


**QUAESTIONES  
PRINCIPALIORES  
POLEMICO-  
DOGMATICO-  
THEOLOGICAE DE...**

Hermannus Josephus : a S. Hilario,  
José Maria Fonseca de Evora







QUÆSTIONES PRINCIPALIORES  
POLEMICO - DOGMATICO - THEOLOGICÆ  
D E  
**SACRA SCRIPTURA**  
E T  
**TRADITIONIBUS,**

DUABUS PARTIBUS COMPREHENSÆ.

QUIBUS

ECCLESIÆ ROMANO - CATHOLICÆ DOCTRINÆ

DOGMATA DEFENDUNTUR:

HÆRETICORUM ERRORES, ET EFFUGIA  
REFELLUNTUR.

AD USUM, ET COMMODUM

THEOLOGICÆ POLEMICO - DOGMATICÆ

AUDITORUM COLLECTÆ, ET IN ORDINE M  
REDACTÆ

AB ADM. REV. AC EXIMIO

**P. HERMANNO JOSEPHO A S. HILARIO,**

S. ORDINIS BREMITARUM DISCALCEAT. S. P. AUGUSTINI SS. THEOLOGICÆ,  
ET SS. CANONUM LECTORE; ALMÆ PROVINCIÆ GERMANO - BOEMICÆ DEFINI-  
TORE. AC PROVINCIALE EMERITO, CEL. ISSIMI AC REVERENDISSIMI PRIN-  
CIPIS EPISCOPI LABACENSIS CONSISTORIALE ASSESSORE, CONVENTUS LABA-  
CENSIS AD S. JOSEPHUM ACTUALI PRIORE, ET CONCIONATORE  
GERMANICO.

CUM FACULTATE SUPERIORUM.

---

L A B A C I,

TYPIS JOANNIS FRIDERICI EGER, INCLV.T.  
PROV. CARNIOL. TYPOGRAPHI.

CIP. 19CC. LXVI.



REVERENDISSIMO, EXIMIO, AC  
RELIGIOSISSIMO,  
P.P. PROSPERO â S.M. MONICA  
S. ORD. FRATRUM EREM. DISCALC. S.P. AUGUST.  
DE ALMA PROVINCIA MESSANENSI  
SS. THEOLOGICÆ LECTORI, DEFINITORI,  
AC PROVINCIALI EMERITO,  
ACTUALI CONGREGATIONIS ITALIÆ ET GERMANIÆ  
V. G E N E R A L I  
PATRI, AC SUPERIORI VENERANDISSIMO  
ADMODUM REVERENDIS EXIMIIS,  
IN CHRISTO RELIGIOSISSIMIS  
DEFINITORII GENERALIS PATRIBUS

A. R. P. FABIO, â Ss. Annunciata de Alma Provincia Mediolanensi Ss. Theol. Lectori, ac Priori emerito, actuali Procuratori Generali.

A. R. P. MAURO, â S. Josepho de Alma Provincia Ferrariensi, Ss. Theol. Lectori, ac Priori emerito, Actuali Definitori Generali Primo.

A. R. P. ANGELICO â S. Agnete, de Alma Provincia Romana, Ss. Theol. Lectori, Priori, ac Provinciali emerito, Actuali Definitori Generali Secundo.

A. R. P.

A. R. P. AUGUSTINO â S. Januario, de Alma Provincia Neapolitana, Ss. Theol. Lectori, ac Priori emerito Actuali Definitori Generali Tertio.

A. R. P. HYACINTHO â B.V. Dolorosa, de Alma Provincia Genuensi, Ss. Theol. Lectori, Priori emerito, Actuali Definitori Generali Quarto.

A. R. P. MARIANO â Ss. Sacramento, de Alma Provincia Panormitana, Ss. Theol. Lectori emerito, Actuali Visitatori Generali Primo.

A. R. P. MARTINO â S. Catharina, de Alma Provincia Germano - Boëmica, Ss. Theol. Lectori, Priori emerito, Actuali Visitatori Generali Secundo.

A. R. P. JOANNI VINCENTIO â S. Victoria, de Alma Provincia Pedemontana, Ss. Theol. Lectori emerito, Actuali Secretario Generali Definitoriali.

D. D. D.

REVE

REVERENDISSIME, EXIMIE, AC  
RELIGIOSISSIME  
P. V. GENERALIS  
PATER, AC SUPERIOR VENERANDISSIME:  
AD MODUM REVERENDI,  
EXIMII IN CHRISTO RELIGIOSISSIMI  
PATRES DEFINITORII GENERALIS:



*Cum non aliud hujus operis, quod Venerandi usurpatis manibus, sit argumenti genus, quam quo Vestra REVERENDISSIMI PATRES præclara indoles voluptuose adeo reficitur, necessum erat, Laborem meum Vestro REVERENDISSIMO Sacrare NOMINI.*

*En! quod cernitis, Sacrum est, Dogma est Polemica adornatum methodo, eruditae oblectans aures, pias baudquaquam offendens, utrasque deliciis profundens ingeniosis, atque vel inde aptum, ut REVERENDISSIMIS VESTRIS gloriatur Auspiciis.*

*TE enim (ut à Capite ordiar) REVERENDISSIME P. V. GENERALIS non nisi Sacris, quis ignorat, delectari institutis? nonnisi doctis inbiare pagellis? bis TE immorari, bis TE pasci, Ipse fateris, qui studio incredibili in iisdem volvendis teneris; unde illustre hoc de Doctrina*

*Erina ac Eruditione TUA testimonium universum Sacrum nostrum pervadit Ordinem, cui singularis plane TUA VIRTUS haud vulgarem simul præstat Decorem. Hinc eruditus omnium, Ipsiusque de Doctrina, ac VIRTUTE TUA sensus se continere non potuit, quin TIBI supremas Sacri Ordinis deferret Tiaras. TE anxio jam-jam conamine expectavere Honores Totius Ordinis, qui illis in Provincia TUA maturesceres per omnes gradus: præstolari jam nequiverè satis, ne eriperè Eisdem: hinc TE ex asse fecere SUUM, quem suprema insignivèrè Dignitate, Suo TE non amplius dimissuri è sinu.*

*Nimirum ipsa ancipiti multumolvebatur animo Gloria, quem è Sacro, Sapientissimoque Confessu Primis inauguraret Palmis: dum totam sese VIRIS & Doctrina, & Pietate Illustrissimis persentisceret circumamictam, TE tamen solum ( Propitiis fatis ) tot Sacris Verticibus quasi Lauream imponere decrevit, Virtute id ei suadente, ipsa quoque Sapientia Genium, Ingeniumque TUUM demirante.*

*In TE quippe legere licet cunctis ( legi & ego coram in Capitulo Generali existens ) selecta omnia, quæ in Superiore & Capite Dignissimo desiderantur effulgere. Sedet TUA ad Clavum voluntas, cui à Consiliis intellectus, ab Imperiis Clementia, à Moribus modestia, à Colloquiis Doctrina. Surgis in Celsissimos Montes & profundissimas deprimeris in Valles; tota id TUÆ mentis perorat compages. Montes dixero, altissimos Supremæ Dignitatis Fasces: Valles invenio, dum Te subditorum pedibus humilitate coram Deo substratum intelligo. In TE Uno Refor-*



*Reformata Augustiniana Eremus, quem sequatur, habet: qui TE Ipsum Eidem bonorum Operum præbes Exemplum, Virtute Sane, ac Dignitate Altissimus, nec tamen exinde elatus, quem semper timida pulsât cogitatio mentis, Deo TE pro eadem redditurum esse rationem.*

*En prodigium in miraculo! En Idæam Patris perfectissimam, ac speculum ab unoquoque ritè usurpandum! quod id indolis habet, ut nemo videat sincere in eo, quin claudat sinistrum, cum, quid videatur sinistre, non reperiatur in eo.*

*At ne vanus jam absens hujus, qua TE celebro, Famæ existam Testis, VOS REVERENDISSIMOS æque ac Sapientissimos appello PATRES, quorum Gremiis se supremum reclinat Caput, illisque dulciter acquiescit; Quorum Sapientia, Consilio, Auctoritate, Prudentia illa rerum gerendarum quasi anima Gubernat, arduis negotiis implicatus excelsa Religionis sustinet Munia, quæ non unius Herculis labor sunt; Quorum favore ornantur, foventur literarum studia; Quibus insita in Literas, & literarum studiosos animi propensio, quæ ita in vobis elucet, ut ad hanc virtutem nati esse videamini: huc enim Vestra Consilia tendunt, huc cogitationes Vestræ, ut sub Auspiciis Vestris amæniores floreant Musæ, scientes, Majus esse eruditionem promovere, quam habere, in aliis fovere, quam in se admirari. VOS inquam appello PATRES REVERENDISSIMI, qui una mecum Superiorem Amantissimum, & Caput reveremini Dignissimum: Eum Eidem deferre bonorem præsentem, quem me absentem delaturum facile imaginamini: nam quodcumque gratum, quod*

quodcunque obsequiis plenum Ratiocinio Vestro potestis assequi, illud à me quoque Patri huic super Astra vebendo exhiberi velle, cogitate, illud simul mente retinentes, quod oculis obversatur Vestris: nimirum Pagina præsens, quæ publicam hodie accepit lucem, à Vobis emendicat splendorem, benignum anbelat obtutum, Vestro sese subdit iudicio probandam. Si probatis? Sapientibus placuisse, sat est; Vestro amplissimo Patrocinio adversus vitilitigatorum proterviam defensa erit. Hæc libasse mihi sufficiat, ne blandiri iis videar, aut assentari, quos admiratio mea laudari jubet.

Hoc tamen etiam atque etiam rogo & obtestor VOS VIRI REVERENDISSIMI, ne dextera manu tradita, sinistra accipiat, sed imitemini Deos, qui magis sæpe placantur pauperiorum Salsa mola, quam ditiorum oblata becatombe. Quod si, ut minime dubito, obtinero, lætabundus mihi hunc ipse quasi triumphum nunc cano:

Sunt Mæcenates, nec deerunt Flacce Marones. Bene Valete PATRES REVERENDISSIMI, DIU uti MERITI: PIE uti SOLITI Ecclesiæ, Sacræ Religionis nostræ Augustiniano - Discalceatæ: DIGNI, quos neque senium senes faciat, nec naturæ lex vita destituat, nisi meliorem Deus apparasset: ut fine nullo Vester in me definiatur affectus, qui ultra incognitos æternitatis limites Vester perenno

CLIENTUM INFIMUS

P. F. HERMANNUS JOSEPHUS à S. HILARIO

P. t. PRIOR.

# PROLOQUIUM

## LECTOREM<sup>A D</sup> BENEVOOLUM.

**A**limpidissimum Sapientiae fontem, quem tuis praesento obtutibus, propera amice Lector, ut ex eo Sitibundi instar Cervi Saluberrimae Theologiae Dogmaticae fluente cum gaudio haurias Tibi haud parum profutura. His refrigeratus atque confortatus ut miles generosus pro Ecclesia DEI Militante certaturus in arenam descende; inclinata Adversariorum acie Victoriā reportabis, spondeo.

En hoc Saeculo ii vivimus, ut praestigiosa Hæresis (cujus vivacissimum prototypum daemonium meridianum est) spurio mentitæ veritatis splendore incautas excæcet mentes, atque pervertat: dum corrupta, infectaque Evangelicæ veritatis Dogmata ignavis propinare mentibus non veretur: totque sibi devinctos numerat, quot fideles intuetur assecclas. Lugubre sane spectaculum, madentibus pupillis, lacrymabilique voce deplorandum.

Ast suo semper stare pede fixam Ecclesiam Catholicam, fortissime contra quosvis Hæreticorum errores sua vera propugnantem Dogmata, contra quosvis Heterodoxorum insultus Authoritatis, & rationum momentis inconcusas roborantem veritates, tot ac tanti in lucem editi testantur libri Dogmatici; verum hi mole sua aut empti, aut lectu difficiles cum sint, quæstiones præsentis de sacra Scriptura, & Traditionibus ex iis Collectas, & ad ordinem redactas Tibi subjicio Lector Benevole ad Tuum faciliorem usum, & commodum.

Jam Davidem æmulare, hæc, quas tuæ porrigo dexteræ, quasi Theologiae Dogmaticæ fundam arripe, haud difficile Goliathæo fastu tumens Hæresum superbiam suo in capite feries, prostrabisque.

Ridebo aliorum obtreptantium Zoilorum tela in me tanquam furtivum ex aliena messe collectorem vibrantia: quæ eo minus feriunt, quo longe jam antea fuerant prævisa; alto enim jam dudum hæret animo consuetum D. Hermetis adagium: *Nullam Constitutionem, seu Scripturam tam sanam esse, quam Nasutuli criticare non velint.* Fateor has quæstiones proprii Conceptus non esse partus, proinde pace mea furtum dixerint, conatum tamen damnare non poterunt, quo plurima in diversis Authoribus hinc inde dispersa in unum si non ingeniosa, sat tamen laboriosa investigatione congesti. Tu Amice Lector humanius ages, & dum Te totum sublimi hoc occupaveris studio, certe ut fortis armatus præsentia custodies, & defendes folia.

V A L E.

INTRO.





# INTRODUCTIO

AD

## THEOLOGIAM

### POLEMICO - DOGMATICAM.

---

**A**Ntequam ad ipsas Quæstiones Polemico - Dogmaticas proponendas, statuendas, & propugnandas procedamus, aliqua ipsam Theologiam Polemico - Dogmaticam concernentia prælibare necessum est; quod tribus sequentibus Paragraphis per quæstiunculas præstabimus. In 1mo. Naturam Theologiæ Polemico - Dogmaticæ dilucidabimus. In 2do. Naturam Hæresis explicabimus. In 3tio. Præcipuos Hæresiarchas, eorumque errores post Christum secundum ordinem sæculorum numerabimus, ut sciat Theologus Polemico-Dogmaticus quibuscum, contra quos, & circa quam materiam sibi agendum sit: atque positiones Catholicas probandas, contrariasque impugnandas habeat. Sit igitur

#### § I.

#### De Natura Theologiæ Polemico - Dogmaticæ.

**Q**Uæritur 1. Quid sit Theologia Polemica? **R.** Theologia Polemica est *sermo de Deo rebusque Divinis, seu Divinitus revelatis belligerans, sive controvertens*: nam Theologia juxta nominis ectypon ex voculis *Deus*, & *sermo* derivatur: & *ly Polemica*  
a apud

apud Grammaticos idem significat, quod *ly Bellica*, seu *militaris*: & ita Belli - Dux nominatur *Polemarchus*: adeoque Theologia controversistica, ac Theologia Dogmatica sunt synonyma quasi, ut hic loquimur.

Quæritur 2. Quodnam sit objectum Theologiæ Polemicæ?  
R. Objectum *formale quod adæquatum* Theologiæ Polemicæ *ut Theologiæ* præcise, est Deus prout virtualiter revelatus, ita ut Deitas sit *ratio formalis quæ*: revelatio verò virtualis sit *ratio formalis sub qua*: ut cum D. Thoma 1. p. q. 1. a 7. aliisque Thomistis docuimus in Prolegomenis Theologiæ.

Ref. 2. Objectum Theologiæ Polemicæ qua talis, seu *qua Polemicæ*, est vera fides objectiva (id est dogmata fidei, seu res divinitus revelatæ, quæ per formatum fidei actum creditæ dominantur *fides*) prout docenda, roboranda, & defendenda; & sic objectum habitus Theologiæ Polemicæ differt ab objecto habitus fidei, quæ res revelatas immediatè attingit prout credendas. Nam tota Theologia Polemica versatur circa veram fidem *prout docendam*, ostendendo videlicet quid tanquam divinitus revelatum credi debeat; *prout roborandam* firmis argumentis in fidelibus ex S. Scriptura, & Ss Patribus, ex traditione & Conciliis; ac *prout defendendam* contra infideles & Hæreticos, eorum solvendo objectiones.

Quæritur 3. Ex quibus principiis hæc Theologia Polemico - Dogmatica in suis controversiis dirimendis sua depromat argumenta? R. Ex Autoritate & Ratione, ita tamen ut Autoritate tanquam proprio utatur principio, quam ratio velut pedissequa sequitur, & in suum obsequium adsciscit: innititur siquidem hæc Theologia potissimum fidei, quæ nisi ab Autoritate proficiscatur, non modo fides esse, sed ne intelligi quidem potest? nam fides juxta Apostolum ad Heb. c. 11. est *argumentum rerum non apparentium*: & in hoc discriminatur hæc Theologia ab aliis scientiis naturalibus, quæ primario innituntur rationi, secundario solum Autoritati.

Quæ-

Quæritur 4. Quænam sit Authoritas , cui Theologia Polemico Dogmatica innititur ? R. Eam esse multiplicem. 1. Autoritatem S. Scripturæ, seu Verbum Dei scriptum, & à Deo nobis revelatum: origo ergo ejusdem est Divina: veritas ejus & Authoritas est fundata in veritate & Autoritate ipsius Dei loquentis, falli & fallere nescii. 2. Autoritatem Traditionum, seu Verbum Dei non scriptum, sed Traditum: plurima siquidem occurrunt credenda & observanda, licet nec digito Dei in tabulis Mosaicis scripta, nec Prophetarum in V. T. nec N. sacris commentariis consignata reperiantur: adeoque ex hac Autoritate argumenta præsertim adversus falsa Hæresum dogmata petere, necessarium est Theologo Polemico Dogmatico; quamvis omnes Hæretici Traditiones repudient, solaque Scriptura pro fidei regula utantur, seu potius abutantur. Sic jam Sadducæi sprete omni Traditione soli Moyſis Legi scriptæ adhærebant: sic Ariani vocem *Homuſion* in solis quærebant S. litteris, cumque non invenirent, Filium Patri esse consubſtantialem in Divinis negabant; sic Semi-Ariani vocem *coeſſentialem* in S. Codice non repertam, pari cum Arianis ausu rejecerunt: sic Neſtoriani negantes B. Virginem Deiparam vocem *Deotbocom* velut à S. litteris alienam expunxerunt: sic Eutyches duas in Christo naturas sociare recusavit, quia in Scriptura de duabus naturis nulla fit mentio: Sic Wicleſſitæ ubique ſpârſerunt: *Quidquid Papa & Cardinales ex Scriptura deducunt, credendum, quidquid ultra præſumpſerint, contemnendum ut hæreticum*: Sic Pelagiani clamabant: *Credamus, quod legimus, & quod non legimus, nefas credamus aſtruere*. Sic Lutherus, ſic omnes alii Hæretici in traditiones debachati ſunt: ſed de his plura in parte II. 3. Autoritatem Eccleſiæ: Scriptura ſiquidem Sacra & Traditio etſi maximæ ſint Authoritatis, admittunt velut in conſortium Authoritatem quoque Eccleſiæ, cujus eſt de utriuſque tum genuina conditione, tum ſenſu legitimo judicare, ac ſententiam ferre, qui ſint libri Canonici, qui ſpurii ſeu apocryphi; unicum interim ſufficiat S. P. Auguſtini eſſatum lib. Cont. Epiſt. fundam. c. 5.

*Ego Evangelio non crederem, nisi me Ecclesiæ Catholicæ commoveret auctoritas.* 4. Auctoritatem Pontificis. 5. Auctoritatem Conciliorum, præsertim Generalium. 6. Auctoritatem Ss. Patrum 7. Auctoritatem Theologorum Scholasticorum, quibus adjungendi juris Pontificii periti. 8. Rationem naturalem. 9. Auctoritatem Philosophorum. 10. Auctoritatem historiæ humanæ per Autores fide dignos scriptæ, non superstitiose, sed gravi fundamento traditæ.

Ex his recensitis septem priores sunt principia intrinseca, & propria Theologiæ Dogmaticæ: ex quibus necessario, & efficaciter concludit: tres posteriores sunt principia extrinseca Theologiæ Dogmaticæ: ex quibus solum probabiliter concludit.

Quæritur 5. An Theologia Polemica sit scientia? R. Cum Theologia Polemica eadem specie sit cum Theologia Speculativa, sicut hæc propriè scientia est, ita & illa. Hinc de Theologia dicit S. P. Augustinus lib. XIV. de Trinit cap. 1. *Huius scientiæ attribuitur illud tantummodo, quo fides saluberrima gignitur, nutritur, defenditur, roboratur.* Item cit. loc. dum S. Pater illa Apost. 1. Corinth. c. 12. v. 8. verba: *alii datur sermo scientiæ, explicat, prosequitur: qua scientia non pollent fideles plurimi, quamvis polleant ipsa fide plurimum. Aliud est enim scire tantummodo, quid homo credere debeat propter adipiscendam vitam beatam, quæ non nisi æterna est; aliud autem scire, quemadmodum hoc ipsum & piis opituletur, & contra impios defendatur; quam proprio appellare vocabulo scientiam videtur Apostolus.* Hæc autem scientia non est alia, quam Theologia Polemica.

Quæritur 6. An usus Dialecticæ, seu Philosophica, aut Scholastica methodus Theologiæ Polemicæ sit utilis, & necessarius? R. Affirmative. Nam Theologus Polemicus debet incredulos, contradictores arguere, versutias sermonum, & sophismata argumentorum detegere, & dissolvere: interrogantibus de his, quæ profiteamur, congruam veramque rationem reddere: atqui hæc omnia suppeditat ars Dialectica, Scholastica methodus: ergo. maj. constat ex S. Scriptura, Apostolus Paulus

Paulus siquidem in Epist. ad Titum c. 1. v. 11. affirmat opus esse, ut Ecclesiarum Rectores fidelem amplectantur sermonem, ut exhortari possint, & eos, qui contradicunt, arguere, quoniam *multi sunt docentes, quæ non oportet*. D. Petrus Epist. 1. c. 3. v. 15. vult nos paratos esse *ad satisfaciendum omni poscenti rationem de ea, quæ est in nobis spe*: nimirum Apologiam exhibere, si quis à nobis causam proposcerit Religionis. Debemus etiam juxta monitum sapientis c. 8. v. 8. *scire versutias sermonum, & dissolutiones argumentorum*. S. P. Augustinus lib. 2. de doct. Christ. c. 31. ait: *Disputationis disciplina ad omnia genera questionum, quæ in literis sanctis sunt, penetranda & dissolvenda plurimum valet*. Idem habet 1. 1. c. 13. Contra Cresconicum Grammaticum. S. Clemens Alexandrinus in 6. Strom. scribit: *Sepimentum est Dialectica, ut ne à Sophistis veritas conculcetur*. Ergo ars Dialecticæ, seu ars disputandi est pedissequa Theologiæ Polemicæ. Sixtus V. in Bulla, in qua D. Bonaventuram Ecclesiæ Doctoribus connumerat, ait: *Hujus tam salutis scientiæ cognitio, & exercitatio semper certe maximum Ecclesiæ adjumentum asserere potuit, sive ad Scripturas ipsas vere & sane intelligendas, & interpretandas; sive ad Patres securius & utilius perlegendos, sive ad varios errores & hæreses Detegendas, & refellendas* - - *Quanto igitur magis illi, id est Hæretici, banc munitionissimam Scholasticæ Theologiæ arcem oppugnare, & revertere conantur, tanto magis nos decet hoc invictum fidei propugnaculum defendere, & hæreditatem Patrum nostrorum conservare & tueri*.

Quæritur 7. An etiam naturalis Philosophia utilis sit Theologiæ Polemicæ? R. Plurimum: nam Christus, Apostoli, & Ss. PP. sæpe sæpius veritatem Philosophica, naturalique ratione firmarunt: sic Christus Matth. 22. c. 20. v. ex imagine numismatis intulit Cæsari solvendum esse tributum. S. Paulus in medio Areopagi ex ipsa Aræ inscriptione occasionem arripuit nuntiandi Evangelium. S. Gregorius Thaumaturgus eruditum de Anima conscripsit volumen solis Philosophicis argumentis compactum. S. P. Augustinus lib. 19. de Civit. Dei c. 4. Contra Julianum, ex morte hujusque vitæ miseriis demonstrat originale peccatum ab



**Adæ Posteris contrahi.** Et ratio est: quia Theologus Polemicus frequenter occurrentia hæc vocabula: generatio, procellio, hypostasis, libertas, natura &c. usurpare debet ratiocinando: atqui horum vocabulorum notionem & idæam suppeditat Philosophia naturalis: ergo. Interim non debet Theologus Polemicus naturali solummodo duci Philosophia, sed subnixus revelationibus divinis debet illam in obsequium fidei captivare. Ex his

Infertur: Theologiam Polemicam maximè necessariam esse in Ecclesia Dei: cum per hanc aptissime convincantur Sectarii: efficaciter enerventur Hæreticorum errores, instruantur in fide populi.

Contra hanc Theologiam Polemicam uno quasi agmine insurgunt Hæretici, eamque variis contumeliis ac dictæis afficiunt. Wicleffus in articulis à Constantiensi Synodo damnatis asseruit, Universitates, & studia Theologorum, quorum Gymnasia castra Cainitica nuncupabat, eo modo Ecclesiæ prodesse, *sicut prodest Diabolus*. Lutherus lib. 2. de abroganda Missa S. Thomam ob Theologiam methodicam, qualis etiam est Polemica, ore blasphemio nominat *ptialam iræ Dei*. Chemnitius vero eandem Theologiam vocat *negotium perambulans in tenebris*. Calvinus in suis institutionibus ait: *Tota Papatus Theologia immane est chaos, & horribilis labyrinthus, quia neglecto Christo sibi insanis & ventosis speculationibus indulget*. Philippus Melancthon in sua Apologia dicit, *Lutetiæ Parisiorum natam esse prophanam Scholasticen, eaque admissa obscuratum Evangelium, ac fidem extinctam*. Sectarii Wittenbergenfes, ut ex Surio in Appendice ad Nacleri Chronicon observat Gammachæus anno 1520. libros Theologicos feretro instar funeris inclusos per mediam Urbis plateam portarunt sequentibus Ministris, officiumque Defunctorum per ludibrium canentibus, ac tandem eos in ardentem rogam injecerunt. Unde tantum in Theologiam odium? nisi inde, quia Sectarii sciunt, suas pseudo doctrinas per eam in fumum redigi: sic traditur Bucerum dixisse: *Tolle Thomam, & dissipabo Ecclesiam.* Sunt

Sunt autem etiam præter Hæreticos Viri Catholici, qui in Scholasticam methodum summo feruntur odio, & in subtiles ac accutas declamant disputationes: non alia ratione, quam quia experimentalī Philosophiæ operam impensius navantes remotiora à sensibus vix delibarent, ac solum Sermonis, verborumque fucum ubique expetunt. Hi audiant monitum Clementis Alexandrini in 1. Stromateon: *neque probandum esse librorum apparatus, in quo plura sunt condimenta, quam quæ parata sunt ad alendum, neque Scitum esse sermonis usum, qui oblectandis potius, quam juvandis Auditoribus servit.* - - Contra hanc ergo nostram Theologiam Polemico - Dogmaticam.

Opponunt AA. I. Isaïæ c. 54. v. 13. dicitur: *Ponam universos filios tuos doctos à Domino*, seu ut Joan. c. 6. v. 45. habetur *docibiles Dei.* Item Jeremiæ c. 31. v. 34. dicitur: *non docebit ultra vir proximum suum.* Ergo Theologia Polemica non est necessaria in Ecclesia.

II. Theologia Polemica est posterior fide: ergo non est necessaria ad generandam fidem. ant. prob. Theologia Polemica nascitur ex fide: ergo.

III. In Ecclesia datur Christi Vicarius potens omnia authoritativo judicio definire, refutare &c. Ergo in Ecclesia non est opus discursibus & Theologia. ant. est juxta Catholicos certum.

IV. Philosophia, humanaque scientia à S. Scriptura est nobis interdicta: Ergo non tantum non est utilis, sed etiam nociva ad Theologiam Polemicam. ant. prob. 1. Ecclesiastes c. 1. v. 13. dicit: *Et proposui in animo meo quærere, & investigare sapienter de omnibus, quæ fiunt sub sole.* Hanc occupationem pessimam dedit Deus filiis hominum: ergo. 2. Apost. ad Coloss. c. 11. v. 8. ait: *Videte ne quis vos decipiat per Philosophiam & inanem fallaciam secundum traditionem hominum, secundum elementa mundi, & non secundum Christum:* ergo. 3. Idem Apost. 1. ad Corinth. c. 2. v. 4. dicit: *sermo meus & prædicatio mea non in persuasibilibus humane*

*manæ sapientiæ verbis, sed in ostensione spiritus & virtutis: ut fides vestra non sit in sapientia hominum, sed in virtute Dei: ergo.*

V. S. Basilii lib. 1. contra Eunomium ita in illum invehitur: *Hæc illum ex mundi sapientia garrere, à qua in præceps abreptus hanc sermonis novitatem ingressus est, non est difficile monstrare. Aristotelis enim sunt, ut qui legerunt, testari possent, sermones illi de habitu, & privatione in libro ejus, qui inscribitur Catégoriarum: similia habet S. Greg. Niss. lib. 2. Contra eundem Eunomium & S. Cyrillus Alex. Thes. 11. Ergo.*

VI. Tertullianus lib. de Præscript. c. 7. Dialecticam appellat coactam, duram, versipellem, molestam, Operariam Contentionum, ac artificem destruendi: & demum esse ab Ecclesia eliminandam his verbis: *Quid ergo Athenis & Hierosolymis? quid Academiæ & Ecclesiæ? quid hæreticis & Christianis? nostra institutio de porticu Salomonis, qui & ipse tradiderat Dominum in simplicitate quærendum. Viderint, qui Stoicum & Dialecticum Christianismum protulerunt. Item in lib. de anima non semel clamat, auferendam esse argumentationem: Ergo.*

VII. Leo Magnus Serm. 5. de Nativ. ait: *Abigatur terrenarum Caligo rationum, & ab illuminatæ fidei oculo mundanæ sapientiæ fumus abscedat: ergo.*

VIII. Si Dialectica ac Philosophia Theologo Polemico aliquid afferret utilitatis, has disciplinas docuisset Spiritus S. Apostolos, atque his disciplinis Concilia ac Patres insurgentes depulissent hæreses: atqui hoc non: ergo. min. prob. Apostoli veri fuerunt Theologi: atqui hi neque Dialecticam nec Philosophiam habuerunt, licet juxta verbum Christi illos Spiritus S. omnem docuerit veritatem: ergo.

IX. S. P. August. disputans contra insaniam Manichæorum gloriantium se initium, finem, & mundi causam adinvenisse, lib. 1. de Actis Contra Felicem c. 10. ait: *Non legitur in Evangelio Dominum dixisse, mitto vobis Paraclitum, qui vos doceat de cursu solis, & lunæ. Christianos enim nos facere volebat non Mathematicos. Sufficit autem ut homines de iis rebus, quantum in Schola didi-*



*didicerunt, noverint propter humanos usus. Ergo humanæ rationis doctrina Theologo nihil prodest.*

X. Socrates lib. 1. Histor. c. 8. narrat, quod cum in Nicæna Synodo Dialectici quidam argumentantes omnia turbarent, ita illos simplex quidam Laicus compescuit: *Christus & Apostoli non artem nobis Dialecticam, nec inanem versutiam tradiderunt, sed apertam & simplicem sententiam, quæ fide bonisque actibus custoditur: quibus dictis omnes assenserunt, & Dialectici quieverunt: ergo.*

XI. Authoritate & experimento compertum est, hæreses à Philosophia promanasse: ergo. ant. prob. 1. ab Authoritate. Tertullianus lib. de anima c. 3. Philosophos appellat *Patriarchas Hæreticorum.* Et c. 7. de Præscript. hoc discrimen statuit Hæreticos inter & Catholicos, quod hi in simplicitate Dominum quærant, illi autem inferant *Aristotelem, qui illis Dialecticam instituit.* S. Ambros. lib. 1. de fid. c. 3. & in Psal. 118. scribit: *Arianos in perfidiam ruisse, quod elegerint disputationum tendiculas secundum Dialecticæ disciplinam.* Et S. P. August. Serm. 81. de Temp. afferit: *Ciniphes, qui tertia plaga vexarunt Ægyptios, designare Philosophos simul & Hæreticos, qui verborum stimulis animas terebrant.* Ergo Authoritate compertum est, hæreses à Philosophia promanasse. ant. prob. 2. ab experimento. Aristotelicis inventis ad exitium ac pestem abusi sunt Arius, Eunomius, Aëtius, ut scribunt Basilius, Gregorius Niss. & alii. Unde narratur in Gestis Philippi. Sub illo Aristotelis Metaphysicam anno 1204. Parisiis damnatam esse. &c. Ergo.

XII. Scholastica Theologia teste Tertull. de Præscript. c. 8. nec ad credendum, nec ad fidem formandam exigitur, dicit enim loc. cit. *Nobis curiositate opus non est post Christum Jesum, nec inquisitione post Evangelium: ergo.*

XIII. Perfectius est simpliciter credere, quam veritatem inquirere, testante Cassiano Serm. de fid. *Quid mihi quærere, quomodo verum sit, quod Deus dixit, cum dubitare non debeam, quia*  
b verum

*verum sit , quod Deus dixit ? Ergo Scholastica Theologia minuit perfectionem fidei.*

XIV. Scholastica Theologia tollit meritum fidei, ut docet S. Greg. hom. 26. *Fides amittit meritum, ubi ratio præbet experimentum.* Ergo.

XV. Scholastici ipsi nunquam inter se conveniunt, sed de rebus etiam ad fidem pertinentibus scandalosa contentione differunt: ergo. Item in pluribus metaphysicis quæstionibus tempus conterunt, quæ apud priscos Ecclesiæ Patres fuerunt prorsus inauditæ. Tandem quid sibi volunt illa turpia ac barbara vocabula: *Entitas, quidditas, opus operatum, materialiter, formaliter &c.* Ergo.

XVI. Tria sunt genera argumentorum, nempe *demonstrativum, probabile, ac Sophisticum*: atqui nullum ex his in explicandis rebus divinis afferre potest utilitatem: ergo. min. prob. Non *demonstrativum*: quia demonstratio propositiones exigit claras ac certas conclusionem notiores, & vel inductione, vel sensibus, vel experientia manifestas: quarum nulla in fidei Dogmatibus potest occurrere, eo quod ad contemplandum difficiles sint rerum Divinarum rationes. Non *probabile*: quia hoc non generat certitudinem, sed opinionem. Non *Sophisticum*, quia hoc potius generat errorem, & fallaciam: ergo.

XVII. Scholastica Theologia est recens in Ecclesia, à tempore nempe D. Joannis Damasc. Ergo.

R. ad I. neg. conseq. Alias Christus, ut scribit Apost. ad Ephes. c. 4. v. 11. & seq. non *dedisset Pastores, & Doctores*? Unde in oppositis textibus adductis sensus est, quod Deus homines amplius non doceat per Prophetas, sed per filium suum & ab hoc datos pastores, & Doctores. Præterea dictorum textuum sensus est, quod Deus se ipso per interiorum gratiæ influxum mentes nostras illustret, & moveat voluntates: nisi enim Deus aures cordis nostri interius aperiat, externa verbi prædicatio non proficit, sed potius evanescit, & ad salutem inutilis red-  
ditur.

Ad

Ad II. dist. ant. Theologia, quæ est in docente, est posterior fide ipsius docentis, conc. ant. est posterior fide ipsius docendi, seu in fide instruendi, neg. ant. & sub eadem dist. conseq.

Dices 1. Primus fidelis acquisivit fidem Theologia adhuc in nullo præsupposita: ergo Theologia unius non est necessaria ad generandam fidem alterius. R. dist. ant. Theologia creata adhuc in nullo præsupposita Conc. ant. increata, neg. ant. & conseq. Unde salvatur, Theologiam semper fuisse priorem fide, quæ in primo fidei fuit genita docente supremo Theologo, scilicet Deo.

Dices 2. Ut quis instruatur in iis, quæ ad habitum primorum principiorum spectant, non requiritur nova scientia præsupposita, sed sufficit, ut quis ea simpliciter proponat: ergo etiam ut quis instruatur in iis, quæ ad fidei habitum spectant, nulla prærequiritur scientia Theologica. R. Neg. conseq. Disp. est: quia prima principia ex se ipsis sunt evidentiæ: ergo bene ex sola terminorum explicatione cognoscuntur, & percipiuntur. At vero ea quæ ad habitum fidei spectant, nempe, Articuli credendi, cum sint obscurissima, nec credantur, nisi quia Deus revelavit, necessario indigent suæ credibilitatis evidentiâ, quam sola facit Theologia.

Dices 3. In veteri lege ad evidentiam credibilitatis faciendam non erat quædam necessaria Theologia: Ergo nec in nova lege. ant. prob. In veteri lege non erat ulla Theologia: ergo. R. Neg. utrumque ant. In omni namque Ecclesiæ statu tam antiquo quam novo necessaria fuit Theologia: cum Ecclesia in nullo statu potuerit recte subsistere absque legitimo Controversiarum Judice, qui doctrinas de fide tenendas proponat, explicet, atque prava dogmata indies scaturientia damnet: qualis Judex absque Theologia id præstare nequit.

Ad III. Dist. ant. potens respectu fidelium, perfecteque subditorum, conc. ant. potens respectu hæreticorum, & rebellantium, neg. ant. & dist. conseq. ergo non est opus discursibus respectu hæreticorum & rebellantium, neg. conseq. respectu fide-

lium , & perfecte obedientium, subdist. pro illis ut fidelibus manentibus conc. seq. pro illis ut potentibus in errorem cadere, neg. conseq. Cum *oporteat esse hæreses*, oportet etiam præter Christi Vicarium esse & alios hæresum confutatores, qui *in doctrina sana* valeant errantes *redarguere*, quod sine discursibus Theologicis fieri non potest.

Ad IV. Neg. ant. Sacræ enim literæ volunt Ecclesiæ Doctorem idoneum esse ad hortandum, docendum, corripiendum, & ad distinguendas versutias sermonum: solum monent, ne ad humanarum rationum momenta fides potissimum exigatur. Ad Eccles. R. Illum de felicitate hujus vitæ verba facere, & ex tali inquisitione evincere, quod omnia vana sint, ut in nullo hujus sæculi bono vera felicitas rationalis creaturæ consistere possit, atque beatitudo, & hoc contra eos, qui hanc in bono creato collocarunt. Paulus autem ibi hortatur fideles, ut caveant ab Epicureorum secta, quæ per inanes fallacias Dei providentiam evertens, plurimos à vera Religione retrahebat. Explofit ergo Paulus illam tantum Philosophiam, quæ adhæret falsis improborum hominum traditionibus. Vel dicatur, Paulum solum vulgari populo vetare Philosophiam, non item Pastoribus & Doctoribus: nam neque nos dicimus necessariam esse Theologiam omnibus Ecclesiæ membris, sed tantum aliquibus.

Ad V. S. Basilium & Cæteros Patres reprobare usum Philosophiæ tanquam pestilentem ac noxium, quando sola credendi ratio in humana ratiocinatione concluditur, & dum ad circumveniendos rudes callida & versuta Dialectica usurpatur: uti fecere Ariani (contra quos ibi Basilius loquitur & Greg. Niss.) qui per ideam humanæ generationis Divinum verbum creatum esse temere contendebant: non vero reprobare usum disciplinarum mundanarum, dum præsidio sunt Religioni, ei que tanquam ancillæ deserviunt.

Ad VI. Tertullianum Philosophos carpere: qui *gloriæ solius & eloquentiæ libidinosi*, si quid in S. Scripturis offenderunt digestum, pro instituto curiositatis ad propria verterunt: qui affectant  
veri-

veritatem, & affectando corrumpunt, qui de una via obliquos multos & inextricabiles tramites sciderunt: tales enim fuisse illius ætatis Philosophos affirmat Tertullianus c. 47. Apologetici, qui non Philosophi, sed Philodoxi nuncupandi sunt. Minime vero Tertullianum improbasse usum verum Philosophiæ. In Lib. vero de anima loquitur contra asserentes, eam esse mortalem, pertinaciter innixos solis sensuum animadversionibus, quibus observabant homines nasci, crescere, & mortalia appetere ad vitam alimenta.

Ad VII. S. Leonem in eodem sensu, ut supra ad V. dictum est, loqui nempe illuminatæ fidei oculum non esse fumo mundanæ sapientiæ obfusandum.

Ad VIII. Exemplum Apostolorum in nobis non valere: nam illis omnia Spiritus S. suggerebat, ita ut nec Grammatici nec eloquentes ex tempore ad Philosophos ac Tyrannos revincendos sapientissime loquerentur; nos autem sumus hoc peculiari munere destituti.

Ad IX. Jure S. P. Augustinum reprehendere Felicem Manichæum: cum nihil pertineat ad fidem Catholicam esse Mathematicum, & Syderum cursum metiri.

Ad X. Socratem loqui de quibusdam Dialecticis, qui licet Scripturarum auctoritatem reciperent, spretis Divinis literis solis paralogismis conabantur adstruere Filii Divinitatem.

Ad XI. dist. ant. hæreses à Philosophia dimanasse, cum aliqui sacras literas ac traditiones arte Dialectica tentarunt convellere, atque credendi regulam in sola humana sapientia constituerunt, conc. ant. cum posita in Divinis revelationibus ratione credendi, humanis disciplinis usi sunt in fidei præsidium & fulcimentum, neg. ant. & conseq. Per quod patet responsio ad probas. Imo Hæretici abutuntur etiam S. Scriptura, ut scribit S. Hilarius ad Constantium Augustum: *Nemo hæreticorum est, qui se non secundum Scripturas prædicare ea, quibus blasphematur, mentiatur: & tamen S. Scripturam esse noxiam, vel inutilem nullus dixerit.*



Ad XII. dist. ant. Scholastica Theologia nec ad credendum, nec ad fidem formandam exigitur, id est, ad nova dogmata invenienda, conc. ant. id est, ad defensionem, & explicationem eorum dogmatum, quæ sunt tradita, neg. ant. & conseq. solutio ex terminis claret.

Ad XIII. dist. ant. Perfectius est simpliciter credere, quam veritatem inquirere: libidine rixandi, & contentionis prurigine, conc. ant. ad ipsius fidei præsidium, & proximorum instructionem, neg. ant. & conseq. Et ita explicatur Cassianus.

Ad XIV. Expl. S. Greg. sub dist. Fides amittit meritum, ubi ratio præbet experimentum, & ubi hoc experimentum quaeritur motivo incredulitatis, ut in Thoma Apostolo, qui noluit credere Christum resurrexisse, antequam vulnera ejus palpasset, & de quo loc. cit. loquitur Gregorius, conc. ubi ratio præbet experimentum ad revincendam obsecratorum perfidiam, neg.

Ad XV. dist. ant. Scholastici ipsi inter se non conveniunt in iis, quæ ad fidem spectant, & certa nituntur revelatione, neg. ant. in iis, quæ extra fidem sunt, conc. ant. & neg. conseq. Duo quæstionum genera sunt distinguenda; unum earum, quæ dogmata fidei comprehendunt, v. g. Deum esse unum & trinum, Christum esse incarnatum &c. alterum earum, quæ in utramque partem absque fidei discrimine defendi possunt, v. g. an attributa Divina distinguantur virtualiter, aut formaliter ex natura rei: an si Adam non peccasset, Christus venisset, &c. In prioribus omnes Scholastici penitus conveniunt, secus in posterioribus. Ad alterum &. Illas quæstiones ab ipsis Hæreticis in Theologiam fuisse inductas: ut patet de Arianis Divinitatem Verbi trecentis Sophisticis argumentis impugnantibus, ex quo Theologi impulsæ sunt, ut subtilius & accuratius de Divina verbi generatione inquirerent. Idem patet de Sabellianis, Nestorianis, Græcis Spiritus S. à Filio originem negantibus, ex quo in Theologiam disputationes de Relationibus, de Personarum notione, de principii unitate &c. inductæ sunt. Imo patet in ipsis Calvinianis præsentiam Corporis Christi in Eucharistia

ristia negantibus, ex idea corporis loci extensione circumscripti impossibilitatem illius præsentiæ in cælo & in terra demonstrantibus : ex quo Theologos provocarunt ad investigandam corporum & specierum naturam, &c. Ad additum R. Per illa vocabula tolli sermonis æquivocationem, & planiori via dissidia dissolvi, licet obscuram reddant latinitatem.

Ad XVI. neg. min. ad prob. R. Veram demonstrationem exigere quidem principia, quæ sint conclusione notiora, sed opus non esse, ut hæc notitia manifestata sit sensu atque experimento, sed sufficere si principia nota sint lumine superioris scientiæ, ut in Prolegomenis Theologiæ Scholasticæ dictum est; Theologiæ proinde principia fide ac revelatione nota sunt, ideoque demonstrationes inde deduci possunt. Argumenta vero probabilia proferuntur ad solam veritatis ampliorem confirmationem. Sophismaticis argumentis Theologus non utitur ad implicandos simpliciores, sed ad ipsos Sophistas compescendos.

Ad XVII. Scholasticam Theologiam esse recentem in Ecclesia quoad methodum, ac partium dispositionem, quæ etiam pro Doctorum arbitrio potest etiamnum immutari: non vero quoad ejus dogmata & usum.

## §. II.

### De Natura Hæreticarum Propositionum.

**Q**Uæritur 1. Quid sit Dogma fidei? R. Est illud, quod in Verbo Dei scripto vel tradito revelatum, & nobis ut tale ab Ecclesia Catholica propositum est.

Quæritur 2. An idem sit, *esse aliquid de fide quoad se* : & *esse de fide quoad nos*, seu à nobis fide Divina credendum? R. Negative: ad hoc enim ut aliquid sit de fide *quoad se*, sufficit, quod à Deo revelatum sit: ut vero aliquid sit de fide *quoad nos*, non sufficit, quod revera in se à Deo revelatum sit, sed debet insuper nobis infallibiliter constare hoc à Deo revelatum esse, idque

idque ex eo, quia non omnis leviter audienda est revelatio, nec omni spiritui credendum, ut S. Joan. in Epist. i. c. 7. v. 1. nos monet. Ergo id Ecclesia nobis debet proponere hoc revelatum, quia sola in discernendo Dei Verbo sive scripto sive tradito infallibilis est.

Quæritur 3. Quid requiratur ad hoc, ut aliquid sit de fide Divina Catholica? R. Hæc duo: 1. ut illud Verbo Dei scripto vel tradito revelatum sit. 2. Ut illud ab Ecclesia qua tale propositum sit: ratio est: quia fides ex auditu, auditus per verbum Dei, verbum Dei autem per Ecclesiam illud proponentem, discernentem, & custodientem habetur.

Quæritur 4. An ea, quæ novimus per quascunque revelationes Viris Sanctis quibuscunque post Apostolorum tempora factas, sint de fide Divina? R. Negative: ratio est: quia nihil est de fide Divina, nisi in Verbo Dei scripto vel tradito revelatum sit: Verbum autem Dei sive scriptum sive traditum per solos habemus Prophetas, Apostolos, & Scriptores Sacros: ergo quidquid post horum tempora quibuscunque revelatum est, fide Divina tenendum non est.

Quæritur 5. An Conclusio Theologica qua talis sit de fide? R. Conclusionem Theologicam qua talem sive ex una, sive ex duabus præmissis de fide illatam, non esse *formaliter & immediate* de fide, sed solum *virtualiter & mediate*. Ratio est, quia nulla conclusio qua talis formaliter est revelata, sed ex revelatis tantum illata: unde etiam nec conclusio qua talis ab Ecclesia unquam fide Divina credenda nobis proponitur, sed in quantum veritatem à Deo nobis revelatam in se complectitur: ergo

Contra hæc dices I. Ad hoc, ut aliquid sit de fide Divina, satis est, quod sit in Verbo Dei scripto vel tradito revelatum: ergo non est necesse, ut qua tale ab Ecclesia proponatur.

II: Qui veritatem aliquam in Scriptura vel traditione revelatam negaret, eo ipso esset Hæreticus: ergo ad hoc, ut aliquid sit fide Divina tenendum, non requiritur Ecclesiæ propositio, sed sufficit id ipsum revelatum esse.



III. Ecclesia non potest facere de fide, quod de fide non est: ergo esse aliquid fide Divina tenendum non ab Ecclesia, sed unice à revelatione Divina dependet.

IV. Si ad hoc, ut aliquid sit de fide Divina quoad nos, requiratur propositio Ecclesiæ, sequitur Hæreticum esse non illum, qui resistit Verbo Dei revelato, sed illum, qui resistit iudicio Ecclesiæ; atqui hoc dici nequit: ergo.

V. Si ad hoc, ut aliquid sit fide Divina à nobis tenendum, requiratur auctoritas Ecclesiæ proponentis nobis, illud esse de fide Divina credendum, committitur circulus vitiosus: tali enim casu foret credendum Scripturæ, propter Ecclesiam, & rursus Ecclesiæ propter Scripturam: ergo.

Ref. Ad I. Dist. ant. Ad hoc, ut aliquid sit de fide Divina *quoad se*, satis est &c. conc. ant. Ad hoc, ut aliquid sit de fide Divina *quoad nos*, omnes sub pæna Hæreseos ad credendum obligante, satis est &c. neg. ant. & conseq. Ut enim aliquid sit de fide Catholica omnes sub pæna Hæreseos ad credendum obligante, debet certo & infallibiliter constare, quod sit in Verbo Dei scripto vel tradito revelatum: hoc autem non conitat, nisi sit ab Ecclesia Universalis propositum.

Ad II. Dist. ant. Eo ipso esset Hæreticus, si haberet animum permanendi in suo errore, etsi Ecclesia Catholica contrarium illi manifestaret, conc. ant. absque tali animo neg. ant. & conseq. Ita D. Th. 2. 2. q. 11. a. 2. ad 3. citans D. P. August. Epist. 16. R. 2. neg. ant. Nam S. P. August. lib. contra Epist. fundamenti c. 5. ait: *Non crederem Evangelio: nisi Ecclesiæ Catholicæ me commoveret auctoritas.* Ideo enim credimus Evangeliiis Matthæi, Marci, Lucæ, Joannis: & econtra non credimus Evangeliiis, quæ sub nomine Petri, Andreæ, Bartholomæi, & Thomæ circumferuntur, quia ad prima suscipienda nos movet Ecclesiæ proponentis auctoritas, non vero ad altera.

Ad III. Conc. ant. intellectum, quod Ecclesia nil possit facere de fide *quoad se*, licet facere possit *quoad nos*, quatenus aliquid nobis ut revelatum proponit, & de fide esse declarat:

c

&

& dist. conseq. Ergo esse aliquid de fide Divina tenendum non dependet ab Ecclesia tanquam à causa efficiente, ut sit de fide, conc. conseq. tanquam à signo ostendente, & declarante illud esse de fide, & pro tali habendum, neg. conseq.

Ad IV. Neg. maj. quia qui resistit judicio Ecclesiæ, resistit etiam Verbo Dei Ecclesiæ judicium commendanti, & dicenti Matth. c. 18. v. 17. *Qui Ecclesiam non audierit, sit tibi sicut Ethnicus, & Publicanus.*

Ad V. Neg. ant. Non est circulus vitiosus, dum unum per alterum probatur sub diversa ratione, & in diverso genere causæ, ut in præsentī contingit, ubi Ecclesiam probamus per Scripturam tanquam per certam fidei regulam, sed inanimatam: Scripturam vero per Ecclesiam tanquam per fidei regulam animatam, & per modum Judicis viva voce proponentem, & judicantem. Plura de hoc dicentur in subsequētibz Quæst.

Quæritur 6. Quid sit proprie Dogma Catholicum? R. esse doctrinam, quam Catholica Ecclesia omnibus fidelibus cum obligatione credendi proponit: hujusmodi Dogmata sunt, quod Deus sit unus in essentia & non multiplex contra Polytheos. Quod sit Trinus in Personis realiter distinctis contra Sabellianos. Quod Christus sit Patris æterni filius, eique consubstantialis contra Arianos. Quod Spiritus S. sit Deus contra Macedonium. Quod duæ in Christo sint naturæ contra Eutychianos: duæ voluntates contra Monothelitas: una tantum Persona, eaque Divina contra Nestorianos: &c.

Quæritur 7. An Dogma proprie Catholicum sit fidei Dogma? R. Affirmative: cum omnibus fidelibus Ecclesia illud cum obligatione credendi proponat, & refractarios ejusdem ut Hæreticos ejiciat.

Quæritur 8. Quid sit Articulus fidei? R. Esse principalem fidei veritatem omnibus ad explicite credendum propositam, & distinctam continentem difficultatem. Notanter dicitur: *distinctam continentem difficultatem* ad credendum: cum enim de ratione objecti fidei sit obscuritas, & inevidentia, etiam de ejus  
ratione

ratione est, quod sit creditu difficile: jam si sint quidem objecta diversa, non tamen plures sed unam eandemque difficultatem afferant, talia objecta non plures constituunt articulos, sed ad eundem fidei articulum revocantur: v. g. Passio, Mors, Sepultura Christi tria sunt quidem fidei objecta, cum tamen non tres sed unam difficultatem afferant, etiam unum tantum, non plures articulos constituunt. Econtra Resurrectio Christi cum specialem ac distinctam afferat difficultatem, distinctum etiam articulum fidei constituit. Sacramentum vero Eucharistiæ et si specialem difficultatem afferat, non tamen specialem articulum constituit: ait enim D. Th. 2 2. q. 1. a 8. ad 6. *In Sacramento Eucharistiæ duo possunt considerari, unum scilicet, quod sacram est, & hoc habet eandem rationem cum aliis effectibus gratiæ sanctificantis. Aliud est, quod miraculose ibi corpus Christi continetur, & sic concluditur sub Omnipotentia, sicut & omnia alia miracula Omnipotentia attribuantur.*

Quæritur 9. An omne fidei Dogma sit Articulus fidei? R. Solas veritates fidei principales constituere specialem articulum, quales sunt, quæ in duabus illis generalibus classibus continentur, & novam rationem non vili, ut ait: D. Th. seu novam difficultatem ad credendum ab omnibus explicite afferunt, & non alias.

Dices: Nulla est fidei veritas, quam quisque fidelis non teneatur credere sub pæna Hæresis: ergo nulla est fidei veritas, quæ non sit Articulus fidei. R. Conc. ant. neg. conseq. quia ut veritas fidei sit Articulus fidei, satis non est, ut fidelis quisque teneatur eam credere sub pæna Heresis, sed requiritur ulterius, ut sit veritas fidei principalis explicite credenda, & specialem in credendo afferens difficultatem, nec etiam ad aliquem specialem articulum fidei reduci possit, quod non convenit omnibus veritatibus fidei.

Quæritur 10. Quænam doctrina pro fidei Catholicæ nociva habenda sit? R. Omnem illam, quam ut nocivam notat, & reprobatur. Nam Ecclesia non minus infallibilis esse debet in rejicienda doctrina non sana, & fidei Catholicæ quomodocunque ad-

versa, quam in admittenda doctrina sana & fidei consona: ergo sicut non est tenendum aliquid esse revelatum, & de fide, donec Ecclesia ut tale illud proposuerit, ita neque tenendum aliquid esse contrarium fidei, donec Ecclesia sua censura illud non notaverit.

Quæritur 11. Quid sit Censura, qua Ecclesia propositionem fidei Catholicæ adversam notat? R. Esse notam, qua Ecclesia præhabito riguroso examine propositiones aliquas tanquam non continentes doctrinam sanam, & fidem Catholicam lædentes declarat.

Quæritur 12. Quotuplici modo pravæ propositiones notari solent ab Ecclesia? R. Duplici modo: 1. In particulari 2. In globo. In particulari notantur, quando Ecclesia eas proscribendo singulis suas notas tribuit, v. g. eam esse Hæreticam, hanc erroneam &c. Et circa has omnes conveniunt, quod decreta, in quibus propositiones proscribuntur, & cuilibet specialis aliqua censura affigitur, sunt judicia Ecclesiæ dogmatica, ipsumque mentis obsequium à fidelibus exigant. In globo notantur, quam omnes simul proscribuntur tanquam falsæ, perniciosæ, scandalosæ, hæreticæ, &c. respectivæ, non determinando in particulari propositiones, quæ una vel pluribus ex his notis censoriis debeant affici.

Quæritur 13. An modus, quo Ecclesia plures in globo damnat propositiones heterodoxas, sit legitimus, & ab omnibus approbandus? R. Affirmative. Ratio est: quia illud est legitimum, & ab omnibus probandum, quod sua praxi probat, & semper probavit Ecclesia, juxta illud S. P. August. Epistol. 118. *Insolentissimæ insanix est disputare, an faciendum sit, quod tota per orbem frequentat Ecclesia.* Atqui Ecclesia sua praxi probat, & semper probavit modum plures in globo damnandi propositiones: ergo. min. prob. Concil. Constant. Sess. 8. libros Joannis Wicleffi, & 45. articulos ex ipsis extractos ita in globo damnavit, non determinando quænam nota singulis articulis debeat applicari, ut ex verbis ipsius Concilii loc. cit. patet. Leo X.  
Bulla

Bulla quæ incipit, *Exurge Domine*, Lutheri 34. articulos pro-  
scripsit in globo. S. Pius V. damnavit in globo 79. proposi-  
tiones Michaelis Baji. Alexander VII. & Innocentius XI. in glo-  
bo damnavit 68. propositiones Michaelis Molinos: hoc ipsum  
egit Alexander VIII. decreto dato die 7. Decembris 1690. Cle-  
mens XI. Bulla quæ incipit, *Unigenitus*, damnavit in globo 101.  
propositiones ex libro reflexionum moralium excerptas. Ergo.

Dices 1. Damnatio propositionum incerta non est legitima:  
sed damnatio propositionum in globo est incerta: ergo. R. Neg.  
min. In hujusmodi enim censuris illud certum est, de quo Ec-  
clesia nos certos vult fieri, nempe nullam esse è damnatis pro-  
positionibus, quæ non mereatur aliquam saltem è censuræ no-  
tis, quæ in decreto exprimuntur, & vice versa, nullam esse  
in decreto notam, quæ non possit in aliquas è damnatis propo-  
sitionibus cadere, & consequenter *omnes damnatas propositiones es-  
se pernitiosas si tradantur, periculosas si credantur*, ut Cardinalis Pa-  
lavicinus respondit Fra-Paulo objicienti Leonis X. censuram,  
quæ Lutheri articulos in globo solum damnabat, insufficientem  
fuisse.

Dices 2. Per censuram in globo factam non potest certo  
sciri, quænam nota singulis conveniat propositionibus: ergo  
illa censura est incerta. R. Trans. ant. neg. conseq. Certum quip-  
pe est, nullam esse propositionem, quæ non mereatur unam sal-  
tem è notis in decreto memoratis, quæcunque tandem ea sit:  
illud porro sufficit, nec in aliud ferri debet mentis obsequium Ec-  
clesiæ auctoritati debitum, uti declarat Martinus V. in formula  
interrogatoria, quam sacro approbante Constantiensi concilio  
digessit. Deinde Doctores possunt scire, quænam nota singulis  
propositionibus conveniat.

Dices 3. Post famosas quinque propositiones Jansenianas  
damnatas in globo ab Urbano VIII. octoginta quinque Galliæ  
Episcopi novum postularunt ab Innocentio X. iudicium, quo  
distincte pronuntiaret, quid de qualibet propositione sentien-  
dum sit? ergo judicarunt censuram in globo latam esse insuffi-



cientem. R. neg. conseq. Non enim novum iudicium requirunt Gallicani Præsules, quod Bullam Urbani VIII. insufficientem esse putaverint, sed illud unice postularunt, ut per illud frangeretur omnino pertinacia eorum, qui pravo affecti animo inde sumebant inobedientiæ prætextum, quod nulli propositioni certa censuræ nota fuisset inusta.

Quæritur 14. An Ecclesiæ decreta, quibus plures in globo propositiones Damnantur, sint vere dogmatica, ipsumque mentis obsequium à fidelibus exigant? R. Affirmative. Ratio est ex Concilio Constantiensi, quod damnans in globo 45. articulos Wicleffi expresse ait, se id facere, *ut de medio Ecclesiæ spurcissima illius doctrina eliminetur.* Atqui decretum, quo de medio Ecclesiæ spurcissima aliqua eliminatur doctrina, vere dogmaticum est, internumque mentis obsequium exigit: ergo.

Dices 1. Decretum dogmaticum habet pro objecto pravam doctrinam, quam proscribit: atqui pleræque censuræ, quæ feruntur in globo, non habent pro objecto pravam doctrinam: ergo non sunt decreta dogmatica. R. Conc. maj. neg. min. Nam propositiones censoria nota non inuruntur, nisi sacræ doctrinæ aliquatenus adversentur: nec ad id necesse est, *ut illæ propositiones certo Dei verbis repugnent, sed satis est, si aut gravia extent indicia hujus repugnantiae, eo quod adversentur seu communi Scholæ sensui; seu veteribus Ecclesiæ usibus, seu Ss. Patrum auctoritati, aut deprehendantur ut semina operum, quæ officiunt Christianæ reipublicæ, ac proinde mereantur aliquam censuram, quæcumque tandem ea sit;* ait Cardinalis Pallavicinus respondens objectioni factæ à Petro Suavi, seu Fra-Paulo. Unde illæ propositiones sic censuratæ non possunt ab ullo Catholico defendi, sed animo sincero debent rejici, quamdiu & ubi eandem significationem retinebunt.

Dices 2. Censuræ in globo latæ hoc tantum præstant, ut usum prohibeant quarundam propositionum, quas habita ratione circumstantiarum loci vel temporis non expedit enuntiare, licet in se veræ sint, vel etiam in aliis circumstantiis necessaria:

riæ : ergo non habent pro objecto pravam doctrinam. R. negant. Non enim debet confundi simplex prohibitio gratia servandæ pacis facta, cum censura alicujus doctrinæ. Per censuram enim decernitur, doctrinam expressam aliqua propositione esse nocivam, unde ipsum mentis obsequium exigit, & qui eam infringit, violatæ fidei se reum constituit. Econtra simplex prohibitio fit quandoque de libris & opinionibus, quarum occasione in Ecclesia tumultus possent excitari, unde qui eam infringit, inobedientiæ legibus debitæ non tamen violatæ fidei reus efficitur.

Quæritur 15. Quæ sint censuræ, quibus propositiones Heterodoxæ notari solent ab Ecclesia? R. Alias esse *Hæreticas*: alias *Erroneas*: alias *Hæresi proximas*: alias *suspectas de Hæresi*, & *Hæresim sapientes*: alias *Schismaticas*: alias *Seditiosas*: alias *Hæresi aut Schismati faventes*: alias *blasphemæ*: alias *impias*: alias *scandalosæ*: alias *perniciosæ*: alias *captiosæ*: alias *male sonantes*: alias *piarum aurium offensivæ*: alias *temerarias*: alias *falsas*: alias *verbo Dei contrarias*.

*Propositio Hæretica* est ea, quæ formaliter & directe adversatur propositioni explicite, vel implicite revelatæ, cum hac differentia, quod propositio opposita propositioni explicite revelatæ sit hæretica ante Ecclesiæ definitionem: propositio vero opposita propositioni implicite tantum revelatæ non sit hæretica nisi post Ecclesiæ definitionem. Sic hæc Jansenii propositio: *Interiori gratiæ in statu naturæ lapsæ nunquam resistitur*: est hæretica etiam ante Ecclesiæ definitionem, quia contradictorie opponitur huic expresse revelatæ: *Vos semper Spiritui Sancto resistitis*. Hæc vero propositio: *Baptismus datus ab Hæreticis non est validus*: est hæretica sed tantum post expressam Ecclesiæ definitionem; nec enim ante hanc definitionem omnibus Ecclesiis constabat contrariam propositionem in Verbo Dei sive scripto sive tradito implicite contineri.

*Propositio erronea* est ea, quæ opponitur veritati, quam vel universa tenet Ecclesia, quamvis non sit de fide: vel commu-

nis

nis Catholicorum Doctorum sententia mediate revelatam judicat, licet ab Ecclesia id nondum expresse fuerit definitum. Sic hæc propositiones: *Expediit, ut lingua vulgari Sacra celebretur liturgia*: Item *Beata Virgo non est in celum corporaliter assumpta*: sunt erroneæ, quia propositiones contradictoriæ constanter tenentur ab universa Ecclesia. Hæc propositio: *Invalidus est baptismus ab Hæreticis datus*: quæ post Ecclesiæ expressam definitionem est hæretica, ante talem definitionem fuit tantum erronea.

Dices: Propositio erronea est ea, quæ opponitur veritati, quæ deducitur ex una præmissa de fide, & altera evidenter vera: ergo. R. neg. ant. Nam hæc propositio: *Christus non habet humanam voluntatem*: est hæretica, & ut talis damnata contra Monothelitas: ergo non est tantum erronea: & tamen sequitur ex una propositione revelata, nempe *Christus est homo*, & ex altera evidenter vera, nimirum *omnis homo habet humanam voluntatem*: ergo.

*Propositio Hæresi proxima* est ea, quæ maxima cum probabilitate judicatur hæretica: quæ nimirum tantam cum doctrina hæretica connexionem habet, ut à majori & saniori Doctorum Catholicorum parte hæretica censeatur, quamvis aliqui non infimæ notæ Theologi contendunt hanc ipsi notam non esse inurendam. Hæc non videtur distinguere à propositione erronea, ipsi enim tantum deest expressa Ecclesiæ definitio, ut sit hæretica.

*Propositio suspecta de Hæresi* est ea, quæ licet aliquo sensu tolerari possit, & enuntiari, tamen magna cum probabilitate judicatur hæretica.

*Propositio Hæresim sapiens* est ea, quæ majori cum probabilitate, quam suspecta de hæresi, judicatur hæretica. Sic ista propositio: *Christus est creatura, vel Patre minor*: Catholice quidem posset intelligi ratione humanitatis: sed prolata tempore Arianismi etiam ab eo, qui non est de Ariana hæresi suspectus, est *suspecta de hæresi*: prolata vero ab eo, qui de Arianismo suspectus est, *hæresim sapit* Arianam. Sic hæc vox *Christotocos* tempore Nestorianismi erat *suspecta de hæresi*, & prolata ab eo, qui  
lu-



suspectus erat de Nestorianismo, *hæresim sapiebat*; hodie est Catholica, in lytaniis enim dicitur, *Mater Christi*. Itaque, ut propositio dicatur suspecta de hæresi, aut hæresim sapere, in se sola considerari non debet, sed attendenda est circumstantia loci, temporis, & Scriptoris. Hinc propositiones, quæ apud unum authorem sunt orthodoxæ, apud alium, qui eis abutitur, suspectæ sunt de hæresi, vel hæresim sapiunt: sic hæc propositio, *Pater major me est*, in sensu Catholico prolata vera est, in Arii libros transfusa sapiebat hæresim. Sic hæ propositiones Quesnellianæ 13. *Quando Deus vult animam salvam facere, & eam tangit interiori gratiæ suæ manu, nulla voluntas humana ei resistit - - - Omnes, quos Deus vult salvare per Christum, salvantur infallibiliter*: prima fronte videntur similes quibusdam S. P. Augustini & S. Prosperi expressionibus, quæ de voluntate Dei absoluta, quam adversus Pelagianos propugnabant, intelliguntur: verum hæresim sapiunt in ore Quesnelistarum, qui negant Deum sincere velle aliorum quam Prædestinatorum salutem, quod in sensu Janseniano blasphemum, & hæreticum declaravit Ecclesia.

*Propositio Schismatica* est ea, quæ fideles ab obedientia Summo Pontifici, aliisque superioribus Ecclesiasticis debita retrahit. Talis esset propositio illius, qui diceret, summi Pontificis tyranicum esse imperium: talis quoque est propositio eorum, qui docent à Bulla *Unigenitus* licitum esse appellare ad futurum concilium, prout anno 1718. declararunt Episcopi Gallicani circiter 50.

*Propositio Seditiosa* est ea, quæ per se nata est subditos ad rebellionem contra Principes Civiles, vel Rempublicam inducere, eos à debita Principibus obedientia retrahendo: v. g. si quis diceret, Principibus vectigalia non debere: vel eis, aut Magistratibus obtemperandum non esse, quia homines sunt ejusdem cum aliis conditionis.

*Propositio hæresi aut Schismati favens* est ea, qua hæretici, aut Schismatici uti possunt ad suos errores, suamque inobedienti-

d

am

am propugnandam: sic qui doceret, Eucharistiæ Sacramentum solemniter per vias publicas non esse circumferendum: faveret errori Calvinistarum docentium, Christum substantialiter non contineri in Eucharistia. Item qui doceret, Clementem XIII. non esse canonice electum, faveret Schismati, retrahendo fideles ab obedientia legitimo Pontifici debita.

*Propositio blasphemica* est ea, quæ Deo vel sanctis est injuriosa: sic hæc Jansenii propositio: *Aliqua Dei præcepta hominibus justis volentibus & conantibus secundum præsentem, quas habent vires, sunt impossibilia; deest quoque illis gratia, qua possibilia fiant*: est damnata ab Innocentio X. non solum ut hæretica, sed etiam ut blasphemica: reddit quippe Deum injustum legislatorem.

*Propositio impia* est ea, quæ cultum Deo debitum minuere de se nata est: talis est prædicta mox Jansenii propositio: ex eo enim, quod Deus impossibilia homini præcipiat, desitque gratia, qua possibilia fiant, sequitur frustra Deum orandum ad obtinendas gratias ad observanda præcepta necessarias.

*Propositio Scandalosa* est ea, quæ per se nata est proximum inducere ad peccatum, eumque à virtutum exercitio retrahere: v. g. si quis diceret, ex auriculari confessione gravissima sequi incommoda: hæc enim propositio per se retrahit fideles à peccatorum confessione, & per accidens est, si non retrahat.

*Propositio perniciofa* est ea, ex qua facile possunt deduci conclusiones contra fidem, aut bonos mores: ut si quis diceret, Scripturam Sacram indiscriminatum esse legendam, & omnibus tradendam. Ad hanc reducitur propositio *periculosa*.

*Propositio captiosa* est ea, quæ sub pietatis specie venenum obtegens apta est simplicium mentes seducere: talis erat ista Ariarum propositio: Christus est similis Patri: nam prima fronte videtur significare, Christum esse similem in natura, & tamen in auctorum sensu significabat Christum esse similem Patri in potentia ipsi tradita à Patre, non vero in natura.

Pro-

*Propositio male sonans* est ea, quæ licet duplicem habeat sensum, unum bonum, & alium malum, absolute tamen & sine distinctione profertur; sic ista propositio: *Christus est Creatura rationalis*: male sonat, quia videtur negare Divinitatem Christi.

*Propositio piarum aurium offensiva* est ea, quæ aliquid indecorum de Deo, vel Sanctis ejus profert: ut si quis Sanctos rogando, eorum peccata ipsis improperearet; v. g. *S. Paule persecutor Ecclesiæ ora pro nobis*.

*Propositio temeraria*, est ea, quæ absque ullo aut Scripturæ aut traditionis, aut rationis Theologicæ fundamento à communi Theologorum sententia recedit; v. g. si quis diceret, *B. V. Mariam in cælum quoad corpus non fuisse assumptam*.

*Propositio falsa* est ea, quæ factum aliquod, quod ad fidem pertineat, eique nocere possit, veritati contrarium enuntiat; v. g. si quis negaret, quinque famosas propositiones à SS. Pontificibus Clemente X. & Alexandro VII. damnatas, ex libro Janseny fuisse excerptas, propositionem enuntiaret falsam. Dixi quod ad fidem pertineat: nam si talis propositio nullatenus pertineret ad fidem, nec ei foret nociva, non posset ei nota falsitatis theologicæ inuri. Unde opiniones Philosophicæ, licet absurdæ, non debent notari ab Ecclesia, nisi saltem indirecte fidem lædant, quo sensu quædam fuerunt damnatæ à Concilio Lateran. V.

*Propositio Verbo Dei contraria* est ea, quæ contraria est Scripturæ, & traditioni: nec tamen est hæretica, quia illa contrarietas nondum est supremo Ecclesiæ judicio definita.

Quæritur 16. Quid intelligatur per adverbium *respective*, cum in decreto, in quo plures propositiones damnantur, dicitur eas esse *respective* hæreticas, erroneas, temerarias, scandalosas &c.? R. Hanc particulam *respective* significare, nullam esse ex damnatis propositionibus disjunctive, in quam non cadat una saltem ex notis, quæ in condemnationis decreto refe-

runtur ; æqualiter ergo propositiones damnantur, cum in globo damnantur, sed non æquali censura afficiuntur: unde decreto Apostolico sic concepto sufficientem exhibet obedientiam, qui credit nullam esse propositionem damnatam, in quam non cadat una saltem ex censuris, quibus in globo notantur.

### § III.

Enumerantur præcipui Hæresiarchæ juxta ordinem sæculorum.

## SÆCULO I.

**S**imon Magus Gittis Samariæ vico oriundus, a quo & Simoniani, qui, cum repulsam passus fuisset ab Apostolis, quibus pecuniam obtulerat, ut virtutem conferendi Spiritum S. acciperet, totum se magicis artibus dedit, variaque doctrinæ monstra docuit. Commenta, in quæ malitiosus impostor lapsus est, præter Sacrilegam rerum sacrarum nundinationem assignantur sequentia: 1. Se Deum esse profitebatur coelo delapsum, & Helenam Scortum suam suæ mentis primum conceptum esse. 2. Mundum non fuisse à Deo conditum. 3. Non esse in homine liberum arbitrium. 4. Resurrectionem mortuorum pernegabat. 5. Bona opera non esse necessaria: imo ut Eusebius lib. 2. Hist. ait: *Nil tam impurum esse potest, quod flagitiosissima hæc secta non attingat.* Damnatus est à D. Petro Act. 8.

Cerintus, vel Cberintbus ( à quo Cerintbiani vel Merintbiani nomen accepere ) post Simonem Magum Hæresiarcha putatur fuisse primus. Docuit 1. Mundum ab Angelis fuisse factum. 2. Vetus testamentum ad literam esse observandum. 3. Jesum esse purum hominem, eum nondum resurrexisse, sed resurrecturum esse &c. Hos errores D. Paulus damnavit in Epist. ad Galat.

Me-

*Menander*, unus ex præcipuis Simonis Magi discipulis, à quo Menandriani nomen acceperunt: Hic una cum Simonis impietatibus addebat, se esse Salvatorem mundi. Hanc hæresim S. Linus ab Ecclesiæ gremio ejecit. In illum etiam inventus est S. Ignatius Martyr, qui ad Trallenses his verbis scripsit: *Fugite Menandrum, & totam collectionem malignitatis ejus.*

*Ebion*, à quo *Ebionitæ* dicti, docebat, Christum esse purum hominem, & legis mandata more Judaico esse observanda. Hunc S. Lucas apud Ecclesiam Antiochenam damnavit: & adversus Ebionis perversa dogmata S. Joannes suum Evangelium scripsit:

*Nicolaus* unus ex 7. Diaconis, à quo *Nicolaitæ* dicti: quamvis antiquissimi Authores, ut Clemens Alexandrinus, Theodoretus, Eusebius, Ignatius hunc Nicolaum hujus sectæ Authorem negent. Hi docebant 1. Uxores esse communes. 2. Licere vesci Idolothitis. 3. Mundum non esse à Deo factum. Hos damnavit Deus Apoc. c. 2. v. 6. Hos & confutavit S. Joannes Evang. Clemens, Irenæus, Origenes &c.

## S Æ C U L O II.

*Elxai*, sub Trajano Imperatore anno Christi 110. hæreticas excogitavit perversitates: *Helcesetarum* hæreticorum, qui & *Sampsæi* dicti sunt, fons, & origo. Hic docebat: Deum habere mensuram milliariorum 96 in longitudinem, & 24. in latitudinem. Christum esse simplicem creaturam. Spiritum S. esse ejus sororem foemineo sexu præditam &c. Refutatus est ab Origene.

*Gnotistici*, quorum *Carpocrates* fuit Coriphæus, docebant 1. Mundum à Deo non esse factum; 2. Christum merum fuisse hominem ex Josepho & Maria natum. 3. Nihil esse malum natura, sed opinione. 4. Animas in alia subinde immitti corpora, ut amplius peccent. Horum spurcissimam doctrinam



abominati sunt, & refutarunt Irenæus, Clemens Alexand. Epiphanius &c.

*Ophitæ* à Colubro sic dicti docebant, serpentem, à quo Adam & Eva fuerunt decepti, esse Christum, unde habebant verum serpentem, quem nutriebant, & adorabant. Hos expunxerunt Theocritus Chalcedoniæ, & Evander Nicomediæ Episcopi.

*Cainitæ*, qui docebant, Cainum, Judam proditorem, Core, Dathan, & Abiron, imo & Sodomitas Colendos esse. Hos refutat S. Epiphanius Hæres. 38. & Tertullianus.

*Millenarii*, qui docebant electos post extremum judicium per mille annos cum Christo regnatueros in terris, omnibus corporeis voluptatibus indulgentes. Hi à Concil. Trid. sess. 25. & Florent. Sess. ult. rejecti sunt.

*Marcionistæ* à *Marcione*, quem tria principia, boni, justi, & pravi admisisse scribit D. Epiph. Hi ab Origene fuerunt confutati.

*Cataybrijges*, seu *Montanistæ* à Montano, qui se dicebat Paraclitum docebant 1. Secundas nuptias esse Sceleratas. 2. Peccatores non admittebant ad pœnitentiam. 3. Conficiebant Eucharistiam ex farina sanguine infantis anniculi delibuta. Docebant cum Sabellio, in Trinitate unicam esse Personam. Damnati sunt à SS. PP. Zephirino, & Aniceto, ut scribit Tertul. L. contra Psychicos. c. 1.

*Quarto-Decimani*, sic dicti, quod 14. Luna Martii Pascha celebrabant, qualibet septimanæ occurreret die. Damnati sunt à Victore S. P.

*Adamitæ*, sic dicti, quia imitabantur Adami innocentis nuditatem: unde nuptias damnabant, eo quod Adamus non prius, quam dimissus esset de Paradyso, cognoverit uxorem. Hos Polycarpus Presbyter eliminavit.

SÆ

### SÆCULO III.

*Sabelliani* à *Sabellio*, qui unicam in Trinitate Personam admitterebant. Hos damnavit Dositheus Episcopus Seleuciæ.

*Tertullianistæ* à *Tertulliano*, qui sectæ Montani nomen dedit, ac insuper docuit 1. Animas cum corporibus fuisse genitas. 2. Deum esse Corporeum. 3. Animas damnatorum in diabolum converti.

*Origenistæ* ab *Origene*, qui assererat 1. Animas longe ante Corpora fuisse creatas, & in corpora immixtas propter peccata ab ipsis antea commissa. 2. Dæmones & damnatos post mille annos fore beatos. Origenem non solum anno Christi 400. Anastasius Pontifex cum suis scriptis damnavit, verum etiam anno Christi 553. in quinta generali Constantinopolitana Synodo sub Vigilio Papa, & Justiniano Imperatore anathema dicitur Origeni, ac scriptis ejus.

*Pauliani* à *Paulo Samosateno*, docebant Christum esse purum hominem, qui non prius extiterit, quam natus sit de B. V. Maria. Hi deficiebant in forma baptismi. Horum dogmata damnata fuere à Concilio Nicæno I. in quo ejecto Paulianistarum baptismo, ad gremium Ecclesiæ redeuntes jussi sunt vero baptismo insigniri.

*Rebaptizantes*, qui ab Hæreticis baptizatos rebaptizandos docebant. Refutati sunt à Stephano Pontifice.

*Manichæi* à *Mane*, qui 1. negabant Trinitatem. 2. Duo admittebant rerum principia, unum bonum, alterum malum. 3. Negabant Christum vere esse passum, &c. Hos acerrime refutavit præter alios S. P. Augustinus pluribus libris.

*Novatiani* à *Novato*, qui contendebant, semel lapsos nunquam ad pœnitentiam recipiendos: secundasque nuptias tanquam malas damnabant &c. Hanc hæresim refricavit *Meletius*, à quo dicti sunt Meletiani, qui postea cum Arianis sese junxerunt. Novatiani damnati sunt in Concilio Diocesano Carthage.

thaginenſi & Romano ſub Cornelio Pontifice anno Chriſti 253.  
Item Concil. Nicæn. I. anno 325. ſub S. Sylveſtro.

## SÆCULO IV.

*Ariani* ab *Ario* Presbytero ſic dicti, negabant Chriſtum eſſe Patri conſubſtantialem, ac proinde negabant eum eſſe Deum. Damnati ſunt in Concilio Nicæno I.

*Semi-Ariani*, qui negantes Chriſtum eſſe conſubſtantialem Patri, fatebantur eum eſſe ſimilem in natura, quomodo homo ſimilis eſt alteri homini. Horum Principes fuerunt *Aetius*, & *Eunomius*. Docuerunt etiam nullum peccatum quantumvis grave imputari in fide ſua manentibus (quod etiam moderni ſentiunt Lutherani) ſolamque fidem abſque ullo alio bono opere ſufficere ad conſequendam vitam æternam &c. Contra hos veritatis patrocinium ſuſcepit S. Baſilius in libris quinque contra Eunomium. S. Hieron. lib. adverſus Vigilantium &c.

*Apollinaristæ* ab *Apollinare* Juniore dicti, docebant, Verbum Divinum aſſumpſiſſe quidem naturam humanam quoad corpus, ſed ſine anima, cujus vices Verbum Divinum gellit: Verbum Divinum ſic caro factum eſſe, ut penitus in ipſam transmutatum ſit: quemadmodum ex corporibus corpora traducuntur, ita ex animabus animæ, &c. Hos damnavit in Romano Concilio anno 373. Damasus Papa. Et in Synodo Conſtantinopolitana I. anno 381. Contra hos etiam egit S. Athanaſius, Gregorius Nazianzenus, S. Epiphanius Hæres. 77. &c.

*Donatiſtæ* à Donato, qui primum propter Cæcilianum contra ſuam voluntatem ordinatum Eccleſiæ Carthaginenſis Episcopum Schisma fecit, quod in hæreſim verterunt Donatiſtæ docentes 1. Hæreticos iterum baptizandos. 2. Solos, qui remanſerant in parte Donati, eſſe de Eccleſia. 3. Baptiſmum à Chriſto inſtitutum eundem eſſe, quem Joannis. 4. Negabant confirmationis Sacramentum. 5. Monachos & Episcopos, quos Phariſæos

risæos nuncupabant, persequerentur odio, & præprimis Pontificem, cujus sedem cathedram pestilentiae intitulabant &c. Fuerunt damnati à Melchiade Papa.

*Macedoniani* à *Macedonio* Episc. Constantinop. sic dicti docebant, Spiritum Sanctum esse puram creaturam, &c. Damnati sunt à Concil. Constantinop. I.

## SÆCULO V.

*Pelagiani* docebant 1. Peccatum Adami illi soli nocuisse. 2. Nullum in ejus posteritate fuisse peccatum originale. 3. Mandata Dei solis naturæ viribus posse observari, sicque hominem posse justificari sine gratia, &c. damnati sunt ab Innocentio I. & à Concil. Carthaginensi.

*Nestoriani* sic dicti à *Nestorio* Episcopo Constantinop. qui duas in Christo Personas admittens, unam Divinam, alteram humanam, B. Virginem negabat esse *Theotocon*, sed solum *Christocon*, seu Christi genitricem. Damnati sunt in Concil. Ephesino I.

*Eutychiani* sic dicti ab Eutychete Abbate Constantinop. qui, ut contradiceret Nestorio, docuit unam tantum esse naturam in Christo. Damnati sunt in Concil. Chalcedonensi.

## SÆCULO VI.

*Monothelitæ*, qui auctore Cyro Patriarcha Alexandrino, quem secutus est Sergius Constantinopolitanus, unam tantum in Christo voluntatem atque operationem asseriebant: Damnati sunt in Synodo VI.

## SÆCULO VII.

*Machumetismus* auctore *Machumete*, qui in Alcorano sua impia dogmata disseminavit, quorum præcipua capita sunt 1. De-  
e um

um esse corporeum. 2. Unicam in Deo esse Personam. 3. Christum non esse Deum, sed magnum quemdam Prophetam. 4. Cæremonias Mosaicas esse necessarias. 5. Poligamiam esse licitam. 6. Vitam æternam consistere in voluptatibus corporeis &c.

## SÆCULO VIII.

*Iconomacbi*, seu *Iconoclastæ*, qui cultores sacrarum imaginum Idololatria accusabant: unde Leo Isauricus Imperator Iconoclasta edictum proposuit, ut sacræ imagines de templis tollerentur. Damnati sunt in VII. Synodo.

*Albanenses* admittebant 1. Duorum principia, unum bonum, aliud malum. 2. Aliquem ante adventum Christi justum fuisse negabant. 3. Docebant mundum esse æternum. 4. Animas de novo non creari, sed eas de corporibus mortuorum in alia corpora transmigrare. 5. Juramentum nunquam esse licitum. 6. Non extare peccatum originale. 7. Sacramenta à peccatoribus collata nullam vim habere. 8. Confessionem non esse necessariam. 9. Matrimonium esse illicitum. 10. Ab Ecclesia nihil esse possidendum, nisi in communi. 11. Resurrectionem corporum negabant.

*Paulianistæ* à Paulo & Joanne sic dicti, præter Manichæismum, quem profitebantur, contendebant, formam baptismi in his verbis consistere: *Ego sum aqua viva: & Eucharistiæ* in his: *Accipite, manducate, & bibite.*

## SÆCULO IX. & X.

*Gothescalcus* renovavit hæresim prædestinianorum, docendo Deum sine prævisione boni & mali aliquos absolute prædestinasse, alios absolute reprobasse, & consequenter tenebat Christum pro omnibus non fuisse mortuum, nec Deum velle omnium salutem.

*Græci*



*Græci* duce *Photio* Schisma fecerunt , seseque ab Ecclesia Romana dividerunt, & errorem de procellione Spiritus S. à solo Patre spargere cœperunt : qui successu temporis in varias hæreses prolapsi sunt.

## SÆCULO XI.

*Sacramentarii* Berengario Duce, qui docebat primùm Christi corpus non existere in Eucharistia nisi figurate: at cum postea hunc errorem revocasset, docuit substantiam panis remanere cum corpore Christi, additque solos adultos esse baptizandos.

*Simoniaci*, qui venditionem rerum sacrarum esse licitam prædicabant.

## SÆCULO XII.

*Petrobustiani* à Petro de Bruiis Antuerpiensi docebant 1. Baptismum non esse parvulis necessarium. 2. Christum non esse in Eucharistia. 3. Preces pro mortuis esse inutiles.

*Valdenses*, seu *Pauperes de Lugduno* sic dicti à *Valdone* Lugdunensi, qui sua bona pauperibus erogaverat, omnia pene Ecclesiæ Romanæ dogmata rejiciebant. Hos damnavit Lucius Papa

*Albigenses*, qui tempore Innocentii III. non solum concionibus, sed etiam armis Ecclesiam diu vexaverunt, duo admittebant principia: animarum transmigrationem asserebant: resurrectionem corporum negabant: Baptismum & Eucharistiam rejiciebant, &c.

## SÆCULO XIII.

*Flagellantes* docebant, non posse salvari eos, qui se non baptizarent in proprio sanguine per flagellationem extracto: fla-

gellationem esse martyrio præstantiorem: Sacramenta, & cætera bona opera esse inutilia; purgatorium in altera vita non esse.

## SÆCULO XIV.

*Fraticelli* auctore quodam *Hermano* docebant, 1. S. Pontificem in Ecclesia nullam auctoritatem habere. 2. Se solos constituere veram Christi Ecclesiam. 3. Se nullius obedientiæ subditos esse. 4. Copulam cum omnibus mulieribus exercebant, puerosque ex illis procreatos occidebant. Hos damnavit Bonifacius VIII.

*Begardi* & *Beguinae*, qui auctore *Bogonato* monasticam vitam sine votis profitebantur, docebant 1. Hominem posse in hac vita fieri impeccabilem. 2. Hominem statum impeccabilitatis adeptum non amplius teneri ad jejunia, & orationem, & in gratia crescere non posse &c. Damnati sunt in Concil. Vienenfi.

## SÆCULO XV.

*Wicleffita* à Joanne Wicleff, cujus articuli 45. erronei damnati sunt à Concil. Constantiensi, in quibus inter alia multa assererat 1. Substantiam panis & vini manere in Sacramento Altaris. 2. Deum debere obedire diabolo. 3. Homini contrito Confessionem exteriorem esse superfluum. 4. Bonorum temporalium possessionem esse Ecclesiasticis illicitam. 5. Religiosos non esse de Religione Christiana. 6. Omnes Religiosos mendicantes esse hæreticos. 7. Romanam Ecclesiam esse Synagogam Sathanæ. 8. Papam non esse Vicarium Christi, nec Petri successorem &c.

*Hussita* à Joanne *Huss* dicti, omnes fere Wicleffi errores propugnabant, quibus sequentes addebant 1. Ecclesiam solis prædestinatis constare. 2. Romanum Pontificem non esse caput Ecclesiæ Catholicæ. 3. Obedientiam Ecclesiasticam non esse fun-

fundatam in Scriptura. 4. Nullum esse Dominum temporalem, nullum Prælatum, nullum Episcopum, dum sunt in peccato mortali &c. Damnati sunt in Concil. Constantiensi.

## SÆCULO XVI.

*Lutherani* à Martino *Lutbero*, qui primum in Indulgentias tanquam in sacrilegos abusus insurrexit: deinde Summorum Pontificum, Conciliorum, & Patrum auctoritatem impugnavit, Sacramenta mutilavit, liberum arbitrium negavit, Sacrificia & preces pro mortuis rejecit &c.

Hæresis Lutherana in varias sectas dividitur, quarum præcipua est *Anabaptistarum*, qui ultra errores Lutheri docent, parvulos non esse baptizandos, & si baptizati fuerint, iterum esse baptizandos, dum ad annos discretionis pervenerint.

*Syncretistæ*, seu *Indifferentistæ* sibi persuadentium, quod in omnibus, vel saltem pluribus Religionibus obtineri possit salus æterna.

*Syncretistæ*, seu *Indifferentistæ* sunt duplicis generis, *laxiores* videlicet & *strictiores*. *Laxiores* sive *Libertini* sunt, qui aditum ad cælum nimis laxant dicendo, quemlibet in sua Secta vel Religione posse salvari, modo in unum Deum credat, eumque juxta suæ Religionis leges colat, sive dein Judæus, sive Turca, sive Christianus sit. *Strictiores* sunt, qui aditum salutis ad solos Christianos stringunt dicendo, quemlibet Christianum in sua Religione posse salutem consequi, si juxta ejusdem Religionis leges vivat, sive postea Catholicus, sive Lutheranus, sive Calvinista (quæ tres Religiones in Romano Imperio maxime vigent, & tolerantur) sive Zwinglianus, Anabaptista fuerit.

*Syncretistæ strictiores* in tres species subdividuntur. *Prima* est eorum, qui putant ad fidem salvificam sufficere, si quis Christianus in Deum unum, Trinitatem Personarum Divinarum,

rum, & in Christum modo quodam confuso credat, ac simul ita honeste vivat, ut nihil opprobrii ei objici queat. Cæterum inquit, omne potest in suo statu relinqui, quipquid *Papa* vel *Lutherus*, aut *Calvinus* prætendit: nec erit necessarium in specie & explicitè credere præcipua de Christo myſteria v. g. paſſionem, reſurrectionem, duplicem naturam in una Perſona hypotaſtice unitam &c. Et talium *Syncretiſtarum* ſpecies jam eſt exigua invenire. *Secunda* eſt illorum, qui docent, ad ſalutem requiri, & ſufficere, ſi quis baptizatus credat præcipua Chriſtianæ Religionis myſteria, ſeu præcipuos articulos tum de Chriſto, tum etiam Sſs. Trinitate, quos articulos vocant *fundamentales*, *ſubſtantiales*, *eſſentiales*, & ad ſalutem *neceſſarios*: reliquos autem appellant *adiaphoros*, ſeu *accidentales*, & *arbitrarios*, quos ſcilicet quis pro arbitrio ac libitu ſuo, atque citra ſalutis periculum credere, vel non credere poſſit: imo quos quis ſalvo fidei fundamento non ſolum ignorare, ſed etiam negare valeat: Et horum *Syncretiſtarum* magnus jam eſt numerus: quibus accenſeri poſſunt *Pietiſtæ* circa annum 1686. exorti: qui tamen ſe *geminos Lutheranos* vocant. *Tertia* eſt eorum, quos *Politicos* appellant, qui aliquid Chriſtianæ fidei, Deum & Chriſtum concernens admittunt, cum tamen nec *Lutheranis*, neque *Calviniſtis* actu adhæreant, ſed parati & in procinctu ſtent eam fidem ac Religionem acceptare, quæ iis utiliſſima erit, & fors magnificum matrimonium, pinquem hæreditatem, nobile officium &c. adferret.

*Calviniſtæ* à Joanne *Calvino*, qui errores *Lutheri* refricavit ipſiſque plures alios addidit circa prædeſtinationem, liberum arbitrium, juſtificationem, bona opera, & Miſſæ Sacrificium &c.

*Sociniani* à Fausto *Socino* & *Lælio Socino* ejus Nepote & diſcipulo, univerſam Theologiam corruperunt, imprimis de Sſs. Trinitate, & juſtificatione hominis coram Deo, docentes 1. Chriſtum eſſe purum hominem. 2. Non dari peccatum originale. 3. Nullam futuram corporum reſurrectionem. 4. Euchariftiam

stiam esse meram Cæremoniam in commemorationem mortis Christi institutam &c.

## SÆCULO XVII.

*Janseniani*, qui quinque famosas propositiones ex libro Jansenii extractas à SS. PP. Innocentio X. Alexandro VII. & Clemente IX. damnatas propugnant.

*Quietistæ*, qui Michaelis de Molinos prava dogmata sequuntur: damnati sunt ab Innocentio XI.

*Deistæ*, qui asserunt, Deum existere credendum esse, & nihil aliud: qui ad rationis naturalis normam Christianæ Religionis mysteria ita commensurant, ut quidquid rationis captum superat, rejiciant.

*Quenelistæ* à quodam *Quenello*, qui scripsit librum reflexionum moralium cum notis in novum testamentum, in quo continentur una supra centum propositiones damnatæ à Clemente XI. in Constit. *Unigenitus*, edita 8. septemb. 1713. quæ propositiones renovant hæreses Jansenii, Lutheri, Calvinii &c. ita ut *Quenelismus* participet cum multis præcedentibus sæculorum hæresibus.

Pro Complemento quæres 1. Unde istud Prædicatum, *Protestantes*? R. Inde: cum anno 1529. in Comitibus Spirensibus cautum fuisset, ut usque post bellum contra Turcas in Ungariam irruentes decretum (ad quod à Principibus, & statibus Imperii auxilia quoque poscebantur) & usque ad futuri Concilii Generalis definitionem nihil in Religionis negotio mutaretur, contra id sex Principes, qui Luthero adhærebant, protestati sunt. Unde prædicatum hoc *Protestantium* spectata ejus origine solis *Lutheranis* est proprium. Id tamen solet communiter jam etiam tribui *Calvinistis*.

Quæres 2. Quo jure Lutherani se nuncupent *Evangelicos*? R. quod nullo: nam 1. sunt Ecclesiæ ejusque capiti rebelles: quid



quid autem de his dicit Evangelium? hoc: *Si Ecclesiam non audierit, sit tibi sicut Ethnicus & Publicanus*, Matth. c. 18. v. 17. 2. quia bonis operibus denegant mercedem, quam tamen iis Evangelium Matth. 10. v. 41. & alibi tribuit. &c. Solent se etiam appellare *Confessionistas* ab Augustana Confessione.

Quæres 3. Quo jure *Calvinistæ* se vocitent *Reformatos*? R. quod etiam nullo: nam Ecclesia Romano-Catholica, utpote quæ nunquam in ullo fidei articulo potest deficere, aut in errorem labi, non est reformabilis &c.

Quæres 4. Quinam dicantur *Athei*? R. Illi impii, qui Deum esse negant: tales Psalmista Psal. 13. v. 1. proclamat insipientes.

Quæres 5. Quinam vocentur *Pagani*? R. Illi, qui Christi fidem nec in figura (in quo a Judæis differunt) nec in re admittunt. Quales etiam sunt Machumetani, quia etiam non credunt in Christum tanquam in Redemptorem.



PARS



PARS PRIMA  
DE  
SCRIPTURA SACRA  
QUÆSTIO PRIMA  
DE

*Essentia & Existentia S. Scripturæ.*

---



**N**otandum 1. Juxta Catholicos quatuor esse fidei Catholicæ Regulas, duas inanimatas, videlicet *Scripturam & traditionem*: & duas animatas, videlicet *Ecclesiam*, & *Concilium Generale*: quibus si cum plerisque addatur *sedes Apostolica*, animatæ regulæ adnumerabitur. In præsentī parte Solum agemus de prima Fidei Catholicæ Regula, nempe Sacra Scriptura.

Notandum 2. Scripturam Divinam variis insigniri nominibus  
1. Appellatur *Scriptura*, & hoc per excellentiam quamdam, vel quia Sola digna est, ut legatur, & scribatur: vel quia Sola Spiritu Dei conscripta est. Dicitur *Sacra*: & hoc vel ab Authore velut causa efficiente: primarius enim Sacrorum librorum Author est Deus ipse, cūjus instrumenta fuere homines, quo-

A

rum

rum manu & opera principalis Divina causa uti dignata est, ut essent velut Amanuenses Spiritus S. juxta illud 2. Petri. cap. 1. v. 21. *Non enim voluntate humana allata est aliquando Propbetia, sed Spiritu S. inspirati locuti sunt Dei homines.* Dicitur *Sacra* ex fine, qui est vel ultimus, & est Dei gloria & salus nostra: vel non ultimus seu propinquus, & est major Dei cognitio & Amor: *Hæc Scripta sunt, ut credatis, quia JEsus est Christus Filius Dei, ut credentes vitam habeatis in Nomine Ejus.* Joan. cap. 20. v. 31. Dicitur *Sacra* ex materia, quia aliud non tractat Argumentum, etiam dum peccata & errores hominum recenset, quam declinare à malo, & facere bonum: nam ut habetur 2. ad Timoth. c. 3. v. 16. & 17. *Omnis Scriptura divinitus inspirata utilis est ad docendum, ad arguendum, ad corripiendum in justitia, ut perfectus sit homo Dei, ad omne opus bonum instructus:* priora duo, nempe docere & arguere ad dogmata spectant, cum & vera doceantur, & falsa redarguantur: posteriora vero, videlicet corripere & erudire ad mores pertinent, ut pravi corrigantur, boni autem & recti amplius proficiant. In *Sacra* ergo Scriptura Deus suæ voluntatis beneplacita manifestat, normam vitæ præscribit, fundamenta Religionis stabilit; denique in compendio docet nos recte credere, bene vivere, beate mori. Dicitur *Sacra* ex forma, quia stylus est Sanctus, & phrasis Scripturæ gravissima: audiat S. P. August. lib. 4. de doct. Christ. c. 8. ita loquens: *Ita est & quædam (eloquentia) quæ viros summa Authoritate dignissimos, planeque Divinos decet; hæc ipsi locuti sunt, nec ipsos decet alia, nec alios ipsa.* Sicut ergo in Sacrificiis non solum *Hostia*, sed etiam *Ara*, *vasa*, *manus* ipsæ *Sacerdotum*, & *Vestes*, in quibus offerebatur, *Sacra* erant, sic non solum Dei Verbum quod Scriptum est, sed & reliqua, quæ ad illud pertinent, *sacra* vocantur.

Appellatur 2. *Sacra Pagina*, in qua Dei Verbum Scriptum est: *Sacræ Litteræ*, quibus exaratum est: *Sacrum Volumen*, primitivis enim temporibus *Codices Sacri* non ligabantur per folia, sed  
papy.

papyrus, aut membrana instar voluminis convolvebatur, prout vidit Zacharias c. 5. v. 5.

Appellatur 3. Scriptura Sacra *βιβλιον*, hoc est *liber* per excellentiam nempe, quia hujus intuitu nullus in orbe liber cum hoc comparabilis est: sicut enim Author hujus libri, utpote Deus ipse, omnium aliorum librorum Authores dignitate superat, ita & ipse hic *Liber* omnibus aliis literariis monumentis excellentior est, Antonomastice autem *Biblia* plurali numero Sacra Scriptura dicitur, quod nimirum in se locupletissimam sapientiæ cœlestis contineat *Bibliothecam*, de qua S. Chrysostomus Hom. 9. in Epist. ad Coloss. *Comparete vobis Biblia, medicamenta animorum.*

Appellatur 4. Divinæ Sapientiæ *Instrumentum*, quod generaliter significat omne Organum, sive adminiculum, quo artifex ad opus suum perficiendum utitur. Est ergo verbum hoc divinum in Sacris paginis consignatum *Organum*, & quasi manuale Dei instrumentum ad omnia justitiæ opera accomodatum, per quod in nobis Deus insculpsit imaginem Filii sui. Porro *instrumenta* vocantur etiam Scripturæ illæ, quæ fiunt ad fidem publicam à Notariis publicis, probatisque testibus consignata ad majorem pactorum & contractuum firmitatem ac robur; Scripturæ autem Sacræ continent Divinas promissiones, quas Prophetæ, Evangelistæ, & Apostoli velut testes & Notarii publici Divina autoritate confirmarunt.

Appellatur 5. *Testamentum Dei*, quia in illa continetur ultima voluntas Legislatoris æterni, quam adimpletam vult ab eo, qui hæreditatis æternæ cupit esse possessor.

Appellatur 6. *Verbum Dei Scriptum*, quia S. Scriptura tanquam certissimo oraculo à Deo alloquimur, instruimur, certificamur.

Notandum 3. Cum S. Paginæ ut plurimum *Scriptura* nuncupentur, eo quia Sola Spiritu Dei conscripta, & transcripta

A 2

est

est à Creatore ad Creaturam, duobus præcipuè modis, nempe *via naturæ, & via Prophetiæ*. Via naturæ scripsit Creator Creaturæ, in quantum ipsi largitus est lumen rationis, quo mediante in magnis Cœlorum tabulis, in paginis elementorum, in voluminibus temporum, & Creaturarum omnium *invisibilia ipsius à Creatura mundi per ea, quæ facta sunt, intellecta conspiciuntur*. Rom. c. 1. v. 20. Via prophetiæ scripsit Creator creaturæ per prophetas & alios Scriptores sacros in antiquo testamento: per Apostolos & Evangelistas in novo testamento.

Notandum 4. Deum rexisse humanam rempublicam in prima mundi ætate ab orbe condito usque ad finem diluvii per vivæ vocis oracula: qua ætate viguit Sola lex naturalis; à diluvio vero successit altera mundi ætas usque ad egressum populi Israel ex Ægypto, quo tempore ultra legem naturalem adjecit Deus non pauca singularia præcepta pro Abrahamo & posteris ejus, v. g. præceptum Circumcisionis &c. ut hoc character discerneret electum populum à reliquo numero, sed adhuc viva voce, & necdum per Scripturam; tandem in tertia mundi ætate, quæ incæpit cum Moyse, voluit legem suam, & Divinas promissiones Scripto authentico roborare tum per tabulas legis datas in Monte Sinai, tum per Pentatevchum dictante Spiritu Sancto conscriptum à Moyse, tum successive per plures Prophetas. His prænotatis:

Dico 1. S. Scriptura optime definitur, quod sit Verbum Dei, nobis à Deo revelatum, manifestatum per Ecclesiam, ac literis exaratum. Explicatur hæc definitio. Dicitur 1. *Verbum Dei*: quod testatur D. Paulus Epist. 1. ad Thessal. c. 2. v. 13. his verbis: *Gratias agimus Deo sine intermissione, quoniam cum accepissetis à nobis Verbum auditus Dei, accepistis illud non UT VERBUM HOMINUM, SED SICUT EST VERE VERBUM DEI, qui operatur in nobis, qui credidistis*. Item Epist. 2. ad Timoth. c. 3. v. 16. *Omnis Scriptura Divinitus inspirata utilis est ad docen-*



*docendum &c. Testatur & id S. Petrus in Epist. 2. c. i. v. 20. & 21. his verbis: Hoc primum intelligentes, quod omnis Prophetia Scripturæ propria interpretatione non fit. Non enim voluntate humana allata est aliquando prophetia, sed Spiritu Sancto inspirati locuti sunt Sancti Dei homines. Una autem eademque est ratio de aliis Scripturis Divinis, quæ est de prophetiis: ergo. Confirmat id ipsum S. P. August. Concio. 2. in Psalm. 90. his verbis: De illa Civitate, unde peregrinamur, hæc literæ nobis venerunt. Ipsæ sunt Scripturæ, quæ nos hortantur, ut bene vivamus. Confirmat & id S. Gregorius M. L. 4. Epist. 84. ad Theodor. inquires: Quid est enim S. Scriptura, nisi quædam Epistola Omnipotentis Dei ad suam creaturam. Dicitur 2. Manifestatum per Ecclesiam: quia Ecclesiæ, seu summi Pontificis ex Cathedra loquentis requiritur auctoritas, ut nobis certo constet librum aliquem esse verè Scripturam Sacram, etsi hæc auctoritas non requiratur, ut Liber ille quoad se sit Scriptura Sacra.*

Dico 2. Datur Scriptura Sacra. Hæc Conclusio non quidem convincenti, sed congrua ratione Probatur: Agnoscendus est aliquis supremus rerum omnium Dominus: ergo etiam agnoscenda est aliqua Scriptura Divina. ant. est certum, nam quamvis multi practicè insipienter dicant: *Non est Deus*: theoricè tamen & speculative Deum admittunt, cum omnibus hominibus ad rationis usum pervenientibus innata sit idæa, & ingenta notio Dei, ut & ipsi gentiles Philosophi agnoverunt. conseq. autem prob. Supremus rerum Dominus, utpote Auctor naturæ & gratiæ ab omnibus est colendus: homo autem de se minime Scire potest, quo modo Deus velit ab ipso coli: ergo debuit Deus mediantibus Prophetis, Apostolis, aut aliis ab eo specialiter selectis signo quodam certo manifestare, atque posteris omnibus transmittere (præcipue cum jam non ut olim per se ipsum hominibus loquatur) ritum, quo colendus sit, atque leges & præcepta dictare, quorum adimple-

tione honorandus sit: hæc vero omnia continet Scriptura S. Ergo.

*Objectiones contra I. Conclus. sunt sequentes.*

I. **T**Radita definitio convenit omnibus aliis Scripturis v. g. S. P. Augustini, D. Thomæ &c. Ergo. ant. prob. Deus juxta sententiam D. Th. est omnium actionum, adeoque & Scripturarum Auctor, quia Deus non solum prædeterminat ad substantiam actionis, sed etiam ad omnem modum illius actionis: ergo.

II. Deus est etiam specialis Auctor Canonum, Definitionum, & Decisionum Ecclesiæ: ergo Deus non est specialis Auctor solius Sanctæ Scripturæ. ant. prob. Ex VI. Synodo, ubi de Epistola Leonis Magni act. 11. dicitur: *A Deo fuit inspirata.* Item ex VII. Synodo, ubi act. 3. de Conciliorum œcumenicorum Canonibus, & Definitionibus dicitur: *Rectis, & a Deo inspiratis Dogmatibus sunt conspicua.* Item Regula S. Francisci dicitur divinitus inspirata: ergo.

III. Potest dari Verbum Dei Scriptum, quod non sit S. Scriptura: ergo. ant. prob. Si Christus, dum erat in terris, mandante vel rogante Matre scripsisset aliquam epistolam, illa continuisset Verbum Dei: atqui illa epistola non fuisset S. Scriptura: ergo.

IV. In S. Scriptura variæ reperiuntur contradictiones, & vitia grammaticalia: atqui hæc Verbum Dei non patitur: ergo.

V. Verbum Dei nequit esse Verbum mendax: atqui Scriptura continet plura mendacia: ergo nequit esse verbum Dei. min. prob. I. Gen. c. 22. Abraham refertur dixisse ad servos: *Expectate hic, ego & puer postquam adoravimus, revertemur ad vos:* per quæ verba tamen mentitus fuit, cum secundum voluntatem Dei eidem manifestatam intenderit filium suum immolare. 2. Isa. 18. v. 1. ægrotanti Ezechix Regi Deus per os Prophetæ dixit: *Morieris tu, & non vives:* quia tamen Ezechias demum convaluit, videtur

detur non tantum Scriptura, sed ipse Deus fuisse mentitus. 3. Reg. lib. 3. c. 22. Propheta Michæas dicit: *Ecce dedit Dominus Spiritum mendacii in ore omnium Prophetarum ejus, qui hic sunt, & Dominus locutus est contra te malum*: Si itaque Prophetæ mentiti sunt, facile etiam in Scriptura reperiri poterit mendacium: ergo.

VI. Si in S. Scriptura contineretur Verbum Dei, deberet in illa esse consensus: Sed non est: ergo. min. prob. Doctrina novi testamenti sæpe opponitur doctrinæ veteris testamenti: ergo. ant. prob. 1. Gen. c. 1. dicitur: quod Deus creaverit *cælum & terram*. Et Joan. 2. dicitur: quod *mundus per ipsum* (id est per Christum) *factus est*. ergo. 2. Gen. c. 2. dicitur: quod *compleverit Deus die septimo opus suum, quod fecerat, & requieverit die septimo ab universo opere, quod patrarat*. Et Joan. c. 5. sic loquitur Christus: *Pater meus usque modo operatur, & ego operor*: ergo. 3. Gen. 1. dicitur: *hominem formatum esse ad imaginem & similitudinem Dei*. Et Joan. 8. Christus dixit Pharisæis: *Vos ex patre diabolo estis*: ergo. 4. Vetus testamentum terrena solum & temporanea præmia, ac beneficia viris justis proponit: & novum testamentum spiritualia, cœlestia, & æterna bona promittit: ergo. 5. In veteri testamento multa sunt præcepta v. g. circumcisio, sabbathi observatio, quæ tamen à Christianis observari in novo testamento districtè prohibentur: ergo.

VII. In S. Scriptura multa sunt, quæ incredibilia apparent: ergo non est Verbum Dei. ant. prob. In Genesi refertur, quod Deus imposuerit Adamo præceptum de non edendo pomo, & eo violato grandi pœna non modo in Adam, sed in tota posteritate ejus animadverterit. Item Serpentem cum Eva fuisse locutum, eam decepisse, & demum serpentem fuisse à Deo punitum, ut terram comederet, & super pectus suum graderetur, quasi vero ante Adæ peccatum serpens fuisset pedibus instructus, & postea in pœnam iisdem mutilatus: sed hæc omnia incredibilia apparent, uti & alia inibi contenta, qualia sunt:  
lignum

Signum utpote rem corpoream arcanam quamdam vim habuisse ad spirituales effectum producendum, qualis est Scientia boni & mali. Item ad formationem Evæ coltam fuisse Adæ subtraham, quia alias corpus Adæ mansisset imperfectum. Denique de existentia paradyfi, quia omnes viatores, qui illas regiones, quas Tygris & Ephrates alluunt, frequentarunt, nullum hujus paradyfi vestigium offenderunt: ergo.

VIII. Si S. Scriptura esset Verbum Dei, deberet nonnisi digna sanctitate divina referre: sed non refert: ergo. min. prob. In S. Scriptura referuntur multa vitia, & passiones Patriarcharum, & Prophetarum: sic 1. refertur, quod Noe bibens vinum sit inebriatus. 2. Quod Abraham non contentus cum sua conjuge Sara cum Agar ancilla sua impudice versatus sit: nec coram duobus Regibus Abimelecho & Pharaone mentiri erubuerit dicens, Saram esse suam sororem, quæ tamen uxor erat. 3. Quod Loth inebriatus vino cum duabus filiabus suis commixtus sit. 4. Quod Jacob, ut libidini suæ indulgeret, non solum Liam & Rachelem duas germanas sorores sibi matrimonio copulaverit, sed etiam earum famulas in uxores duxerit. 5. Quod Judas Patriarcha cum nuru sua Thamar commixtus sit; quod David adulterium & homicidium comiserit. Salomon trecentas concubinas, & septingentas uxores habuerit. Quod Propheta Osee de muliere fornicaria filios procreaverit. Quod denique Moyse crudelia bella gesserit, & Auctor Hebræis fuerit, ut vasa aurea & argentea Ægyptiis diriperent: ergo.

## S O L U T I O N E S.

**A**D I. dist. ant. Deus est omnium actionum Author universalis, conc. ant. particularis, neg. ant. Deus ergo omnium nostrarum actionum est Author universalis, in quantum ut causa prima & universalis præmovet, & concurret. S. ve-

S. vero Scripturæ est Author specialis, in quantum speciali modo Scriptoris ministerio utendo & inspirando concurrir.

Ad II. dist. ant. Deus est specialis Author Canonum &c. eo modo quo S. Scripturæ, neg. Alio modo conc. ant. Verum quidem est, quod Deus dici possit specialis Auctor decisionum Ecclesiæ, in quantum Spiritus S. specialiter assistit Pontifici & Ecclesiæ Patribus, ne in suis decisionibus errent, attamen relinquit illorum voluntati & electioni verba, quibus punctum illud fidei proponant. Et idem est de Epistola Leonis Magni, & Regula S. Francisci, supposito quod illa sint à Deo inspirata: Sacræ autem Scripturæ Deus ita est specialis Author, ut Scriptori Sacro etiam omnia & singula verba dictet, & sic S. Scriptura proprie & rigoroze est Verbum Dei. Præterea, quando Concilia, vel Pontifices aliquid fide Divina credendum definiunt, non proponunt nobis Verbum Dei novum, sed tantum declarant illud, quod revera erat Verbum Dei, sed confuse tantum & nobis minime clarum, à parte rei in Verbo Dei scripto, vel tradito fuisse contentum, in quo ne errent, Spiritus S. eis assistit, non tamen Deus illis inspirat Verbum proprie ut suum.

Ad III. dist. maj. illa continuisset Verbum Dei proprie, neg. maj. improprie conc. maj. Illa enim Epistola non continuisset Verbum, quod Deus proprie scripsisset ut suum, sed tantum ut Matris suæ Verbum, seu mandantum: de ratione namque Verbi Dei est, quod procedat ab eo tanquam à dicente, & ad illum dicat relationem originis: verba vero hujus Epistolæ non dicerent relationem originis ad Christum ut Deum, sed ad Matrem ejus ut mandantem, seu consulentem, & ad Christum ut hominem obedientem, & Filium Matri suæ subjectum ratione humanæ solum naturæ, & consequenter non exprimeret conceptum Divinum, sed humanum.



Ad IV. dist. maj. reperiuntur variæ contradictiones, & vitia grammaticalia in S. Scriptura ut à Deo dictata, neg. maj. ut illam de facto habemus, transeat maj. In præsentī præscindimus de textu Hebræo, Græco, & Vulgata nostra, & inferius de eo specialiter agemus.

Ad V. neg. min. ad 1. prob. dico cum S. Ambrosio lib. I. de Abrah. c. 8. Abrahamum prophetasse, adeoque verum dixisse: *Iste solus disponebat redire immolato filio, sed Dominus per os ejus locutus est.* Accedit, si etiam ultronee concedatur Abraham fuisse mentitum, quis prudenter inferet, ergo S. Scriptura mentitur? nam historice quiscunque referens mendacium, nunquam ipse contra mentem loquitur, quod est mentiri. Ad 2. prob. cum S. Th. 2. 2. q. 174. a. 1. dico, hanc Prophetiam fuisse Prophetiam comminationis, non vero præscientiæ, aut prædestinationis. Videatur etiam S. Th. 2. 2. cit. q. 171. a. 6. ad 2. ad 3. prob. Explico textum sub dist. Deus dedit spiritum mendacii in ore omnium Prophetarum, & ad hoc permillive se habendo, conc. & hoc jubendo vel ad hoc malum efficaciter movendo, neg. Verbum enim imperandi non semper præceptum, aut Consilium, sed aliquando etiam permissionem significat, ut patet ex illo Joan. 13. *quod facis, fac citius.*

Ad VI. Conc. maj. neg. min. ad prob. Dico, quod dum dicitur Gen. c. 1. *In principio creavit Deus cælum & terram* per lii Deus intelligatur tota Sancta Trinitas, ac proinde Christus ut Deus est: quod vero tota Trinitas intelligatur, eruitur ex textu Hebræo, ubi legitur: *Berešcit, Bara Elocchim* quæ phrasis conformiter ad illam dictionem Hebraicam *Elocchim* sic latine reddi deberet, in principio creavit Dy, *Elocchim* enim apud Hebræos nomen plurale est, cum igitur Moyses hoc nomen plurale *Elocchim* conjungat cum verbo singulari *creavit*, significare voluit totam Ss. Trinitatem ad creationem mundi indivisibili operatione concurrisse. Ad 2. prob. dico: locum Geneseos solum velle, quod  
Deus

Deus ab instituendis rerum naturis post earum rerum perfectionem cessaverit, non autem quod in illis administrandis, videlicet gubernando, illuminando, animas creando, conservando cessaverit, & non operetur, de qua operatione sunt intelligenda apud Joan. verba Christi. Ad 3. prob. ajo: Phariseos fuisse quidem natura filios Dei, factos ad illius imaginem & similitudinem: ast doctrina & imitatione fuisse filios diaboli. Ad 4. prob. dico: legem veterem fuisse quidem divinam ut legem novam, cum hoc tamen discrimine, quod lex vetus comparate ad legem novam fuerit infirma ac imperfecta; caduca autem tantum promisit bona, quia ut S. P. Aug. epist. 19. ait: talis promissio temporibus & personis congruebat, si quidem Judæi ut plurimum carnales terrenis bonis inhiantes à peccato non tam amore justitiæ, sed formidine pænæ amittendi bona temporalia à peccato abstinerunt. Ad 5. prob. dico: præcepta data in veteri lege de circumcissione, & sabbathi observatione, & alia cæremonialia fuisse quidem divina, eorum tamen nullum in lege Evangelica prohibitum esse: sed cum tanquam figuræ ordinata sint ad Christum verum Messiam, qui in se omnes figuras adimplevit, ipso præsentem tanquam Figurato eadem evanuisse.

Ad VII. neg. ant. Omnia namque in argumento adducta non sunt incredibilia. 1. Non præceptum de non edendo pomo, quia Deus illud Adamo jure supremi Dominii imponere potuit, nec refert præceptum fuisse circa objectum leve, & pænam violationi annexam fuisse grandem: quia Deus jure sui supremi dominii etiam circa rem levem obedientiam exigere potuit. 2. Neque serpentis cum Eva Colloquium incredibile est, quia non serpens per se ipsum, sed diabolus per serpentem Evam allocutus est, sicut olim per idola fundebat oracula. Neque 3. incredibilis est pæna serpenti inflictæ, quia per eam non intelligitur pedibus serpentem privatum esse utpote nunquam

iisdem instructum, sed Deum ad puniendum serpentem solum fecisse, ut ea, quæ antehac serpenti erant naturalia, in pœnam & probrum ipsi post peccatum hominis verterentur. Neque alia ex Genesi adducta creditu sunt difficilia. Nam lignum vetitum appellatum *lignum Scientiæ boni & mali* non est tale dictum, quasi vim quandam naturaliter sibi congenitam habuisset producendi bonum & malum, sed est tale dictum solum ab eventu, nempe quia primi parentes nostri ex degustato vetito fructu funesta experientia didicerunt, quam grave malum esset Deo non obedire, non quidem quod antehac nescirent malum esse Deo non obedire, sed quia sua experientia edocti manifestius intellexerunt, quam nefandum crimen perpetrassent. Neque incredibile est, quod Deus ex costâ Adæ Evam formaverit: non enim per subtractionem hujus Costæ Adamus mansit imperfectus, quia ut D. Th. 1. p. q. 92. a. 3. docet, hæc costâ fuit superflua Adamo, quatenus Adamus singularis persona erat, nec ad ejus corporis integritatem ac perfectionem pertinuit, licet necessaria fuerit, quatenus juxta Dei Decretum Adamus destinatus erat parens omnium hominum, seu principium totius generis humani. Neque incredibilia sunt, quæ de Paradiso voluptatis referuntur, licet enim hic à nullo viatore hactenus detectus sit, inferri nequit illum nunquam extitisse, sed solum universali diluvio deletum esse.

Ad VIII. dico, quod dum peccata referuntur, non referantur approbative, sed exprobrative, quod sanctitatem potius commendat. Ad adducta. R. quod gesta memoratorum Patriarcharum ab omni culpa excusari possint: 1. Juxta S. Cyrillum, Ambrosium & alios non censetur peccasse Noe, quia hæc inebriatio improvisa fuit, & ab imperitia, non ab intemperantia profecta, cum Noe vim vini nunquam ante dignoverit. 2. Nec peccarunt Abraham, Isaac, & Jacob, alique Patriarchæ plures uxores habentes, quia licet jure merito culpe-

tur.

tur Lamechus, qui ante diluvium plures duxerat uxores, cepitque violare legem Monogamiæ latam Gen. c. 4. his verbis: *relinquet homo patrem & matrem, & adhaerebit uxori suæ, & erunt duo in carne una*: non peccarunt tamen Patriarchæ post diluvium ducentes plures uxores, quia post diluvium Polygamia speciali Dei dispensatione concessa, eisque dispensatio hæc ad multiplicandum genus humanum inspirata fuit. Nec obstat, quod Scriptura mulieres illas concubinas nominet, nam Scriptura S. etiam veras & legitimas uxores aliquando concubinas, & quandoque concubinas uxores vocat. Sic Gen. 16. Agar appellatur uxor Abraham. Et c. 25. Cethura etiam uxor Abrahami dicitur, & paulo tam ipsa quam Agar Concubinæ dicuntur: pariter Judic. 19. unica cujusdam legitima uxor nunc concubina, nunc uxor vocatur. Nec 3. peccavit Oseas, quia ille non fornicarie commixtus est meretrici, sed illam, quæ meretrix erat, jubente Deo in uxorem duxerat, & ex ea ad meliorem frugem conversa filios procreavit. Denique nec 4. peccavit Moyse bella gerendo, quia ille bella hæc non domandi libidine, nec ulciscendi crudelitate, sed Deo jubente suscepit, qui etiam ut supremus rerum omnium Dominus Hebræis ab Ægyptiis improbis laboribus vexatis in bona Ægyptiorum dominium tribuit.

*Objectiones Contra 2. Conclus. sunt sequentes.*

I. **P**Oquit Deus omnia hominibus necessaria ad salutem sine Scriptura per inspirationem internam revelare: ergo.

II. Joan. 2. v. 27. dicitur: *Non necesse habetis, ut aliquis doceat vos, sed unctio ejus, scilicet Spiritus S. interius inspirantis, docet vos de omnibus*: ergo.

III. Usque ad Moysem non fuit necessaria Scriptura S. similiter ab initio prædicationis Christi usque ad novi testamenti scriptionem præcepta Evangelica sine Scriptura conservata sunt: ergo & conservari postea poterant.

B 3

IV.

IV. S. Scripturam perpetuæ possunt supplere traditiones, uti suppleverunt in lege naturæ usque ad Moysem, & modo in lege scripta multa suppleant: ergo:

V. In S. Scriptura gravissimæ occurrunt difficultates, & antilogiæ: ergo.

VI. Si extaret Scriptura S. esset ei deferenda fides: sed non est: ergo. min. prob. Scriptura hæc favet locum spiritui contradictionis: ergo. ant. prob. 1. Gen. 5. c. v. 25. dicitur: Mathusalem vixisse annis 187. dum genuit Lamech, illoque genito adhuc annis 782. universim 969. vixisse annis, sicque interfuisse in Arca Noe, sed hujus non facit commemorationem Scriptura, dum octo solum enumerat animas fuisse in illa Arca, nempe Noe, Sem, Cham & Japhet, quorum quilibet suam uxorem habuit, ut legitur Gen. c. 6. ergo. 2. Gen. 46. c. v. 26. legitur, quod ex domo Jacob 66. animæ ingressæ sint in Ægyptum, & v. 27. habetur: *Omnes animæ domus Jacob, quæ ingressæ sunt in Ægyptum, fuere sexuaginta.* Et act. c. 7. v. 14. numerantur 75. animæ: ergo. 3. S. Lucas actor. 8. narrat Jacobum & Patriarchas translatos fuisse in Sichem, ubi tamen Josephus 2. Antiquit. L. c. 8. affirmat Fratres Josephi conditos esse in Hebron. Denuo ait. S. Lucas translatos esse in Sichem in sepulchrum emptum ab Abraham: sed hoc fuit situm in Hebron, & non Sichem, uti legitur Gen. c. 23. ergo.

VII. Textus scripturistici in multis inter se pugnant: ergo S. Scripturæ non est deferenda fides: ergo non extat. ant. prob. 1. Matth. 26. c. v. 29. fertur Christum dixisse: *Non bibam amodo de hoc genimine vitis usque in diem illum cum bibam vobiscum novum in regno Patris mei.* Et Petrus de se & aliis actor c. 10. v. 41. ait: *Manducavimus, & bibimus cum illo, postquam resurrexit à mortuis:* ergo. 2. Simeon Luc. c. 2. v. 34. de Christo dicit: *Ecce positus est hic in ruinam, & in resurrectionem multorum.* Et c. 9. v. 56. legitur: *Filius hominis non venit animas perdere, sed salvare:*



vare: ergo. 3. Christus apud Joannem ait c. 5. v. 31. *Si ego testimonium perhibeo de me ipso, testimonium meum non est verum.* Et ibid. c. 8. v. 14. inquit. *Si ego testimonium perhibeo de me ipso, verum est testimonium meum:* ergo. 4. S. Lucas act. c. 1. v. 1. scribit: *Primum sermonem feci de omnibus o Theophile, quæ cepit Jesus facere, & docere.* Econtra S. Joan. c. ult. ait: *sunt & alia multa quæ si scribantur per singula, nec ipsum arbitror mundum capere posse eos, qui scribendi sunt libri.* Ergo: si enim libri de Christi gestis scribendi capax non sit mundus eos capiendi: quomodo solus S. Lucas fuit sufficiens ad conscribenda omnia ejus gesta? 5. Apostoli invicem congregati Act. c. 15. v. 28. definiverunt sic: *Visum est spiritui S. & nobis, ut abstineatis vos ab immolatis simulacrorum:* sed tum Spiritui S. tum Apostolis videtur contradicere S. Paulus 1. ad Timoth. c. 4. v. 3. inquit: *In novissimis temporibus discedent quidam a fide, attendentes spiritibus erroris, & doctrinis Dæmoniorum, in hyprocrisi loquentium mendacium, & cauteriatam habentium suam conscientiam, prohibentium nubere, abstinere a cibis, quos Deus creavit:* ergo. 6. Gen. 1. legitur, mundum a Deo creatum fuisse sex dierum spatio: & Eccles. 18. Scriptum est: *qui vivit in æternum, creavit omnia simul:* ergo. 7. Gen. 1. dicitur, lucem creatam fuisse prima die, sed hæc tanquam solis proprietas debuit creari cum sole, qui die 4. primò creatus est: ergo. 8. Gen. 4. De Enoch legitur: *Iste cepit invocare nomen Domini:* Et ibidem dicitur a Cain & Abel jam fuisse oblata sacrificia, adeoque fuisse invocatum nomen Domini: ergo. 9. Patriarcha Jacob Gen. 32. v. 30. gloriatur: *Vidi Dominum facie ad faciem, & salva facta est anima mea.* Econtra Exod. c. 33. v. 20. Deus ait: *Non videbit me homo: & vivet;* ergo. 10. Deus Exod. c. 20. v. 5. dicit se visitaturum iniquitatem patrum usque ad tertiam generationem. Econtra Ezechiel. c. 18. legitur: *Filius non portabit iniquitatem patris:* ergo. 11. Joachim 2. Reg. c. 14. legitur: *Filius fuisse octodecim annorum, cum regnare cæpisset.* Econtra 2. Paralipom. c. 36.

c. 36. dicit eum Scriptura fuisse tantum hominem octo annorum: ergo. 12. lib. 3. Reg. c. 8. narratur, quod in Arca foederis nil aliud fuerit præter tabulas testamenti. Econtra ad Hebr. 9. Paulus dicit in Arca contineri præter tabulas manna & Virgam Aaron, quæ floruerat: 13. De Ochozia legitur 2. Paralip. v. 2. quod fuerit homo 42. annorum, cum regnare cæpisset: & 2. Reg. c. 8. v. 26. Scriptum est, eum fuisse tunc solum 22. annorum hominem: ergo: 14. S. Matthæus hanc sententiam: *Percutiam Pastorem, & dispergentur oves gregis*: applicat Christo ut prænunciato à Zacharia: sed Zacharias hoc loquitur de Psevdo-Propbeta sceleratissimo, unde etiam non dicit, *percutiam*, sed *percutite*: ergo: 15. S. Paulus ad Rom. c. 3. dicit nos justificari per fidem sine operibus: econtra Jacob. c. 2. legitur: nos justificari per opera: ergo:

VIII. Si extaret Scriptura S. sic haberet Auctorem Deum: sed multa sunt in Scriptura à solo homine: ergo. min. prob. 1. S. Paulus 2. Corinth. c. 7. v. 12. dicit: *Ego dico, non Dominus*. Item c. 11. *Quod loquor, non loquor secundum Deum, sed quasi in insipientia*: ergo. 2. S. Paulus epist. 2. ad Timoth. c. 4. scribit: *Lucas est mecum solus - - - Tychicum autem misi Epbesum, Penulam, quam reliqui Troades apud Carpum: veniens affer tecum & libros, maxime autem membranas*: sed hæc sunt mere naturalia: ergo. Item 1. ad Corinth. c. 7. ait: *Cæteris ego dico, non Dominus: si quis frater habet uxorem infidelem, & hæc consentit habitare cum illo, non dimittat illam*: ergo.

## S O L U T I O N E S.

**A**d I. dist. ant. Potuit Deus de potentia absoluta Conc. ant. de potentia ordinaria, neg. ant. Verum est, quod Deus de sua absoluta potentia potuisset per se ipsum cuilibet suam voluntatem intimare: quia vero connaturalius Creaturæ sensibiles percipiunt intimanda ministerio sensuum: & cum regula, quæ

quæ nos ducit ad finem nostræ salutis , debeat esse certa , & ab erroribus immunis : Deus juxta suavem suam providentiam se creaturis accomodavit , suam voluntatem scriptura manifestando. Præterea quis discerneret inspirationem , sitne à Deo , an à spiritu mendace ? in Angelum enim lucis Diabolus se sæpe transformat.

Ad II. S. Joannem ibi non impugnare S. Scripturæ existentiam , cum & ipsa Epistola , quam scribit , sit S. Scriptura , sed hortatur fideles , ut permaneant in doctrina à SS. Apostolis accepta , & fugiant novos Pseudo - Apostolos contraria docentes : v. enim 24. dicit , *quod audistis ab initio , in vobis permaneat.* Et v. 26. *Hæc scripsi vobis de his , qui seducunt vos :* & tunc subjungit : *non necesse habetis* &c. ubi seductores tantum excludit , non vero scripturam ut superfluum rejicit.

Ad III. Scripturam *absolute* non fuisse necessariam , fuisse tamen necessariam ad *melius esse* , ut videlicet salus citius , certius , & commodius obtineretur : & ideo salus facilior fuit tempore legis scriptæ quam naturæ , & tempore novæ legis , in quo lex nova non solum jubet , sed etiam juvat gratiam , auxilium ejus inspirando , ut docet D. Th. 1. 2. q. 106. a 2. Deinde ante Moysen nulla data fuit hominibus lex positiva , vel si aliqua præcepta familiaria data sint , tantum fuit unum vel alterum , quod faciliter memoria retineri poterat. Quod additur de præceptis Evangelicis etiam non urget : nam ex eo , quod exiguo tempore sine scriptura conservata sint , non bene infertur , ea etiam per longum tempus facile absque scriptura conservari posse.

Ad IV. Neg. ant. ob rationem jam datam ad I. & III. Doctrinæ enim à Deo revelatæ , ejusque perpetuitati ac puritati magis accomodatæ sunt literæ scriptæ non in incertum volitantes , sed suo loco immobiliter affixæ , ad quod non sufficiunt solæ traditiones , utpote quæ ex rerum multitudine confundi possunt : quæ ratio non currit de lege naturæ , & lege Nova.

C

Ad

Ad V. Dist. ant. in S. Scriptura occurrunt gravissimæ difficultates, & antilogiæ tantum apparenter tales, quæ tamen ab Ecclesia & SS. Patribus jam sunt explanatæ conc. ant. Secus neg. ant. Antilogiæ siquidem tantum sunt apparenter tales, quia re ipsa ibi non dantur, nec dari possunt. Cur autem Deus voluerit, ut difficultates; & etiam tantum apparenter tales antilogiæ extarent in Scriptura? Ratio est, ut hoc pacto S. Scriptura esset obscura sive ad exercenda hominum ingenia, sive ad domandam superbiam, sive denique ad ostendendam sublimitatem arcanorum, seu altitudinem mysteriorum.

Ad VI. Conc. maj. neg. min. ad prob. neg. ant. ad ejus prob. 1. dico, quod ultimus Mathusalæ annus fuerit solum inchoatus, & non completus: cum constet ex Scriptura eum non fuisse in Arca Noe, sed septimo die ante inchoatum diluvium mortuum fuisse tradunt Hebræi. Quod autem LXX. Interpretes in græca versione dicant illum 14. annis adhuc vixisse absoluto diluvio, mendum emendandum esse in græca versione notat post S. P. Augustinum Bellarminus cum alijs. Ad 2. prob. dico, quod loc. cit. enumerentur animæ, quæ solum Jacobum comitatæ sunt, non vero Jacobum & Joseph cum duobus ejus filijs Ephraim & Manasse, quibus quatuor adjectis habentur 70. Clarè hoc dicit Scriptura his verbis loc. cit. *Cunctæ animæ, quæ ingressæ sunt cum Jacob in Ægyptum, egressæ sunt de femore illius absque uxoribus filiorum ejus sexaginta sex, filij autem Joseph, qui nati sunt ei in terra Ægypti, animæ duæ, omnes animæ --- quæ ingressæ in Ægyptum fuere septuaginta.* Dum autem S. Lucas Actor. c. 7. v. 14. numerat. septuaginta quinque, adjecit Nepotes Josephi, filios Manassis & Ephraim, nimirum nominibus *Macbis, Galaad, Sutalaam, Taam, & Edem* nuncupatos: & hos quoque enumerant LXX. in sua versione. Nec obstat, eos non intrasse in Ægyptum, sed natos inibi fuisse: non inquam obstat, nam licet Ephraim & Manasses nati sint in Ægypto, tamen  
Moy-

Moyſes in textu Hebræo eodem enumerat inter animas, quæ Ægyptum ſunt ingreſſæ: ergo & ſic fecit S. Lucas imitando Moyſem. Ad 3. prob. Dico: quamvis in Libro Joſue c. 24. v. 31. legatur Solum Patriarcham Joſeph ſepultum eſſe in Sichem, verosimilius tamen eſt duodecim Patriarchas fuiſſe inibi ſepultos, & eorum oſſa cum oſſibus Fratris Joſephi ex Ægypto translata, atque in Sichem reposita; colligitur namque id ex narratione S. Stephani Act. 7. Sicut & Hieronymo, qui in Epitaphio S. Paulæ ad Euthochium Paulæ peregrinationem ſcribendo ait: *Transiit Sichem, & circa puteum Jacob extructam intravit Eccleſiam, atque inde divertens vidit duodecim Patriarcharum ſepulchra.* Iterum ad Pamachium ſcribens inquit: *duodecim Patriarchæ non ſepulti in Arboch, ſed in Sichem.* Igitur Joſephus Hebræus ſcribens Fratres Patriarchæ Joſeph ſepultos eſſe in Hebron memoria lapsus cenſendus eſt. Pariter S. Lucas de errore non eſt arguendus, eo quod hiftoriæ veritatem retinere volens ne jota quidem immutaverit, ſed rem, ut à S. Stephano narrata fuit, expoſuerit.

Ad VII. Neg. ant. ad 1. prob. explico textum ſub diſt. non bibam de hoc genimine vitis ordinario modo, & ad ſuccurrendum neceſſitati naturæ, conc. ant. ſecus, neg. ant. licet itaque Chriſtus poſt reſurrectionem ſuam cum Diſcipulis manducaverit, & biberit vinum de genimine vitis, illud tamen non bibit conſveto & ordinario modo ad conſervationem ſuæ naturæ: atque hoc modo ſolo etiam negaverat ante mortem ſe deinceps cum illis comesturum, & bibiturum. Ad 2. prob. expl. text. ſub diſt. poſitus eſt in ruinam per accidens & occasionaliter, conc. tanquam cauſa formalis, & per ſe, neg. ſicque explicato 2. textu neg. conſeq. Chriſtus namque poſitus eſt in ruinam multorum indirecte, quatenus videlicet multi ejus gratiæ & doctrinæ reſtituri ibunt in ignem æternum ex propria malitia. Ad 3. prob. Duoſ textus citatos nullam arguere contradictionem,



eo quod non sub eodem sed diverso sensu eos Christus protulerit. In priori enim textu loquitur præcise de suo testimonio, quod de se ipso protulit, & hoc dicit gratis quasi permittens non esse verum, hoc est firmum, & sufficiens alieno iudicio, cum testimonium unius secundum vulgarem sententiam non sit firmum, & à fortiori, si sit unius de se ipso testantis. In posteriori vero ait, *testimonium meum est verum*, quia non unius tantum, sed duorum, meum nempe, & Patris mei testimonium de me perhibentis, qui sumus duæ Personæ Divinæ, duoque de mea Divinitate testantes: ergo. Ad 4. prob. dist. Et loquitur S. Lucas de omnibus absolute Christi gestis, neg. solum de aliquibus, & ad certam usque ætatem, conc. S. Lucas ergo scribit solum de præcipuis Christi gestis à prima infantia usque ad ejus in cælum ascensum: e contra S. Joannes loquitur de omnibus absolute Christi gestis, ergo nulla est contradictio. Ad 5. prob. neg. min. Nam Apostolus non dicit, quod abstinere à certis cibis sit absolute doctrina Dæmoniorum, sed increpat abstinentiam superstitiosam, qualiter Simoniaci, Saturniani, Ebionitæ, Marcionitæ, & nonnulli alii Hæretici abstinebant à quibusdam cibis, quos à malo Deo, sive Dæmone procreatos esse affirmabant. Unde abstinere ab aliquibus cibis obedientiæ, temperantiæ, vel pænitentiae causa, aut ex urgentibus certis motivis Ecclesiæ, non Dæmonis, sed Spiritus S. est doctrina. Ad 6. prob. expl. textum sub dist. creatum fuisse mundum sex dierum spatio quoad distinctionem, conc. quoad se, & secundum se, absolute, neg. Deus namque creavit omnia simul, ut perhibetur Ecclesiast. c. 18. quia vero hæc opera distinxit sex dierum spatio, etiam non est erratum c. 1. Gen. Cum enim opus nobis saltem non appareat factum, nisi dum est distinctum, & in quadam specie constitutum, sequitur opera distinctionis dici etiam opera creationis. Ad 7. prob. dico lucem quidem Creatam fuisse à Deo prima die cum totius  
mundi

mundi globo , quarta vero die apparuisse distinctam , & separatam à cæteris operibus cum sole , cujus est proprietas : hac die enim determinata fuit ad effectus particulares in sole. Ad 8. prob. expl. text. sub dist. Iste cæpit invocare nomen Domini sub certis ritibus , & formula quadam determinata , conc. cæpit absolute , neg. Nam Adam jam invocaverat Dominum , propter quod etiam justificatus fuisse , sicut & sanctificatus à sapientia legitur , sap. 10. hoc autem contingere non potuit sine bonis operibus , & supremi Dei invocatione. Quod vero Enoch cæpisse legatur , fit ideo , quia illud invocavit sub certis ritibus , & quadam determinata formula , quæ prius nemini fuerat in usu : unde in hebræo legitur sic : *cæptum est tunc invocare nomen Domini.* Ad 9. prob. expl. sub dist. Jacob vidit Deum visione mediata , nempe mediante Angelo , qui luctabatur sub forma viri usque mane cum illo , conc. vidit visione intuitiva , neg. Jacob ergo loquitur de familiari visione sub specie externa. Deus autem Exod. loc. cit. loquitur de visione suæ essentiae in se ipsa , quæ non conceditur nisi post mortem : Ad 10. prob. expl. text. sub dist. Deus dicit se visitaturum iniquitatem Patrum visitatione temporali , & afflictionibus hujus vitæ , conc. visitatione æterna , & privando filios gloria ob iniquitatem Patrum , neg. Exod. loc. cit. Deus loquitur de pæna temporali : apud Ezechielem vero de pæna spiritali privationis gratiæ , & damnationis æternæ : nullum siquidem peccatum ( excepto originali , de quo hic sermo non est ) cedit posteris in damnationem , sed solum in pœnam temporalem. Ad 11. prob. dist. & hic computantur anni , quibus regnavit Joachim cum Patre suo Sedecia , conc. secus , neg. fuit itaque Joachim tunc octo annorum filius , dum regnum administrare incæpisset cum Patre suo , quando vero Patre ducto in Babylonem gubernare visus est solus ( ut legitur 4. Reg. c. 27. & 28. ) tunc fuerat octodecim annorum. Ad 12. dist. tabulæ fuerant in Arca , virga vero &

manna ad latus Arcæ, conc. secus, neg. fuerat namque in Arca distinctio quædam ita, ut aliquid potuerit esse in medio Arcæ, & aliquid ad latus, ut eruitur ex illo Deut. c. 31. v. 26. *Tollite librum istum, & ponite eum in latere Arcæ fæderis Domini Dei vestri*: illud autem latus communiter non vocabatur Arca. In medio igitur Arcæ nil aliud fuit reconditum quam tabulæ testamenti, sicque verificatur textus ex 3. Reg. c. 8. In latere autem fuit virga Aaron, urna aurea cum manna, & sic verificatur textus Apost. ad Hebræ. c. 9. Aliqui ad hanc prob. respondent, quod, dum Salomon posuisset Arcam in templo post ejus dedicationem, tunc hæc nihil continuerit præter tabulas legis: sequentibus vero temporibus Sacerdotes posuerint in ea manna, & virgam Aaron: ideo dicunt, Apostolum locutum fuisse secundum viciniora tempora: prior responsio est melior. Ad 13. prob. Ochoziam fuisse 22. annorum cum regnavit cum Patre, vel consiliarius ejus fuit: fuisse autem 42. annorum, dum solus regnavit. Ad 14. prob. conc. maj. dist. min. loquitur in sensu obvio de Pseudo-Propheta, conc. min. in sensu mystico, & figurativo, neg. min. Mystice namque intelligitur de Christo, quem Judæi perfidi ut sceleratorem tractarunt. Item cit. text. in genere intelligitur tum de bono, tum de malo Pastore, quo percusso disperguntur oves, quæcunque illæ sint. Ad 15. prob. dist. Et loquitur hic Paulus de operibus naturalibus seclusa gratia Christi: vel de operibus legis Mosaicæ, quæ sublata sunt, conc. Et loquitur de operibus per fidem in Christum, neg. de his ultimis locutus est S. Jacobus c. 2. de primis S. Paulus ad Rom. c. 3.

Ad VIII. Conc. maj. dist. min. multa sunt à solo homine, inspirante simul & dirigente Deo, conc. min. nullo modo sunt à Deo, neg. min. Historiæ itaque continentes facta humana in Scriptura S. sunt à Deo protegente, ne Scriptor in iis quempiam inducat in errorem. Ad 1. prob. dico, Apostolum velle  
indicare

indicare, quod hæc, quæ protulit, non acceperit immediate à Christo loquente: nunquam tamen negat se accepisse à Spiritu S. assistente, & protegente eum, ne falsa proferret. Ad id quod additur expl. text. sub dist. sed quasi in insipientia & hoc dicit ex humilitate, conc. ob errores, qui in suos irrepsissent libros, neg. Ad 2. prob. dico: quod Apostolus donatus fuerit sic assistentia Spiritus S. ut etiam in exarandis rebus Civilibus non erraret. Ad additum expl. text. sub dist. & hæc proposuit Paulus seclusa Divina inspiratione, nego. Hæc proposuit secernendo mandata, & præcepta à Deo immediate accepta à Consiliis, quæ licet immediate non acceperit, tamen sine inspiratione non dedit, conc. se ipsum interpretatur Paulus loc. cit. inquit: *Puto autem, quod & ego Spiritum Dei habeam.* Porro Matthæus & Joannes ea scripserunt, quæ ab ore Christi procedere audierant: Marcus à Petro, Lucas à Paulo informationem acceperunt; Petrus autem fuit ab ipso Christo edoctus: sicut & Paulum ipse instruxit Christus, quando ei aparuit in via Damasci: testatur id ipse S. Paulus ad Galat. c. 1. v. 12. his verbis: *neque enim ego ab homine accepi illud (scilicet Evangelium) neque didici, sed per revelationem Jesu Christi.* Scripserunt ergo omnes cuncta Deo inspirante, & assistente.

## QUÆSTIO SECUNDA

*An Deus per se ipsum immediate aliquid scripserit?*

CUM Deus sit Author S. Scripturæ, oritur quæstio, an Deus aliquid, quod ad Scripturam pertinet, per se ipsum immediate scripserit? quæstio vero potissimum devolvitur ad primas, & secundas legis tabulas. Pro cujus intelligentia

Notandum 1. Legem Mosaicam esse triplicem, *Moralem, Cæremonialem, & Judicialem.* *Moralis* summatim continetur in De-

Decalogo, & duo potissimum præcipit, nempe cultum Dei, & justitiam cum proximo. *Cæremonialis* speciatim determinat, quibus ritibus ac cæremoniis Deus sit colendus : *Judicialis*, quibus modis justitia cum proximo servanda sit.

Notandum 2. De lege Morali hanc procedere quæstionem, quæ Decalogus dicitur; cum definiatur: *Lex naturalis* & *Divina decem præceptis comprehensa*, digito Dei in duabus tabulis scripta, & per manum Moysis populo Hebræo delata. Quæstio ergo est de istis duabus legis tabulis, an illæ sint scriptæ immediatè à Deo? pro resolutione

Dico 1. Primæ legis tabulæ non sunt immediate scriptæ à Deo, sed ab Angelo Dei vices gerente. Probatur 1. Actor. c. 7. v. 53. Stephanus plenus gratia & Spiritu S. dicit Judæis: *Accepistis legem in dispositione Angelorum*: & v. 38. loquens de Moyse ait: *Hic est, qui fuit in Ecclesia in solitudine cum Angelo, qui loquebatur ei in monte Sina, & cum patribus nostris, qui accepit verba vitæ dare nobis*, Et D. Paulus ad Galat. 3. v. 19. dicit: *Lex (scilicet antiqua) ordinata per Angelos in manu mediatoris*. In quæ verba S. P. August. lib. 3. de Trinit. cap. ult. ita ait: *Disposita per Angelos in manu mediatoris*. In quibus Angelis erat utique & Pater, & Filius, & Spiritus S., & aliquando Pater, aliquando Filius, aliquando Spiritus S. aliquando sine ulla distinctione personæ Deus per illos figurabatur, etsi visibilibus, & sensibilibus formis apparens, per creaturam tamen suam, non per substantiam suam. Ex quibus concludit: Quod antiquis Patribus nostris ante Incarnationem Salvatoris, cum Deus apparere dicebatur, voces illæ, ac species Corporales per Angelos factæ sunt: sive ipsis loquentibus, vel agentibus aliquid ex personâ Dei. Sic etiam in eadem verba Pauli S. Anselmus loc. cit. inquit: *Lex est ordinata per Angelos, quia non per se ipsum Deus, sed per Angelos Moyse loquebatur, & præcepta legis disponebat*. Ergo.

Pro-



Probatur Conclusio 2. Omnes apparitiones Dei in veteri lege hominibus factæ contigerunt mediante Angelorum ministerio: ergo. ant. prob. ex D. Th. in 2. dist. 8. q. 1. a. 6. Respon-  
deo dicendum, quod Deus secundum essentiam suam corporalibus ocu-  
lis nunquam videri potest, - - sed in corporalibus formis hominibus  
apparuit. Hæc autem apparitio facta est ministerio Angelorum, ut  
dicit August. in lib. de Trinit. quia Divinæ illuminationes non veniunt  
in nos, nisi mediante cælesti Hierarchia, ut dicit Dion. - - Idem  
docet 1. 2. q. 98. a. 3. Lex vetus data est à Deo per Angelos: &  
præter rationem generalem, quam Dionys. assignat in 4. c. cælest. Hier-  
arch. quod divina debent. deferri ad homines mediantibus Angelis,  
specialis ratio est, quare legem veterem per Angelos dari oportuit;  
dictum est enim, quod lex vetus imperfecta erat, sed disponebat ad  
salutem perfectam generis humani, quæ futura erat per Christum. Sic  
autem videtur in omnibus potestatibus, & artibus ordinatis, quod  
ille, qui est superior, principalem & perfectum actum operatur per  
se ipsum: ea vero quæ disponunt ad perfectionem ultimam, operatur  
per suos Ministros, sicut navifactor compaginat navem per se ipsum,  
sed præparat materiam per artifices subministrantes, & ideo conve-  
niens fuit, ut lex perfecta novi Testamenti daretur immediate per ip-  
sum Deum hominem factum: lex autem vetus per Ministros Dei, sci-  
licet per Angelos daretur hominibus. Et per hunc modum Apostolus  
1. ad Hebræ. probat eminentiam novæ legis ad veterem: quia in novo  
Testamento locutus est nobis Deus in Filio suo: in veteri autem Testa-  
mento est sermo factus per Angelos. Ergo.

Dices: verum quidem esse, quod Deus gubernet mun-  
dum per Angelos: ob specialem tamen rationem circa tabulas  
primas, ad ostendendam scilicet bonitatem suam, & amorem,  
in hac lege dispensavit. Sed

Contra. Hæc conficta dispensatio nullum in Scriptura S.  
habet fundamentum: ergo talis dispensatio non est adstruenda.  
ant. prob. Si haberet in Scriptura S. aliquod fundamentum:

D

esset

esset hoc, quia Exodi c. 24. v. 12. dicitur: *dixit autem Dominus ad Moysen: Ascende ad me in montem, & esto ibi: daboque Tibi tabulas lapideas, & legem, & mandata quæ scripsi*: sed hoc fundamentum non est efficax: licet enim ille, qui hic apparuit, non solum de tabulis dicat, *quæ scripsi: scriptas digito Dei*: sed etiam se ipsum sæpius Deum asserat, suumque nomen esse illud venerandum, & proprium solius Dei, *qui est*: apparitio tamen hæc & à S. P. Aug. & à S. Th. attribuitur Angelo, ut ex superioribus patet textibus: ergo. Unde S. P. August. lib. 3. de Trinit. c. 11. hanc quæstionem instituit: *sed ait aliquis, cur scriptum est: dixit Dominus ad Moysen, & non potius dixit Angelus ad Moysen?* Et respondet: *quia cum verba iudicis præco pronunciat, non scribitur in gestis, ille præco dixit, sed ille Judex*: ergo. Imo & hanc apparitionem Angelo attribuit S. Stephanus actor. c. 7. v. 38. ut in 1. proba vidimus.

Dico 2. Moyses secundas legis tabulas scripsit. Prob. Exod. c. 34. v. 1. ait Dominus ad Moysen: *Præcide tibi duas tabulas lapideas instar priorum: & v. 27. Scribe tibi verba hæc, quibus & tecum & cum Israel pepigi fædus*. Fuit ergo ibi cum Domino quadraginta dies, & quadraginta noctes: panem non comedit, & aquam non bibit, & scripsit in tabulis verba fæderis decem: atqui *lij scripsit* non minus, ac *lij non bibit & comedit*, referri debet ad Moysen: ergo sicut Moyses non bibit, nec comedit, ita psemet scripsit secundas legis tabulas.

Dices: Secundum Hebræam dialectum *lij scripsit* non esse referendum ad Moysen, sed ad verbum remotius, scilicet *Deum*. Sed

Contra: Nulla hujus recursus ad verbum remotius est Necessitas: quia hic explicatur, quod Moyses verba fæderis scripserit, quæ Deus ei scribenda versu præcedenti mandaverat dicens: *scribe tibi verba hæc, quibus & tecum & cum Israel pepigi fædus*: cum enim de verbis fæderis mandatum Domini præcēferit,

ferit, & statim jungatur: *Et scripsit in tabulis verba fœderis decem*: ergo Moyses non Deus scripsit secundas legis tabulas

Neque in presenti admittenda est expositio Tostati, quod, quando Deus dixit *Moyse: scribe tibi verba hæc*: non loquatur de verbis decem præceptorum, sed de verbis quorundam præceptorum cæremonialium. Non inquam hæc expositio est admittenda: cum in utroque loco agat de verbis *fœderis*, quæ proprie sunt verba *Decalogi*: unde dicit S. P. August. lib. 5. super Deut. q. 15. *Profecto non cogimur violento intellectu subaudire, quod Deus scripserit, ubi scriptura dicit: Et erat ibi Moyses in conspectu Domini quadraginta diebus, Et quadraginta noctibus: panem non manducavit, Et aquam non bibit, Et scripsit in tabulis verba testamenti. Ubi valde sonat scripsisse Moysen. Idem eod. loc. cit. Certe illud quod sequitur: Et erat ibi Moyses in conspectu Domini quadraginta diebus, Et quadraginta noctibus, panem non manducavit, Et aquam non bibit, Et scripsit in tabulis testamenti decem verba, satis manifestat eundem Moysen in tabulis hæc decem verba scripsisse, non Deum: ergo.*

### Objectiones Contra 1. Conclusionem.

I. **E**Xodi cap. 31. v. 18. Item Deut. c. 9. v. 10. habetur: *Editque Dominus Moysi - - - in monte Sinai duas tabulas testimonij lapideas scriptas digito Dei. Vel ut Paginus vertit: in digito Dei: Cetubim Beelsbang Elochim: ergo.*

II. Tabulæ digito Dei, vel in digito Dei scriptæ non minus Deo videntur tribuendæ, quam cæli immediate Deo attribuntur, quia à Psalmista vocantur *Mangbasè, et scengbstica*: hoc est, *opus digitorum tuorum*: ergo.

III. Primæ legis tabulæ scriptæ dicuntur digito Dei, quia Deus eas immediate scripsit: ergo. ant. prob. S. P. August. q. 166. super Exod. ita interrogat: *quare illæ (scilicet primæ tabulæ)*

bulæ) opus Dei: istæ (scilicet secundæ) opus hominis? & respondet: ideo dicuntur opus Dei, quia Deus legem constituit, Deus conscripsit, nullum opus hominis --- opus tantummodo Dei, & conscriptio digito Dei. Et q. 15. super Deut. Non habet dubitationem, quod priores tabulas & Deus fecit, & Deus conscripsit --- ubi ergo & tabulæ opus Dei erant, & scriptura eorum digito Dei facta. Ergo.

IV. Deus immediate primas tabulas scripsit: ergo. ant. prob. omnia Scripturæ loca explicantur, quamvis dicatur Deum immediate primas tabulas scripsisse: ergo.

V. Angelus tantum apparuit tanquam legis promulgator, & non scriptor: ergo. ant. prob. lex illa est solius Dei: ergo.

VI. Lex illa est solius Dei ut scribentis: ergo. ant. prob. Scriptura ponit distinctionem inter dantem legis tabulas, & scribentem: nam Exod. c. 30. v. 18. dicitur: *Deditque Dominus Moysi* (id est Angelus) *scriptas digito Dei* scribentis: ergo.

VII. Nequit intelligi hic Angelum apparuisse, sed Deum: ergo. ant. prob. qui Moysi in rubo apparuit, vocatur *Jebova*: sed *Jebova* est Deus: ergo. min. prob. nomen *Jebova* non potest Angelo tribui ut Dei legato: ergo. ant. prob. natura hujus nominis *Jebova* ita Deo soli propria est, ut alteri tribui non possit: ergo. ant. prob. legatus Imperatoris vocari non potest Imperator, aut ejus nomen sibi habere proprium: quis enim eum vocat *Augustissimum*: neque legatus illud usurpabit: *Nos Josephus*: quia hoc nomen est individuo Imperatoris proprium: ergo à pari.

VIII. Qui apparuit in rubo vocat se *Jebova*, quia erat Deus in persona propria: ergo. ant. prob. sacrificia & holocausta tantum Deo in persona propria possunt offerri, & solus Deus in persona propria potest adorari: atqui Moyse illi, qui apparuit in rubo, sacrificia, & holocausta obtulit, eumque adoravit: ergo.

IX.

IX. Qui apparuit in rubo fuit Deus in propria persona : ergo. ant. prob. Moyſes moriturus benedicit duodecim tribubus Iſrael, & perveniens ad benedictionem Joſeph dicit Deut. c. 33. v. 16. *Benedictio illius, qui apparuit in rubo, veniat ſuper caput Joſeph*: atqui hoc non poteſt de Angelo intelligi, ſed de Deo : ergo.

X. Non fuit Angelus, qui apparuit in monte Sinai dicens : *dabo tibi tabulas, quas ſcripſi* : ergo. ant. prob. quando Paulus ad Galat. c. 3. v. 19. de hac lege dicit : *ordinata per Angelos in manu Mediatoris*, hoc intelligitur : inter Angelos auditis tubis, ignibus, tonitruis in promulgatione legis ab ipsis excitatis : ergo.

XI. Variæ apparitiones in lege veteri contigerunt nullo interveniente ministerio Angelorum : ergo ruit fundamentum conſuſionis. ant. prob. Gen. c. 18. dicuntur viri tres apparuiſſe Abraham : atqui unus illorum fuit Deus, & duo alij Angeli : ergo. min. prob. v. 13. unus illorum ſecundum textum Hebræum dicit ſe *Jehova* & duo alij c. 19. v. 2. non vocantur *Jehova* vel Adonai, ſed Angeli à Deo miſſi ad perdendam Sodomam : ergo.

XII. Loth. loc. cit. non dixit in plurali *Domini mei*, ſed *Domine mi* preces ad eum fundens : Onkelos vero nomen etiam Dei *Tetragrammaton* hic loco *Domine* ſubrogat : ergo.

XIII. Angelis tanquam Dei legatis hæc tribui non poſſunt : ergo. ant. prob. Chriſtus & Prophetæ fuerunt Dei legati : atqui nullibi in Scriptura vocantur *Jehova* : ergo.

XIV. Si dicta noſtra vera ſint, ſequitur, quod *Socinianos* hæreticos imitemur, atque eorum cauſam ſuſcipiamus, ac pro Filij Dei Divinitate præclarum eripiamus argumentum : neque tunc ullam vim contra eos obtinebit, quod *Jehova* nomen Scriptura ei ſoleat tribuere : cum enim etiam Angelis tot locis tributum inveniamus : nihil ergo ex hoc capite (dicent Sociniani)



ni) pro Divinitate Filij Dei arguitur, neque ex hoc ostenditur esse Deum: ergo.

XV. Veritas hucusque dictorum huic innititur supposito, quod de mente SS. PP. omnes Dei apparitiones in veteri lege fuerint factæ mediantibus Angelis: atqui D. Th. hoc suppositum destruit. ergo. min. prob. D. Thomas varijs in locis docet, quod Moyſes in mortali adhuc carne viderit Dei essentiam: ergo.

## S O L U T I O N E S.

**A**D I. Illas authoritates, quomodocunque ab Interpretibus vertantur, aliud non innuere, quam tabulas scriptas esse digito Dei, id est, Angeli specialiter vices Dei gerentis, qui vocari potest Deus, & digitus Dei: ut ex S. P. Augustino ostensum est in proba.

Ad II. Neg. ant. & Disp. est: quod in Psalmo id clare colligatur ex circumstantiis: quia Angeli juxta S. Th. 1. p. q. 45. a 5. in Arg. sed Contra. Item in ☉ art. etiam instrumentaliter nequeunt concurrere ad creationem, non implicat vero, quod ministerio Angelorum illæ tabulæ sint scriptæ, nam illæ cum sua inscriptione à Deo per Creationem non exierunt, utut aliqui hoc velint, quod per creationem à Deo exiverint, quod tamen admittendum non est.

Ad III. S. P. August. q. 166. in Exod. non excludit ministerium Angelorum à scriptione primarum tabularum, sed tantum ministerium ipsius Moyſis, & ita per exclusionem ipsius Moyſis dicit *opus solius Dei*. Ergo S. P. August. non agit de difficultate hac, an Deus immediate per se scripserit primas tabulas: nam loc. cit. super Exod. hanc sibi proponit quæstionem: *Proinde magna oritur quæstio, quomodo illæ tabulæ, quas erat Moyſes, Deo utique præſciente, facturus, non hominis opus esse dicantur*

*tur sed Dei, nec ab homine scriptæ, sed scriptæ digito Dei. Ubi clare videtur, Augustinum inquirere, an homo, scilicet Moyses, vel Deus primas tabulas scripserit? quando ergo resoluit: Deum illas scripsisse, tantum excludit Moysen, non vero Angelum vicem Dei gerentem, cum expresse loc. cit. in Prob. lib. 3. de Trinit. c. 11. asserat per Deum hic Angelum intelligi. Eodem etiam modo S. P. Augustin. q. 15. super Deut. difficultatem proponit non inter Deum & Angelum, ut nos in præsentia, sed inter Deum & Moysen, sic enim ait: *discutienda nascitur quæstio, quod utrasque tabulas, id est, & priores & secundas Deus hic legitur scripsisse, non homo.**

Ad IV. Neg. ant. ad prob. dist. ant. omnia loca scripturæ explicantur cum contradictione ad SS. PP. si dicatur Deum immediate primas tabulas scripsisse, conc. ant. sine contradictione neg. ant. Manifesta siquidem sequeretur contradictio: Scriptura namque dicit, quod eadem sit persona, & quæ tabulas dedit, & quæ illas scripsit: in sententia vero Adversariorum non esset eadem persona: Deus quippe tabulas scripsisset, & Angelus apparuisset, easdemque Moyse tribuisset ac tradidisset; si vero dicatur, quod Deus apparuerit, & tabulas scripserit, hoc Patribus opponitur, qui omnes cum D. Thoma probant, & docent, in veteri lege apparitiones factas fuisse per Angelos.

Ad V. Neg. ant. ad prob. dist. ant. lex illa est solius Dei tanquam Authoris principalis, conc. ant. tanquam scriptoris, neg. ant. & conseq. licet enim Angelus legem hanc scripserit, manet tamen quantum ad authoritatem solius Dei: quia scriptio tantum est initialis, & inadæquata promulgatio legis.

Ad VI. Reflexionem hanc aliquorum Neotericorum esse quidem subtilem, sed subtilitate sua evanescere: cum in scriptura nihil communius sit, quam loco nominis possessivi poni ipsam personam.

Ad

Ad VII. Neg. ant. ad prob. con. maj. neg. min. ad prob. neg. ant. ad prob. neg. ant. ad ejus prob. con. ant. neg. conseq. Disp. est: quod legatus quidem à legante mittatur, & auctoritatem accipiat, negotia tamen, ad quæ mittitur, proprio genio exequitur: Angelus vero est tantum instrumentum Dei, qui illa solum exequitur, eaque verba profert, ad quæ Deus ipsum movet, lingua Angeli utens tanquam suo instrumento; sicut Angelus asina Balaam fuit usus. Vere itaque dixit Angelus, qui apparuit in rubo: *Ego sum Deus Abraham, ego sum, qui sum: dixit autem Dominus, dabo tibi tabulas lapideas, & legem, & mandata, quæ scripsi*: quia vere erat Deus, qui in Angelo tanquam locutionis suæ instrumento hæc verba exprimebat: & per Angelum tanquam scribam suum legis tabulas scribebat inspirando, & dictando ei omnia & singula verba. Hinc etiam tota Scriptura etsi ab Authoribus secundariis sit scripta, vere dicitur, & est Verbum Dei.

Ad VIII. Neg. ant. ad prob. conc. maj. dist. min. atqui Moyse illi, qui apparuit in rubo visibiliter & in corporali specie, sacrificia, & holocausta obtulit, eumque adoravit, neg. min. qui apparuit in rubo invisibiliter in se, & visibiliter in Angelo, conc. min. Moyse ergo non obtulit Angelo, sed Deo in Angelo invisibiliter apparenti sacrificia.

Ad IX. Neg. ant. ad prob. conc. maj. dist. min. atqui hoc non potest de Angelo intelligi, tanquam de benedicente principaliter, conc. min. tanquam de benedicente minus principaliter, & nomine Dei, neg. min. & conseq.

Ad X. Hanc expositionem esse contra S. Th. in c. 3. Galat. lect. 7. qui ita exponit: *ordinata, id est, ordinanter data per Angelos, id est, ministerio Angelorum*. Præterea S. Paulus ad Galat. 3. & Heb. 2. dicit: *si enim, qui per Angelos dictus est sermo, factus est firmus &c.* quid ad firmitatem conferre potuit, quod ipsis audientibus fuerit dictus?

Ad

Ad XI. Dist. ult. maj. unus illorum dicit se *Jebova*, & ille solus specialiter Dei personam gerebat, con. maj. & omnes specialiter Dei personam gerebant, neg. maj. Nihil ergo obstat, quod illi viri apparentes Abraham & Loth fuerint Angeli, qui & viri, & Angeli, & *Jebova* vocantur: ille enim, qui vocatur *Jebova*, solus specialiter Dei personam gerebat, & in persona Dei loquebatur. Unde

Ad XII. Licet Loth plures alloquatur, ad unum tamen sermonem suum dirigit utrique communem: postquam enim Loth v. 18. dixit ad eos, mox singulari numero utitur, & dicit: *quæso Domine mi, quia invenit servus tuus gratiam coram te.* &c. Ex quo videtur, quod Loth hic non secus, ac Abraham in illo, qui cæteris excelsior apparebat, Deum cognoverit, ad quem preces fudit, vocans eum *Jebova* v. 14. dicens ad generum suum: *perdet Jebova Civitatem hanc:* ita docet expresse D. Th. 2. 2. q. 84. a. 1.

Ad XIII. neg. ant. ad prob. dist. maj. Christus & Prophetæ fuerunt Dei legati eodem modo quo Angeli, neg. maj. diverso modo, conc. min. neg. conseq. Quia Angeli fuerunt Dei legati, ut in figura assumpta Deum repræsentarent, & Deus ipsis uteretur tanquam instrumentis, quibus non tantum mentem suam vellet hominibus manifestare, sed etiam verba tanquam propria per illos vellet pronuntiare: Christus vero & Prophetæ in propria apparuerunt persona, & mentem Dei nobis manifestarunt verbis à se efformatis.

Ad XIV. dist. ant. si eodem modo tribueretur hoc nomen *Jebova* Filio Dei & Angelis, conc. ant. si diverso modo, neg. ant. Dei enim Filius vere & proprie secundum personæ rationem dicitur *Jebova*: Angeli vero tantum per quandam repræsentationem.

Ad XV. Moyses vidit Dei essentiam in apparitione corporali, ut in præsentī loquimur, neg. ant. in apparitione intellectuali, conc. ant. neg. conseq. Ex his

E

Que-

Quæres I. Si in omnibus apparitionibus corporalibus non Deus sed Angelus apparuit, cur Moyſes & alii narrant illas tanquam factas à Deo? R. Cum Toſtato minime conveniſſe, ut Angeli, qui apparebant, & loquebantur tanquam Dei Miniſtri, ſe eſſe à Deo miſſos dicerent, ne nimis Angelis afficerentur homines, ſed ad Deum magis allicerentur: eamque ob cauſam & Moyſes ita ſolet Angelorum Miniſteria narrare, ut Deum potius loquentem, quam ſe ipſos repræſentent, uti ſit Eod. c. 3. & 24. dum datam eſſe à Deo legem commemorat.

Quæres 2. An Moyſes mortali adhuc in carne vivens clare viderit Dei Eſſentiam? R. affirmative. Nam Numeror. c. 12. v. 6. Dominus ad Aaron & Mariam de Moyſe loquens, ejusque excellentiam ſuper alios Prophetas oſtendens ait: *Si quis inter vos Propbeta Domini, in viſione apparebo ei, vel per ſomnium loquar ad illum: at non talis ſervus meus Moyſes, qui in omni domo mea fideliffimus eſt: ore enim ad os loquar ei, & non per ænigmata, & figuras Dominum videt: ergo.* Ex his mox citatis verbis & S. P. Auguſt. probat Moyſen clare Dei Eſſentiam vidiffe: ſiquidem epiſt. 112. c. 13. ad Paulinam de videndo Deo, ubi poſtquam oſtenderat, quod Moyſes Exod. c. 33. petivit, ut claritatem Domini videret, cui dixerat: *Si inveni gratiam ante te, oſtende mihi temetiſſum manifeſte: dicit: deſiderio ejus etiam illud, quod petierat, fuiſſe conſeſſum, in libro Numerorum poſtea demonſtratum eſt, ubi Dominus arguit contumaciam ſororis ipſius, & dicit, aliis Propbetis in viſione ſe apparere & in ſomno: Moyſi autem per ſpeciem & non per ænigmata: ubi etiam addidit dicens, & gloriam vidit: quid ergo eſt, quod eum ſic fecit exceptum, niſi forte quia illa contemplatione dignum etiam tunc habuit populi ſui talem rectorem, & miniſtrum in tota domo ſua fidelem, ut quemadmodum concupiverat, videret Deum ſicuti eſt, quæ contemplatio cunctis filiis in fine promittitur.* Idem docet S. Pater lib. 12. de Gen. ad literam c. 28. Ex cit. loc. Num. c. 12. cum S. P. Auguſt. etiam probat. D. Th. in 4. diſt.



dist. 49. q. 2. a. 7. ad 4. Moysen vidisse Dei essentiam his verbis : Duplex eminentia visionis Moysi adscribitur : una Exod. c. 33. ubi dicitur , quod loquebatur Dominus Moysi facie ad faciem , sicut loqui solet homo ad amicum suum. Ex quibus tamen verbis haberi non potest , quod Deum per essentiam viderit , quod petit dicens : ostende mihi gloriam tuam , quod ei tunc concessum non est , unde dictum est ei , faciem meam videre non poteris - - - Alia eminentia visionis Moysi ostenditur Numer. c. 12. ubi Dominus de eo dixit ad Aaron & Mariam : ore ad os loquar ei , & palam & non per ænigmata , & figuras Deum videt , vel gloriam Domini secundum septuaginta , ubi ostenditur impleta fuisse ejus petitiō , qua petiverat in Exod. c. 33. ostende mihi faciem tuam , ita quod ante mortem Deum per essentiam vidit , ut August. dicit 12. super Gen. ad literam. Et in libro de videndo Deum. - - - Ergo. Item 2. 2. q. 174. a 4. Moyses ergo fuit aliis excellentior , primo quidem quantum ad visionem intellectualem : eo quod vidit ipsam Dei Essentiam , sicut Paulus in raptu , sicut August. dicit 12. super Gen. ad literam : unde dicitur Numer. 12. quod palam , non per ænigmata Deum vidit. Item q. 175. a 3. ad 1. ubi relato duplici modo visionis veritatis Divinæ dicit : Tertio modo ut contempletur eum in sua essentia , & talis fuit raptus Pauli , & etiam Moysis , & satis congruenter. Nam sicut Moyses fuit primus Doctor Judæorum , ita Paulus fuit primus Doctor gentium : ergo. Contra hoc

Dices 1. Juxta scripturam , & S. Th. nullus homo vivens potest clare videre Dei essentiam : ergo. R. dist. ant. nullus homo vivens potest clare videre Dei essentiam permanenter , conc. ant. transeunter , neg. ant. & conseq.

Dices 2. Visio clara Dei facit hominem beatum : atqui Moyses non fuit in hac vita beatus : ergo. R. dist. maj. visio clara Dei permanens facit hominem beatum simpliciter , conc. maj. transiens subdist. facit hominem beatum secundum quid ,

E 2

conc.

conc. maj. simpliciter, neg. maj. & sic dist. min. neg. conseq. solutio est D. Th. 2. 2. q. 175. a 3. ad 2.

Dices 3. Visio etiam tranliens non compatitur secum fidem & spem, ut habetur 1. ad Corinth. c. 13. v. 13. atqui Moyse non amisit fidem & spem: ergo. R. Visio tranliens non compatitur secum fidem & spem quoad actum, conc. maj. quoad habitum, neg. maj. & sic dist. min. neg. conseq. solutio est D. Th. loc. supra cit. ad 3.

Dices 4. Ex verbis Exod. c. 33. non probatur, quod Moyses viderit Dei essentiam etiam transeunter: ergo nec probatur ex verbis Numer. c. 12. prob. conseq. Numer. c. 12. v. 8. de Moyse dicitur: *ore enim ad os loquor ei*: & Exod. c. 33. v. 11. dicitur: *loquebatur Dominus ad Moysen facie ad faciem*: sed ex verbis Exodi non probatur: ergo nec ex verbis Numer. R. Neg. conseq. Disp. est: quod Numer. non solum Moyses dicatur *loqui ore ad os*, sed etiam *palam*, cui additur, *non per ænigmata*, & *figuras Dominum videt*: cum ergo negatio sit malignantis naturæ, destruit omnem figuratam, & ænigmaticam visionem. Exod. vero 33. hoc non additur, roganti Deum Moyse: *ostende mihi faciem tuam*: *non poteris videre faciem meam*.

Dices 5. Plus est videre Deum facie ad faciem, quam loqui ore ad os & palam: & patet ex 1. Corinth. c. 13. v. 12. videmus nunc per speculum in ænigmate, tunc autem facie ad faciem. Atqui ex verbis Exod. non probatur Moysen Dei essentiam vidisse: ergo nec ex verbis Numer. R. dist. maj. plus est, si nihil addatur, per quod illa visio excludatur, conc. maj. si aliquid addatur, neg. maj. & conc. min. neg. conseq. solutio clarescit ex præcedenti Dices 4.

### *Objectiones Contra 2. Conclusionem.*

I. **J**uxta S. Scripturam idem scripsit posteriores legis tabulas, qui scripsit primas: sed primas non scripsit Moyses, ergo  
nec

nec secundas. maj. prob. Deus in persona Angeli apparens Exod. c. 34. v. 1. dicit ad Moysen: *Præcide tibi tuas tabulas lapideas instar priorum, & scribeam super eas verba, quæ habuerunt tabulæ, quas fregisti: ergo.*

II. Dominus in præcitato textu Exod. c. 34. dixit *scribeam*: ad significandum, quod, qui priores scripsit, etiam scripserit posteriores: ergo. ant. prob. ex Deut. c. 10. v. 1. ubi Moyses totum factum narrat his verbis: *In tempore illo dixit Dominus ad me: dola tibi duas tabulas lapideas, sicut priores fuerunt, & ascende ad me in montem: faciesque arcam ligneam, & scribeam in tabulis verba, quæ fuerunt in his, quas ante confregisti, ponesque eas in Arca. Feci itaque arcam de lignis setim, cumque dolasssem duas tabulas lapideas instar priorum, ascendi in montem habens eas in manibus: scripsitque in tabulis, juxta id quod prius scripserat verba decem, quæ locutus est Dominus ad vos in monte de medio ignis, quando populus congregatus est: & dedit eas mihi. Ergo.*

III. Dicendo Dominum in persona Angeli sine ministerio Moylis posteriores tabulas scripsisse, nulla est antilogia inter locum Exodi & Deuteronomii: ergo si sine ministerio Moylis scriptæ sunt priores legis tabulæ, etiam posteriores. Ant. prob. Quando in Exodo dicitur: *scripsit in tabulis*, id referendum non est ad Moysen: ergo. ant. prob. S. P. Aug. super Deut. q. 15. dicit: *violenter quidem, sed certa necessitate compellimur, ubi dictum est, & scripsit in tabulis &c. non Moysen subaudire, sed Dominum: ergo.*

IV. Si Moyses posteriores legis tabulas scripsisset, tunc illum laboriosa in lapide sculptura, pro qua non jussit Dominus instrumenta afferre, debemus gravare, vel miraculum hic ponere: atqui neutrum dici potest: ergo. min. prob. quoad r. part. Deut. c. 10. Moyses minutim narrat omnia, quæ Deus ei jussit quantum ad secundarum tabularum scriptionem; sed nullam de adferendis secum instrumentis ad sculpendum in lapide

facit mentionem: & Moyſes præter Dei mandatum nihil hic auſus fuiſſet facere, ſed e contra prudenter debebat judicare, illa instrumenta non futura neceſſaria, cum Deus ei promiſiſſet & ſcribam in tabulis: ergo. prob. etiam min. quoad 2. part. Non ſunt ponenda miracula ſine neceſſitate: atqui miraculum illud non fuit neceſſarium: ergo.

## S O L U T I O N E S.

**A**D I. Sacrum textum eſſe intelligendum, Deum, qui in perſona Angeli hic apparet, ſe legis tabulas ſcripturum Moyſi promittere, quia Moyſe illas ſcribente ipſe illas authoritative, verba ſcilicet ſenſibiliter dictando, ſcribet. Unde Carth. ad locum objectum hic a. 64. dicit: *ad hoc Auguſtinus, aliique reſpondent, quod Dominus ſcripſit per authoritatem, Moyſes per executionem, videlicet Deo iubente in figura Angeli, quem dicit hic apparuiſſe.*

Ad II. reſpondet Hugo Card. in expoſitione cap. 10. Deut. *Ad hoc dicunt, quod tabulas ſecundas ſcripſit & Dominus & Moyſes, ſed Dominus authoritative, Moyſes miniſterio.* Contra quod obicit: ſed eadem ratione poteſt dici, quod Dominus ſcripſit iudicia, & omnia alia, quæ in lege ſunt, quia ejus authoritate ſcripta ſunt. Et ſolvit: plus eſt quam authoritas ibi: Domino enim per Angelum dictante ſcripſit Moyſes ſecundas tabulas: unde Dominus non tam Author, ſed & agens fuit: expone ergo: ſcribam, id eſt, ſcribi faciam, dictando ſcilicet quod in eis ſcribatur: & ſcripſit, id eſt, ſcribi fecit. Et ſic concordat cum Exod. c. 34. v. 28. ubi Angelus ſpecialiter Dei vicem gerens Moyſi dicit: ſcribe tibi verba hæc, quibus & tecum & cum Iſrael pepigi fædus - - & ſcripſit in tabulis verba fæderis decem, ſcilicet decalogum, qui proprie per verba fæderis intelligitur.

Ad

Ad III. S. Patrem non dixisse assertive verba ista, sed dubitative; sibi objiciendo dum dicit: *Non Moysen subaudire sed Dominum*: & illa postea solverè dicendo: *profecto non cogimur violento intellectu subaudire, quod Deus scripserit &c.*

Ad IV. Neg. min. ad 1. part. prob. dist. min. Si Moyses non cognoverit Deum per authoritatem, & se in executione tantum scripturum, conc. min. si hoc cognoverit, neg. min. Cum ergo Moyses hoc cognoverit, instrumenta illa secum attulit: dicit enim S. Pater August. expressis terminis super Exod. q. 166. *Posteriores tabulæ humano opere exsculptæ, & humano opere conscriptæ*: ubi S. Pater ita scriptionem attribuit Moy- si sicut dolationem: sicut ergo ad dolandas tabulas instru- menta disposuit, ita ad scribendas, quia utrumque ministerium fuit illi commissum: sicut ergo non gravamus Moysen laborio- sa dolatione, ita nec scriptione in tabulis lapideis: imo si Do- minus voluisset has tabulas scribere, quid indigebat eas per Moysen præparari? Præterea observat Dionysius Carth. ad hæc verba Exod. c. 34. *Scribe tibi verba hæc*: a. 64. *Septuaginta trans- tulerunt circa exordium hujus Capituli, scribes, satis credibile est, quod Moyses necessaria ad scribendum in tabulis secum accepit.* Ad 2. part. prob. dist. min. illud non fuit necessarium absolute, conc. min. supposita Dei voluntate, neg. min. Nam Dionysius Carth. loco mox cit. ait: *Alia multa supernaturalia fecit Deus per Moy- sen, ita & tabulas poterat Moyse facere ad scribendum cedentes ut ceram mollissimam, quemadmodum multis Sanctis in novo Testamen- to fecit Saxa, & cupra, ad suscipiendum signacula crucis, cedere tanquam ceram.* Ex his

Quæres I. Quare ante Moysen Scriptura S. data non fue- rit? R. cum D. Th. 1. 2. q. 98. a. 6. *Valde expediens fuisse Scripturam S. usque ad Moysen differri, ut hominis superbia convince- retur: de duobus enim homo superbiebat, scilicet de scientia, & de potentia: de scientia quidem, quasi ratio naturalis ei possit sufficere*  
ad



*ad salutem. Et ideo, ut de hoc ejus superbia convinceretur, permiffus est homo regimini suæ rationis absque adminiculo legis scriptæ, & experimento homo discere potuit, quod patiebatur rationis defectum, per hoc quod homines usque ad idololatriam, & turpissima vitia circa tempora Abrabæ sunt prolapsi. Et ideo post hæc tempora fuit necessarium legem scriptam dari in remedium humanæ ignorantiae: quia per legem est cognitio peccati, ut dicitur Rom. 5. Sed postquam homo est instructus per legem, convicta est ejus superbia de infirmitate, dum implere non poterat, quod cognoscebat. Ratio etiam est: quia in lege naturæ, cum paucissima essent Dei præcepta, ea Patriarchæ facile retinebant, & cum ad annos 800. & 900. vitam suam protraherent, ea suis filiis & nepotibus communicabant: ergo eis non fuit Scriptura necessaria. At vero ubi populus infinita fere accepit documenta, Christi Redemptoris tempore appropinquante doctior evaluit, ac evangelicis dotatus fuit consiliis, necesse fuit in memoriæ auxilium Scriptura, quæ manet: ergo.*

**Quæres 2.** Quare Deus vetus Testamentum literis voluerit mandari? *R.* cum S. P. August. Epist. ad Volus. id factum fuisse ad conciliandum Dei & hominum amorem. Præterea ut nobis certo constaret de hominis lapsu: item ad cognitionem Christi, & Messiae receptionem sive à Judæis sive à gentilibus, ut de cordis duritia convincerentur ex suis libris, in quibus hæc veritas continetur.

**Quæres 3.** Cur Christus Evangelium non traditione vivæ vocis, sed scriptis committi voluerit? *R.* ut tot rerum mirabilia, tot salutarium Consiliorum & præceptorum, Salvatoris beneficiorum, & amoris erga homines argumenta fideliter & sine mutatione falsæ doctrinæ hæreticorum ad posteros transmitterentur.

**QUÆ.**

## QUÆSTIO TERTIA.

*An 1. Scriptores Sacri circa res leviores memoriae lapsi sint passi? 2. An Scriptores Sacri ad scribenda fidei mysteria, ac determinandas morum regulas speciali quadam revelatione indiguerint, etiam ad ea, quæ proprio visu, vel auditu certissime hauserunt? 3. An Scriptores Sacri in omnibus, quæ scripserunt, præter specialem assistentiam Spiritus Sancti, etiam ejusdem speciali inspiratione affecti fuerint? 4. An singulæ veritates & sententiæ Scriptoribus Sacris à Deo inspiratæ sint? 5. An etiam singula verba, imo literæ ac apices literarum Sacris Scriptoribus à Deo sint inspirata? ut proinde vocabulorum compositio & stylus ad Deum referri debeat?*

Cum in hac quæstione plura involvantur, eam per Paragraphos distinctos absolvemus: in primo Paragrapho notanda dabimus, in reliquis Conclusiones ponemus, & objectiones solvemus. Igitur sit

### §. I.

Notanda pro statu quæstionis intelligendo,

**N**Otandum I. Tria in Sacris literis esse discernenda: nempe *Res seu sententias: Verba ipsa: Verborum seriem ac structuram seu stylum.* Res verbis expressæ sunt vel dogmata quædam: seu sententiæ, quæ fidem, vel mores spectant, vel prætorum temporum historiæ, vel prædictiones futurorum, vel leges ac præcepta, quibus homines ad virtutem informantur, & à vitiis retrahuntur. *Verba* sunt ipsæ voces, quibus Sacri contextus mens, ac sensus exprimitur. *Stylus* denique est verborum ordo, series, structura, & compositio.

F

Notan-

Notandum 2. Triplici modo concipi posse, Deum mentem alicujus Scriptoris afficere: videlicet vel *revelatione*; vel *inspiratione* seu afflatu: vel *Assistentia* quadam speciali. *Revelatio* est veritatis antea ignotæ divinitus facta manifestatio, ita Isaias c. 45. revelatione divina noverat, Cyrum aliquando futurum populi Israelitici liberatorem. *Inspiratio* seu afflatus est motus quidam interior, quo voluntas cæteræque potentiae loquentis vel scribentis à Deo impelluntur, & incitantur, ut certa quædam, non alia proferat, aut scribat: *Assistentia* specialis est peculiaris Divini Spiritus directio, qua cavetur, ne loquens vel scribens, seu lingua seu calamo falsi quidpiam profundat. Clarius de hac re vide dicta in sequenti §. III.

Notandum 3. Revelationem alicui contingere posse, quin sit inspiratus seu afflatus: item inspirationem seu afflatum quempiam habere posse, quin is adhuc de assistentia quoque certus sit: imo unam quamlibet sine utraque haberi posse. Exemplum inspirationis sine revelatione habetur Joan. c. II. v. 50. ubi refertur dixisse Caipham: *Expedi vobis, ut unus homo moriatur pro populo*, quod Caiphas ex secreto impulsu, seu inspiratione, non ex revelatione protulit: ex inspiratione, quia ut Scriptura dicit: *hoc autem à semetipso non dixit, sed cum esset Pontifex anni illius, prophetavit &c.* Non ex revelatione, quia Caiphas necdum sciebat JEsu pro salute generis humani, cruci esse affigendum.

Notandum 4. Aliquos Authores docere, Spiritum Sanctum præservasse Scriptores sacros, ne errarent in rebus gravioribus, quæ spectant ad fidem & mores: in levioribus vero proprio suo genio reliquisse, & in illis potuisse errare, atque defacto errasse, atque lapsum memoriae passos esse.

Notandum 5. Alios Authores docere, Spiritum Sanctum assistisse Scriptoribus sacris, ne errarent, inspirando tantum singulis veritates, & sententias; non tamen omnia & singula verba.

No-

**Notandum 6.** Alios tandem Authores docere, quod Spiritus Sanctus Scriptoribus sacris revelaverit immediate & expresse scribenda tam quoad sententias & veritates singulas, quam quoad verba & stylum: verbo quod Spiritus S. scriptori infuderit, quod & qualiter scriptis debeat mandare scribenda.

**Notandum 7.** Multipliciter aliquid posse scribi ex impulsu & inspiratione Spiritus Sancti. 1. Quia res, quæ scribitur, ignota erat scriptori, & solum ex Dei revelatione cognoscitur, & hæc dicitur inspiratio prophetica, sive propria revelatio. 2. Quia Deus scriptoris mentem ad scribendum movet, sive quia illa, quæ scribit, naturaliter, sive supernaturaliter noverit. 3. Quia non solum Deus ad scribendum movet, sed etiam, ut hoc vel illud scribat, inspirat. 4. Quia Deus specialiter assistit scriptori, ne in illis, quæ naturaliter vel supernaturaliter novit, scribendo erret vel ex malitia, vel ex naturali oblivione. 5. Ut scriptori singulas veritates & sententias, ac etiam ipsa verba inspiret, & stylum. Et hæc dicuntur revelatio impropria.

**Notandum 8.** Ut aliqua Scriptura sit sacra, non est necessaria inspiratio immediata prophetica, & propria revelatio: quia nequit dici proprie revelari, quod jam evidenter cognoscitur: revelatio enim propria est, qua res velata manifestatur; cum ergo Scriptores sacri varia scripserint, sic propria revelatio non semper requiritur: requiritur tamen semper inspiratio immediata, ut hoc vel illud scribatur.

**Notandum 9.** Spiritum Sanctum Scriptoribus sacris ea, quæ ignorabant, illa propria revelatione revelasse, ac species infudisse: ea autem, quæ jam noverant, scribentibus, immediate quidem inspirasse ac species præexistentes renovasse, non tamen propria revelatione revelasse.

**Notandum 10.** Scriptores sacros in scribendo non fuisse liberos quoad specificationem, bene tamen quoad exercitium. Ratio 1. part. est: quia Scriptores Sacri debebant scribere illa,

& non alia , quæ Spiritus S. eis suggerebat ; hinc Pseuto-Propheta Balaam , cum maledicere Israelitis summopere optaret , dicebat Numer. c. 22. v. 14. *Si dederit mihi Balac plenam domum suam argenti & auri , non potero immutare Verbum Domini Dei mei , ut vel plus vel minus loquar.* Et v. 38. *Numquid loqui potero aliud , nisi quod Deus posuerit in ore meo.* Et c. 23. v. 12. *Num aliud possum loqui , nisi quod iusserit Dominus ?* Et v. 20. *Ad benedicendum adductus sum : benedictionem prohibere non valeo.* Ergo. Ratio 2. part. est. Apostoli , dum ante Reges & Præsides loquendo profitebantur fidem , libere quoad exercitium fuerunt locuti , & loquendo fuerunt meriti : ergo etiam Scriptores sacri in scribendo fuerunt liberi quoad exercitium. conseq. prob. Ideo libere non scripsissent quoad exercitium , quia Deus eis dictavit omnia verba : sed hæc ratio est nulla : ergo. min. prob. Apostolis , dum starent ante Reges & Præsides , non solum Christus promisit , quod illis Spiritus S. inspiraret verba , sed etiam ut non ipsi loquerentur , sed Spiritus S. in eis loqueretur , ut patet ex Matth. c. 10. v. 10. & tamen hoc non obstante loquebantur libere quoad exercitium , fueruntque per hoc meriti , ad meritum autem requiritur libertas : ergo etiam à pari. Si etiam cum inspiratione verborum ad loquendum potest componi libertas : hæc etiam componi poterit cum inspiratione verborum ad scribendum.

Dices 1. Scriptores sacri comparantur calamo : dicitur enim Psal 44. v. 2. *Lingua mea calamus scribæ velociter scribentis :* atqui calamus libere non scribit : ergo. R. dist. maj. Scriptores sacri comparantur calamo tanquam instrumento Dei vivo & libero , conc. maj. tanquam instrumento Dei mortuo , & necessario , neg. maj. & sic explicatur etiam cit. Psal. Etiam Sacerdos absolvens est instrumentum Dei , libere tamen absolvit. Aliud est de instrumento necessario , uti etiam patet ex Numer. p. 22. dum Deus posuit verba in ore Asinæ Balaam , de qua  
v. 28.



v. 28. dicitur: *Aperuitque Dominus os asinæ, & locuta est*: nam Dominus ita verba in ore hujus asinæ posuit, ut illa utpote carens libero arbitrio sine libertate loqueretur.

Dices 2. Scriptores sacri scripserunt ut à Deo necessario impuls: ergo scripserunt ut instrumentum necessarium. ant. prob. Ezechiel c. 1. v. 12. de quatuor animalibus, quæ ut SS. PP. explicant, præfigurabant Evangelistas, dicitur: *ubi erat impetus spiritus, illuc gradiebantur*; atqui impetus denotat necessitatem: ergo. R. dist. min. atqui impetus denotat necessitatem aliquando, conc. min. semper, neg. min. Denotat enim quandoque efficaciam moventis, qui movet agens juxta exigentiam suæ naturæ: adeoque in agente libero relinquit libertatem, semper intelligendo quoad exercitium: quia ipsum motum voluntatis, & liberi arbitrij Spiritus S. in agente libero causat.

Dices 3. Salomon fatetur se necessario scripsisse, uti & David: ergo. ant. prob. Prov. c. 30. v. 1. Salomon se vocat *Filium vomentis*: & David Psal. 44. v. 1. dicit: *Eruclavit cor meum verbum bonum*: sed vomitus & ructus denotant necessitatem: ergo. R. dist. min. sed vomitus & ructus naturalis denotant necessitatem, conc. min. vomitus & ructus mentis, neg. min. Dum Salomon se dicit *filium vomentis*, non ita se vocat propter necessitatem, sed potius propter ubertatem & abundantiam in dicendo, sive scribendo. Pariter David dicitur eruclare verbum bonum propter zelum & amorem, quibus verbum bonum exprimebat, non vero quasi necessitate coactus illud pronuntiaret.

Dices 4. Scriptores sacri à Deo moti ad scribendum, non potuerunt non scribere: ergo. R. dist. ant. non potuerunt non scribere in sensu composito, conc. ant. in sensu diviso, neg. ant. & conseq.

Dices 5. Moyses necessitate coactus scripsit, alias de se Numer. c. 12. v. 3. non dixisset: *erat autem Moysen vir mitissimus*:

ergo. ant. prob. vir Sanctus, ut fuit Moyſes, libere ſe ipſum non ita laudaſſet : ergo. R. diſt. ant. vir Sanctus, ut fuit Moyſes, non ita ſeipſum laudaſſet, ſi fuiſſet liber tam quoad exercitium, quam quoad ſpecificationem, conc. ant. ſi tantum fuiſſet liber quoad exercitium, neg. ant. verum quidem eſt, quod Moyſes utpote vir Sanctus non ita ſe ipſum laudaſſet, ſi liber fuiſſet quoad ſpecificationem, quia tunc ex ſe ipſo ſeſe laudaſſet : ſed cum fuerit in ſcribendo tantum liber quoad exercitium, ſic ſe ipſum tantum laudavit, in quantum ad hoc à Deo fuit motus, adeoque laus illa redundat in Deum, cujus ope & gratia Moyſes tam mitis fuit & manſvetus.

Dices 6. Vates gentilium non fuerunt liberi in loquendo, loquebantur enim qualiſi Arreptitii : atqui Scriptores Sacri movebantur à Deo ſicut vates gentilium : ergo. R. diſt. min. atqui Scriptores Sacri movebantur à Deo ſicut vates gentilium quoad aliqua, conc. min. quoad omnia, neg. min. magnam inter Scriptores S. & vates gentilium differentiam oſtendit D. Th. 2. 2. q. 173. a. 3. in ☉. & ad 4. ibidem.

## §. II.

Dico I. Scriptores Sacri circa res leviores memoriae lapſum non ſunt paſſi.

**P**ROBATUR 1. Auth. S. P. Auguſtini lib. 2. de Conſenſu Evangelist. c. 12. dicentis : *Omnem falſitatem abeſſe ab Evangelistis decet, non ſolum eam, quæ mentiendò promitur, ſed etiam quæ oblivijcèdo* : ubi S. Doctor non ſolum graves errores ab Evangelistis, conſequentèr etiam ab aliis Scriptoribus Sacris excludit, verum etiam leviores, quæ memoriae defectu poſſunt contingere. Ergo.

Probatur 2. Ex S. Chryſoſtomo homil. 1. ad populum Antioch. ubi agens de re, quæ valde parvi momenti eſſe videtur,

tur, nempe de eo, quod Apostolus de Salute Timothei Sollicitus scribebat, ut modico vino uteretur propter stomachum, ita dicit: *Nec illas quidem, quæ tenues esse putantur, scripturarum sententias prætermittamus. Nam & ipsæ de Spiritus gratia sunt. Spiritus autem gratia nunquam parva & vilis, sed magna, & dantis munificentia digna: ubi autem error est etiam levis, quomodo semper & ubique magna, & mirabilis invenitur Spiritus S. gratia? unde aliquibus interjectis concludit: discas, quod non tantum non est inanis admonitio, sed necessaria & utilissima fuit: & rationem dat: non Pauli est hoc, sed Spiritus gratiæ. Ergo.*

Probatur 3. Ratione: Si S. Scriptura in aliqua parte falsa inveniretur, posset in totum reprobari, nullumque ex illa argumentum esset firmum: instrumentum enim ex parte falsum, reputatur falsum in totum *leg. si ex falsis. C. de transact.* sed hoc admitti non potest: ergo.

## O B J E C T I O N E S.

I. 2. Corinth. c. 17. v. 8. Paulus testatur se pœnitentiæ affectum, quod Corinthios contristaverit prioris Epistolæ reprehensione: sed qui fatetur pœnitentiam, supponit errorem: ergo Apostolus Paulus erravit.

II. Paulus fatetur se insipienter, & in insipientia fuisse locutum 2. ad Corinth. c. 11. v. 17. ubi dicit: *quod loquor, non loquor secundum Deum, sed quasi in insipientia:* sed hoc fieri non posset, nisi Apostolus existimaret se in rebus saltem levioribus errasse: ergo.

III. Paulus in eadem Epistola dicit se omnibus plus laborasse, & errorem suum agnoscens statim subjungit: *non autem ego, sed gratia Dei mecum:* ergo.

IV. Apostoli ex proprio genio varia scripserunt: ergo saltem in iis potuerunt errare. ant. prob. Paulus scribens ad Corinthios

thios clare fatetur, eorum, quæ scribit, aliqua esse præcepta Domini, & aliqua non Domini sed sua: atqui præcepta ab Apostolo ut sua tradita debuerunt esse proprio genio Scripta: ergo. maj. prob. ex 1. ad Corinth. c. 7. v. 10. ubi ait: *iis, qui matrimonio juncti sunt, præcipio non ego, sed Dominus* & v. 12. dicit: *Cæteris ego dico non Dominus*: ergo.

V. Indignum videtur tribuere Spiritui S. scriptionem aliquorum levium, quæ in scriptura habentur: v. g. quod canis secutus fuerit Tobiam peregrinantem, quod caudam moverit, quod Timotheus deferret Paulo penulam, quam Troade reliquerat, quod solus lucas manserit cum Paulo, quod Timotheus modico vino uteretur propter stomachum, quæ nil faciunt ad fidem, vel mores: ergo.

VI. Non omnia, quæ in libris sacris habentur, sunt ex instinctu Spiritus S. ergo. ant. prob. si omnia, quæ in S. libris continentur, essent ex instinctu Spiritus S. jam illa jure Divino essent credenda & observanda, nec Ecclesia illa posset commutare: atqui habetur contrarium: ergo. min. prob. Paulus præcipit bigamos non esse ordinandos Episcopos; dicit enim: *oportet Episcopum esse unius uxoris virum*: & dicit Evangelium, Apostolos fuisse missos ad baptizandum in nomine SS. Trinitatis: atqui Ecclesia quandoque dispensavit cum bigamis, & aliquo tempore permisit baptismum in nomine Christi: ergo.

VII. Matth. c. 23. v. 35. dicitur: *A sanguine Abel justique ad sanguinem Zachariæ filii Barabæ*: atqui in illo loco continetur error: nam S. Hieron. lib. 4. Comment. in cap. 23. Matth. dicit: *observandum quod ille Zacharias non sit filius Barabæ, sed filius Jojadæ Sacerdotis*: unde & scriptura refert 2. Par. c. 24. v. 22. *Non fuit recordatus Joas Patris ejus Jojadæ, quia sibi fecisset bona* - - - *quærimus quare Barabæ dicatur filius, & non Jojadæ*: ergo.

VIII. Spiritus S. non liberavit Apostolos in scribendis libris suis ab omni errore: ergo. ant. prob. Paulus redarguit Petrum, quod cogeret gentes judaizare. Idem Paulus 1. ad Timoth. c. 2. v. 11. dicit: *in faciem ei restiti, quia reprebensibilis erat.* Item Actor. c. 15. dicitur: Paulum dissensisse à Barnaba: atqui hæc fieri non potuerunt nisi uno vel alio errante: ergo.

IX. Matth. c. 5. continetur error: dicit enim, quod Christus dixerit: *dictum est, diliges proximum tuum, & odio habebis inimicum tuum:* atqui Christus dicere non potuit hoc fuisse dictum, cum odium inimicorum sit contra legem naturæ: ergo.

X. Lucas ait. Patriarchas translatos esse in Sichem in sepulchro, quod emit Abraham: atqui sepulchrum, quod emit Abraham, non fuit positum in Sichem, sed in Hebron, uti habetur Gen. c. 23. Ergo.

XI. Lucas rursus addit, Abraham sepulchrum emisse à filiis Hemor filij Sichem: atqui hic non unus sed geminatus reperitur error: nam primo Abraham non emit sepulchrum à filiis Hemor, sed ab Ephron Hetheo filio Seor duplicem speluncam emit, Gen. c. 23. Secundo Hemor non fuit filius Sichem, sed Sichem fuit filius Hemor, dicitur enim Gen. c. 33. emit (Jacob) partem agri, in qua fixerat tabernaculum à filiis Hemor Patris Sichem centum agnis: ergo.

## SOLUTIONES.

**A**D I. dist. maj. Paulus testatur se pænitentia affectum vere & à parte rei, neg. maj. in suppositione, transeat maj. quia Apostolus clare dicit: *etsi pæniteret:* quæ verba non sunt pænitentis, sed aliquid supponentis, vel concedentis. Ex quo non potest colligi, Apostolum fateri errorem à se commissum in priori sua Epistola, quia addit: *etsi ad horam vos contristavi, nunc gaudeo:* Apostolus autem gaudere non posset de errore à se commisso.

G

Ad



Ad II. Apostolum non fateri se in hoc capite fuisse insipienter locutum, sed quod Corinthii possent ipsum insipientem reputare: quia se ipsum, quod quandoque insipientium est, laudat; cum tamen se ipsum ex rationabili causa laudaverit, ut explicat S. Th. lib. 4. in hunc locum.

Ad III. Apostolum non agnovisse se errare dicendo hæc verba, plus omnibus laboravi, cum clare dicat: *non sumus sufficientes aliquid cogitare ex nobis*: sed ne aliqui incaute cogitarent se in prioribus verbis de suis viribus gloriaffe, se ipsum explicat addens: *non autem ego, sed gratia Dei mecum*.

Ad IV. Apostolum nullatenus velle innuere, quod aliqua proprio instinctu Corinthiis ponat præcepta: sed hanc inter utrumque præceptum ponit distinctionem: quod primum præceptum v. 10. Dominus proprio ore dederit, nempe Matth. c. 19. secundum autem præceptum v. 12. non habuerit ex ore proprio Christi, sed ipsi à Deo fuerit inspiratum. Ita D. Th. in hunc locum lect. 2. ubi dicit: *Præcipio non ego, scilicet indicta mihi auctoritate, sed Dominus hoc præcipit, dicens Matth. c. 19. quos Deus conjunxit, homo non separet*; quando autem addit Apostolus, *cæteris ego dico non Dominus*, intelligendum est, non Dominus dixit hoc proprio ore, ac si dicat: *Et hoc dico ex Deo, licet ipse non dicat hoc ore proprio*.

Ad V. dico 1. hæc non esse tam levia, ut objicientes putant, cum gravia contineant morum documenta, ut videre est apud interpretes. 2. respondet S. Hier. in proæmio in Epistolam ad Philemonem idem argumentum sibi objicienti: *quod si non putant esse parva, quorum & magna sunt, alterum mihi conditorem juxta Valentinum, Marcionem formicæ, vermium, culicum, locustarum: alterum cæli, terræ, maris, & Angelorum debet introducere. An potius ejusdem potentie est ingenium, quod in majoribus exercueris, etiam in minoribus non negare*. 3. dist. ant. Indignum videtur, si hæc juxta humanum captum expendamus, conc.  
ant.

ant. si inscrutabilia Dei judicia consideremus, neg. ant. Non est indignum Deo attribuere creationem vilium animalium: ergo nec indignum judicari debet attribuere Spiritui S. Scriptio- nem rerum, quæ humano captui videntur minimi momenti.

Ad VI. Neg. ant. ad prob. dist. maj. jam. omnia jure Di- vino essent observanda tanquam præcepta perpetua, neg. maj. tanquam præcepta temporaria, Consilia, vel instructiones mora- les, conc. maj. Ex eo enim non bene sequitur, omnia scripta sunt ex dictamine Spiritus S. ergo omnia statim ut præcepta jure di- vino sunt servanda: Spiritus S. liquidem dictavit præcepta stricte dicta, quorum aliqua sunt perpetua, aliqua temporaria, dictavit consilia, dictavit instructiones morales: inter quæ cum magna sit differentia, potest Ecclesia infallibili Spiritus S. inspiratione gubernata dispensare, & illa immutare juxta rerum exigentiam.

Ad VII. S. Hier. loc. cit. non loqui assertive, sed dubi- tative: varias enim circa hunc locum affert explicationes, & nullam proponit ut certo sequendam, quod dubitantis animi est signum. 2. Dato hoc loco contineri errorem, sic hic locus non est S. scriptura vere, cum error ille non possit dici dicta- tus à Spiritu S. sed contigit ex scribentium vel negligentia, vel inanimadvertentia. Esse autem hoc loco errorem videtur insinuare S. Hier. cum addat verbis citatis: *cum ergo Zacchariam teneamus, & occisionis consentiat locus, quærimus, quare Barachia dicatur filius, & non Joadæ? & respondet: Barachia lingua no- stra benedictus Domini dicitur, & Sacerdotis Joadæ iustitia Hebræo nomine demonstratur. In Evangelio, quo utuntur Nazareni, pro filio Barachia filium Joadæ reperimus scriptum.*

Ad VIII. Dist. min. atqui hæc fieri non potuerunt nisi u- no vel alio errante in scribendo scripturam S. neg. min. in facto aliquo, transeat min. Dico transeat, quia hoc ad præsentem difficultatem non spectat, utrum Apostoli in aliquo facto erra- verint? sed sufficit, quod in scribendo scripturam S. nullum

commiserint errorem: error enim talis non tribueretur scriptori, sicut in facto (de quo procedit argumentum) tribueretur Apostolis, sed Spiritui S. quod cum impium sit, à Scriptoribus sacris Spiritum S. omnem præservasse errorem est dicendum.

Ad IX. Dist. min. atqui Christus dicere non potuit hoc fuisse dictum ad declarandum odium inimicorum in antiqua lege esse præceptum, conc. min. ad redarguendam pravam interpretationem Judæorum, qui hoc male ex antiqua lege interpretabantur, neg min. In lege ergo veteri fuit dictum: *Diliges proximum tuum*: quia vero Deut. c. 25. legebant Judæorum Doctores, à Deo mandatum esse Judæis, ut gentium urbes delerent, imo ipsum quoque nomen earum, quod etiam in libris Regum præceptum, & executioni mandatum noverant, & aliunde videbant Moysen nihil aliud ab ipsis exegisse, nisi ut amicos diligerent: ideo inferendum putabant, non esse diligendos inimicos: quorum falsam illationem hic tacite redarguit Christus. Solutio est D. Th. qui in 3. dist. 30. q. 1. a. 1. idem sibi objicit, & ad illud ad 2. ita respondet: *quod in lege veteri etiam homines tenebantur ad dilectionem inimicorum, sicut patet per auctoritatem Levitici inductam c. 19. v. 18. Unde cum dicitur: odio habebis inimicum tuum, non est ex lege sumptum, quia nusquam hoc in litera invenitur, sed est additum ex prava interpretatione Judæorum, qui ex eo, quod præcipiebatur dilectio proximi, concludebant, quod inimici essent odiendi: Idem habet Glossa ordinaria: Sciendum est, in toto corpore legis non esse scriptum, odio habebis inimicum tuum: sed hoc dicitur, quantum ad traditionem scribarum.*

Ad X. Cum Venerab. Beda, Rabano, & Melchiorre Cano dico: quod S. Stephanus, cujus narrationem Lucas cit. loc. refert, non tam ordinem circumstantiis historiæ, quam causam, de qua agebatur, intenderit. Imo Venerab. Beda verecunde & modeste significat, Stephano id, quod vulgo fere solet accidisse, ut in longa videlicet narratione, eademque præsertim  
subita

subita, nonnulla confuderit, & miscuerit, in quibusdam etiam memoria lapsus fuerit, sed in his duntaxat, quæ ad rem parum aut nihil omnino attinerent, nam causæ, de qua potissimum agebatur, intentus erat. Lucas vero historiæ veritatem retinere volens, ne jota quidem immutavit, sed rem à Stephano narratam exposuit.

Dices: Ergo Stephanus passus est lapsum memoriæ saltem in re levi. R. Non Stephanum, sed Evangelistam ab omni lapsu vindicari debere: ex ratione, quia solis Apostolis, Prophetis & Evangelistis hunc honorem deferre catholica Fide docemur, ut nullum eorum vel memoria lapsum esse credamus, nullum nec in magnis nec in parvis errasse. Fuit quidem Stephanus plenus Spiritu S. & Spiritus loquebatur in eo; sed aliter tamen in Prophetis & Apostolis, aliter in Stephano locutus est: nunquid per Concilium Generale Deus Ecclesiæ loquitur, per Ecclesiæ Pastores Deus Ecclesiæ loquitur, per veteres Sanctos Deus Ecclesiæ loquitur? & hi tamen omnes in parvis labi possunt, memoria præsertim, ubi lapsus est facilius. Scriptorum ergo sacrorum hoc privilegium est, ut nullus eorum in scribendo erret; Apostolorum privilegium est, ut nullus eorum in docendo erret; Stephano hoc privilegium nec ratio concedit, nec auctoritas.

Inistes. Tamen S. Lucas Evangelista hæc refert: ergo ille memoriæ lapsus passus esse videtur. R. A sacris Scriptoribus alienum non esse, errantium etiam verba referre: sic enim Jephthe Judic. c. 11. trecentos annos possessionis prætendit, cum revera trecenti non fuissent, & tamen Sacer Historicus trecentos retulit. Ita sentit quoad hæc omnia Melchior Canus lib. 2. c. 18. per quod patet etiam responsio ad XI.



## §. III.

Dico 2. Scriptores sacri ad scribenda fidei myſteria, ac determinandas morum regulas ſpeciali quadam revelatione indiguerunt: non vero ad ea, quæ, proprio viſu vel auditu certiffime hauſerunt.

CUM jam in §. i. inter Notanda dictum ſit, *Inſpirationem* motionem eſſe interiorem à Deo in Scriptore ſacro excitatam, ut ſcribat ea, quæ Deus vult: hanc inſpirationem differre & à *revelatione*, & ab *aſſiſtentia*: à *revelatione* quidem, quia hæc eſt manifeſtatio rei antea ignotæ divinitus facta, & ſtare poteſt ſine illa interiore motione ad ſcribendum: ſicut & viciffim ſtare poteſt inſpiratio ſine præcedente revelatione, uti in conſuſione hac dicimus in caſu, quo Sacer ſcriptor inſpirante Deo aliquid ſcribit, quod ipſemet aut egit, aut vidit, aut audivit: quibus in circumſtantiis, ut infra probabimus, nulla ipſi opus eſt revelatione. Ab *aſſiſtentia* vero, cum aſſiſtentia non ſit ejusmodi motio interior, hoc eſt, à Deo in ſcriptore excitata ut ſcribat, quæ Deus ſcribi vult, aut intus ipſi loquitur, ſed ſpeciale ſolum auxilium Dei, vi cujus ſcriptor adjutus nihil ſcribit, niſi quod verum eſt. Jam ergo

Probatur i. pars Concluſ. Auctores Sacri Myſteriorum fidei, & eorum omnium, quibus homines ad finem ſupernaturalem perducereptur, exactam notitiam habuerunt: ſic Iſaias prædixit, quod Virgo eſſet paritura, quod Chriſtus multa paſſurus eſſet: Daniel prædixit in medio hebdomadæ Chriſtum occidendum: Zacharias triginta argenteis à diſcipulo tradendum vaticinatus eſt; atqui horum aliorumque, quibus homines ad finem ſupernaturalem perducere, atque dirigere oportet, non aliunde quam ex revelatione habere notitiam potuerunt: nulla enim qualiscunque induſtria humana propriis natu-



naturæ viribus rerum supernaturalium notitiam assequi potest: ergo ad hæc speciali quadam revelatione divina indiguerunt.

Probatur 2. Pars Concluf. Quando rerum series aliunde jam perspecta habebatur, v.g. Si Auctores Sacri propriis oculis quædam viderunt, auribus audierunt, ipsimet egerunt, tunc revelatione opus non erat: sed Auctores Sacri multa, quæ scripserunt, propriis oculis viderunt, ut Moyſes Ægyptiorum plagas, Joſue Iſraelitarum victorias in ingreſſu terræ promiſſionis: S. Joannes Chriſtum pendentem & morientem in cruce: vel à teſtibus fide dignis didicerunt: ergo ad hæc ſcribenda illis revelatione opus non erat. Mai. conſtat ex illo Joan. Epiſt. 1. c. 1. v. 1. dicentis: *quod fuit ab initio, quod audivimus, quod vidimus oculis noſtris, quod perſpeximus, & manus noſtræ contrectaverunt, teſtamur, & annuntiamus.* Item ex Luca, qui c. 1. v. 2. ea ſe ſcribere teſtatur, quæ ab illis ſibi tradita fuerunt, *qui ab initio viderunt, & miniſtri ſermonis fuerunt.* Ergo.

Ex his ſequitur: neque revelationem neceſſariam fuiſſe, ut narraretur, quomodo Tobix canis blandiente cauda herum ſuum anteverterit. Quomodo Auctor libri 2. Machab. ea, quæ à Jaſone Cyrenæo 5. libris fuſius ſcripta & enarrata fuerant, ipſe contraxerit, & uno breviori volumine collegerit. Quomodo S. Paulus moneat Timotheum, ut penulam, quam reliquerat Troade apud Carpum, veniens ſecum adferret, ut fideles ſalutaret, &c.

#### §. IV.

Dico 3. Scriptores Sacri in omnibus, quæ ſcripſerunt, præter ſpecialem aſſiſtentiam Spiritus Sancti, etiam ejusdem ſpeciali inſpiratione affecti erant: etiam ad ea, quæ viſu, auditu, aut narratione ab aliis Prophetis facta certiffime hauſerunt:

Pro-

**P**ROBATUR 1. Pars 1. Ex Scriptura. Psal. 44. Scriptor Canonicus comparatur *calamo scribæ velociter scribentis*, hoc est, calamo Spiritus S. ut S. Greg. L. 1. Moral. interpretatur. Psal. 86. *Dominus narrabit in Scripturis*. Item in Prophetis sæpius legimus: *hec dixit Dominus Deus*. S. Petrus c. 1. v. 22. ait: *non voluntate humana allata est aliquando Prophetia*, id est, S. Scriptura, *sed Spiritu S. inspirati locuti sunt Dei homines*, græce legitur, *Spiritu S. acti & impuls*i. S. Paulus 2. Timoth. c. 3. inquit: *Omnia Scriptura divinitus inspirata utilis est ad docendum*. Item ad Rom. c. 3. Scripturam eloquia Dei appellat: ergo

Probatur 2. Ex constanti traditione: In Symbolo Constantinopolitano dicitur de Spiritu S. qui locutus est per prophetas. S. Ignatius Epist. ad Magnesianos. S. Justinus Apol. 2. S. Clemens Alexandrinus in admonitione ad gentiles. S. Hieronymus Præfat. in Epist. ad Philemonem. S. P. Augustinus lib. 18. de Civit. Dei c. 38. Et alii docent, Scriptores Sacros ad scribendum fuisse inspiratos, motos & impulsos. Ergo.

Probatur 3. Nomine S. Scripturæ intelligimus verbum Dei Scriptum: atqui si non esset inspirata à Deo, sive quod idem est, Sacris Scriptoribus dictata, neutiquam foret Verbum Dei saltem formale, & proprie tale: siquidem hoc requirit, aut supponit locutionem Dei, qua absente jam non amplius Verbum Dei, sed verbum hominis erit, ut cuivis cogitanti palam est: ergo cum nomine S. Scripturæ nil aliud intelligamus quam Verbum Dei Scriptum, negari nequit, illam esse à Deo Sacris Scriptoribus inspiratam: ergo. Hinc S. Paulus 1. Thes. sal. c. 2. v. 13. ait. *Gratias agimus Deo sine intermissione, quoniam cum accepissetis à nobis verbum auditus Dei, accepistis illud non ut verbum hominum, sed verbum Dei*.

Probatur 2. Pars Conclus. 1. Sublata inspiratione Deus Auctor verbi illius dici non posset, nisi remote solum, quatenus videlicet primitus revelasset: atqui hoc implicat: ergo.

Pro-

Probatur 2. Auctores sacri in scribendo delectum quendam adhibere debuerunt, nec continuo calamis omnia credere, quæ ipsis quocunque modo manifestata fuissent: imo nec potuissent, cum vel à solo Salvatore nostro tam multa inter Apostolos degente gesta sint, ut juxta illud Joan. c. ult. si scribere veissent, totum orbem implerent: atqui hic delectus non potuit haberi à revelatione divina, quia multa sunt revelata, quæ scribi nunquam potuerunt: non etiam ab arbitrio ipsius Scriptoris, quia alias Divinus non esset: ergo ab inspiratione quadam speciali, quæ revelata à revelatis discernat, facta à factis segregaret, scribenda præ non scribendis determinaret: ergo.

Dictum fuit in Conclusionem: Præter specialem assistentiam Spiritus S. etiam speciali ejusdem inspiratione affecti erant: quia licet in Auctoribus sacris specialem Spiritus S. assistentiam requiramus, ne in actuali exercitio scriptio error irrepat: nihilominus tamen hæc sola minime suffecisset: nam alias etiam decreta summorum Pontificum ex cathedra loquentium, Canones Ecclesiæ & Conciliorum Oecumenicorum, in quibus condendis æque adest Specialis Spiritus S. assistentia, forent verbum Divinum: quod tamen dicinequit, cum ortum suum puræ creaturæ in acceptis referant. Ex his

Jam infertur, S. scripturam pro Authore habere Deum: si ve enim materiam, quam S. Scriptura continet, si ve modum, quo per tot sæcula florentissime fuit propagata, attendamus, utrinque illucescit, illam non posse alium habere Authorem, præterquam Deum. Materia quam continet, sunt sanctissimorum documenta, mytheria profundissima, & prophetiæ arcanissimæ, quas multo ante prædictas suis jam temporibus mirabili cum consensu impletas cernimus, & adhuc implendas esse, dubitare ex iis, quæ suum sortitæ sunt effectum, non amplius possumus. Modus propagationis illius est omnino mirabilis ac Divinus. Divulgata est per totum terrarum orbem, & quidem

potissimum ope hominum inopum, cæteroquin rudium, non vi aut occultis artibus, sed simplici prædicatione, quod jure prodigium, miraculumque censeretur debet. Hæc profecto sunt, quæ nonnisi dextera excelsi operari potuit: adeoque S. Scriptura pro Authore habet Deum.

Dices 1. Si S. Scriptura habet pro Authore Deum, & est divinitus inspirata, vel est inspirata quoad omnia, quæ in ipsa continentur, vel duntaxat quoad aliqua? non quoad aliqua: hæc enim præ aliis non possunt determinari. Non quoad omnia, quia plurima in ea existunt, quæ quia sunt communia nonnunquam sensui adversa, & forte non adeo pia, à Deo, qui amat pietatem, & majestatem, S. scriptoribus dictata, aut inspirata fuisse fidem superat: v. g. colloquium serpentis cum Eva, & loquela Asinæ Balaam: cantica canticorum, & maledictiones in psalmis Davidicis passim occurrentes: ergo. 2. S. scripturam quoad omnia esse inspiratam, id est, non tantum quoad abstrusiora fidei mysteria, sed etiam quoad res levioris momenti, & mere historicas: alias S. scriptura innumeris exceptionibus foret obnoxia, præsertim apud eos, qui foris sunt, & Ecclesiam non audiunt: quivis enim posset, & vellet excipere præcipue in rebus, quæ captum nostri intellectus transcendunt, eas non esse à Spiritu S. inspiratas: ex quo sequeretur, S. scripturam non amplius esse inconcussam fidei regulam. Colloquium serpentis cum Eva, & asinæ cum Balaam equidem communi sensui adversum videtur, quatenus novimus nec serpenti, nec asinæ convenire vocis humanæ usum: ruit tamen suspicio falsi, si perpendimus, non serpentem, sed in serpente locutum dæmonem primum mendacem, ut insinuat S. Joan. in suo Evang. c. 8. v. 44. Non asinam, sed in asina Angelum, ut ipse contextus Numer. c. 22. v. 28. &c. manifestat, locutum fuisse. Cantica canticorum sunt dulce epithalamium sanctarum nuptiarum Christi cum Ecclesia, hinc non debent in sensum reprobum detorqueri. Davit autem  
Psal.

**Psalmes Regius loquitur in nomine , cujus est retribuere , & ulcisci.**

Dices 2. S. scriptores multa suis scriptis inseruere, quæ proprijs viderunt oculis , propriisque tractarunt manibus , ut S. Lucas testatur in exordio sui Evangelii : & S. Joan. c. 1. ergo hæc ut scriberentur , non requirebant inspirationem. R. Exinde plus inferri non posse , quam quod ejusmodi res sint quidem scriptæ sine revelatione , non item sine inspiratione. Quæ ex S. Luca & Joanne adferuntur , non obstant : hi enim ideo ab humana notitia propriis sensibus vel testibus hausta sibi fidem conciliarunt , ut Ethnicos facilius ad Christi fidem adducerent , ab his enim , si se divinitus inspiratos dixissent , cum inspiratio Divina ipsis penitus ignota fuerit , nullam fidem habuissent , imo potius sibilo explosi fuissent.

Dices 3. Leges & ritus à Moyse introducti , item festa , & sacrificia Hebræorum ab Ægyptiis profluxerunt , quorum sapientia Moyse in aula Pharaonis educatus imbutus erat : sic ritus circumcisionis , ut testantur Herodotus , & Diodorus siculus , nec non complura festa Hebræis cum Ægyptis communia erant : item præcepta moralia , quæ Moyse in Decalogum intulit , fere omnia Ægyptiis injuncta erant : quin & sacrificia Judæorum non à Deo , sed re ipsa à gentium ruditate , cultuque superstizioso Ægyptiorum promanarant : ergo Moyse à Deo ad illa scribenda inspiratus non fuit. R. Omnia in argumento adducta esse potius deliria : quia Moyse in nullo Pentatevchi libro memorat Hebræos ea omnia Ægyptiis debere , quæ in Exodo aut Levitico tam accurate præscripta sunt , quin potius refert à Deo cautum fuisse , ne Hebræi Ægyptiacos ritus amplexarentur , ut legitur Levit. c. 18.



S, V,

Dico 4. Omnes sententiæ, & singulæ veritates, seu sint dogmata fidei atque morum: seu ordinationes judiciorum, sacrificiorum atque rituum, seu præteritorum temporum historiæ, vaticinia & futurorum prædictiones, seu denique leges atque præcepta, quibus homines à vitiis retracti ad virtutem informantur, à Deo Sacris Scriptoribus sunt inspirata.

**P**ROBATUR 1. Auth. S. Scripturæ. Ad Hebræ. c. 2. dicitur: *Multifarie, multisque modis olim Deus locutus est Patribus in Prophetis.* Luc. c. 1. *Deus locutus est per os sanctorum, qui à sæculo sunt Prophetarum ejus.* S. Petrus Epist. 2. c. 1. *Omnis Prophetia scripturæ propria interpretatione non fit, non enim voluntate humana allata est aliquando prophetia: sed Spiritu S. inspirati locuti sunt Sancti Dei homines.* S. Paulus 2. ad Timoth. c. 3. v. 16. *Omnis Scriptura divinitus inspirata utilis est ad docendum &c. ergo.*

PROBATUR 2. Ex SS. Patribus: S. Irenæus lib. 2. adversus hæreses c. 47. inquit: *Scripturæ quidem perfectæ sunt, quippe à verbo Dei & Spiritu ejus dictatæ.* Tertull. lib. de habitu muliebri c. 3. *Legimus omnem Scripturam ædificationi habilem divinitus inspirari.* S. Chrysost. Hom. 21. in c. 5. Genes. *Nihil hic Scriptum est, quod non multas habeat sensuum divitias, quando quidem divino Spiritu afflati Prophetæ locuti sunt, ita uti à Spiritu S. scriptæ, ingentem in se continent thesaurum.* Et S. P. August. lib. de consens. Evang. c. 12. *Si in sacro quovis libro unaquælibet falsitas reperitur, totius libri certitudo interit: Sed hoc secundum dicendum non est: ergo nec primum; subf. sed si non reperitur falsitas, omnia sunt à Spiritu S. utpote Spiritu veritatis dictata: ergo.*

PROBATUR 3. Ratione: Scripturæ sacræ libri communiter dicuntur Verbum Dei, seu eloquia Dei: sed non possent ita

no-

nominari, si non inspirante Deo conscripti fuissent: nam verbum Dei, seu eloquium Dei non aliter sumere possumus, nisi quod Deus ea, quæ in mente sua Divina concepit, locutus fuerit per Sacros scriptores, atque ea ipsa iisdem Scriptoribus dictaverit: si enim Spiritus S. tantum adstitisset S. Scriptoribus, ut nihil nisi veritati conforme scriberent, tunc vere Scriptura illa tantum erit verbum hominis, non verbum Dei: si enim quis alicui tantum assisteret, nullus dicet, illud verbum scriptum esse proprie verbum assistentis. Ergo. Applicentur huc etiam probæ prioris §.

*Objectiones sunt sequentes.*

I. S Criptores Sacri in novo testamento nonnunquam allegant, quæ ita non habentur in antiquo: vel aliter quidpiam refertur ab uno Scriptore, quam ab altero: ergo non videntur in omnibus, quæ scripserunt, fuisse à Deo afflati seu inspirati. Ant. prob. Matth. c. 2. v. ult. citat aliquod testimonium à Prophetis dictum, quod tamen in nullo Propheta legitur: *quoniam Nazareus vocabitur*: quæ verba in nullo Prophetarum libro leguntur. Item idem Evangelista Jeremiam pro Zacharia posuit, dum ait: *tunc impletum est, quod dictum est per Jeremiam Prophetam dicentem: & acceperunt 30. argenteos &c.* Quæ prophetia non in Jeremia, sed Zacharia reperitur: ergo.

II. Marcus in Isaia scriptum affirmat, quod in Malachia est: nam cap. 1. hæc verba leguntur: *Sicut scriptum est in Isaia: Ecce ego mitto Angelum meum*: quæ verba non in Isaia, sed Malachia habentur: ergo.

III. S. Marcus c. 14. v. 25. Christum hora tertia crucifixum narrat, qui tamen juxta Joan. c. 19. hora fere sexta à Pilato judicatus est: ergo.

IV. Numer. c. 14. v. 29. & 30. dicitur: quod nullus

Israelitarum natus ultra viginti annos ingressurus sit terram promissionis præter Caleb & Josue, & tamen constat ex libro Josue c. 17. Eleazarum Sacerdotem tunc viginti annis majorem ingressum esse terram hanc: ergo.

V. Matthæus Christi Genealogiam ducit à David per Salomonem Davidis Filium: Lucas vero c. 3. eandem ordine retrogrado genealogiam ducit ad David per Nathanem alterum Davidis filium, ait enim, *qui fuit Matbatba, qui fuit Natban, qui fuit David*: ergo.

VI. Matthæus Josepho patrem assignat Jacob, scribens: *Jacob autem genuit Joseph virum Mariæ.* Lucas vero Josepho patrem tribuit Heli, scribens: *Joseph qui fuit Heli, qui fuit Matbat.* Ergo.

VII. Genealogia Christi, quam Matthæus affert, cum historia veteris testamenti non consonat, dicit enim hic Evangelista, Joram genuisse Oziam, ubi tamen 4. Reg. c. 24. dicitur, quod Joram genuerit Ochoziam, Ochozias genuerit Joas, Joas genuerit Amasiam; Amasias genuerit Oziam: ergo Matthæus tres gradus genealogicos omisit: ergo.

VIII. S. Lucas texendo genealogiam Christi dicit, Cainan filium fuisse Arphaxad, Sale autem filium Cainan; constat vero Genes. c. 11. Sale non ipsius Arphaxad nepotem fuisse sed filium, nullamque inter hos mediam generationem intercessisse: ergo superflua est in genealogia Christi una generatio: ergo.

IV. S. Matthæus ait: Josias genuit Jechoniam: & 4. Reg. c. 24. dicitur: quod Josias genuerit Joachim, Joachim vero Jechoniam: ergo unum gradum genealogicum Matthæus omisit: ergo.

X. Si Scriptores Sacri in omnibus, quæ docuerunt, vel scripserunt, fuissent divinitus inspirati, debuissent Christiani Antiocheni absque ulla hæsitatione credere Paulo & Barnabæ, qui docebant legales Judæorum ceremonias post passionem Christi

fi Domini fuisse abrogatas: atqui non crediderunt, sed exortam illam legalium quæstionem detulerunt ad Ecclesiam Hierosolymis congregatam, ut in hoc Consilio hæc quæstio dirimeretur: ergo.

XI. S. Paulus ad Galat. c. 2. testatur, se perrexisse ad Ecclesiam, quæ Jerosolymis erat, ut cum ea doctrinam, quam prædicabat, conferret, illius judicio probandam: ergo ipse S. Paulus videtur sensisse, non omnia, quæ docebat, sibi fuisse à Deo inspirata; alias enim non postulasset, ut Evangelium, quod Gentibus prædicavit, auctoritate Ecclesiæ comprobaretur. Ergo.

XII. Gen. c. 4. v. 15. refertur, quod Deus promiserit Caino, eum non occidendum fore, tamen constat, ipsum postea à Lamecho fuisse è vivis sublatum: ergo.

## S O L U T I O N E S.

**A**DI. Neg. ant. ad prob. 1. dico cum S. Hieron. quod S. Matthæus nullum speciatim citans Prophetam solum indicare voluerit prædictum fuisse ab omnibus Prophetis Messiam, seu Jesum Christum fore Sanctum, & Nazaræorum more Deo consecratum iri. Ad alterum dico cum S. P. Augustino, divino plane Consilio factum fuisse, quod Evangelista Jeremiam pro Zacharia posuerit, ut inde innotesceret, omnes Prophetas uno eodemque Spiritu ita inter scribendum fuisse afflatos, ut quæcunque per eos Spiritus S. dixit, & singula sint omnium, & omnia singulorum. Sunt, qui ad hunc locum respondent, errorem ex parte librarii intervenisse, qui Jeremiam pro Zacharia posuit. Sunt & alii dicentes, locum citatum & Jeremiæ, & Zachariæ esse, sed non amplius in scriptis Jeremiæ, quæ supersunt, inveniri, eo quod vel Judæi illum nequiter expunxerunt, vel alio casu interierit.

Ad

Ad II. Verba illa : *sicut scriptum est in Isaia*, non referri ad omnia ea, quæ sequuntur, sed ad illa tantum, *vox clamantis in deserto* &c. quæ apud Isaiam c. 40. reperiuntur; illa vero *ecce ego mitto Angelum meum*: Evangelistam addidisse, quod jure facere potuit, quamvis eadem in alio Propheta reperiantur.

Ad III. Dico cum S. Th. 3.<sup>o</sup> p. q. 46. a. 9. ad 2. ex S. P. August. l. 3. de consens. Evang. c. 13. Juxta Marcum hora tertia Christum Crucifixum fuisse clamoribus Judæorum: juxta Joannem vero hora quasi sexta facto militum. 2. dico, Marcum intelligere horam tertiam non incipientem, sed jam vergentem ad finem, & accedentem ad horam sextam: & sic benè concordatur cum Joanne, qui non dicit Christum Crucifixum hora sexta, sed hora quasi sexta, hoc est hora sexta quidem nondum incæpta, sed jam appropinquante. Unde

Observandum: quod, quemadmodum nox apud Judæos in quatuor vigilias, ita dies in quatuor stationes seu partes divisa sit. Prima diei pars à diluculo exordium sumebat, & durabat usque ad horam diei tertiam, quæ apud nos est hora diei nona matutina, quæ ideo vocabatur prima, eo quod ab ea dies initium sumeret. Secunda diei pars incipiebat ab hora tertia, seu ab hora nostra nona, & protrahebatur usque ad horam sextam, hoc est, usque ad meridiem, ac dicebatur hora tertia, quia à tertia habebat exordium. Tertia diei pars incipiebat ab hora sexta, id est, à meridie nostro, & durabat usque ad horam nonam, hoc est, usque ad tertiam nostram pomeridianam, appellabaturque similiter ab hora, unde principium acceperat, hora sexta. Quarta diei statio, seu diei pars incipiebat ab hora nona, seu tertia nostra pomeridiana, & durabat usque ad occasum solis, vocabaturque vel hora nona, vel Vespera.

Ad IV. Solos murmuratores ab ingressu terræ fuisse exclusos, ut liquet ex allegato textu: cum itaque Eleazarus Sacerdos, & plures de Levitis fuerint immunes à murmure, neque etra promissa eis denegari debuit. **Ad**



Ad V. & VI. Dico 1. cum Julio Affricano: quod Jacob filium Joseph reipsa genuerit: eundem vero filium sibi legalem adsciverit Heli: lex enim erat Deut. c. 25. ut si frater sine liberis decederet, frater superstes relictam viduam duceret, & semen fratris excitaret. Secundum hanc legem enim, quæ *Leviratus* dicta (quia levir mariti fratrem sonat) primogenitus, qui ex secundo illo matrimonio procreabatur, secundum naturam quidem filius mariti secundi erat, quia ab ipso naturaliter genitus: secundum legem tamen prioris mariti filius censebatur; Jam autem Jacob & Heli fratres erant, & sine liberis mortuus est Heli: Jacob frater ejus ducens in uxorem viduam ejus genuit ex illa Joseph: qui filius fuit naturalis Jacob, filius legalis Heli. Hoc modo conciliat Evangelistas Julius Affricanus dicens, quod Matthæus loquatur de filio naturali, Lucas vero de filio legali. Hanc sententiam etiam tenet S. Ambrosius, S. Hieronymus, & S. Thomas. Hæc opinio ab antiquitate sua laudatur. Dico 2. cum Cornelio à Lapide: quod dum Lucas dicit *qui fuit Heli*, non velit, quod Joseph fuerit filius Heli, sed gener Heli, seu Sponsus B. Virginis Mariæ filiæ Heli, aliter dicti Heliachim seu Joachim: indeque fit, quod Lucas non utatur verbo *genuit*, quo utitur Matthæus, sed verbo *fuit*, ut indicet, quod licet Joseph fuerit Heli, non tamen fuerit filius Heli: sicut dum dicitur: *Adam qui fuit Dei*, licet Adam non fuerit filius Dei, sed solum plasma seu opus Dei, quia à Deo non genitus Adam sed plasmatus. Similiter Christus dicitur filius Joseph, licet non sit genitus à Joseph, sed ex eo solum, quod sit filius Sponsæ Joseph, scilicet Mariæ: unde & Joseph dici potest fuisse Heli, licet non fuerit ex Heli natus, sed ex eo præcise, quod sit Sponsus Mariæ filiæ Heli: præsertim cum vir & uxor per conjugium fiat unum, & quasi una persona Civilis, habeantque communia omnia. Hæc opinio etsi recentior est planior, atque ad explicandas difficultates aptior quam

I

prior

prior. Hæc opinio exhibet 1. Quod Mathan sit communis Jacobi & Annæ Pater: Avus Josephi Paternus, Mariæ vero Maternus: Josephus & Maria Amitini. 2. Quod Elifabetha ex Sobe Mathanis filia, & Maria ex Anna itidem Mathanis filia sint consobrinæ: Elifabetha & Josephus Amitini: Jacobus & Joannes cognati in quarto gradu, Jacobus major & Judas cognati Christi in tertio gradu. Ex hac quoque opinione & sententia apparet 1. Utramque genealogiam, Matthæi nempe & Lucæ non tantum putativæ vel legaliter, sed vere & realiter pertinere ad B. Virginem & Christum: huncque juxta Scripturam 2. Reg. c. 7. v. 12. Item Psal. 88. v. 37. vere & naturaliter descendere ex semine Davidis, nempe per Annam intervenientem ex Salomone, per Joachimum. ex Nathane: cum tamen in sententia priori Affricani vel neutra, vel saltem alterutra genealogia nil pertineat ad Mariam & Christum, sed tantum ad Josephum, qui Christi Pater vere non fuit. Apparet 2. S. Lucam texuisse genealogiam Christi per Avum ejus Heli seu Joachim, quæ est communis sententia S. P. Augustini, Dionysij Carthusiani, Cajetani &c. Apparet 3. B. Virginem utpote unicam Hæredem ex lege nupserit viro non tantum ex eadem tribu, sed etiam familia proximo, nempe Josepho, qui cum Maria ex eadem fuit familia Mathanis, Josephus Nepos ex patre, Maria neptis ex Matre. Tandem 4. apparet, duplici titulo Christum fuisse filium Davidis, jureque duplici in Davidis regnum successisse, Matthæo è Regis Davidis stemmate genealogiam per Salomonem usque ad Mathanem Annam & Josephum deducente: Luca vero per Nathanem alterum Davidis filium stemma B. Virginis & Christi genealogice enarrante. Sed contra hanc sententiam Cornelij.

Dices 1. Hæc sententia nullum habet fundamentum in Scriptura, & traditione Patrum: ergo non est præferenda utpote nova sententiæ Affricani, quam antiqui Patres tam Græci,  
quam

quam Latini amplexi sunt. R. Neg. ant. fundamentum ex Scriptura est hoc, quod S. Matthæus expresse dicat se scribere librum generationis Jesu Christi, quod sane satis intelligi non posset, si tam ista, quam S. Lucæ genealogia pertinerent ad Josephum, qui non fuit nisi Pater Christi putativus.

Dices 2. Incertum est, an B. Anna fuerit filia Mathanis, cum de hoc altum sit in Scriptura silentium, nec probatæ fidei Authoris testimonium adferri possit. Ergo. R. Neg. ant. nam ad hoc, quod B. Annam dicamus filiam Mathanis, nos cogit D. Matthæus, qui profitetur se scribere Genealogiam Christi, quæ tamen sine hoc medio nil pertinebit ad Christum, sed Josephum. Præterea falsum est, quod nullum probatæ fidei Authoris testimonium adferri possit: cum Menæum, seu officium Ecclesiasticum Græcorum 8. Septembris in Hymnis & laudibus B. Virginis ipsi Mathani B. Annam, Soben, Jacobum assignet: cui accedunt Cajetanus, Lyranus, S. Hippolythus Episcopus Portuensis & Martyr apud Nicephorum L. 2. c. 3. Imo Cleopham fratrem S. Josephi testatur Hegesippus, qui vixit sub ipsa tempora Apostolorum.

Dices 3. Incertum est, an Heli idem sit ac Eliakim & Joakim: ergo. R. Neg. ant. quia Eli per apocopen Hebræis consuetam idem esse ac Eliakim, sive Joakim, patet 1. ex 4. Reg. c. 23. v. 24. Item 2. Paralip. c. 36. v. 4. ubi Joakim Rex Juda vocatur Eliakim. patet. 2. ex Judith c. 4. v. 11. ubi Eliakim Pontifex vocatur Joakim.

Dicet 4. In hac sententia, qua dicitur, quod Heli fuerit Pater Deiparæ, sequitur, quod Christus secundum Maternum solummodo genus descenderit à Davide per Salomonem: secundum Paternum vero genus per Nathanem: sed hoc dici nequit: ergo. min. prob. hoc adversatur antiquissimorum Patrum, & omnium fere Theologorum doctrinæ, qui docent: promissiones Davidi factas de nascituro Messia impletas esse in linea Sa-

lomonis; & non Nathanis: ergo. R. Conc. maj. neg. min. ad prob. dist. ant. docent promissiones Davidi factas de nascituro Messia impletas esse in linea Salomonis abstrahendo, an per rammum Maternum vel Paternum, conc. ant. determinate per rammum paternum, neg. ant. & conseq.

Dices 5. Juxta S. Lucam Josephi Pater legalis est Heli, naturalis est Jacob: ergo Heli non est Joakim Pater Mariæ. ant. prob. S. Lucas expresse dicit: *Erat JEsus, ut putabatur filius Joseph, qui fuit Heli*, hoc est, filius legalis Heli: nam S. Matthæus studio dicit, Jacob genuit Joseph, ut indicaret parentem naturalem. R. Neg. ant. quia tantum sequitur, quod Joseph dicatur fuisse filius Heli in sensu latiori, attamen S. Scripturæ usitatissimo, hoc est, gener Heli, quare etiam S. Lucas usus est verbo *fuit*, non *genuit*, uti Matthæus. Præterea neg. ant. ad prob. neg. ant. & suppos. quod pronomen *qui* referatur ad S. Josephum, sed potius refertur ad JEsum, ita ut sensus sit, JEsus putatus quidem Josephi filius, qui tamen JEsus fuit Heli, hoc est, nepos Joakim: ratio est: quia videtur contra finem Evangelistæ genealogiam Josephi scribere, quem tamen expresse dicit patrem solum putativum.

Dices 6. Judæis, ut testatur Ambrosius, Hilarius, Hieronymus & alii, nunquam solemne fuit texere genealogias per mulieres: ergo verosimile non est S. Lucam hanc consuetudinem vel nescisse, vel neglexisse: ergo nec ille texuit stemma B. Virginis, sed Josephi. R. Dist. ant. nunquam solemne fuit &c. Loquendo de ordinariis circumstantiis, & respectu gentis Judaicæ, conc. ant. loquendo de extraordinariis circumstantiis, & in ordine ad alias gentes, neg. ant. Verum est, Judæis non fuisse in more genealogiam viri per matrem, seu fæminam texere loquendo de ordinariis, & genti Hebraicæ propriis circumstantiis, unde etiam Matthæus, qui suum Evangelium Hebraice, & proprie pro Judæis scripsit, genealogiam texuit per

Jo-



Josephum: sed ex hoc more neutiquam sequitur, quod Lucas in aliis circumstantiis vel non potuerit, vel etiam non debuerit genealogiam Christi per Deiparam texere. Ratio est 1. Quia ille scripsit ad nutum D. Pauli pro gentibus non Hebræis, usus idiomate Græco non Hebraico. 2. Quia ejus finis fuit, Christum ut verum hominem naturali consanguinitatis serie vere & proprie à Patribus descendisse secundum Carnem ex Matre, sed tamen sine Patre, de quo vel maxime dubitaverant gentiles. Ex his

Inferes: Matthæum incipere ab Abraham, & è Regio Davidis stemmate genealogiam Josephi & Christi deducere per Salomonem: Lucam vero per Mathanem alterum ex Bethsabæe legitimum Davidis filium: quia finis Matthæi fuisse creditur genealogice demonstrare Messiam ut legitimum Regem descendentem à Patribus juxta promissionem Divinam Abrahamo factam: *In semine tuo benedicentur omnes gentes.* Item Davidi: *De fructu ventris tui ponam super sedem tuam.* Unde descendit ab Abraham per triplicem seriem generationum, 14. nempe Patriarcharum, Regum, Principum populi ac Majorum. Dum contra S. Lucæ finis fuisse videtur genealogice demonstrare Messiam ut verum hominem, descendentem à Patribus & Davide secundum carnem: hinc genealogiam cepit ab Heli sive Joachim Mariæ parente, ascendendo per Majores usque ad David, Abraham, Adamum, denique & ipsum Deum. Jam ad alias objectiones supra positas

Ad VII. dico cum S. Hilario, quod S. Matthæus volens in tres Tessara decades, hoc est, in ter quatuordecim generationes genealogiam Christi distribuere, sciens omiserit tres Reges, nempe *Ochoziam, Joam, & Amasiam*: neque propterea falsum dicit à Joram genitum esse Oziam, quia mediate vere genitus est: sicut nos falsum non dicimus prætermittendo plurimos intermedios progenitores Christum vocando filium David. Dico



2. cum S. Th. 3. p. q. 31. a. 3. ad 4. Illam prætermissionem ideo contigisse, quia Joram Rex se miscuit generi impiissimæ Jezabelis & Achab, ex quorum filia Athalia, quam Joram conjugem habuit, prænominati tres Reges originem derivarunt. Statuerat autem Deus 3. Reg. c. 21. per Eliam Prophetam omnem Achabi posteritatem delere: ut igitur memoria iniquissimorum Achab & Jezabelis aboleretur, Matthæus tres illos Reges prætermisit.

Ad VIII. quod Moyſes consulto omiserit Cainanem, eo quod decem tantummodo generationes ab Adam usque ad Noe, & totidem à Noe usque ad Abraham numerare decreverit: neque per hoc Moyſes falsum attulit, quia non exclusive locutus, sed præcisive, adstruendo enim generationem decimam, non negavit undecimam.

Ad IX. Nullum gradum genealogicum omisſum esse à Matthæo, sed duplicem distinguere debere Jechoniam, primum filium Josiæ, dictum etiam Eliackim: alterum hujus ipsius filium dictum eodem nomine Jechoniam seu Joachim. Primum nominat Matthæus, cum dicit, *Josias genuit Jechoniam* (intellige primum) & *fratres ejus in transmigratione Babylonis* nempe Joachimum primogenitum, Sedeciam & Sellum. Alterum indicat, cum subdit: & *post transmigrationem Babylonis Jechonias* (utique non primus post tanti temporis lapsum, sed secundus) *genuit Salatbiel.*

Ad X. Dico 1. Quod Christiani illi Antiocheni, qui doctrinæ Pauli & Barnabæ acquiescere noluerunt, fuerint fluctuantes in fide: fuerunt enim turbati à quibusdam Psevdo. Apostolis probabilius Cerintho & Ebione, qui veteris legis observantiam cum Evangelio conjungere moliebantur, quam tamen doctrinam improbarunt, & doctrinæ Pauli & Parnabo adhæserunt, ut primum per Epistolam ab Apostolis Scriptam, quam Judas & Silas detulerunt, informati sunt. Dico 2. Quod  
Deus

Deus in ipso exordio Ecclesiæ permiserit illud Schisma Antiochenum, ut omnes fideles intelligerent præter revelationem & inspirationem alicujus doctrinæ, necessariam esse auctoritatem Ecclesiæ declarantis, talem doctrinam esse vere revelatam & inspiratam. Ad Ecclesiæ igitur tribunal in quæstione de cessatione legalium confugerunt Antiocheni, posteritati exemplum relinquentes, ut deinceps fideles in aliis exortis controversiis eodem modo se habeant, ad Ecclesiam pro dirimendis controversiis confugiant, & ejusdem decretorio judicio non autem alio stent.

Ad XI. Quod S. Paulus mox datam doctrinam voluerit confirmare, dum Evangelium, quod prædicabat, cum Apostolis contulit, non quod dubius hæreret Apostolus de doctrina sua, quam probe scivit sibi divinitus esse inspiratam, sed ut edoceret, neminem ut ut illuminatum à Deo docere vel prædicare debere, nisi prius ejus doctrinam Ecclesia auctoritate, quam à Deo accepit, probasset, & roborasset.

Ad XII. Cainum occisum fuisse à Lamecho de homicidio nihil cogitante : quod veritati Vaticinii non obest : quia Deus Caino plus non promisit, quam eum non esse occidendum à primo occurrente & ex intentione, ut Cainus sibi metuebatur : Lamech autem ipsum occidit de improvviso multo tempore post factam Abelis cædem, adeoque nec à primo occurrente, nec ex intentione interfectus est Cainus, stante vaticinio sua veritate. Præterea negari potest cum Theodoreto, & Gravefonio, Cainum fuisse à Lamecho occisum : idque non sine fundamento, cum in Sacris literis nec vestigium hujus homicidii habeatur, sed si Theodoreto fides, hoc innititur unice quorundam Rabbiorum traditioni, quæ teste Cornelio à Lapide non paucis videtur fabulosa eo, quod S. Scripturæ videatur magnopere adversari ; Deus namque Caino dicenti : *omnis igitur, qui invenerit me, occidet me* : ita respondisse refertur :

tur: Nequaquam ita fiet, qui occiderit Cain, septuplum punietur, posuitque Dominus Caino signum, ut non interficeret eum omnis, qui invenisset eum. Gen. c. 4. v. 14. & 15. Quod promissum Dei Caino factum haud sufficienter salvatur, si admittatur, Cainum à Lamecho reipsa fuisse occisum.

## §. VI.

Dico 5. Singula Verba, imo literæ ac apices literarum Sacris Scriptoribus à Deo sunt inspirata, ut proinde vocabulorum compositio & stylus ad Deum referri debeat.

**O**bservandum 1. Verba posse aut *materialiter*, aut *formaliter* spectari. Materialiter spectantur, si secundum sonum & figuram suam præcise considerantur. Formaliter vero verba spectantur, si considerantur, quantum ad sensum scripturificum conducunt.

Observandum 2. Impune aliquem negare posse, omnia & singula verba materialiter sumpta fuisse inspirata: quippe nostra latina Vulgata Scriptura est proprie verbum Dei: Similiter Sacerdos latine consecrans loquitur proprie Verbum Christi: quamvis nee Deus in Veteri testamento, nec Christus in novo testamento verba latina locutus sit. Dixi *omnia & singula*: nam negandum non est, saltem aliqua esse inspirata, scilicet ea, de quibus ex traditione Patrum forte constat, quod sint à Spiritu S. dictata, quia ipsis Mysterium quodpiam peculiare inesse agnoscitur. Ergo præsens conclusio est intelligenda de verbis vel maxime formaliter spectatis. Quæ conclusio

Probatur 1. Auth. S. Scripturæ. Exod. c. 4. v. 15. Deus Moyfi ait: *Ego ero in ore tuo*. Isaïæ c. 51 v. 16. *Posui verba mea in ore tuo*. Ezech. c. 3. v. 17. *Audies de ore meo verbum, & annuntiabis*

*tiatis ex me. Matth. c. 10. v. 19. Nolite cogitare, quomodo aut quid loquamini, dabitur enim vobis in illa hora, quid loquamini. Joan. c. 14. v. 20. Spiritus S. quem mittet Pater in nomine meo, ille vos docebit omnia, & suggeret vobis omnia, quaecunque dixerō vobis. Matth. c. 10. v. 20. Non vos estis, qui loquimini, sed Spiritus S. qui loquitur in vobis. Dein Prophetæ communiter in Scripturis dum loquuntur, utuntur formula. Hæc dicit Dominus; vel sermo Domini ad me factus est dicens: vel factum est verbum Domini ad me dicens: Ergo. Nec obstat: quod illa verba dicantur de loquentibus & prædicantibus. Non inquam obstat, nam & accomodari debent Scriptoribus sacris: sicut enim Deus loquentibus & prædicantibus illa verba dixit, ut homines instruant, ita & illa dixit Scriptoribus sacris, cum & per hos Ecclesiam docere voluerit per sua scripta usque ad finem mundi. Ergo.*

Probatur 2. ex SS. Patribus. S. Hieron. Epistol. 103. ad Paulinum de libro Lev. ait: *Singulæ pene Syllabæ - - - spirant cælestia Sacramenta.* Et in cap. 3. ad Ephes. dicit: *Singuli sermones, syllabæ, apices, puncta in Divinis Scripturis plena sunt sensibus.* S. Chrysost. hom. 22. in Genesim docet: *Neque syllabæ & apiculus est in sacris litteris, in cuius profundo non sit grandis thesaurus.* S. P. August. Epist. 14. palam profitetur: *Se nullius hominis libris tantum deferre, quantum Divinis litteris, non ob veritatem, quæ par est in utrisque, sed ob verba, præsertimque dictantis, qui est Spiritus Sanctus.* S. Gregor. in Præfat. lib. Moral. exposit. in Job dicit: *Ipse hæc scripsit, qui hæc scribendo dictavit.* Denique S. Bernardus Serm. 72. in Cant. & alii SS. PP. passim docent, ex peculiari Dei consilio factum fuisse, ut unam præ alia vocem Scriptores sacri usurpaverint. Ergo.

Probatur 3. Ex ratione congruentiæ: Scriptura S. est proprie verbum Dei: ergo de essentia Scripturæ S. est, quod Spiritus S. dictaverit omnia & singula verba. Conseq. prob. Juxta S. Th. in 1. dist. 27. q. 2. a 2. De ratione verbi est, quod dicat re-

lationem originis ad dicentem : atqui si Spiritus S. non dictaverit omnia & singula verba , jam Scriptura non dicet relationem Originis ad Spiritum S. tanquam ad dicentem : nam verbum v. g. S. P. Augustini non erit vere & proprie verbum S. P. Augustini , nec ad ipsum dicet relationem originis tanquam ad dicentem , nisi ab ipso immediate procedat : quod enim solum approbat , & assumit , non est proprie ipsius verbum , sed tantum adoptive vel authoritative: ergo.

Confirmatur 1. Res & singulæ sententiæ , ut in priori §. probatum , sunt inspiratæ à Deo Scriptoribus Sacris: ergo. etiam singula verba , quatenus ad sensum Scripturificum conducunt. Conseq. prob. ut res & sententiæ in S. Scriptura habeant sensum Scripturificum , id est talem , qui à Deo intentus fuit , erant iis verbis proponendæ , quibus sensus Scripturificus tribui potest: ergo cum planum sit , solis verbis Divinis , sive iis , quæ à Deo inspirata & dictata sunt , posse proprie tribui sensum Scripturificum , utique sequitur , etiam singula verba , quatenus ad sensum scripturificum conducunt , à Deo S. Scriptoribus inspirata esse. Et profecto si singula ita accepta , quibus res & sententiæ in S. Scriptura proponuntur , non sint æque à Deo inspirata , haud apparet , qua ratione illæ res & sententiæ queant vere dici verbum Dei Sacris scriptoribus à Deo dictatum , cum verbum dictatum essentialiter supponat locutionem , seu inspirationem , sine qua non est verbum. Et si est verbum hominis , supponit locutionem hominis : si est verbum Dei , supponit locutionem Dei

Confirmatur 2. Singula verba non sunt paria , sed aliqua magis , aliqua minus significativa. Ergo ea non sunt æqualiter idonea , ut sensum à Deo intentum rite , & eo modo expriment , quo Deus vult : quia ergo multum refert , ut S. Scriptores expriment sensum à Deo intentum , & expriment eo modo , quo Deus vult , omnino decuit , ut Deus etiam ipsa verba



ba singula , quatenus ad sensum scripturificum conducunt , sacris scriptoribus suggesserit , & inspiraverit.

Confirmatur 3. Ex verborum mutatione non raro contingit ipsum mutari sensum , & litteræ appositæ corrumpunt verba , imo & apices , nonnunquam & puncta , quod ex Massora , & Græcis accentibus liquet , totum sensum pervertunt : ergo si omnis sententia à Deo inspirata est , necesse est inspirata etiam esse verba , imo syllabas & litteras , cum litteræ persæpe punctis & accentibus affectæ conflent syllabas , syllabæ conficiant verba , verba autem referant sententias.

Probatur 4. Communi sed efficacissima ratione. Si à Spiritu S. dicantur tantum sententiæ inspiratæ , & non omnia & singula verba , jam non erit discrimen inter definitiones conciliorum de rebus fidei & morum , & ipsam S. scripturam : atqui juxta omnes inter eas est discrimen : ergo. seq. maj. prob. Etiam Spiritus S. assistit Conciliorum Patribus & Pontifici definientibus aliquid ad res fidei & morum pertinens , ne errent , etiam eis inspirat veritates instruendæ Ecclesiæ necessarias : sed non singula verba , sed hæc eorum arbitrio relinquit : ergo si Spiritus S. Scriptoribus sacris solum inspiret veritates & sententias , eisque assistat , ne errent : verba quoque S. Scriptoribus non inspiret , sed eorum arbitrio eligenda relinquat : inter definitiones Conciliorum ad fidem & mores pertinentes & S. Scripturam nullum erit discrimen.

Confirmatur : Nec in republica profana verba legum relinquuntur arbitrio scribarum , aut amanuensium privatorum , sed dictari solent vel ab ipso Principe , vel à Principis Ministro , & quidem ad literas , ad apicem , ut nempe cautum sit , ne vis legis aut hebetetur , aut ultra intentum Principis acutur : ergo magis hoc asserendum est de lege Divina pro toto humano genere constituta.

Quod de verbis formaliter sumptis hic resolvimus , hoc ipsum etiam asserimus de stylo formaliter accepto , nempe dispositione verborum , ornatu , ac coordinatione rerum & sententiarum conducente ad sensum scripturistico. Imo potuit nonnunquam stylus etiam materialiter acceptus à Deo specialiter fuisse intentus pro materiæ & sententiarum varietate , ut adeo nonnunquam intendi debuerit , nonnunquam remitti , aut frangi , in quo casu & iste à Deo inspiratus dici valet. Dixi *in hoc casu* , & *nonnunquam* : nam quod stylus materialiter sumptus non semper fuerit à Deo inspiratus , ex eo manifestum esse videtur , quia Sacri scriptores sæpe sensum tantum , non verba , verborumque ordinem citant : sic Moyses Decalogum aliis verbis , alioque ordine recitat in libro Deuteronomij , ac illum recitat in libro Exodi. Sic etiam Evangelistæ Prophetias Vet. Testam. allegant. Et licet Christus Dominus tantum unica forma in ultima cæna consecraverit , eandem tamen Evangelistæ singuli diversis phrasibus referunt.

## O B J E C T I O N E S.

I. In S. Scriptura reperiuntur plurima verba vitiosa : ergo hæc non sunt dictata , & inspirata à Spiritu S.

II. In S. Scriptura reperiuntur plurima verba obscura : ergo.

III. In S. Scriptura reperiuntur varii solæcismi , & barbarismi : ergo illi inspirari non potuerunt à Spiritu S.

IV. Si omnia & singula S. scripturæ verba essent à Spiritu S. Scriptoribus sacris dictata , tunc unus & idem esset omnium Sacrorum scriptorum stylus : sed non est idem , in quibusdam enim est elegans & sublimis , sicut in Isaia : in aliis vero humilis & simplex , sicut in Propheta Amos. Paulus ut docet D. Hieron. melius scripsit Hebraice , quam Græce : ergo.

V. Au-

V. Author Ecclesiastici in prologo agnoscens errorem suum dicit: *Hortor itaque venire vos cum benevolentia, & attentiori studio lectionem facere, & veniam habere in illis, in quibus videmur, sequentes imaginem sapientiæ, deficere in verborum compositione: nam deficiunt verba Hebraica, quando fuerint translata ad aliam linguam: ergo.*

VI. Author libri secundi Machabæorum c. 15. v. 39. dicit: *Et siquidem bene, & ut historiæ competit, hoc & ipse velim: sin autem minus digne, concedendum est mihi: ergo.*

VII. Nostra vulgata est scriptura S. sed in ea nullum reperitur verbum à Spiritu S. dictatum: ergo. min. prob. Nulum in nostra vulgata habetur verbum Hebraicum, Chaldaicum, vel Græcum: atqui Spiritus S. illis linguis locutus est, & scripsit per scriptores sacros: ergo.

VIII. Ex Scriptura clare constat, sufficere inspirationem quoad sententias tantum, ut aliquid sit Verbum Dei: ergo. ant. prob. Vox Domini, quæ de cælo facta est Christo baptizato super aquas Jordanis, hoc modo refertur Matth. c. 3. v. 17. *Et ecce vox de cælis dicens: Hic est filius meus dilectus, in quo mihi complacui.* Et de eadem voce Marci c. 1. v. 11. dicitur: *Et vox facta est de cælis, Tu es filius meus dilectus, in te complacui.* Et Luc. c. 3. v. 22. *Vox de cælo facta est: Tu es filius meus dilectus, in te complacui mihi.* Similiter de negatione Petri à Christo prædicta dicit Matth. c. 26. v. 24. *Ait illi Iesus: amen dico tibi, quia in hac nocte, antequam gallus cantet, ter me negabis.* Marcus autem c. 14. v. 30. refert: *Ait illi Iesus; amen dico tibi, quia tu bodie in nocte hac, priusquam gallus vocem bis dederit, ter me es negaturus.* Et Joan. c. 13. v. 38. *Respondit ei Iesus: animam tuam pro me pones? amen amen dico tibi, non cantabit gallus, donec ter me neges.* Ex his hoc formatur argumentum: illa vox, vel Christi sermo non potuit quoad verba, sed tantum quoad sensum inspirari à Spiritu S. cum illa vox, & Christi sermo di-

versimode ab Evangelistis referantur, ubi tamen certum est, quod illa vox diversimode non insonuerit, nec Christi sermo diversis illis modis fuerit prolatus: ergo.

IX. Ad hoc, ut Scriptura S. sit essentialiter Verbum Dei, non est necessarium, Spiritum S. inspirasse omnia verba: ergo. ant. prob. Liber Judith, prout habetur in nostra vulgata, est Scriptura S. & Verbum Dei: sed illius libri singula verba non sunt à Spiritu S. ergo. min. prob. S. Hier. qui hunc librum, prout illum nunc in nostra vulgata habemus, ex Chaldaeo in latinum reddidit, testatur illum non esse conformem suo originali: nam præfat. in Judith, quæ habetur tom. 3. Epist. III. de translatione hujus libri à se facta ait: *Magis sensum è sensu, quam ex verbo verbum transferens*: ergo.

X. S. Scriptores aliqua ex se ipsis scripserunt: ergo. ant. prob. S. Chrysost. Hom. 49. in cap. 23. Actuum Apost. de Apostolo Paulo dicit: *Iterum humano modo differit, & non semper gratia fruitur, sed etiam permittitur à se ipso afferre, quod sane & facit*: ergo.

XI. Si Deus Scriptori Sacro revelaret sententias, & relinqueret verba ipsius arbitrio, illa Scriptura haberet omnia, quæ defacto habet Scriptura S. dummodo per assistentiam extrinsecam eum errare non sineret: ergo. ant. prob. Esset firmum fidei nostræ fundamentum & non minus infallibile, quam si Deus omnia verba inspirasset: ergo.

XII. In Scriptura S. reperiuntur plura prophana Ethnicorum dicta, ut v. g. Actuum c. 17. v. 29. illud Arati Poetæ: *Ipsius enim & genus sumus*. Item 1. ad Corinth. c. 15. v. 35. illud Menandri: *Corrumpunt bonos mores colloquia prava*. Item ad Tit. c. 1. v. 13. illud Epimenidis Cretensis Philosophi: *Cretenses semper mendaces, malæ bestiae, ventres pigri*: sed hæc non videntur à Spiritu S. dictata: ergo.

## SOLUTIONES.

**A**D I. Neg. ant. quia impræsentiarum loquimur de Hebraica, græcaque editione prima, prout nempe è manibus ipsorum Sacrorum Scriptorum prodire.

Ad II. S. Scripturam non tantum non carere, sed abundare verbis obscuris, cum palam sit, res plurimas per ænigmata, parabolas, & allegorias proponi. Verum hæc obscuritas ex una parte commendat non parum dignitatem S. Scripturæ, & ex altera parte deservit Sanctæ intentioni dictantis Dei, qua Divinæ suæ elocutionis depositum immediate committere statuit Ecclesiæ, cui cæteri fideles sunt subordinati, accipientes ab ea intelligentiam S. Scripturæ.

Ad III. Ex solæcismis & Barbarismis non destrui quoad singula verba inspirationem Spiritus S. nam Spiritus S. se accommodat capacitati Scriptorum, & hoc ideo, quia semper aliquid fidei nostræ relinquere vult, ut captivantes intellectum nostrum in obsequium fidei, dum non capimus, cur in verbis à se dictatis, voluerit relinquere Solæcismos. Nam in die Pentecostes, quis verba Apostolorum ex Spiritu S. fuisse neget? & tamen quilibet suo modo loquebatur: sicut ergo organum vocis Spiritus S. exterius non immutabat, sic nec interius ingenii idoneitatem: & qui variis linguis loquebantur, non omnes eodem modo & æque perfecte verba proferebant, omnes tamen ex Spiritu S. verba depromebant; sic pariter in his, quæ Spiritus S. infundit, nihil obstat, quominus solæcismos & barbarismos ex Scriptoris ingenio contingere posse dicamus.

Ad IV. Neg. maj. quia Spiritus S. dictans verba accommodavit se statui, educationi, & genio Scriptorum, talia iisdem inspirans verba, qualia adhibuissent, si rem à se conceptam verbis propriis expressissent. Hinc per Isaiam in aula Regis enutritum & eruditum loquitur stylo eleganti: humiliori autem

per



per Amos gregum pastorem ad prophetandum assumptum.

Ad V. Authorem Ecclesiastici veniam petere non de aliquo errore à se commisso, sed de inconcinnitate styli redolentis capacitatem & naturam Scriptoris: cum Spiritus S. ut supra dictum, unius cujusque ingenio se accomodet: consequenter si quid humiliori stylo dictum, vel quod non ita energiam vocis Hebraicæ exprimit, capacitati Scriptoris tribuendum est: & de hoc Spiritu S. inspirante, veniam petit. Præterea dici potest, quod Prologus hic non sit canonicus.

Ad VI. Authorem libri Secundi Machabæorum non petere veniam erratorum, quæ ibi nulla sunt, sed styli minus forte politi, & minus forte digni, quam Divini Verbi Majestas exigit, non quidem quod talis sit, sed si forte talis legentibus appareat. Recolligantur mox dicta ad V.

Ad VII. Dico 1. Vulgatam nostram esse versionem Verbi Dei Ss. Scriptoribus olim dictati: unde non requiritur, ut iterato sit inspirata versoribus, sed sufficit, quod sit editio conformis Verbo immediate Ss. Scriptoribus dictato: ex qua conformitate optime adhuc dicitur Verbum Dei utut cum addito: *versum*, seu *transsumptum*. Textus autem primigenius Hebraicus, Chaldaicus, vel Cræcus non est versio, sed dicitur Verbum Dei *simpliciter*. Dico 2. conc. maj. dist. min. sed in ea nullum reperitur verbum materialiter sumptum à Spiritu S. dictatum, conc. min. sed in ea nullum reperitur verbum formaliter sumptum à Spiritu S. dictatum, neg. min. licet enim in variis linguis Verbum Dei materialiter varietur, manet tamen semper idem formaliter sumptum, quia formaliter sumptum dicit ad Deum relationem originis tanquam ad dicentem: materialiter vero illa verba sunt interpretis. Recolligantur dicta in observando 1. & 2. Unde etiam in vulgata reperiri possunt leves aliqui errores librariorum.

Ad

Ad VIII. dist. Illa vox, vel sermo Christi non potuit quoad verba materialiter sumpta inspirari, conc. quoad Verba formaliter sumpta, neg. Solutio ex dictis patet mox antecedentibus: unde omittitur responsio Didaci.

Ad IX. dist. S. Hier. testatur illum non esse conformem suo originali quoad verba materialiter sumpta, conc. quoad verba formaliter sumpta, neg. solutio ex dictis claret.

Ad X. S. Chrysostomum loqui de verbis materialiter sumptis, quæ Paulus à se ipso adfert, non vero de verbis formaliter spectatis, hæc enim Paulo fuere inspirata.

Ad XI. dist. Et in casu argumenti esset proprie & rigoroſe Verbum Dei, neg. & non esset proprie & rigoroſe Verbum Dei, conc. solutio ex proba patet.

Ad XII. Verba Ethnicorum non debere inpræſentiarum spectari, prout fluunt ex ore Ethnicorum, sic enim sunt verba mere prophana, sed prout fluunt ex ore sacrorum scriptorum, & sic jam sunt elevata ad ea significanda, quæ Deus per ea nobis significare voluit: proin ut sic accepta nil obstat, quominus dicantur inspirata à Deo.

## QUÆSTIO QUARTA.

An Sacra Scriptura sit obscura? aut in omnibus Clara?

UT Adversarii nostri Protestantes necessitatem Ecclesiæ Scripturam interpretantis rejiciant: ut suam praxim concedendi omnibus lectionem S. Scripturæ in lingua vernacula tueantur: unanimiter affirmant, scripturam se ipsa clarissimam & apertissimam, sui ipsius Judicem ac Interpretem esse, secuti Magistrum suum Lutherum, qui Præfat. assertionis Articulorum à Leone X. damnatorum loquens de Patrum dictis sibi invicem pugnantibus asserit: *Quo Judice finiatur quæstio, si Patrum dicta*  
L
sibi

sibi pugnaverint ? oportet enim Scriptura Judice hic sententiam ferre, quod fieri non potest, nisi Scripturae dederimus Principem locum in omnibus, quæ tribuuntur Patribus : hoc est, ut ipsa sit per se certissima, facillima, apertissima, sui ipsius interpres, omnium omnia probans, judicans, & illuminans. Item de Servo arbitrio contra Erasmmum, ubi respondens ad objectionem, in Sacra scriptura esse multa abstrusa, & obscura, inquit : *Esse in Scriptura quædam abstrusa, & non omnia exposita, invulgatum est quidem per impios Sophistas, quorum ore & tu loqueris Erasme, sed nunquam unum articulum produxerunt, quo suam hanc insaniam probarent.* Talibus larvis Sathan nos absterruit à Sacris litteris, & reddidit Scripturam Sanctam contemptibilem, ut suas pestes in Ecclesia faceret regnare. Hoc sane fateor, esse multa loca in scripturis obscura, & abstrusa non ob Majestatem rerum, sed ob ignorantiam vocabulorum, & Grammaticæ, sed quæ nihil impediunt scientiam omnium rerum in Scripturis. Res in Scripturis contentæ sunt omnes proditæ, licet quædam loca adhuc verbis incognitis obscura sint. Contra hos ergo

Dico : Sacra scriptura in omnibus non est clara, sed in multis obscura.

Probatur 1. ex ipsa S. scriptura 1. Psalm. 118. v. 18. ait. David : *Revela oculos meos, & considerabo mirabilia de lege tua.* Et v. 34. *Da mihi intellectum, & scrutabor legem tuam :* atqui si scripturae essent ubique claræ ac evidentes, Davidi non fuisset opus petere, ut illuminetur à Deo : hinc in prædicta loca S. Hieronim. in Epist. ad Paulinum de instit. Monachi c. 4. ait. *Si tantus Prophetæ tenebras ignorantiae confitetur, quæ nos putas parvulos, & pene lactentes inscitiae nocte circumdari.* 2. Lucæ ultimo v. 45. Christus post resurrectionem suam aperuit illis (discipulis suis) sensum, ut intelligerent Scripturas : ergo non perse ipsas intelligebant. 3. Actor. 8. Eunuchus Reginae Candacis Itaiam legens, & à Philippo interrogatus v. 30. *Putasne intelligis, quæ legis ?* respondit v. 31. *Et quomodo possum, si non aliquis ostenderit mihi ?* 4. Matth. c.

13. v. 36. discipuli verba quidem Christi intelligentes, sensum vero nequaquam percipientes accesserunt ad eum discipuli ejus dicentes: *Ediffere nobis parabolam Zizaniorum agri.* Et cap. 16. v. 11. *Quare non intelligitis, quia non de pane dixi vobis?* 5. Lucæ c. 18. v. 34. dicitur: *Et ipsi nihil horum intellexerunt, & erat verbum istud absconditum ab eis, & non intelligebant, quæ dicebantur.* Et discipuli euntes in Emaus nonnisi interpretante Christo scripturas intellexerunt. 6. Dum Christus Dominus in suæ divinitatis testimonium Judæis Joan. c. 2. v. 19. dixit: *Solvite templum hoc, & in tribus diebus excitabo illud:* Discipuli ejus id non intellexerunt, ut habetur v. 22. Neque Judæi, ut habetur v. 21. 7. Ipsemet Christus Dominus Joan. c. 5. v. 39. dixit: *scrutamini scripturas:* atqui res, quæ scrutinio indigent, non sunt claræ, evidentes, & omnibus statim obviæ: ergo. 8. S. Petrus Apostolus 2. Pet. c. 3. v. 16. de Epistolis D. Pauli scribit: *in quibus sunt quedam difficilia intellectu, quæ indocti & instabiles (uti nostri Adversarii) depravant, sicut & cæteras Scripturas ad suam ipsorum perditionem.* Ubi advertendum: hic non dici difficilia tantum indoctis & instabilibus, sed difficilia absolute, quamvis de indoctis dicatur, quod ea dicta depravent: ut Bellarminus tom. 1. Controvers. 1. de verbo Dei L. 3. c. 1. ex S. P. Augustino probat. 9. S. Paulus Rom. c. 12. docet: Interpretationem scripturarum esse speciale donum Dei. Et 2. Corinth. c. 3. v. 14. & 15. ait: *obtusos fuisse sensus Judæorum, quia, etsi Vetus testamentum quotidie legerent, non tamen intelligebant, quæ in eo continebantur de Christo: usque in hodiernum enim diem (addit Apostolus:) idipsum velamen in lectione veteris testamenti manet non revelatum.* 10. Ipsi Scripturæ textus subinde videntur inter se pugnare, v. g. Psal. 1. v. 5. dicitur: *Non resurgent impii in judicio.* Econtra 1. Corinth. c. 15. v. 51. dicitur: *Omnes quidem resurgemus, sed non omnes immutabimur.* Ergo non omnis Scriptura est ita clara ac evidens, ut eam quilibet capere valeat. Et



tandem 11. Quid obscurius esse potest Apocalypsi & Prophetiis v. g. Ezechielis de visione quatuor animalium: Danielis de septem hebdomadibus: Isaïæ de generatione Christi? de quo Isaïæ c. 53. v. 8. scriptum est: *generationem ejus quis enarrabit? quia abscissus est de terra viventium.* Ergo:

Probatur 2. Ex SS. Patribus: qui, etsi illuminatissimi Ecclesiæ Doctores, summo cum labore connixi sunt Scripturæ arcana assequi, & populo explicare, atque ejusdem scripturæ in multis obscuritatem fassi sunt. Sic

S. P. Augustinus ad Januar. c. 6. Et Epist. 119. c. 21. scribit: *In ipsis Sanctis Scripturis plura nescio, quam scio.* Item lib. 12, Confess. c. 14. ita alloquitur Deum: *Mira profunditas eloquiorum tuorum! quorum ecce ante nos superficies blandiens parvulis, sed mira profunditas. Deus meus mira profunditas: horror est intendere in eam; horror bonoris, horror amoris.* Item Præfat. in Psal. 140. inquit: *Sunt in Scripturis sanctis profunda mysteria, quæ ad hoc absconduntur, ne vilescant: ad hoc queruntur, ut exerceant: ad hoc aperiantur, ut pascant.* Item hic S. Pater testatur, inter plures scripturæ textus sibi ex D. Pauli Epistolis duos difficiles fuisse: nempe 1. illum, quem 1. Corinth. c. 3. v. 12. habet: *Si quis autem superædificat super fundamentum hoc aurum, argentum, lapides pretiosos, ligna, fœnum, stipulam.* 2. istum 1. Corinth. c. 15. v. 29. ubi Apostolus dicit: *Quid faciunt, qui baptizantur pro mortuis, si omnino mortui non resurgunt? ut quid & baptizantur pro illis?* qui textus tot & diversas patitur opiniones apud Bellarm. l. 1. de purg. c. 4. videndas. Quomodo ergo vos Protestantes, qui scripturam ubique claram, & intellectu facilem pronuntiatis, textum illum intelligitis? An unus potest baptizari pro alio? & quidem pro mortuo? Num baptismus potest proficere defunctis? Et quomodo illum Eccli. c. 42. v. 14. textum: *Melior est iniquitas viri, quam mulier benefaciens, & mulier confundens in opprobrium: si ita clarus sit, intelligitis, ac explicatis?*

S. Hie



**S. Hieronymus** per orbem universum famosissimus Bibliorum translator in c. 4. ad Ephes. scribit : *Quo plus in Scripturis procedit quis , eo majores ei occurrunt difficultates.* Hinc in Epistol. ad Paulinum conqueritur dicens : *Cum nulla sit ars , quam omnes passim sibi vendicent , hanc ( scilicet Scripturarum intelligentiam ) garrula anus , hanc delirus senex , hanc Sophista verbosus , hanc universi præsumunt , lacerant , docent , antequam discant.* Item agens de Epistola ad Rom. c. 7. ad Algasiam. q. 8. inquit : *Totus hic Apostoli locus , & in superioribus & in consequentibus , imo omnis Epistola ejus ad Romanos nimis obscuritatibus involuta est.* Quod idem confirmat S. Pater Epist. ad Hedibiam q. 10.

**S. Gregorius** expendens illud Canticorum: *Fons hortorum :* inquit : *Scientum quod scriptura Divina in quibusdam ( nec nos dicimus in omnibus esse obscuram ) manifeste existens , in quibusdam vero locis obscuram se præbens , aliquando leviter , sicut fons potatur : & aliquando magna inquisitione eget , ut inventa sumatur.*

**S. Ambrosius** Epist. 44. inquit : *Mare est Scriptura Divina , habens in se sensus profundos , altitudinem Prophetarum ænigmatum.*

Eodem modo sentiunt **S. Irenæus** lib. 2. Contra hæreses c. 47. **S. Chrysostomus** Hom. 40. in Joan. **Dionysius Areopagita** in Mystica Theol. c. 2. **S. Clemens Alexand.** lib. 2. Strom. c. 6. **S. Athanasius** de Verbi Incarnat. circa finem. **S. Basilus Magnus** Proemio in Isaiam. **S. Epiphanius** Hæres. 55. **S. Gregorius Nazian.** in Apologetico , seu Orat. 1. **S. Joannes Damasc.** Orthod. fidei lib. 4. c. 18. Ergo.

Probatum 3. Si scriptura sacra in omnibus esset clara & perspicua: nec malè intelligeretur , nec ex male intellecta tot hæreses fuissent exortæ: atqui S. Scriptura fuit male intellecta , & ex male intellecta exortæ fuere hæreses: ergo. maj. constat ex **S. P. August.** tract. 18. in Joan. Item lib. 1. de Trinit. c. 4. inquit: *Littera ipsa Scripturæ male intellecta innumeras generavit hæreses , ac enormes errores.* min. autem patet ex exemplis sequentibus:

Primo: *Sabellius* perperam usurpato textu Joan. 10. c. 30. v. *Ego & Pater unum sumus*: distinctam Personarum realitatem negabat, contendens ipsas solo nomine discriminari.

Secundo: *Arius* legens Joan. c. 14. v. 28. *Pater major me est*: Christum dicebat creaturam, & 42. Scripturæ textibus male intellectis probavit Filium in Divinis non esse Patri consubstantialem.

Tertio: *Macedonius* Spiritum S. non esse Deum credidit, quia eundem ignorare somniavit, ex quo Apostolus 1. ad Corinth. c. 2. v. 10. dicat: *Nobis revelavit Deus per Spiritum suum: Spiritus enim omnia scrutatur etiam profunda Dei.*

Quarto: *Pelagius* negat filios originali pollutos labe ex Ezech. c. 18. v. 20. *Filius non portabit iniquitatem Patris.*

Quinto: *Origenes* Scripturas intelligendas in sensu simplici accepit figurate, ut D. Hieron. notat in epist. ad Pammachium dicens: Origenem ita Paradisum terrestrem allegorice intellexisse, ut *historia deleverit veritatem*: siquidem per arbores Angelos: per quatuor flumina virtutes coelestes: & per pelliceas Adæ ac Evæ vestes humana corpora intellexerit, ac si Protoparentes ante peccatum absque corporibus vixissent.

Sexto: Idem *Origenes* Enochismum sive castrationem, de qua Christus Matth. c. 19. v. 12. loquebatur, quæque figurate ac in sensu spirituali de abstinence à venereis intelligenda venit, in sensu simplici & litterali de virilium abscissione accipiens, se ipsum demasculavit.

Septimo: *Papias* ejusque Sectatores erraverunt, dum ea, quæ Apoc. c. 20. v. 5. & 6. de mille annis dicuntur, quibus sancti cum Christo regnaturi sunt, censuerunt hic in terris implenda esse: quorum error reprehenditur à S. P. August. lib. 20. de civit. c. 7. Et S. Hieron. lib. 18. in Isaiam.

Verum quid plura, cum Lutheranos & Calvinistas in ejusdem textus intelligentia pugnantes, & contrarie sentientes ha-  
bea-

beamus ? Si S. Scriptura in omnibus est clara & perspicua, quare non omnes eandem eodem intelligunt, & explicant modo ? ergo fatendum, Scripturam S. in multis esse obscuram.

Probatur 4. Si Ecclesiæ Catholicæ impugnantibus Scriptura est adeo facilis, aperta, & clara: quare illi ad dirimendas controversias inter illos grassantes circa S. Scripturam Synodos celebrant ? quare anathemate refragantes Sanctionibus Synodalibus suis percellunt ? quare varios & mole immensos in S. Scripturam adornant commentarios ? quare unam eandemque sententiam tam diversis & plane repugnantibus sensibus explicant ? quare inter solos Confessionistas viginti sententiæ diversissimæ de justificatione versantur ? quare magno animorum æstu inter se digladiantur & in varias interpretationes abeunt circa illa Scripturæ verba: *Hoc est corpus meum*: ita ut plures quam octuaginta differentes interpretationes adhibeant ? quare Lutherani textum præcitatum de præsentia reali Christi in usu absque tamen transubstantiatione, Calvinistæ & Zwingliani in sensu methaphorico & tropico explicant ? Catholici vero omnes de reali præsentia Christi etiam extra usum, & cum transubstantiatione intelligunt ? Recte igitur fanaticum est appellandum dogma, asserere, rusticos plumbeo ingenio præditos, & garrulas mulieres posse incunctanter intelligere abstrusissima Christianæ Religionis mysteria, omnes dissolvere nodos. Ergo.

Probatur 3. Impugnatores Catholicæ fidei debent fateri, non solum in Scriptura varios contineri Hebraismos, sive peculiare Hebræorum loquendi modos v. g. quod abstractum sæpe ponant pro concreto, ut Exod. c. 8. v. 26. illa verba: *Abominaciones Ægyptiorum immolabimus Deo nostro*, ubi intelliguntur res abominandæ, quarum nomine apud Ægyptios veniebant pecudes & oves ab ipsis immolari non solitæ, sed colebantur ut numina; verum etiam plurimas figuratas locutiones; scilicet

cet modo per synecdochen loquitur, ut si ponatur pars pro toto, aut vicissim v. g. Psal. 65. v. 12. *Imposuisti homines super capita nostra*, id est, super nos; modo per metonymiam, ut si ponatur causa pro effectu, aut vicissim v. g. Habacuc. c. 3. metonymice loquitur, dum ait: *Domine audiui auditionem tuam, & timui*, sumens effectum pro causa, videlicet actum pro objecto, auditionem pro re audita: objectum enim actus est causa actus, juxta illud vulgare: *Ex objecto & potentia paritur notitia*. Modo per antonomasiam, v. g. si nomen commune pluribus uni per excellentiam attribuitur, v. g. Antichristo ly *homo peccati*. Modo per antiphrasim, annuntiando unum pro ejus opposito designando, v. g. dum Job c. 1. v. 11. dicitur: *Ne forte peccaverint filii mei, & benedixerint Deo in cordibus suis*: ubi ly *benedixerint*: sumitur pro *maledixerint*: sicut & ibidem c. 2. v. 5. dum dicitur: *Tange os ejus & carnem, & tunc videbis, quod in faciem benedicat tibi*: ubi ly *benedicat* sumitur pro *maledicat*: item 3. Reg. c. 21. v. 13. dum dicitur: *benedixit Naboth Deum & Regem: quamobrem eum eduxerunt extra civitatem, & lapidibus interfecerunt*: ubi ly *benedixit* pariter sumitur pro *maledixit*. Modo per hypallagem, cum unum subjicit pro alio, seu phrasim submutat, & invertit unum ponens pro alio, v. g. dum Exod. c. 12. v. 11. dicitur: *calceamenta habebitis in pedibus*: ibi enim est inversio, seu submutatio, quæ idem significat, ac si dicatur, pedes habebitis in calceamentis nam: calceamenta seu calcei non sunt in pedibus, sed pedes in calceis. Ut alia prætereamus, frequentissima est illa tropologica per metaphoram & allegoriam in scripturis locutio v. g. dum Christus passim vocatur leo, agnus, vitis, ostium, petra. Metaphora pariter est, dum gladii acies os gladii vocatur, ut 1. Reg: c. 15. v. 8. ubi dicitur: *omne autem vulgus interficit in ore gladii*. Metaphora etiam est, dum omnia, ex quibus mors inferri solet, ut arma, & instrumenta bellica, vasa mortis vocantur, v. g. dum Psal. 7. v. 14. dicitur: *& in eo paravit vasa mortis, sagittas suas*



*suas ardentibus effecit* : hoc est, in eo scilicet arcu lethifera paravit instrumenta contra eos, qui ardentem persequuntur justos, sagittas fabricavit. Quæ omnia non ad literam, sed secundum sensum aliquem mysticum intelligenda veniunt; scripturam proinde potius obscuram, quam claram evincunt. Ergo.

Ad hæc argumenta respondent Adversarii 1. Scripturam tantum obscuram esse impiis & infidelibus, non autem piis, & fidelibus, & Prædestinatis, ac eam attente, devote, & sine pravo affectu legentibus. Sed

Contra 1. Quis ex Adversariis damnabit tot Sanctos Patres sub proba 2. adductos impietatis, & infidelitatis: quibus tamen S. Scriptura obscura fuit? Ergo.

Contra 2. Ex dictis AA. Scriptura obscura est impiis, & infidelibus: atqui Scriptura est obscura Lutheranis & Calvinistis: ergo ipsi Lutherani & Calvinistæ sunt impii & infideles, maj. est responsio AA. min. vero prob. assumamus duos, Titium Lutheranum, & Cajum Calvinistam, utrumque supponamus pium, fidelem, prædestinatum juxta ipsos AA. ponamus etiam, quod uterque scripturam legat attente, devote, & absque malo affectu: jam videamus, quomodo Scripturam intelligant, v. g. illum textum Matth. c. 26. v. 26. *Hoc est Corpus meum*: legit Titius, & dicit: *Sub - & cum pane est corpus Christi realiter in sumptione*. Legit etiam Cajus, & dicit: *hic benedictus panis non est corpus Christi realiter, sed est tantum figura corporis Christi*: hic necessario unus eorum debuit falsum legisse, quia afferunt duo contradictoria, quorum unum necessario debet esse falsum: ergo ipsis Lutheranis & Calvinistis est obscura S. Scriptura, adeoque illi ipsi sunt impii & infideles, ac reprobi ex propria sententia.

Respondent AA. 2. Scripturam tantum obscuram esse, superbis, vel indoctis Hebraicæ, aut Græcæ linguæ ignaris.

M

Con-



Contra est: Eunuchus Candacis Reginae, de quo Actor. c. 8. pius & humilis erat, imo teste S. Hieron. epist. 103. ad Paulin. in c. 5. Sanctus: linguae Hebraicae vel Syriacae, in qua lingua Isaias tunc scriptus erat, gnarus, tamen eum non intellexit. Item S. Hieronymus tum virtute tum doctrina & Hebraicae linguae notitia maximus fuit, quem Ecclesia in exponendis sacris scripturis Doctorem maximum appellat: qui tamen locis supra citatis scripturam sacram sibi esse obscuram fatetur. Ergo.

Respondent AA. 3. cum Luthero lib. de servo arbitrio contra Erasmus: quod duplex sit claritas scripturae, sicut & duplex obscuritas: una externa in verbi ministerio posita, altera in cordis cognitione sita: si de interna claritate dixeris, nullus homo unum jota in scripturis videt, nisi qui spiritum Dei habet - - - Si de externa dixeris, nihil prorsus relictum est obscurum aut ambiguum, sed omnia sunt per Verbum in lucem producta certissimam, & declarata toti orbi, quaecunque sunt in scripturis. Hæc Lutherus.

Contra 1. Hæc responsio involvit contradictoria: ergo nihil valet. ant. prob. Si omnia sunt per verbum in lucem producta certissimam, quomodo nullus homo jota unum in scripturis videt, nisi Spiritum Dei habeat; quid facit iste spiritus, nisi illuminare, declarare, detegere, manifestare? atqui non illuminatur; nisi quod est obscurum? non declaratur, non detegitur, nisi quod est opertum? non manifestatur, nisi quod latet? Ergo vel omnia non sunt per verbum producta in lucem certissimam: vel spiritus iste utpote otiosus non requiritur.

Contra 2. Ponamus Lutherum cum suis asseclis, & Calvinum, Zwinglium cum suis asseclis: jam quæro: habetne Lutherus cum suis asseclis externam in verbi ministerio positam claritatem sicut & Calvinus, Zwinglius cum suis: vel non? si non: ergo falsum est: nihil prorsus relictum & obscurum  
aut

aut ambiguum, sed omnia sunt per Verbum in lucem producta certissimam, & declarata toti orbi, quæcunque sunt in scripturis: si enim, quæcunque sunt in scripturis, sunt declarata toti orbi: ergo non minus Luthero cum suis asseclis, quam Calvino, Zwinglio cum suis. Si autem uterque hanc externam claritatem habet: unde tot inter ipsos jurgia, tot contradicentes interpretationes: ergo.

Contra 3. Ponamus etiam utrumque: & quæramus, an uterque spiritum Dei habeat, seu internam claritatem? Si non? ergo vel nullus: vel solus Lutherus cum suis asseclis? vel solus Calvinus cum suis? Si uterque Spiritum Dei habeat: quare circa sensum horum verborum: *Hoc est corpus meum*: tot sunt opiniones contradictoriæ: Zwingliani & Calvinistæ contradicunt Lutheranis: nam hi dicunt, sensum illorum verborum importare realem Christi præsentiam in pane & in usu: illi vero præsentiam solum figurativam, nec Christum adesse in pane realiter, sed solum ut in signo: uterque iste sensus utpote contradictorius non potest esse verus, nec à spiritu Dei, qui contradictoria inspirare non potest. Si nullus spiritum Dei habeat: ergo nullus jota in Scriptura videt, & uterque in tenebris ambulat. Si aliquis illorum: ergo si adsit Lutheranis, deerit Zwinglianis & Calvinistis, vel econtra: ergo.

Contra 4. Iste Spiritus Dei necessarius ad intelligendas scripturas, easque in vero sensu interpretandas, vel datur omnibus & singulis Idiotis, plebeis &c.? vel solis Doctoribus cum pietate ad eam accedentibus? si solis istis, ergo illis erit operta Scriptura, nec jota unum videbunt, quicumque eam legunt: si autem omnibus & singulis post Christum datur, id falsum esse evincitur in Eunuchò Candacis Reginae, de quo Actor. 8. qui pietate motus post Christum legens Isaiam, & rogatus an intelligeret, quæ legebat? respondit: *quomodo possum, si non aliquis ostenderit mihi?* Ergo.

M 2

Quod

Quod si velit Lutherus hac sua responsione, Scripturam esse quidem in se clarissimam & lucidissimam, sed homini obscuram, nisi habeat spiritum Dei: nihil dicet contra nos: dato enim scripturam esse in se clarissimam, & mysteria, quæ reserant, in apertissima luce posita esse: quia tamen lux hæc inaccessibleis est nobis, nisi sancto illuminante Spiritu, jam scriptura nobis obscura est: sicut esto Deus clarissimam lucem habitet, quia tamen teste D. Paulo 1. Timoth. c. 6. v. 16. *Lucem habitat inaccessibleem*, jure dicit, eum esse homini invisibilem, incomprehensibilem.

Respondent AA. 4. Obscuritatem Scripturarum verborum tantum esse, & non rerum. Sed

Contra 1. S. P. Augustinus in Epistola ad Volusianum 3. nunc 127. clarissime inquit: *Tanta non solum in verbis, quibus ista dicta sunt; verum etiam in rebus, quæ intelligendæ sunt, latet altitudo sapientiæ, ut annosissimis, flagrantissimisque cupiditate discendi hoc contingat, quod eadem Scriptura quodam loco habet: cum consummaverit homo, tunc incipit.* Ergo.

Contra 2 In eo Evangelii testimonio, in cujus intelligentia nunquam Lutheri & Calvini discipuli convenire potuerunt: *Hoc est Corpus meum*: quodnam verbum obscurum est? quidnam pronomine illo usitatus? quæ propositio hac planior? cujus vocabuli magis quam corporis explorata perceptio? Ergo ipsum Mysterium Eucharisticum, non verborum involucra, Calvinianos & Lutheranos scindit ad invicem. Eadem est ratio verborum illorum: *Verbum caro factum est*: quæ in oppositum sensum trahunt Nestoriani & Eutychiani: & unde? nisi ex Mysterii altitudine est illorum Hæreticorum halucinatio?

Respondent AA. 5. Ea, quæ sunt, & manent obscura, non pertinere ad substantiam fidei, sed ad scholasticas tantum controversias: adeoque in omnibus iis, quæ ad salutem sunt creditu necessaria, S. Scriptura est clara & perspicua devote eam legentibus. Sed

Cou-

Contra 1. Neque quænam omnia determinate sint creditu necessaria ad salutem, est clare expressum in S. Scriptura: ergo multo minus ipsa omnia necessario credenda sunt clare expressa in S. Scriptura. Ant. patet, vel adferant nobis AA. S. Scripturam, & legant nobis ex ea clare, quænam omnia determinate debeamus credere?

Contra 2. Si S. Scriptura pro articulis necessariis sit ita clara, quomodo ergo fit, quod apud AA. in explicanda S. Scriptura sint tot dissidia circa numerum Sacramentorum? ubi aliqui ex S. Scriptura deducunt duo, aliqui tria, alii quatuor &c. quomodo fit, quod circa S. Eucharistiam inter Lutheranos & Calvinistas ipsos tot sint opiniones sibi contradicentes? Pariter si S. Scriptura sit ita clara, probent ergo AA. claro Scripturæ textu contra Anabaptistas, infantes esse baptizandos, non vero iis esse præbendam S. Eucharistiam: cum tamen S. Scriptura videatur eodem modo loqui de Eucharistia ac de baptismo; nam sicut Joan. c. 3. v. 5. de baptismo ait: *Nisi quis renatus fuerit ex aqua & Spiritu S. non potest introire in regnum Dei.* Ita Joan. c. 6. v. 54. dicit de Eucharistia: *Nisi manducaveritis carnem filii hominis, & biberitis ejus sanguinem, non habebitis vitam in vobis.* Imo Scriptura, dum fidem actualem ante baptismum requirit Marci ult. v. 16. dicens: Qui crediderit, & baptizatus fuerit, salvus erit, videtur velle, infantes, utpote actualis fidei incapaces non esse baptizandos: atqui mox enumerata sunt articuli fidei ad salutem necessarii: ergo.

Respondent AA. 6. Licet quædam loca Scripturæ sint obscura etiam circa fidei dogmata, circa eadem tamen alibi ipsa S. Scriptura se clarissime explicat, adeoque unus Scripturæ textus ex alio innotescit. Sed

Contra 1. Ex omnibus supra relatis pro nullo se S. Scriptura explicat: pervolvantur Biblia, & adducite unicam sal-

sem explicationem claram: quam cum nullam adducetis, etiam vestra data responsio est nulla.

Contra 2. Subinde textus aliquis, qui per se satis clare apparet, accedente alio fit obscurior, & captu difficilior: ergo Scriptura unum sui textum per alterum non explicat clare. Ant. prob. Iste Joan. c. 10. v. 30. textus: *Ego & Pater unum sumus*: multum obscuratur per alterum textum, quo idem Christus Joan. c. 14. v. 2. dicit: *Pater major me est*: ergo.

Contra 3. Ut unus textus per alterum explicetur, debet prius clare, certo, & infallibiliter constare, quinam ex duobus illis textibus sit clarior, & uter sit explicandus per alterum? an textus A per textum B. vel econtra? sed de his ex scriptura clare, certo, & infallibiliter non constat, v. g. an iste textus: *Pater major me est*: explicandus sit per alterum: *Ego & Pater unum sumus*. Item quisnam ex sequentibus textibus Rom. 3. v. 28. *Arbitramur hominem justificari per fidem sine operibus legis*: & Rom. 2. v. 13. *Factores legis justificabuntur*: explicandus est per alterum, vel potius ad alterum: ergo.

Contra 4. Quid agendum erit, cum plures invicem textus pugnare videntur? si expendatur uterque? crescet hæsitatio. Si unus duntaxat expendatur? vigeat adhuc mentis perplexio, & Sacrilege Dei verbum repudiabitur. Ergo.

### *Objectiones Adversariorum.*

I. Ipsa S. Scriptura se vocat lucidam, lucernam, lucem, sic Ps. 18. v. 9. dicitur: *Præceptum Domini lucidum, illuminans oculos*. Psal. 11. *Lucerna pedibus meis verbum tuum*. Prov. c. 6. v. 23. *mandatum lucerna est, & lex lux*: ergo

II. Deut. c. 3. v. 11. dicitur: *mandatum hoc, quod ego præcipio tibi hodie, non supra te est, neque procul positum, nec in celo situm, neque trans mare*: ergo intelligentia Scripturarum  
non



non est supra captum nostrum, neque procul eundum est ad quærendam ejus interpretationem: ergo.

III. S. Paulus 2. Corinth. c. 4. v. 3. ait: *quod si etiam opertum est Evangelium nostrum, in iis, qui pereunt, est opertum, in quibus Deus hujus sæculi excæcavit mentes infidelium, ut non fulgeat illis illuminatio Evangelii gloriæ Christi.* Ergo ex opposito, Paulus Evangelium omnibus fidelibus apertum, & clarum sentit.

IV. Isaïæ c. 45. v. 14. dicitur de Christianis: *Et ponam universos filios tuos doctos à Domino, quæ verba assumens Christus Joan. c. 6. v. 46. inquit: Est scriptum in Prophetis, Et erunt omnes docibiles Dei, omnis qui audit à Patre, Et didicit, venit ad me:* ergo omnes fideles docti sunt à Domino per Spiritum, nec alio indigent Doctore, aut Interprete.

V. S. P. Augustinus L. 2. de Doctrina Christ. c. 6. docet omnia obscura alibi explicari dicens: *Sed multiplicibus obscuritatibus Et ambiguitatibus decipiuntur, qui temere legunt aliud pro alio sentientes, quibusdam autem locis quid vel falso suspicentur, non inveniunt, ita obscure quædam dicta densissimam caliginem obducunt, quod totum provisum divinitus esse non dubito ad edomandam labore superbiam, Et intellectum à fastidio renovandum: ergo.*

VI. S. Chrysostomus Hom. 3. de Lazaro, ubi cum ostendisset Philosophos obscure locutos, ita subdit: *Apostoli vero Et Prophetæ omnia fecerunt manifesta claraque, quæ prodiderant, exposuerunt omnibus veluti Communes orbis Doctores, ut per se quisque discere possit ea, quæ dicuntur, ex sola lectione.* Item Hom. 3. in 2. ad Thessal. inquit: *quam ob rem opus est concionari? omnia clara sunt ac plana ex Scripturis Divinis, sed quia delicatuli estis auditores, delectationem audiendo venantes, propterea concionatores quæritis.* Ergo claritatem Scripturæ sanctus hic Pater commendat.

VII. Dicere quod Scriptura sit obscura, est deprimere ejus auctoritatem, & eam dicere defectuosam ac imperfectam: sed hoc est impium: ergo.

VIII.

VIII. Testamentum vetus & novum in hoc discriminantur, quod Vetus omnia figurative exhibeat, novum vero aperte indicet: unde etiam Vetus Testamentum Isaia c. 29. v. 11. dicitur *Liber signatus*: econtra novum Testamentum Apoc. c. 5. v. 8. vocatur *Liber apertus per Agnum*: ergo clara videtur esse S. Scriptura.

IX. Patres probant sententias suas ex Scripturis: sed non debet probari quod notius est ex minus noto: ergo Scriptura clarior est quam sententiæ Patrum.

X. SS. Patres primitivæ Ecclesiæ sine commentariis Scripturas legerunt: ergo & nos sine his legere, & intelligere poterimus.

XI. Deus Scripturam dedit, ut esset fidelibus regula fidei, & morum magistra, quæ omnes veritatem doceret: ergo hoc ipso debet esse clara & intelligibilis ab omnibus.

XII. Scriptura S. est Testamentum Dei, in quo Testator Deus fidelibus ut hæredibus suam voluntatem explicavit, ut in eum credentes accipiant dona gratiæ, quibus consequantur gloriam cælestem tanquam hæreditatem: atqui testamentum debet esse clarum, & facile intelligibile, alias enim foret potius fomentum dissidiorum inter hæredes, quam Testamentum: ergo Scriptura S. debet esse clara, & facile intelligibilis.

XIII. Deus 2. Timoth. c. 3. v. 16. & 17. dicit: *Omnis Scriptura divinitus inspirata utilis est ad docendum - - - ut perfectus sit homo Dei ad omne opus bonum instructus*: ergo omnis Scriptura debet esse clara.

XIV. Scriptura est ita clara, ut ab infante valeat intelligi juxta id 2. Timoth. c. 3. v. 15. *quia ab infantia sacras literas nosti*: ergo declaratione opus non est.

XV. S. Joannes Epist. 1. c. 1. v. 14. dicit: *Scribo vobis infantes: quoniam cognovistis Patrem?* credidit utique S. Joannes, Scripturam ab infantibus posse intelligi: ergo

XVI.

XVI. S. Chrysostomus Hom. 3. in Epist. 2. ad Thessal. scribit: *Omnia sunt dilucida & recta, quæ sunt in Divinis Scripturis: manifesta sunt, quæcunque sunt necessaria: ergo.*

XVII. S. P. Augustinus lib. 2. de doct. Christ. c. 9. inquit: *in iis, quæ aperte in Scripturis posita sunt, inveniuntur illa omnia, quæ continent fidem, moresque vivendi: spem scilicet atque charitatem: ergo.*

XVIII. S. Epiphanius Hæres. 70. docet: *Omnia clara sunt in divina Scriptura his, qui pia ratiocinatione divino sermoni attendere volunt, non vero concepta in se ipsis diabolica operatione, se ipsos præcipites dare in barathrum mortis. Ergo.*

XIX. Aliquis ex Protestantibus ita argumentatur: Papi-  
stæ per hoc, quod scripturam ab Ecclesia & Papa declarandam  
esse velint, gravi contumelia afficiunt scripturam: ergo. ant.  
probat.

1. Stanislaus Hosius Cardinalis lib. de expresso Verbo  
Dei sub finem scribit: scriptum Dei verbum, nisi secundum  
Romanæ Ecclesiæ mentem declaretur, esse verbum Satanæ:  
sed hæc est impia contumelia: ergo.

2. Sylvester Prieras dicit: Ecclesiæ Romanæ & Papæ  
doctrinam esse infallibilem fidei regulam, atque scripturam à  
Papa omnem suam habere virtutem, & authoritatem: sed hæc  
est gravis contumelia: ergo.

3. Doctor Ekius l. 1. de Auth. Eccles. c. 10. scripsit:  
*Nec Deo credimus nisi propter Ecclesiam*, hoc est, nisi prout Ec-  
clesia approbat, vel Papa exponit: sed hoc est impium dictu:  
ergo.

4. Cardinalis Bellarminus l. 2. de Verbo Dei c. 15. tra-  
dit: scripturam magis nocivam, quam utilem esse: sed hæc est  
gravis contumelia: ergo.

5. Petrus Canisius in op. Catech. pag. 44. non erubescit  
dicere: *S. scriptura in illis, quæ continet, & proponit, est velut*  
N velut

*velut natus cereus, non præbens certam aliquam & immotam scientiam, sed quæ in quavis interpretationem inflecti potest: ergo.*

## SOLUTIONES.

R. **A**D I. In citatis locis non esse sermonem de universa scriptura, sed de divinis præceptis maxime in decalogo contentis, quæ & clara sunt, ut ab omnibus possint intelligi, & sunt lucerna pedibus nostris, quia intellecta & cognita nos in operando dirigunt. Quod si citati textus de universa scriptura accipiantur, dicitur ibi præceptum Domini lucidum, lucerna, lux, non quod facile ab omnibus statim intelligantur, sed quod, postquam intellecta fuerint, mentem illustrent juxta illud Psal. 128. *Declaratio sermonum tuorum illuminat, & intellectum dat parvulis.*

Ad II. Retorquetur Argumentum in AA. Si scripturæ interpretatio non est supra nos, nec procul posita, nec in cœlo sita: ergo nec quærenda est à spiritu Dei & à gratia Christi: nam si interpretatio scripturæ esset quærenda à spiritu Dei, esset in cœlo sita, & procul à nobis posita. Quid ad hoc Protestantes. 2. Si mandata Dei non sunt supra nos, nec in cœlo sita, quare dicunt Protestantes: mandata Dei esse nobis impossibilia. 3. Dico, quod textus ille non loquatur de scripturæ intelligentia, sed de impletionem divinorum mandatorum, quæ non supra nos posita est, sed nobis non quidem per vires naturæ sed Dei gratia facilis redditur: Deus enim est, qui vires præbet juxta illud Deut. c. 8. v. 47. Imo si etiam textum illum AA. intelligendum velint de intelligentia scripturarum, dicendum, quod scriptura reddatur facilis intellectu, postquam explicata est à Doctore: sicut illi populo facilis erat intellectio mandatorum divinorum, quia Moysen sibi explicantem audiverat.

Ad

Ad III. S. Paulum illo loco loqui de Evangelio jam prædicato, cui noluerunt multi etiam post signa & miracula credere; quod utpote viva voce ab Apostolis explicatum omnino clarum & manifestum erat. Nos autem hic loquimur de Evangelio, seu verbo Dei scripto, ut à Spiritu S. dictato, & nondum prædicato ac explicato. Nec obstat, quod tam multi post Evangelium prædicatum adhuc non credant: non inquam obstat, quia hi ex propria malitia & spontanea cæcitate nolunt Evangelio credere: sed in infidelitate manere.

Ad IV. Dico: Si omnes fideles docentur, vel sunt edocti à Deo, ita ut per hoc superfluat Doctor humanus, qui eos instruat: ergo superfluit prædicatio verbi, & ministerium Ecclesiæ: vidit hoc Calvinus ipse Comment. in dictum cap. Isaïæ: & propterea conjungens simul dictum Isaïæ cum dicto Christi, dicit: utrumque loqui de solis electis ac prædestinatis, qui docentur à Deo & per externam prædicationem & per internam revelationem: inepte igitur hi textus etiam secundum Calvinum trahuntur ad claritatem Scripturæ. Est igitur tam textus Isaïæ quam Christi intelligendus de præveniente, & ad credendum nos vocante & aliciente gratia, ut sensus sit: *ponam universos filios tuos doctos à Domino*, scilicet per fidem, quæ est donum supernaturale proveniens à Domino, quodque non obtinetur nisi per gratiam. Præterea S. P. August. Serm. Domini in monte L. 2. c. 6. dicit: ibi sermonem esse de hominibus post universale judicium: *post quod judicium, id est, cum discretio & separatio iustorum ab iniustis facta fuerit, ita inhabitat iustos Deus, ut non opus sit quemquam doceri per hominem, sed sint omnes, ut scriptum est, docibiles Dei.*

Ad V. Verba S. Patris nostram de obscuritate S. scripturæ sententiam potius roborare: ultimæ particulæ: *nihil enim ferre &c.* non probant à quolibet reperiri plenissime dictum, sed



ad summum probant reperiri à certis quibusdam copiosius à Deo illustratis. Præterea non dicit S. Pater omnia obscura alibi reperiri planissima: sed tantum si quid eruitur ex obscuritatibus, reperiri doctrinas aliquas Sacras inde erutas, alibi planius scriptas: & hinc S. Doctor non dicit simpliciter eas reperiri, sed addit particulam *fere* valde limitantem: si enim illimitate hoc assereret, sibi contradiceret, dum epist. 119. ad Januarium dicit: *Etiam in ipsis Sanctis Scripturis multo nesciam plura, quam sciam.*

Ad VI. dist. Et loquitur S. Chrysost. de mysteriis in Scriptura contentis, neg. & loquitur de claritate historiarum inibi enarratarum, conc. subdit enim S. Doctor: *At obscure inquis? Quæ est ista obscuritas, dic quæso? non historiae sunt? nosti quam clara sunt, quod de obscuris rogas.* Quod vero non neget obscuritatem multis in locis S. scripturæ reperibilem, indicat in ipsa Hom. 3. de Lazaro. Præterea S. Doctor increpat etiam eos, qui fugientes Ecclesiam se excusabant, quod neminem concionantem audirent, & dixit in confusionem eorum, quod licet non adsit, qui concionetur, sint tamen qui in Ecclesia Scripturas legant. Certe si hæc Chrysostomi Verba in rigore accipienda essent, sicut quia Scriptura clara est, non egemus Doctore, ita nec per se egebinus concionatore, seu prædicatore: sicque rueret necessitas prædicationis Evangelii, quam tamen Christus Apostolis passim præcepit, & cui adeo fidunt Protestantes.

Ad VII. dist. dicere, quod Scriptura sit obscura in omnibus, est deprimere ejus authoritatem, conc. dicere, quod scriptura sit obscura in aliquibus, neg. Obscuritas enim S. scripturæ ait S. P. Aug. l. 2. de doct. Christ. c. 6. servit potius ad conciliandam ei Majestatem & reverentiam, nec indicat defectum in ea, sed in nobis, ex defectu intellectus nostri caligantis ad tam alta mysteria.

Ad

Ad VIII. dist. in hoc discriminantur, quod Vetus omnia figurative, adeoque obscure exhibeat tam quoad se, quam quoad nos, conc. quoad nos solum, neg. differunt itaque inter se hæc duo testamenta, quod in veteri non solum Scripturæ fuerint obscuræ, sed & mysteria contenta in eis & figurata non intelligebantur, nec aperiebantur, eo quod *omnia in figura contingebant illis* 1. Corinth. c. 10. nec adhuc ille venerat, qui figuras esset impleturus, & veritatem manifestaturus, & ideo liber erat adhuc signatus. Nunc autem cum Christus venerit, qui illa mysteria implevit, & toti orbi manifestavit, dicitur liber apertus.

Ad IX. Retorqueo argumentum in AA. Quod est magis notum non debet illustrari, interpretari, commentari, per id, quod est minus notum, & minus clarum: ergo si scriptura sit magis nota & clara, quam dicta & sententiæ Patrum, cur eam adhuc interpretantur Protestantes, imo Lutherus est interpretatus. Profecto hoc argumento Protestantes Sophistas (quos tamen tot maledictis insectantur) agunt: arguunt namque à notitia verborum ad notitiam veritatis rei. Dico ergo, magis quidem notum est, esse verum omne illud, quod in scripturis continetur, quam id, quod in Patribus continetur, & ideo Patres veritatem suarum sententiarum testimoniis scripturæ probant: verba tamen, quibus scriptura loquitur, non sunt notiora quam verba Patrum, & ideo Patres commentariis suis scripturam illustrarunt, quia verba scripturæ obscuriora sunt, quam verba Patrum.

Ad X. dist. Ss. Patres primitivæ Ecclesiæ scripturas legērunt sine commentariis scriptis, conc. sine commentariis divinæ vocis oraculo collatis, neg. Primi orientis & nascentis Ecclesiæ Patres utpote cœvi Apostolis omnino non indigebant commentariis, eo quod habuerint commentaria, viva, ipsos nempe Apostolos, eorumque discipulos, quibus in intelli-

gendis scripturis adhæserunt, & non sicut Protestantes proprio ingenio id effecerunt.

Ad XI. Retorqueo Argumentum: Deus dedit etiam omnibus præcepta, ut omnibus essent regula, & ab omnibus observarentur: quare ergo Protestantes dicunt: præcepta Dei esse homini impossibilia. Si dicant: præcepta quæ naturæ homini secundum se impossibilia sunt, eidem reddi possibilia per gratiam Dei: dicam & ego, scripturas, quæ secundum se obscuræ sunt, maxime attenta hominis imbecillitate, adjutorio gratiæ reddi claras, & manifestas. In forma dist. ut esset fidelibus regula fidei, & morum magistra, secundum legitimam interpretationem Ecclesiæ, ad quam solam pertinet judicare de vero scripturarum sensu, conc. independenter ab hac interpretatione, neg.

Ad XII. Si S. Biblia sunt testamentum Dei clarum: cur ergo inter Protestantes oriuntur tot lites & Controversiæ circa hoc testamentum? cur aliqui ipsos hæredes obligant ad bona opera in ordine ad hæreditatem consequendam, alii eos deblegant requirentes solam fidem in Christum? imo dicentes, impossibilem esse mandatorum Dei observantiam? quæ tamen est conditio Dei testamento inserta juxta id: *si vis ad vitam ingredi, serva mandata*. Certe apud AA. tot sunt fere hujus testamenti seu Scripturæ pro libitu factæ interpretationes & sententiæ, quod Capita: unde & tot inter eos sectæ atque schismata. Dico ergo: in testamento eam sufficere claritatem, qua quis intelligat se esse hæredem Scriptum, & facile capiat condiciones pro hæreditate consequenda à testatore præscriptas: hæc autem facile intelliguntur in testamento Dei, ubi clare legimus, *quod Deus velit omnes homines salvos fieri*, & quod adultus rationis compos *si velit ad vitam ingredi, debeat servare mandata*.

Ad

Ad XIII. Expl. textum sub dist. est utilis, si debito modo intelligatur, & in vero sensu accipiatur, conc. secus, neg. Jam in proba ostensum, plures non accipientes scripturam in vero sensu prolapsos esse in hæreses: quibus revera utilis non fuit scriptura ad docendum.

Ad XIV. Quod infans, vel potius puer usu rationis præditus possit aliquid per suos parentes aut pædagogos, vel etiam per lectionem, ubi Scriptura clara est, in sacris literis addiscere: ita enim S. Timotheus addidicit per Aviam, aut Matrem suam 2. Timoth. c. 1. v. 5. & v. 15. vel per propriam lectionem. Si autem sermo sit de infante rationis usu destituto, vel etiam eo prædito, quod per se ipsum possit omnem Scripturam capere: falsum est.

Ad XV. Patet solutio ex mox dictis: præterea S. Joannes discipulos suos ex teneritudine charitatis vocavit Infantes: uti eos sæpe vocat filiolos.

Ad XVI. S. Chrysostomum voluisse, quod fidelibus Catholicis, ad quos ibi concionem habuit, omnia in Scripturis sint dilucida & manifesta, quæ sunt ad salutem necessaria fidelibus inquam, qui traditionem amplectuntur, quique ex verbo Dei tradito, sive non scripto circa scripturarum sensum ab Ecclesia edocti scripturas legunt, & intelligunt. In forma explico sub dist. Omnia sunt dilucida & recta, quoad se, conc. quoad nos, neg.

Ad XVII. Explico sub dist. sunt aperte posita, si intelligentur secundum unanimem Ecclesiæ consensum, conc. si intelligentur juxta privatum cujusque judicium discretionis, neg. legatur S. Pater l. 1. cont. Crescon. c. 32. & 33.

Ad XVIII. Eadem est responsio: & prior per verba S. Epiphanii explicatur.

Ad XIX. Neg. ant. ad 1. prob. Hosium locutum esse in hoc sensu, quod Verbum Dei scriptum, quod quis expone-  
ret,

ret, & declararet contra Ecclesiæ Romanæ mentem, ac doctrinam, non sit verbum Dei sed satanæ: sunt & isti, qui verbum Dei contra mentem, ac doctrinam Ecclesiæ Dei exponunt, habentur pro hæreticis, & filiis satanæ, seu diaboli: ad minimum debent juxta Christi effatum Matth. c. 18. v. 17. pro Ethnicis & publicanis haberi. Si dicat aliquis Protestans ad Hunnium insignem Calumniatorem, & Zythophilum provocans: Hosium lib. 3. de Script. S. authorit. Scripturam S. appellasse *fabulamentum Æsopi*: Dico: id esse falsum; & ab hæreticis afflictum: & dato; Forte Hosius cit. loc. meminit, quomodo S. Scripturam ut fabulas Æsopi, & gladiatorium ludum tractent nostri Protestantes: utpote quibus par est id, quod contra eos ex S. Scriptura profertur, vel rejicere, vel eludere: uti Lutherus in colloq. commenſ. de vet. & nov. testam. anno 1558. Francofurti impressis fol. 387. pag. 2. de libro Job fecit. Egregius Protoparens!

R. Ad 2. Quod Romanæ Ecclesiæ & Papæ, dum Ecclesiam è Cathedra docet, doctrina in fidei dogmatibus sit infallibilis regula fidei, dicit non solum Prieras, sed ipsum dicunt omnes Ss. Patres, & omnia concilia, ut suo loco videbimus. Pro fidei regula inanimata admittimus S. Scripturam, quæ, prout est certum Verbum Dei, omnem virtutem, & auctoritatem suam habet non à Papa, aut alio puro homine, sed à solo Deo. Pro iis vero, in quibus S. Scriptura est obscura & dubia, Ecclesia & hujus visibile caput, summus Pontifex tanquam regula fidei animata, à Christo obtinuit potestatem Scripturam declarandi, & de ejus genuino sensu judicandi: & hoc Prieras dicere volebat: minime vero quod certum & clarum verbum Dei absque Papali approbatione nullam virtutem & auctoritatem habeat.

R. Ad 3. Ita propositio: *Nec Deo credimus, nisi propter Ecclesiæ approbationem*: si habeat hunc sensum, quod Deo absque



que Ecclesiæ approbatione credi non possit in iis, de quibus certum & clarum est, esse à Deo revelata, & in quo sensu sint revelata: tunc sumpta ista propositio foret prava: certum enim est D. Eckio & omnibus Catholicis, quod absque ulla Ecclesiastica approbatione indubitatus sit Verbo Divino & Scripturæ S. præstandus assensus. Si vero dicta propositio hunc faciat sensum, quod Deo absque Ecclesiæ approbatione credi non possit in iis, de quibus dubium est esse à Deo revelatum, & in quo sensu sit revelatum: vera est propositio: tunc enim Ecclesiæ debemus stare declarationi, & iudicio: & in hoc sensu sunt accipienda verba Eckii: uti & ille textus S. P. Augustini Cont. epist. fundam. c. 5. *Ego Evangelio non crederem, nisi me Catholice Ecclesiæ commoveret auctoritas.*

R. Ad 4. Bellarminum cit. loc. solum formare quæstionem, an necessarium, vel utile sit, ut S. Scriptura (prout hæretici modernis temporibus exigunt: in vulgare cujuslibet Provinciæ idioma transferatur? ad quod respondet negative ob plures rationes, maxime quia post quodlibet sæculum novis opus esset versionibus, cum quolibet fere Sæculo varientur lingue vulgares: ex varietate autem versionum discordantiæ generentur.

R. Ad 5. Canisium cit. loc. nec verbulum habere de objectis: de naso cereo &c. Ergo false & calumniose hæc adducuntur. Legatur Canisius cit. loc. & pag. 45. Contrarium omnino videbitur.

## QUÆSTIO QUINTA.

*Cujus sit de vero Scripturæ sensu judicare? seu quodnam sit determinatum fidei Tribunal?*

CUM S. Scriptura, ut dictum est, in multis sit obscura, adeoque varios patiatur sensus: ergo restat inquirendum,

dum, ad quem spectet genuinum sensum à Spiritu S. intentum aperire, & proponere, ut ita fideles de illo certi sint. Pro quo

Observandum 1. Certum esse inter nos & Protestantes, scripturas non proprio ingenio esse exponendas, sed secundum dictamen Spiritus S. quia ex inspiratione Spiritus S. & non humano ingenio, & voluntate scriptæ sunt, ut habetur ex D. Petro Apost. 2. c. 1. v. 20.

Observandum 2. Certum itidem esse inter nos & Protestantes, S. Scripturam esse infallibilem fidei regulam, cum contineat verbum Dei, Deumque pro Authore habeat: quia tamen in pluribus est obscura, & non clara, ac aperta, ideo se sola non sufficit ad diluendas, & determinandas controversias fidei, sed indiget alio iudice in terris visibili.

Observandum 3. Apud nos Catholicos hæc duo *Judicem*, & *Normam* seu *regulam* distinguere: docemus enim, Regulam seu normam, secundum quam Judex in decidendis fidei controversiis fert sententiam, esse verbum Dei scriptum, sed non solum, verum & traditum: iudicem vero controversiarum esse Ecclesiam Universalem: quæ sententiam, qua fidei controversia dirimatur, potest pronuntiare dupliciter, nempe vel primò per Romanum Pontificem extra Concilium ex Cathedra, seu authoritative loquentem, ut scilicet est caput, & Doctor universalis Ecclesiæ: vel secundò per Concilia generalia à summo Pontifice approbata, & confirmata: utroque autem modo pronuntiatam Ecclesiæ sententiam esse infallibilem suo loco ostendemus. Distinctionem hanc inter Regulam & Iudicem fieri debere cape exemplum sequens:

Dum condito testamento, ac viro defuncto, qui de hæreditate disposuit, propinqui nequeunt ad concordiam revocari: norma quidem, seu regula ad litem dirimendam sunt tabulæ testamenti à Notario conscriptæ: sed neuter jure bona Testatoris acquireret, si unus aut neget producta instrumenta, aut quæ-

quædam in eis dubia inveniatur, ideoque ex his petat causæ suæ patrocinium: neque sit vivus iudex, qui perpendat pugillaria, audiat dissidentes, sensum explicet, & sententiam pronuntiet. Ita post Christi mortem intenterunt nobis litem ad hæc usque tempora Hæretici, nec fuit eorum quispiam, qui testamentum, sacram scilicet divinamque Scripturam non proferret: hanc & nos tanquam Dei testamentum recipimus, hanc normam fidei & veritatis regulam esse fatemur: & quomodo poterit dignosci, ad quos pertineat hæreditas, ad quos spectet Ecclesia, ad quos custodiendum fidei depositum; si proferentibus nobis libros aut sapientiæ, aut Ecclesiastici, aut Machabæorum, respondent Sectarii: non est testamentum Domini: aut promentibus Evangelia, reponunt, aliam esse mentem Testatoris: quis iudicabit? Iudicis vivi necessaria est sententia, qui decernat sacrorum codicum germanitatem, ac sensum. Aperte S. P. Augustinus iudicem à testamento seu norma discernit, cum in Psal. 21. ita scribit: *Quare litigamus? Non interest mortuus est Pater, fecit testamentum, & mortuus est. Tandem contenditur de hæreditate mortuorum, quamdiu testamentum proferatur in publicum: & cum prolatum fuerit, tacent omnes: ut tabulæ aperiantur, & recitentur. Iudex intentus audit, advocati sedent, universus populus suspensus est, ut legantur verba mortui.*

**Observandum 4.** In iudice controversiarum requiri sequentia. 1. ut sit visibilis, & vivens: visibilis quidem, ut ad eum recurri possit: vivens autem, ut discrepantium rationes & momenta audiat, & ponderet. 2. Ut habeat jurisdictionem, & auctoritatem, qua non solum proponat, quæ vera et iusta sunt, uti proponit quivis Consiliarius: sed etiam subditos cogere possit ad obtemperandum, & punire rebelles. 3. Ut sit infallibilis in iis, quæ ex fide credenda decernit. 4. Ut omnem Religionis Controversiam etiam in propria causa terminare possit.

His ergo observatis, Protestantes, ne cogantur admittere traditiones, audire Ecclesiam, Concilia, Romanum Pontificem, asserunt, solam S. Scripturam esse infallibilem fidei regulam, & judicem controversiarum, non distinguentes inter regulam & judicem. Alii vero Spiritum privatum, seu privatam Spiritus S. revelationem, seu internam Spiritus S. persuasionem & illustrationem, qua Spiritus S. fideli lectori adest, eique verum sensum dicat, ut judicem audiendum esse docent. Catholici vero Ecclesiam, ejusque supremum in terris visibile caput judicem esse tuentur, normam vero, juxta quam Ecclesia judicat, non solum Scripturam, sed & traditionem esse, agnoscunt: & ut clare in hac quæstione procedamus, per sequentes Paragraphos decidemus. Igitur sit

### §. I.

Dico 1. S. Scriptura Sola non est, nec potest esse sui ipsius Judex, & Interpres.

**P**ROBATUR 1. Scriptura S. spectari potest vel quoad literam, vel quoad sensum: atqui Scriptura S. neque quoad literam, neque quoad sensum spectata potest esse sui ipsius Judex: ergo. Prob. min. quoad 1. part. Scriptura S. literaliter sumpta sæpe multos occidit, & in errorem ac hæresim induxit, ut constat ex illo Pauli 2. ad Corinth. c. 3. v. 6. dicentis: *Litera occidit, spiritus autem vivificat*. Constat & exemplo multorum, quos sola Scripturæ litera variis temporibus occidit, & in hæresim induxit: sic

Primo *Sabellianos* occidit, & Trinitatem in Divinis negare fecit, quatenus hi relicto genuino Scripturæ sensu, & ad literam explicantes illud Christi Joan. c. 10. v. 20. dicentis: *Ego & Pater unum sumus*: inferebant Patrem & Filium ac consequenter Spiritum S. esse unum quoad Personam: cum tamen  
juxta

juxta genuinum Christi sensum, & mentem Ecclesiæ, Christus his verbis significet, se unum esse cum Patre quoad essentiam, & non quoad Personam.

Secundò *Arianos* occidit nuda litera, & in detestabilem illam hæresim induxit, qua Christum non Deum, sed Deo minorem & inferiorem esse docebant, quia ad literam genuino relicto sensu illud Christi apud Joan. c. 14. v. 28. *Pater major me est*: absolute dictum putabant, cum tamen juxta Patres & mentem Ecclesiæ Christus ibi de se loquatur ut homine præcise, solumque se minorem Patre quoad humanitatem, non vero quoad Divinitatem dicere velit.

Tertio *Macedonianos* pariter occidit Scripturæ litera sola, & ad Spiritus S. divinitatem negandam induxit, dum hi ad literam explicantes illud Pauli 1. ad Corinth. c. 2. v. 10. dicentis: *Spiritus omnia scrutatur etiam profunda Dei*: unde sic discurrebant: qui scrutatur, quærit: qui quærit, dubitat: qui dubitat, ignorat: qui ignorat, Deus non est: ergo Spiritus S. Deus non est: & in hoc errabant ipsi: cum germanus Apostoli sensus sit, quod Spiritus S. dicatur omnia scrutari, quatenus omnia etiam cordium secretiora videt, penetrat, & comprehendit, ac proinde quod sit Deus, de quo dicitur 1. Paralip. c. 28. v. 9. *Omnia corda scrutatur Deus*. Item Psal. 7. v. 10. *Scrutans corda & renes Deus*. Item Jerem. c. 17. v. 10. *Ego Dominus scrutans corda*.

Quartò *Manichæos* etiam occidit nuda Scripturæ litera, eosque hunc in errorem induxit, quo vetus testamentum novo contrarium esse credebant, quia ad literam intelligebant vetus, dum Gen. c. 1. v. 27. dicit: *Hominem ad imaginem Dei factum*: & pariter novum, dum Joan. c. 8. v. 44. *hominem ex diabolo esse* docet: & iterum vetus, dum Gen. c. 2. v. 2. ait: *Deum quiescere die septimo ab omni opere*: & novum, dum Joan. c. 3. v. 17. ait: *Deum usque modo operari*: hæc enim ad literam intellecta videntur sibi contraria, non autem si secundum genuinum Scri-



pturæ & Ecclesiæ sensum explicentur: non enim repugnat hominem esse ad imaginem Dei quoad naturam, & ex diabolo quoad malitiam: nec, Deum quievit die septimo ab opere creationis mundi, & tamen operari adhuc in eodem conservando, atque gubernando mundo.

Præter hos alios innumeros subsequentibus temporibus nuda Scripturæ litera occidit, & in varios errores, & hæreses induxit: ergo Scriptura S. secundum literam nequit sui ipsius esse Judex.

Prob. etiam min. argumenti quoad 2. part. videlicet, quod nec quoad sensum spectata Scriptura S. queat esse sui ipsius Judex: sensus Scripturæ S. sæpe est ambiguus, obscurus, & delitescit, ut ex priori quæstione patet: ergo nec quoad sensum spectata potest esse sui ipsius Judex, sed pro genuino Scripturæ sensu ad Ecclesiam recurrendum est.

Confirmatur 1. Quando de alicujus Scripturæ sensu controvertitur, ipsa Scriptura est materia, seu objectum controversiæ, nempe id, de quo partes controvertunt: ergo non potest esse Judex: quis enim unquam dicet, objectum controversiæ esse judicem controversiæ: ergo.

Confirmatur 2. Controversia de Scripturæ sensu tolli non potest per nuda verba illius scripturæ, sed tolli debet per genuinum sensum verborum: atqui de illo sensu controvertitur, quis sit? ergo Interpres & Judex, qui decernat, quis sit genuinus sensus, non potest esse ipsa Scriptura: sicut in Republica, lex non potest esse Judex de ejus sensu, quando de eo ambigitur, sed præter legem necessarius est Judex, qui de mente & sensu legis respondeat.

Dicunt AA. Controversiam de sensu Scripturæ in uno loco sub obscuro tolli per alium locum Scripturæ magis clarum: ideoque scripturam posse uno loco claro esse Judicem ac interpretem suimet circa alium locum obscurum. Unde dicit S. P.

Aug.

Aug. lib. 5. de Doct. Christ. c. 6. non est in Scriptura locus obscurus, qui per alium clarum intelligi non possit: *Nibil fere de illis obscuritatibus eruitur, quod non planissime dictum alibi reperitur.* Hæc responsio etsi jam sit impugnata in præcedenti quæstione sub responsione 5. AA. adhuc

Contra est 1. Proferant AA. textum Clarum explicantem principium & finem Ezechielis: plurima loca obscura in Prophetis, in Epistolis Paulinis, in Apocalypsi, aliaque, de quorum sensu dubitatum est, & adhuc dubitatur: ergo.

Contra 2. Verba hujus Scripturæ textus: *Hoc est corpus meum*: Lutherani proprie & literaliter accipiunt, Calvinistæ autem figuraliter & symbolice. Item hæc verba: *Baptizantes eos in nomine Patris & Filii & Spiritus S.* Anabaptistæ de solis adultis: alij vero de omnibus promiscue accipienda esse docent: Jam si allati textus ambigui, obscuri sunt, cur non proferuntur alii tam exprelli & aperti ac clari, ut pars contraria acquiescat, cum juxta AA. unus locus obscurus Scripturæ tollatur per alium locum Scripturæ magis clarum? cur Lutherani & Calvinistæ de loco citato Scripturæ, qui obscurus est, altercantes, non recurrunt ad alium, qui clarus est? aut si id faciunt, cur nullus altercandi apud ipsos est finis? cur hac via Protestantes non finiunt lites, quas inter se habent? Ergo inanis & inutilis est responsio AA.

Contra 3. Multa sunt testimonia Scripturæ, quorum verus ac legitimus sensus haberi non potest ex ipsa S. Scriptura, nisi accedat traditio, aut autoritas Ecclesiæ: ergo si oritur controversia circa ipsa, sola Scriptura non poterit esse Juxta. ant. prob. 1. Christus dicit Matth. c. 28. v. 19. *Docete omnes gentes baptizantes eos in nomine Patris & Filii & Spiritus S.* quorum verborum sensus legitimus est etiam juxta AA. in baptismo pronuntianda esse hæc verba: *Ego te baptizo in nomine Patris & Filii, & Spiritus S.* Jam posito si aliquis negaret hunc esse  
sen-

sensum , & diceret, non esse opus pronuntiare dicta verba , sed sufficere, ut qui baptizat, interne velit baptizare in nomine Trinitatis , ut visus est sentire Zwinglius *de vera & falsa Religione*. Vel ut , qui baptizatur, intendat recipere in nomine Trinitatis, ut ait Lutherus lib. de capt. babyl. c. de baptismo: quomodo illum confutarem? Non ex solis Scripturæ verbis: nam illa verba *baptizantes eos* &c. non dicunt vocalem Trinitatis invocationem adhiberi oportere: alius clarus textus Scripturæ hoc explicans reperibilis non est, vel adducatur? unde ergo constabit? nisi ex traditione Ecclesiæ: ergo.

Præterea: Christus in ultima cæna non solum instituit Eucharistiam, sed etiam lotionem pedum adhibuit: & quidem in institutione Eucharistiæ dixit: *comedite, bibite* Matth. c. 26. In lotionem autem pedum ait Joan. c. 13. v. 24. *Et vos debetis alter alterius lavare pedes*: Hic AA. dicunt, priora verba continere præceptum: adeoque fideles omnes divino præcepto obligari ad sumendam Eucharistiam utraque specie: at posteriora verba non continere præceptum. Nunc quæro, ex quo fundamento existiment, se teneri quidem ad sumptionem Eucharistiæ sub utraque specie, à lotionem autem pedum liberos esse? Non possunt prætexere Scripturæ verba, nam hæc potius contrarium præferunt: hæc enim *comedite, & bibite*, non videntur præferre plus, quam si Paterfamilias suis hospitibus dicat, comedite, bibite, læti estote, quibus certe non censetur velle eos obligare sub præcepto, ut comederent, ac biberent. Hæc autem alia: *vos debetis alter alterius lavare pedes*: videntur significare præceptum non minus, quam si Dominus dicat servo: tu debes hospitibus meis lavare pedes. Unde igitur sciunt se hisce verbis non obligari ad lavandos pedes, cum verba potius obligationem præferant? Non aliunde, nisi ex traditione Ecclesiæ, quæ nunquam existimavit, hanc lotionem esse præceptam. Ergo.

Con-

Contra 4. Si de illa prætenſa majori aliorum testimoniorum claritate, diſcordia, ut ſæpe fit, excitetur, quis Judex erit? neceſſe eſt, ut tunc in dubio ac ſuſpenſo hæreat fides: ergo.

Contra 5. Si in quæſtionem veniet ipſe Canon Scripturarum? an Scriptura, quam præ manibus habemus, genuinum ſit Dei verbum? an autographis Prophetarum & Apoſtolorum conformis? an pura & integra ad nos pervenerit? an Judæorum aut Hæreticorum fraudibus ſit depravata & corrupta? an hi vel illi libri ſint Canonici vel non? de omnibus his Heretici litem moverunt? quomodo lis hæc ſolius Scripturæ testimonio refelli & dirimi poterit? nonne Lutherani & Calviniſtæ negant Canonicos eſſe libros Tobiae, Judith, Sapientiæ, Eccleſiaſtici, & Machabæorum? imo nec ipſi inter ſe de nonnullis libris conſentiunt: Lutherus à Canone rejicit Epistolam ad Hebræos, & illam quæ S. Jacobi eſt, & Apocalypſin, quos libros admittit Calvinus: quis quæſo Judex erit inter illos? quæ ipſis certa regula veritatem illam dignoſcendi? Nulla. An confugient ad textus claros, & perſpicuos? ubi ſunt? citentur? neceſſe eſt alterutrum ſequi: nempe vel nullos tales textus dari claros & perſpicuos: vel certe ſi dentur, Lutheranos & Calviniſtas pervicaces eſſe, quod hiſ claris & perſpicuis textibus non acquieſcant. Præterea ſit impius aliquis, qui utrumque teſtamentum repellat, per quam alterius teſtamenti auctoritatem poterit controverſia iſta reſolvi? Pervulgatum eſt hoc argumentum, quod tamen magno verborum pondere urget S. P. Auguſtinus lib. 11. Contra Fauſtum c. 2. *Si non de aliqua particula, ſed de toto audies contradicentem, & clamantem, falſus eſt: quid ages? quo te convertes? quam libri à te prolati originem, quam vetuſtatem, quam ſeriem ſucceſſionis teſtem citabis? Nam ſi hoc facere conaberis, & nihil valebis: & vides in hac re, quid Eccleſiæ Catholiciæ valeat auctoritas, quæ ab ipſis fundatiſſimis ſedibus*

P

Apo-

*Apostolorum usque ad hodiernum diem succedentium sibi met Episcoporum serie, & tot populorum consensione firmatur. Atque hinc est, quod Athanasius in Synopsi rationem afferens, cur non recipiamus Evangelium Thomæ, respondet: quia non est in Catholico Canone. Et S. P. August. lib. 1. Serm. Dom. in Monte c. 3. scribit: à nobis cenferi Apocrypham Apocalypsim Pauli, quoniam illam Ecclesia sana non recipit. Econtra libros Machabæorum, aliosque ab Hæreticis rejectos ipsius Ecclesiæ auctoritate retinemus juxta regulam S. P. August. lib. 11. de Doctrina Christ. c. 8. Et lib. 18. de Civit. Dei c. 36. Ergo.*

Probatur Conclusio 2. Si Scriptura, ut AA. prætendunt, ita sit Clara, ut se sola omnes fidei Controversias valeat dirimere, cur Protestantes in Augustanæ Confessionis præfatione Carolum V. Imperatorem pro Concilio Generali, quod scripturam, & quid tenendum sit, declaret, tam instanter sollicitantur? cur Argentinenfes Lutherani ac Professores Confessionem Augustanam, & Apologiam vocant normam & regulam totius doctrinæ Christianæ? prout testantur Liphenses notitiæ ad annum 1714. his verbis: eo quod (Augustana confessio, & Apologia) sit norma & regula totius doctrinæ non tantum de Cæna Domini, sed etiam de reliquis articulis omnibus, ex verbo Dei sincere & incorrupte in scholis & Ecclesiis docendi? cur illud principale Saxo-Gothense Fridensteinii anno 1715. die 20. Febr. emanatum Edictum ita habet? Mandamus, quod nemo præsertim contra libros Symbolicos, nempe Augustanam Confessionem, Apologiam, librum concordiæ, librum Corpus doctrinæ intitulatum &c. tanquam principia & formam nostræ confessionis quovis modo aut scribere præsumat: etiam quilibet Candidatus illa, tanquam à nostra Ecclesia secundum Scripturam examinatam regulam & normam sine ulla limitatione aut reservatione suscipiat, & subscribat. Ergo juxta Protestantium doctrinam non sola Scriptura, sed penes hanc etiam Con-

fessio



fessio Augustana , & Apologia &c. sunt norma ac regula credendi , & docendi.

Probatur Conclusio 3. Si sola Biblia sunt Judex Controversiarum , quæro , quænam sint illa Biblia ? Lutheranus respondet : *Mea*. Calvinianus *Mea*. Zwinglianus *Mea*. Catholicus *Mea*. Et sic de reliquis. Ergo tot erunt diversi Judices , quot Biblia diversa. Quis in causa fidei v. g. inter Lutheranos & Calvinistas controversa Judicabit ? quæ Scriptura ferret sententiam in quæstionibus fidei controversis ? an Catholica ? an Calvinista ? an Lutherana ? an Zwingliana ? Catholica ab omnibus rejicitur , Lutherana à Calvinistis , horum à Lutheranis : ergo.

Dicit Lutheranus : Scripturæ Catholicorum , Calvinistarum , Zwinglianorum &c. non sunt veræ ac puræ , consequenter nequeunt in rebus fidei esse arbitri aut Judices. Sed

Contra 1. Sicut Lutheranus dicit , Scripturas Catholicorum , Calvinistarum , Zwinglianorum non esse veras , ac puras : ita dicit Catholicus , Calvinista , Zwinglianus scripturas Lutheranorum non esse veras , ac puras : ergo.

Contra 2. Unde Credam Lutheranis dicenti : Scripturam Catholicorum , Calvinistarum , Zwinglianorum &c. non esse veram , ac puram ? nam juxta principia Lutheranorum nihil possum fide Divina credere , quod non est clare expressum in scriptura : atqui Catholicam , Calvinisticam , Zwinglianam &c. Scripturam non esse veram ac puram scripturam : econtra Lutheranam esse veram ac puram , non est clare expressum in scriptura , vel dicatur in qua , quo loco ? ergo id non possum fide divina credere : nec Lutheranus potest de sua scriptura tanquam vera ac pura habere fidem divinam : ergo inutilis & incapax est , ut sit Judex controversiarum fidei. Ergo.

Probatur Conclusio 4. In omni republica bene instituta , & ordinata , *Lex* , & *Judex* duæ sunt res distinctæ : *Lex* enim  
P 2 docet ,

docet, quid sit agendum: *Judex* vero ex præscripto legis pronunciat: Lex dirigit subditos declarando ipsis, quæ facienda sunt vel omittenda: *Judex* autem illos cogit, ut faciant, vel omittant, ac reos pro delicti natura punit. Jam scriptura est quidem lex, norma, ac regula fidei & morum: at non potest esse *Judex*, ut contendunt Protestantes: nam qui *Judex* est inter duos litigantes, debet ita pronuntiare sententiam, ut uterque litigantium clare intelligat, quænam sit *Judicis* sententia: & alter eorum fateatur illam pro se, alter contra se latam esse: nisi ita fuerit, à lite non desistent, & interminabilis evadet controversia: atqui non potest sola scriptura id præstare: nam *Lutherani* & *Calvinistæ* litigant tum inter se, tum nobiscum: hætenus tamen ex sola scriptura finiri ac terminari non potuit controversia, & quisque in priori sua sententia immotus persistit: est siquidem scriptura regula, ut vocant mortua, ergo se ipsam exponere non potest, nec consequenter lites circa varium ipsius sensum excitatas componere. Ergo.

## O B J E C T I O N E S.

**O**bjicies I. Dùm in Veteri testamento orireretur Controversia aliqua, *Judæi* ad scripturam tanquam ad *Judicem* mittebantur juxta illud *Isaiæ* c. 8. v. 20. *Ad legem magis & ad testimonium*: ergo & in novo testamento ad scripturam tanquam ad *Judicem* recurrere oportet.

II. Ad dirimendam Controversiam illam, qua *Judæi* olim *Christum Filium Dei* negabant esse, *Christus* illos ad scripturas provocat dicens *Joan.* c. 5. v. 59. *Scrutamini Scripturas*: ergo suo exemplo scripturam controversiarum fidei *Judicem* esse indicat.

III. *Actor.* c. 17. v. 11. dicitur: quod *Beræenses* fuerint quotidie scrutantes scripturas, an illa ita se habeant, sicut illis  
Pau-

Paulus prædicabat : ergo hi pro Judice controversiarum fidei scripturas agnoscebant.

IV. Joan. c. 7. v. 17. dicitur : *si quis voluerit voluntatem ejus facere, cognoscat de doctrina, utrum ex Deo sit, an ego ex me ipso loquor* : ergo omnes probi & boni titulo probitatis & sanctitatis possunt intelligere omnia loca Scripturarum.

V. Qui scripturas scrutatur, sit homo spiritualis : sed dicitur 1. Corinth. c. 2. v. 15. *Spiritualis homo judicat omnia, & ipse a nemine judicatur* : ergo.

VI. Regula fidei nostræ est verbum Dei : ergo de se est clara, & intelligibilis ab omnibus.

VII. Primævi Patres intellexerunt scripturas absque interpretatione Ecclesiæ : ergo & nunc erunt intelligibilis sine tali interpretatione.

VIII. Controversia de sensu scripturæ in uno loco subobsuro tollitur per alium locum scripturæ magis clarum : ergo scriptura uno loco clara potest esse Judex ac interpretes sui circa alium locum obscurum.

IX. S. P. Augustinus Epist. 178. Contra Arianos ad Pascendum ait : In disputationibus sine scripturarum auctoritate nihil temere asserendum : ergo in omnibus fidei controversiis sola scriptura est Judex.

X. S. Paulus 2. ad Timoth. c. 3. v. 16. ait : *Omnis Scriptura divinitus inspirata utilis est ad docendum, ad arguendum, ad erudiendum in justitia, ut perfectus sit homo Dei, ad omne opus bonum instructus* : ergo scriptura est sufficiens ad fidei controversias dirimendas.

## SOLUTIONES.

**A**D I. Hæreticos textum Isaïæ sibi absque readoptare. Scriptura siquidem ibi eos redarguit, qui, ut futura dignosce-

cerent , ad Pythonissas, Ariolos, & maleficos confugiebant, & liquet ex verbis proxime præcedentibus: *Et cum dixerint ad vos : quærite à Pythoibus , Et à divinis , qui strident in incantationibus suis.* Hique recte partim ad legem , partim ad testimonium remittuntur , ut sic instruantur , melius & salubrius fore testimonium legis, & Prophetarum Consilium futura sciendi, quam Ariolorum & Pythonissarum vaticinium, & prognosticatio falsissima : quod aliunde per legem Domini Deut. c. 18. v. 9. prohibebatur.

Ad II. dist. ant. Christus illos provocat ad scripturas tanquam Controversiæ hujus Judicem , neg. ant. tanquam ad fidelem , Judæisque non suspectum suæ doctrinæ , & sanctitatis testem , conc. ant. neg. conseq. Hoc eruitur ex ipsis Christi verbis , dum non dicit scrutamini scripturas, illæ de me judicant, sed *illæ testimonium perhibent de me.* Cum enim Judæi Christo utenti & perhibenti triplex testimonium divinitatem suam probans , nempe *Joannis c. 1. v. 34. Suorum miraculorum* Joan. c. 1. v. 36. & *Patris sui æterni* Joan. 1. c. 37. Fidem adhibere renuerint : quarto usus est contra eos testimonio , & quasi ex concessis argumentando ad Scripturas scrutandas remisit , quoniam has illi admittebant. Itaque scripturæ testimonium quidem optimum est ad dignoscendam veritatem : sed si obscurum sit , alia suppetunt media , ut rerum habeatur intelligentia , judicium nempe Ecclesiæ.

Ad III. Beræenses non ad Scripturas legendas se convertisse , ut crederent Paulo : jam enim verbum cum omni aviditate susceperant : sed ut in fide proficerent , videntes omnia , quæ de Christo vero Messia , passo , & resurgente ab Apostolo enuntiabantur , fuisse prædicta vaticiniis Prophetarum : uti in hunc locum Grotius (quem tanti faciunt Novatores) tom. 2. op. Th. p. 630. Scribit his verbis: *Non quod dubitarent de veracitate*

*racitate Pauli & Silæ , sed ut prophetica scripta cum illorum verbis conferendo , magis magisque in veritate confirmarentur , & haberent , unde alios convincerent.* Hac intentione animoque proficiendi unicuique licet scripturas expendere , & ex illis veritatem investigare iudicio discussionis , non iudicio definitionis , quæ duo calide Heterodoxi confundunt. Præterea Beræenses non recurrabant ad scripturas tanquam iudicem controversiarum fidei , sed tantum tanquam motivum credibilitatis. Nam diversa est ratio illorum , quibus nova doctrina proponitur , & illorum , qui jam Religionem Christianam per baptismum professi sunt. Illi enim si prophetias , si miracula , si rerum consonantiam , si auctorum fidem explorant , prudenter se gerunt , cum nemo teneatur credere , priusquam motiva credibilitatis ad trutinam revocarit : & tales fuere Beræenses. Econtra qui jam fide imbuti sunt , & Christi Religionem susceperunt , debent in ea supremi Iudicis agnoscere auctoritatem : sine qua Religionis unitas consistere nequit : contra hoc

Dices : Beræenses non recurrabant ad scripturas tanquam motivum credibilitatis , sed eam pro Iudice venerabantur , cum statim in Christum crediderint : scriptum est enim AA. c. 17. v. 11. de iis : *Susceperunt verbum cum omni aviditate quotidie scrutantes Scripturas , si hæc ita se haberent : ergo. R. neg. ant.* Verba enim ista : *cum omni aviditate* : non significant illos avide in Christum credidisse , sed solum indicant , quod Paulum audiverint , & ejus zelosæ prædicationi , atque de Christo habitis concionibus cum aviditate interfuerint.

Ad IV. Christum cit. loc. non hoc intendere , quod omnes viri boni soli titulo probitatis & sanctitatis per se intelligere possint omnia loca scripturarum obscura & difficilia : sed ibi hoc unum velle Christum , quod viri iusti & probi careant impedimenti quibusdam , propter quæ alii quidam nec per se nec per alios fidei veritatem intelligere possint : cupiditas enim v.g.  
glo-



gloriæ, pecuniarum &c. oculos excæcat. Unde Joan. c. 5. v. 44. dicitur: *quemodo vos potestis credere, qui gloriam ab invicem accipitis.* Item Lucæ c. 16. v. 14. *Audiebant hæc Pharisei, qui erant avari, & deridebant eum.*

Ad V. Ariani, Sabelliani, Nestoriani & alii veteres Hæretici Scripturas scrutati sunt non minus, quam hodierni Protestantes, adeoque & illos sicut hos factos fuisse spirituales: ergo & Ariani, Sabelliani, Nestoriani, alique veteres Hæretici non minus quam Calviniani, Lutherani &c. judicant, & non judicantur: eruntque fidei Judices. Cæterum qui scripturas scrutatur cum animo eruendi veritatem submittendo se iudicio infallibili Ecclesiæ Catholicæ: qui Scripturas scrutatur sequendo sensum definitum ab Ecclesia Catholica, is spiritualis est, is judicat, & non judicatur: Ille vero, qui scrutatur scripturas errores suos propugnando, in falsum sensum eas detorquendo: secundum proprium fallibile, & mendax Iudicium interpretando: veritatem definitam ab Ecclesia Catholica impugnando: is non spiritualis, sed pure animalis est homo: is non debet præsumere judicare, sed timendum habet, ut à justo Iudice judicetur: & tales sunt Novatores. Præterea spiritualis, qui judicat, & non judicatur, is plane est, qui tanquam Doctor alios instruere debet, ut ex Apost. ad Galat. c. 6. v. 1. evincitur: *Vos, qui spirituales estis, hujusmodi instruite in spiritu lenitatis:* cum ergo non omnes sint legis Doctores ab Ecclesia constituti, sensum ab ea definitum proponentes, in aperto est, prædictum textum in argumento non omnibus scrutantibus scripturas applicandum esse.

Ad VI. dist. ant. Regula fidei nostræ est verbum Dei infallibiliter declaratum, & explicatum per auctoritatem infallibilem Ecclesiæ, cui Christus continuam assistentiam promisit ad docendum omnes fidei veritates, ut inferius latius probabitur, conc. ant. est verbum Dei expositum à fide vera alienis, quibus

bus Christus infallibilem assistentiam non promisit , nec promittere potuit, neg. ant. & conseq.

Ad VII. dist. ant. intellexerunt scripturas absque interpretatione scripta , conc. ant. absque interpretatione Divinae vocis oraculo collata , neg. ant. & conseq. Primi orientis & nascentis Ecclesiae Patres utpote coevi Apostolis omnino non indigebant commentariis, eo quod habuerint commentaria viva, ipsos nempe Apostolos, eorum discipulos, aut Pontificem ex Cathedra loquentem : quibus intelligendis scripturis adhæserunt : & non sicut Novatores proprio ingenio id effecerunt.

Ad VIII. dist. ant. tollitur in aliquibus per alium clariorem, conc. ant. in omnibus, neg. ant. & conseq. solutio patet ex probis. Et Instatur: In lege humana persæpe unus textus obscurus explicatur per contextum clariorem, & tamen lex hæc non est sui interpres, neque lites per solam legem, sed per judicem secundum legem dirimuntur: ergo pariter.

Ad IX. Trans. ant. neg. conseq. quæ in antecedenti non continetur: nam si in fidei disputatione, dum textus scripturæ non suffragatur, proferam auctoritatem verbi Divini non scripti, Ecclesiae &c. non attiro temere. Præterea non omnia, quæ sine scripturæ probatione afferuntur, sunt habenda pro temeritate: liquidem res sunt non paucæ, quas Christiani credimus, etsi in S. Scriptura expresse non contineantur, uti sunt Consubstantialitas Divinarum Personarum in Trinitate: quod Deipara in & post partum manserit Virgo; quod Biblia sint verum Dei Verbum: &c. Satis est enim, quod secundum sensum in scriptura contineantur. Vere nostris Novatoribus commune est cum Pelagianis & Arianis teste D. P. August. lib. de nat. & grat. dicere: *Credamus igitur, quod legimus, & quod non legimus, nefas credamus adstruere.* Dixi Trans. ant. Nam loc. cit. Verba ita sonant: *nihil, præterquam quod scriptum est, debere*

Q

quem

*quemquam in defensione fidei applicare, vel nominare: ast hæc verba non sunt S. P. Augustini, sed Pascentii Ariani Hæretici, qui illa in quadam disputatione coram aliquo Regio locumtente protulit: eo quod græcam voculam Homousios, latine consubstantialis, in Dei Ecclesia pati nollet ex falsa hac ratione, quod illa vocula non contineatur in S. Scriptura: quam rationem S. P. Augustinus refutat ita: Pascentius admittit, quod Pater in Divinis sit ingenus & incapabilis, seu incomprehensibilis: quamvis id in nulla scriptura contineatur: ergo etiam.*

Ad X. Conc. ant. neg. conseq. Non enim idem est *utile ac sufficiens*: nec omne id sufficit, quod est utile. Sic utilis est Eleemosyna ad salutem, sed sola non sufficit: & sic de pluribus: ergo.

Dices: Cap. 22. v. 16. 17. & 18. Apocal. habetur: *Contestor omni audienti verba prophetiæ libri hujus: si quis apposuerit ad hæc, apponet Deus super illum plagas scriptas in libro isto. Et si quis diminuerit de verbis libri prophetiæ hujus, auferet Deus partem ejus de libro vitæ: ergo. &c.* Hæc ad præsentem materiam non esse. Neque enim Ecclesia ut Judex controversiarum scriptis quidquam addit, aut ab ipsis quid detrahit. Nam illa est custos depositi, quod integrum & illæsum servat: solum textum scripturæ ex officio exponit, non auget, non minuit. Hic textus proprie AA. Novatores ferit: qui scripturam adulterant, partim addunt, partim demunt, ut lustranti Biblia Novatorum, & cum authentica combinanti ad oculum patefcet.

## §. II.

Dico 2. Judex Infallibilis de sensu S. Scripturæ, non est Spiritus privatus, seu Spiritus S. cuique fideli assistens.

JAM præmissum est, Spiritus privati nomine intelligi internam Spiritus S. persuasionem, seu illustrationem, ac revelationem,

nem, qua fidelis privatus discernit veritatem in controversiis fidei, ut docent Hæretici. Non negant Catholici, Spiritum S. aliquibus privatis & probis hominibus aliquando concedi, & concessum esse, sed solum negant, hunc Spiritum ita certo adesse cuilibet privato etiam fidei, ut quilibet privatus possit certum & infallibile iudicium de vero sensu scripturarum ferre, ut Protestantes prætendunt. Hoc præmisso

Probatur Conclusio 1. Spiritus à Deo reprobatus nequit esse Judex infallibilis controversiarum fidei: sed spiritus privatus est à Deo reprobatus: ergo spiritus privatus non potest esse Judex infallibilis controversiarum fidei. min. prob. 1. Jerem. c. 23. v. 16. habetur: *Nolite audire verba Prophetarum, qui prophetant vobis, & decipiunt vos: visionem cordis sui loquuntur, non de ore Domini.* 2. Ezech. c. 13. v. 3. dicitur: *Væ Prophetis insipientibus, qui sequuntur, Spiritum suum, & nihil vident.* 3. Maria soror Moylis & Aaron frater, qui murmurantes contra Moysen, & putantes sibi æque ac illi Dominum loqui per privatam revelationem, seu per spiritum illum privatum, dixerunt Numer. c. 12. v. 2. *Num per solum Moysen locutus est Dominus? nonne & noi is similiter locutus est?* quod cum audisset Dominus, iratus est, & gravi lepra percussit Mariam sororem Moysis. 4. 3. Reg. c. 22. v. 23. *Dedit Dominus spiritum mendacii in ore omnium Prophetarum tuorum, qui hic sunt.* 5. 2. ad Thessal. c. 2. v. 2. dicitur: *Regamus - - - ut non cito moveamini à vestro sensu, neque terreamini, neque per spiritum, neque per sermonem:* Hic Paulus duos deceptores præcavendos admonet: iudicium spiritus privati, & Pseudoprophetarum doctrinam. 6. 1. ad Corinth. c. 12. habetur: *Alii datur Propbetia, alii discretio spirituum - - - Nunquid omnes Propbetæ? nunquid omnes Doctores? nunquid omnes interpretantur? quid clarius ad intelligendum, non omnibus datum esse donum sensum scripturarum percipiendi?* 7. 1. Joan. c. 4. v. 1. dicitur: *Charissimi nollite omni spiritui credere, sed probate spiritus,*

*si ex Deo sint , quoniam multi Pseudoprophetae exierunt in mundum.* Probandus est igitur spiritus privatus utique non per privatum spiritum , cum eadem ratio urgeat. Ergo. Ex his

Confirmatur 1. Incertum est , num spiritus iste privatus sit à Deo : & quamvis nonnunquam donum interpretationis sit alicui collatum , nullus habet proprii spiritus certam , exploratamque persuasionem , & qui hanc se habere præsumit , insigniter inflatus est ac superbus. Esse enim Prophetas , qui sequuntur spiritum suum & nihil vident affirmat Ezech. c. 13. v. 3. Eum qui loquitur mendacium , ex propriis loqui , quia mendax est & pater ejus inquit Christus Joan. c. 8. v. 44. atque in corpore Ecclesiæ omnibus à spiritu , qui ubi vult spirat , non dari interpretationes sermonum , scribit Paulus in 1. ad Corinth. c. 12. v. 28. & 30. atqui spiritus hæreticorum non solum ob hanc rationem est incertus , sed etiam est spiritus mendacii , præsumptionisque sacrilegæ , cum sibi temere attribuant , quod Ecclesiæ , & summis Pontificibus negant , quibus tamen Christus solis repromisit : testis hujus incertitudinis est Zwinglius , qui in Lutheranis palæstris edoctus ad Sacramentarios circa doctrinam cœnæ defecit , alio spiritu interpretatus verba consecrationis : monitoremque habuit in somniis , de quo ipsemet scribit in subsidio de Euchar. non meminisse , *ater is fuerit an albus.* Præsumptionis vero exemplum singulare tribuit Lutherus scribens initio libri contra Regem Angliæ , *Nactum se spiritum insignem contemptorem tum fraudis , quam furoris Papistici.* Et quodnam majus præsumptionis indicium , quam sibimet arrogare auctoritatem interpretandi scripturam , illamque auctoritatem Romano Pontifici , & plenariis synodis denegare ? ergo interpretatio S. Scripturæ facta privato spiritu tanquam ambigua , fallax , & temeraria debet esse suspecta. Ergo.

Confirmatur 2. Licet etiam interpretatio S. Scripturæ fieret Divino spiritu afflante , ut Novatores sibi falso blandiuntur ,



tur, non esset tamen ad faciendam fidem idonea nisi accedente Ecclesiæ comprobatione; nam & Paulus Evangelium acceperat per revelationem Jesu Christi, & nihilominus illud cum Apostolis contulit, *ne forte in vacuum curreret, aut cucurrisset*, ut ipse scribit ad Galat. c. 11. v. 2. *scilicet ne secundum illos credidisset, & ne secundum illos evangelizaret*, ait Tertull. lib. 4. Contra Marcionem. Quare S. P. August. lib. 28. c. 4. Contra Faustum inquit: *Quis est ergo tam demens, ut credat, nescio cui ex transverso de Perjide post ducentos & amplius annos venienti - - - cum ipse Apostolus Paulus post Ascensionem Domini de cælo vocatus, si non inveniret in carne Apostolos, quibus communicando, & cum quibus conferendo Evangelium, ejusdem societatis appareret, Ecclesia illi omnino non crederet?* Jam ergo ex his hoc conficitur argumentum: spiritus privatus aut est spiritus mendacii, aut veritatis? si mendacii, idoneus non est ad rectum judicium de veritate fidei pronuntiandum: si veritatis: suam ab Apostolica Ecclesia postulat dijudicationem, si non sui causa, saltem causa illorum, qui sunt instruendi: ergo nullatenus privatus ille Spiritus Judex esse potest Controversiarum fidei.

Probatur Conclusio 2. Si spiritus privatus, seu Spiritus S. fidei assistens esset Judex Controversiarum fidei: nulla apud fideles esse posset dissensio circa res fidei sed maxima est dissensio non modo Catholicos inter & protestantes, sed inter ipsos protestantes, qui se solos fideles jactitant: ergo. maj. constat: quia Spiritus S. contraria & repugnantia dictare non potest, alias esset Spiritus mendax, sibi que contradicens. Min. de dissensione inter Catholicos & protestantes aliunde patet: de dissensione inter ipsos invicem protestantes æque constat: hæc enim verba Christi: *Hoc est corpus meum*. aliter interpretantur Lutherani, aliter Calvinistæ & Zwingliani: illi volunt Christum designasse realem sui corporis præsentiam in Eucharistia; & quidem in sumptione quamvis sine transubstantiatione: Isti solum figura-

Q 3

tivam:

tivam: ergo non adest ipsis Spiritus S. cum nequeat spiritus veritatis uni veritatem dictare, alteri falsitatem: quod fieret, si uni dictaret unum sensum, alteri sensum contradictorium.

Confirmatur: Nonne Lutherani jactant se privato spiritu edoceri de rebus fidei: jactant idem & Calvinistæ. jactant & alij. Putemne potius recurrendum esse ad Pastorem Lutheranum, quam Calvinistam, aut vicissim? cui infallibilem adhibendam fidem censeam? Lutheranus dicit spiritu privato se edoceri, *Apocalipsin, Epistolam ad Hebræos &c.* non esse Scripturas Canonicas ac divinas: hæc verba: *Hoc est corpus meum* designare realem Christi præsentiam in Eucharistia. Calvinista vero reponit se à spiritu privato contrarium edoceri: prædictos libros vere in Canonem SS. Scripturarum referendos esse: atque hæc verba: *hoc est corpus meum*, solum designare præsentiam Christi figurativam in Eucharistia. Jam si spiritus privatus sit infallibilis S. Scripturæ Judex, cur aut Lutherani non acquiescunt Calvinistis? aut cur Calvinistæ non conveniunt cum Lutheranis? nempe complacet sibi sensus humanus in suis inventionibus, & quivis blanditur sibi se verum habere spiritum, verum Scripturæ sensum, sæpe Sathana in Angelum lucis sese transfigurante, & tales decipiente cum æternæ vitæ dispendio. Ergo.

Probatur Conclusio 3. Stante Novatorum doctrina, quod spiritus privatus sit Judex Controversiarum fidei: nulla in Ecclesia foret Hæresis: atqui contrarium constat tum ex experientia: tum ex Apost. 1: ad Corinth. c. 11. v. 19. dicente: *oportet esse Hæreses*: ergo. seq. maj. prob. Hæreticus is censetur, qui à fidei regula elongatur: sed si spiritus privatus esset Judex & regula fidei, nemo ab ea discreparet, cum juxta Novatorum principia eidem adhærere teneatur quilibet: nemoque proprio spiritu refragetur & judicio: ergo nusquam falsi dogmatis quis criminari posset, adeoque nullus foret hæreticus. Imo nullus

redarguendus esset & vitandus contra Apostoli sententiam ad Titum c. 3. v. 10. *Hæreticum hominem - - - devita.*

Dices: Juxta evulgatum Novatorum axioma, quisque in propria lege salvari potest: ergo nil officit, quod aliquis ex motione privati spiritus credat, quæ alter non credit. Sed

Contra 1. Juxta scripturam, ad quam perpetuo provocant Novatores, admittendum est, futuras esse Hæreses, atque hæreticum à via salutis aberrare: ut dicatur ad Titum c. 3. v. 10. *Hæreticum hominem post unam & secundam correptionem devita, sciens quia subversus est, qui ejusmodi est, & delinquit, cum sit proprio judicio condemnatus: ergo falsum est, unumquemque in ea fide, quam perperam credit, salvari posse.*

Contra 2. Si quilibet in propria secta salvari potest, cur furiose adeo adversus Catholicos invehunt Hæretici? cur veteres hæreticos damnant, atque ab illis discriminari summo conantur studio? ergo.

Probatur Conclusio 4. Spiritus privatus excitat, fovet, & auget hæreses ac Schismata: ergo nequit esse Judex controversiarum fidei. Ant. prob. Calvinus instruct. adversus Anabaptistas fatetur, quod si adversus omnes illorum errores, & falsas opiniones scribere vellet, ingressurum se abyssum, unde sibi non pateret exitus, cum illa secta quoddam sit immensum stupendorum deliriorum Mare. Lutherus Thesi 27. lib. contra art. Lovaniens. ait: *Hæreticos seriocensemus, & alienos ab Ecclesia Dei Zwinglianos, & Sacramentarios omnes: qui negant Christi corpus, & sanguinem ore carnali sumi in universa Ecclesia.* Tigurini in Confessione Germanica edita Tiguri anno 1544. fol. 123. & 131. habent: *Quia Lutebrus monstruosum dogma inducere conatur - - - Lutherus Dei & Divini bonoris oblitus nos damnatam sectam vocat, sed videat, ne hujusmodi nefandis & impiis dictis seipsum Hæresarcham declaret.* Heidelbergenses in ordin. Eccles. definiunt: *Lutberi & Brentii Catechismi extra Ecclesiam ejiciantur, & eorum scripta*

*scripta nullam habeant auctoritatem.* Franciscus Stanckarus de Trinitate adversus Bullingerum, Petrum Martyrem, Calvinum, scribit: *Quis Diabolus o Calvine te seduxit contra filium Dei cum Ario obloqui, ut ostenderes, eum privatum fuisse gloria sua, nunc autem petere eam sibi dari, quasi eam non semper habuerit - - - Cave o Christiane, & vos Ministri a libris Calvini cavete, & praesertim in articulo de Trinitate, Incarnatione, Mediatore, de Sacramento baptismi, & Praedestinatione: continet enim doctrinam impiam, & blasphemias Arianorum.* His positis instauratur praesens argumentum: Vel istae censurae & definitiones verae sunt vel falsae? Si falsae: ergo spiritus privatus non est infallibilis Judex fidei, cum omnes isti Sectarii ex propriae conscientiae sensu scripserint. Si verae: ergo Anabaptistae, Tigurini, Calviniani Lutherani, Porretani, & reliqui ejusdem furfuris homines vere sunt Haeretici, & extra Ecclesiam, ut censurae satis innuunt; subsumo: sed omnes isti erraverunt, quia spiritum suum privatum obsecuti sunt: ergo spiritus privatus est haesum, Schismatumque radix. Ratio in promptu est: quia spiritus unius alteri non probatur, & quod uni constat, alteri sufficienter non ostenditur: unusquisque judicat, secundum quod est affectus: cumque scripturam legentes diversimode affecti sint, diversa judicia fore est necesse. Qui rudes sunt, non intelligunt: qui polent ingenio, inter se digladiantur: imo qui doctrina excellere sibi videtur, alterius opinioni sese accommodare dedignatur: ergo. Hinc bene scripsit S. Hieronymus adversus Luciferanos: *Si non sit in Ecclesia una eminens potestas, futura sunt Schismata, quot Sacerdotes; & licebit dicere, tot Schismata, quod homines.*

Communis & vulgaris Haeticorum est responsio: quod duo sint articulorum genera distinguenda: fundamentalium. nempe & non fundamentalium. Fundamentales ii censentur, sine quibus Ecclesiae veritas corrui, nec salus haberi potest.

Non

Non fundamentales sunt ii, sine quibus tum Ecclesiæ veritas, tum animarum salus habetur, suntque adiaphori, quos absque fidei injuria liberum est adoptare, vel respuere. Porro in fundamentalibus omnes ad unum conveniunt Reformati: in adiaphoris discriminantur quidem, verum ex horum discrepantia nihil fidei derogatur: sicut ex quo in pluribus Scolasticis concertationibus dissidium est inter Thomistas, Scotistas, & Recentiores, non valet inferri substantialis divisio in Papatu. Sed

Contra 1. Illa Articulorum in fundamentales, & non fundamentales, seu adiaphoros & arbitrarios distinctio est inanis, frustranea, & Protestantibus impossibilis: ergo. ant. infra ex professo demonstrabitur.

Contra 2. Articuli, in quibus Lutherus à Zwinglio, Calvinus ab Anabaptistis, Lutherani à Calvinistis discriminantur, vere sunt fundamentales: nam ii articuli sunt fundamentales, quibus non credens sit hæreticus: sed Lutherus Zwinglianos aperto ore hæreticos vocat: Tigurini Lutherum Hæresiarcham prædicant: Bullingerus Calvinum Arianum dicit: ut ex proba constat; ergo.

Contra 3. Inter ipsos Calvinianos est discrepantia in fundamentalibus articulis: ergo. ant. prob. 1. Joannes Piscator (à quo Piscatoriani) in Gymnasio Herbornensi Calvinianæ Theologiæ Professor in Aphorismis de lege Dei aphoris. 17. affirmat: fractionem panis in Dominica cæna essentialem, atque ita necessariam, ut, quisquis illam omittit, cænam non modo mutilet, sed etiam tollat. Hæc quæstio in tribus Calvinistarum Academiis acriter agitata fuit, Marburgensi nempe, Basileensi, & Heidelbergensi. Marburgenses Piscatoris doctrinam in fidei dogma adoptarunt: Basileenses ritum esse adiaphorum dixerunt: Heidelbergenses fractionem nec essentialem, nec adiaphoram volunt, sed necessariam fatentur ad cænæ in-

R

tegr-



tegritatem. Piscatoriani itaque in substantialibus discrepant à Calvinianis Basileensibus & Heidelbergensibus, & taliter discrepant, ut isti Piscatoris opiniones aperte hæreticas proclamaverint. Ergo.

Prob. ant. 2. Diffidium inter Calvinianos Jacobum Arminium (à quo Arminiani, seu Remonstrantes) & Franciscum Gomarum (à quo Gomaristæ, seu Contraremonstrantes) erat in fundamentalibus utique articulis, nempe in materia de gratia Dei, & libero arbitrio, de Justificatione &c. ita ut tota Hollandia in partes fuerit divisa. In Dortrectana synodo lis instituta fuit, damnatique Arminiani, qui solemnī protestatione Dortrectanam synodum pro legitimo controversiarum suarum Judice recusarunt: verum contra eosdem Synodica sententia lata est: *Synodus invocato Dei Sancto nomine, juxta auctoritatis ex verbo Dei probe conscia, omnium legitimarum tum veterum tum recentium Synodorum vestigiis insists, & Illustrissimorum DD. Ordinum Generalium auctoritate munita declarat, atque judicat, Pastores illos, qui partium in Ecclesia Ductores, & errorum Doctores se præbuerunt, corruptæ Religionis, scissæ Ecclesiæ unitatis, & gravissimorum Scandalorum: citatos vero ad hanc Synodum pervicaciæ reos & convictos teneri. Quas ob causas primò Synodus prædictis citatis omni Ecclesiastico munere interdicit, eosque ab officiis suis abdicat, & Academicis functionibus etiam indignos esse judicat, donec per seriam resipiscentiam dictis, factis, studiis contrariis abunde comprobata Ecclesiæ satisfaciant, & cum eadem vere & plene reconcilientur, atque ad ejus communionem recipiantur. Jam, qui tam severe puniuntur, nonne in fundamentalibus à cætu Calviniano discriminantur? Ergo.*

Diffidium inter Thomistas, Scotistas, & Recentiores nullas suppetias fert Novatoribus: etenim hi omnes pleno consensu approbant, quidquid credendum proponit Ecclesia: unde in fide nulla inter eos est discrepantia, immo summa consensio:

sio: quare lis tota versatur circa conclusiones ex fidei principiis proxime vel remote illatas, parato semper animo obtemperandi in omnibus Ecclesiæ: ergo hæc paritas ipsos Novatores ferit.

Dices: Esto discrimen in fundamentalibus intercederet, non tamen illud est, quod saluti officiat. Unde etsi Lutherani & Calvinistæ &c. in pluribus discriminantur etiam fundamentalibus, omnes tamen habent in iis, in quibus differunt, solidam probabilitatem: qui vero solidæ innititur probabilitati, nequaquam censeretur debet extra statum salutis. Etenim non minus ad salutem necessaria est fides quam lex: sed stante solida probabilitate circa legem potest absque ulla noxa unusquisque sequi, quam vult partem: ergo etiam in fide. Porro quamlibet Novatorum sectam solidæ innixam fore probabilitati ex ipsis Papistarum principiis compertum est: nam illa sententia vere est probabilis, quæ à pluribus Doctoribus rem ex professo tractantibus tum Scripturæ S. fundamento, tum rationum pondere, tum Patrum auctoritate, atque oppositorum argumentorum solutione defenditur: atqui evidens est, Novatorum sectas sua dogmata his momentis propugnare v. g. in Eucharistia non adesse reale corpus Christi, probant Calviniani Scripturis, Patribus, atque argumenta dissolvunt: quod si conferantur momenta, quibus Calviniani probant non adesse realiter corpus Christi in Eucharistia cum iis, quibus Catholici intendunt evincere Sacramenta vivorum v. g. producere per accidens primam gratiam, luce clarius apparebit, gravioribus fundamentis inniti Calvinianos, quam Catholicos: ergo si Catholicorum hujusmodi assertio ut probabilis propugnatur, cur non & illa Calvinianorum? Sed

Contra 1. Si hæc Hæreticorum doctrina urgeret, Secta Arianorum, Sabellianorum, Ebionitarum, aliorumque non fuisset hæresi nota proscripta, cum iisdem probabilitatis momen-

R 2

tis

tis inniteretur, quibus recentiorum hæreticorum: atqui ipsimet Novatores proscribunt tanquam hæreticos Arianos, Sabellianos, Ebionitas, & hujusmodi, atque fore extra statum salutis palam profitentur: ergo Christi Ecclesia circa fidei dogmata non patitur opinionum probabilitatem.

Contra 2. Christi fides ad salutem necessaria taliter una esse debet, ut omnes idipsum sentiant, sed ubi pluralitas probabilitatum admittitur, non omnes id ipsum sentiunt: ergo. maj. constat ex D. Paulo ad Ephes. c. 4. v. 5. *Unus Dominus, una fides, unum baptisma.* Eapropter S. P. August. lib. 12. Confess. c. 25. Deum alloquens ait: *Veritas tua nec mea est, nec illius aut illius, sed omnium nostrum, quos ad ejus communionem publice vocas: terribiliter admonens nos, ut nolimus eam habere privatam, ne privemur ea. Nam quisquis id, quod tu omnibus ad fruendum proponis, sibi proprie vindicat, & suum vult esse, quod omnium est, à communi propellitur ad sua, hoc est, à veritate ad mendacium. Qui enim loquitur mendacium, de suo loquitur.* Ruminent quæso Novatores hæc verba, & dicant, annon acu tangantur.

Contra 3. Fides Christi ad salutem necessaria in una solum Ecclesia universos fideles comprehendente reperitur; & ideo in Symbolo habemus, *Credo in unam sanctam, Catholicam, & Apostolicam Ecclesiam*: atqui probabilis Sectarum pluralitas multiplicat Ecclesias: ergo non stat cum fide ad salutem necessaria.

Contra 4. Fides ad salutem necessaria debet esse summæ certitudinis, atque omnimodæ infallibilitatis, cui falsum subesse nequit: nam à Divina pendet revelatione, quæ falsum, & mendacium dictare non potest: dicitur enim Lucæ c. 21. v. 33. *Cælum & terra transibunt, verba autem mea non transibunt*: sed stante probabilitate nequaquam datur summa & omnimoda infallibilitatis certitudo, cui subesse falsum nequeat: ergo.

Contra 5. Vera fides ea est, sine qua nemo Deo placere potest: nam *sine fide impossibile est placere Deo*: atqui Sectarum  
divisio

divisio nequaquam Deo placet : ergo cum ex emendicata sectarum probabilitate oriatur divisio , hæc Dec nusquam placere potest. Et sane unitate non minus gaudet fides ac baptisma : sed contentiones circa baptisma dividunt Christum juxta illud 1. ad Corinth. c. 1. v. 3. *Ego sum Pauli : ego autem Apollo : ego vero Cephae : ego autem Christi : divisus est Christus ?* Ergo etiam contentio in fide Christum dividit : atqui qui dividit Christum ex Deo non est : ergo Novatores suis fallaciis nullam gignunt probabilitatem , nec ex Deo , sed ex Patre mendaciorum sunt.

Novatores quidem suas hæreses contendunt scripturis , Patrum autoritatibus , immo Catholicorum argumentis respondendo propugnare : sed cum Deus in eos immiserit spiritum vertiginis , ut videntes non videant , & intelligentes non intelligant , infeliciter opus absolvunt , videlicet scripturas depravando , Patrum auctoritates mendaciter in suas partes trahendo , secundum proprium judicium interpretando , argumenta Catholicorum illudendo : ut ipsis merito verba S. Hilarii ad Constantium Augustum adoptari queant : *Periculosum nobis admodum , atque etiam miserabile est , tot nunc fides existere , quod voluntates , & nobis tot esse doctrinas quot mores , & tot causas blasphemiae pululare quot vitia , dum aut fides scribuntur , ut volumus , aut intelliguntur ; & cum secundum unum Deum & unum Dominum , & baptismum etiam fides una sit , excidimus ab ea fide , quæ una est ; & dum plures fiunt , ad id esse cæperunt , ut nulla sit.*

Dicunt AA. Omnes nostras probas premere difficultatis pondus : inquit Calvinianus , quænam Ecclesia dogmata prohibuit Calviniana ? Romanam dicunt Pontificii. Verum de hac quæritur , an sit vera Ecclesia ? affirmant Papistæ : Calviniani negant. Cur igitur illorum doctrina rem facit probabilem immo certam , secus istorum ? Ad unum omnes volunt dari veram Christi Ecclesiam , extra quam non est salus : contendunt Paptistæ hanc esse sub Papatu : negat Calvinus. Porro



ridiculum est dicere : Calvinisticam doctrinam nulla gaudere probabilitate, quia oppositum Romana Ecclesia decrevit : cum de hac sit quæstio, an vere sit Ecclesia ?

Ad hanc superbam, futilem instantiam, & excogitatum deliramentum infra ex professo respondebitur, dum invicte demonstrabimus solam Romano-Catholicam veram esse Ecclesiam Christi, extra quam salus haberi non potest.

Probatur Conclusio 5. In omni republica bene ordinata & instituta debet esse Judex, qui legem Principis interpretetur : qui à litigantibus adiri, videri, & audiri possit : qui Civiles subditorum causas dirimat : qui cum judicandi potestate conjunctam habet vim coactivam, alias judicis sententia esset frustranea maxime adversus eos, qui non amore justitiæ, sed metu poenæ a malo retrahuntur. Ergo etiam talis vivus Judex debet esse in Ecclesia : atqui Spiritus privatus enumeratas condiciones non habet : ergo nequit esse judex Controversiarum fidei. Ipsimet Hæretici proprio testimonio in hoc convincuntur. Nam Henricus VIII. Anglorum Rex anno 1540. decrevit, neminem præter Ecclesiæ Doctores posse Scripturas interpretari, inhibuitque populo, ne illas exponere, aut ex illis ratiocinationes inferre auderet. Zwinglius ad refellendos Anabaptistas lib. 1. de baptismo. p. 72. demonstrat, non ad illos sed ad Ecclesiam spectare Scripturarum expositionem. Idem scribit Bucerus in Rat. Can. exam. p. 223. Cur demum hæretici ad Controversias dirimendas, & dogmata definienda de Eucharistia, de baptismo, de justificatione &c. adeoque non ad solam statuendam Ecclesiasticam disciplinam, non semel Synodos coegerunt, si unusquisque à proprio privatoque spiritu debet dirigi. Quid etiam definiunt nisi fidei dogmata tot Confessiones ab Hæreticis divulgatæ ? Ipsi ergo velint, nolint, præter Scripturam & privati spiritus persuasionem coguntur vivum & spirantem adire Judicem, quem nullibi invenient, nisi in vi-

sibili



sibili, & Apostolica Romana Ecclesia, Perbene scripsit hac super re Sectarius Anglicanus Hookerus in præf. lib. de Ecclesiastica Politia. Sect. 6. *Hoc unum sat scimus tam natura & experientia, quam ipsa Scriptura edocti, Contentionibus tandem finem imponendum esse definitive alicujus Judicis sententiæ nos submittendo, cui neutra litigantium pars sub quovis prætextu contradicat, alioquin semper confusio erit, nec spes ulla pacis consequendæ.* Witakerus Hæreticus de S. Scriptura approbat in veteri lege auctoritativum tribunal: *alioquin nullus fuisset litigandi finis: Cum par in parem non habeat imperium.*

## O B J E C T I O N E S.

**O**bjicies I. Scriptura docet, singulos fideles novæ legis à Deo immediate erudiri; Isaïæ 54. c. v. 13. dicitur: *Dabo omnes filios tuos doctos à Domino:* ergo Spiritus interior & privatus est fidei tribunal, & Judex.

II. Ut Divina Mysteria percipiantur, ita Filii Dei in nova lege erudiuntur interius, ut omne prorsus externum Magisterium excludi debeat: ergo solus privatus Spiritus interne loquens audiendus est. ant. prob. ex Jerem. c. 31. v. 33. ubi dicitur: *Dabo legem meam in visceribus eorum, & in corde eorum scribam eam - - & non docebit ultra vir proximum suum & vir fratrem suum dicens: cognosco Dominum: omnes enim cognoscent me.* Ergo.

III. Si interior & privatus spiritus non foret Judex Controversiarum fidei, alius sane necessarius foret: sed hoc repugnat Joanni Epist. 1. c. 2. v. 27. dicenti: *Non necesse habetis, ut aliquis doceat vos, sed sicut unctio ejus docet vos de omnibus - - manete in eo.* Ergo interior & privatus Spiritus & de omnibus docet, & est sufficiens Judex.

IV.

IV. Interior illustratio, quæ est probativa veritatis, est fidei tribunal: sed illustratio, de qua loquitur Joannes cit. loc. est hujusmodi, ideo subdit c. 4. v. 1. *Probate spiritus si ex Deo sint.* Cui consentit Apost. 1. ad Thessal. c. 5. v. 21. *Omnia probate, quod bonum est, tenete.* Ergo.

V. Lumen interius, quod propheticum est, debet cense-  
ri regula fidei, cum fides fundata sit super fundamentum Apo-  
stolorum & Prophetarum: sed fidelis quilibet prophetia est do-  
natus: dicit enim Apost. ad Rom. c. 12. v. 7. *Habentes autem  
donationes secundum gratiam, quæ data est nobis, differentes: sive  
Prophetiam secundum rationem fidei: sive ministerium in ministrando  
&c.* Ergo.

VI. Spiritus, qui omnia judicat, & à nemine judicatur,  
est regula & Judex mysteriorum fidei: sed omnes fideles sunt  
ejusmodi: cum ille spiritualis jure credi debet, qui Spiritu re-  
generationis præditus est, & spirituales judicare, & non ju-  
dicari docet Apost. 1. ad Corinth. c. 2. v. 15. *Spiritualis autem  
judicat omnia, & ipse à nemine judicatur.* Ergo.

VII. Ille est Judex mysteriorum fidei, ad quem pro Con-  
troversis dirimendis recurrendum est: sed in iis ad scripturas  
secundum internam spiritus significationem est recurrendum,  
dicente Joan. c. 10. v. 27. *Oves meæ vocem meam audiunt, &  
sequuntur me:* Vox autem Dei est Scriptura, & hanc vocem  
absque præceptore audiunt interius fideles. Ergo.

VIII. Oves Christi ita ejus vocem audiunt, ut non no-  
verint vocem alienorum, ut dicitur Joan. c. 10. v. 5. Ergo so-  
la vox Dei audienda est.

IX. Oves per interiorem spiritum audiunt vocem Christi  
ita, ut aliam quamcunque excludant: dicit enim S. Paulus 1.  
ad Corinth. c. 12. v. 7. *Unicuique autem datur manifestatio ad uti-  
litatem, id est, ut recte scripturas intelligat, seque ad salutem  
dirigat:* Ergo.

X.

X. Cuilibet taliter Scripturæ Spiritus manifestatur, ut eam judicare possit: unde Apost. 1. ad Corinth. c. 14. v. 29. hoc clarius explicat dicens: *Prophetae autem duo, aut tres dicant, & cæteri dijudicent: & infra: Potestis enim omnes per singulos propbetare: ergo omnes fideles sunt Judices, & prophetæ.*

XI. Si spiritus privatus non esset regula & tribunal fidei, alicui alligaretur, puta Papæ, aut Concilio; sed hoc est falsum: nam Joan. c. 3. v. 8. legitur: *Spiritus, ubi vult, spirat: ergo.*

XII. S. Paulus 2. ad Corinth. c. 3. v. 17. ait: *ubi Spiritus Domini, ibi libertas: sed in lege gratiæ datur Spiritus Domini, ergo & libertas: ergo in judicio fidei nequaquam huic vel illi debet dari alligatio.*

XIII. Habetur 1. Joan. c. 5. v. 10. *Qui credit in Filium Dei, habet testimonium Dei in se: ergo fidelis quilibet lumen habet, & donum interpretandi dogmata.*

XIV. Dicitur Joan. c. 7. v. 17. *Si quis voluerit voluntatem ejus (id est Patris) facere, cognoscet de doctrina, utrum ex Deo sit, an ego à me ipso loquar. Ergo præter spiritum fidei, quo credimus Deo volenti & præcipienti, aliud non datur Magisterium.*

XV. Patres spiritum interiorem tanquam fidei tribunal agnoverunt: hinc Calvinus in Præfat. Instit. habet: *Augustinus contendit, Ecclesiam non debere se Christo præponere, quod ille semper veraciter judicet; Ecclesiastici autem Judices, sicut homines, plerumque fallantur: ergo spiritus privatus infallibilis est Judex.*

XVI. S. P. Augustinus in veritatis acquisitione omne externum Magisterium excludit: nam Tract. 3. in Joan. ad ea verba *unusquisque docebit vos* habet: *Sonus verborum nostrorum aures percutit, Magister intus adest: nolite putare quemquam hominem aliquid discere ab homine. Ergo.*

XVII. S. Ambrosius lib. 2. Epist. 13. juxta editionem Parisiensem ad Valentinianum Augustam scribens vult Mediolanensem populum judicem controversiæ fidei inter ipsum & Au-

S

xen-

xentium Arianum: ergo existimat quemcunque de plebe esse Judicem fidei.

XVIII. Quilibet sua fide salvatur: ergo cujuslibet Spiritus debet esse tribunal fidei, & Judex Controverliarum fidei.

XIX. Quod per pauciora fieri valet, non debet per plura fieri: sed Spiritus Sancti lumen cuilibet elargitum est sat ad constituendam salutis normam: ergo sat quoque est pro tribunali fidei. Quod enim ab uno perfectiori agente peragitur, non debet per aliud ministerium fieri: cum ergo perfecta motio, quæ interior est, sit à Deo, non debet venari ab homine.

XX. Fides nostra sequitur ad conditionem scientiæ Christi: sed Christus non accipiebat testimonium ab homine juxta illud Joan. c. 5. v. 34. *Ego testimonium ab homine non accipio*: ergo & fides nostra non ab hominibus, sed ab interno Spiritu testimonium accipere debet:

XXI. Apostolus 1. ad Corinth. c. 2. cuilibet adesse Spiritum Dei docet: postquam enim dixit, neminem scire quæ sunt, nisi Spiritum Dei; subdit v. 12. *Nos autem non Spiritum hujus mundi accepimus, sed Spiritum, qui ex Deo est, ut sciamus, quæ à Deo donata sunt nobis.* Et v. 15. *Spiritualis autem judicat omnia, & ipse à nemine judicatur. Quis enim cognovit sensum Domini, qui instruat eum? Nos autem sensum Christi habemus.* Ergo ipse S. Paulus nos interius à Spiritu privato doceri tradit: ait enim primo: nos fideles accepisse Spiritum, qui ex Deo est, ut sciamus &c. secundo: hominem spirituales dijudicare omnia. Tertio: nos sensum Christi habere.

XXII. S. Paulus 1. ad Corinth. c. 12. v. 11. scribit: *Hæc autem omnia operatur unus, atque idem Spiritus, dividens singulis prout vult*: ergo omnibus bene petentibus datur Spiritus interpretationis: ergo is non est alligatus alteri puta Papæ, sed datur à Deo liberè, cui ipse voluerit.

XXIII.

XXIII. Spiritus Prophetiæ non est alligatus summo Pontifici : ergo nec Spiritus interpretationis. Ant. patet 1. ex eo, quod Deus olim prætermisiss Sacerdotibus & Pontificibus Prophetas excitaverit de communi plebe, ut Amos, qui erat Pastor ovium, & Deborah, quæ etsi mulier prophetavit : non vero prophetavit Aaron, nec ejus successores. 2. ex eo, quia Act. c. 21. v. 8. & 11. Legimus, quod prophetaverint Agabus, & quatuor filiæ Philippi unius ex septem Diaconis, dicti Evangelista, non quod Evangelium scripserit, sed quia id prædicavit: non autem prophetaverunt Linus & Clemens, qui erant summi Pontifices.

## S O L U T I O N E S.

R. **A**D I. Isaiam loc. cit. alludere ad primarium novæ legis Magistrum, qui fuit Deus homo: ut S. Paulus ad Hebræ. c. 1. v. 1. loquitur: *Multifariam, multisque modis olim Deus loquens Patribus in Prophetis, novissime locutus est nobis in Filio.* Apostolos itaque aliosque fideles per se ipsum docuit Filius Dei in lege gratiæ, immo quotidie docet per interiorem gratiam, qua homo interius movetur ad ea amplectenda, quæ forinsecus à Pastoribus audit, quia nihil externa proficit prædicatio, nisi Deus interius cor moveat, dicente Apostolo: *Ego plantavi, Apollo rigavit, Deus autem incrementum dedit.* Paucis etiam dici potest: de gratia præveniente, & ad credendum vocante intelligendum esse Isaiam dicentem: *Dabo omnes filios tuos doctos à Domino*, hoc est, doctos per fidem, quæ est donum supernaturale proveniens à solo Deo: per hoc tamen non excluditur externum ministerium, cum ipsemet Christus præceperit docere omnes gentes. Nec exclusit, sed magis recommendavit nobis Ecclesiam cum visibili capite suo summo Pontifice: unde legitur etiam: *si quis Ecclesiam non audierit, sit sicut Ethnicus &c.* ap-



posita hac causali à Christo : *qui vos audit , me audit : qui vos spernit , me spernit.* Ergo. Et

Si hoc argumentum Novatorum quid ponderis haberet : contra illos inferre licet : ergo Ariani , Sabelliani , aliique Catholicæ Ecclesiæ hostes sunt à Domino eruditi : ergo in his , quæ docent , non errant. Cur igitur Novatores veteres hæreticos damnant ? deinde Calvinus eruditus à Domino dicit Christi verba *Hoc est corpus meum* intelligenda esse methaphorice ; Lutherus itidem à Domino eruditus vult intelligenda esse realiter : quisnam ex duobus contradictorie loquentibus judicabit ?

Dicet Calvinianus , suum judicium esse infallibile , Lutheranorum fallibile verum ñ minus Lutherani , quam Calvinistæ sua dogmata scripturis fulcire contendunt , utriq ; à Spiritu S. se directos , & à Domino eruditos credunt : quorum igitur judicium erit infallibile ? non illud Calvinistarum : nam ut ait Smidelinus contra Grynæum , *Spiritus Calvinistarum mendax est* ; & Lutherus apud Gretserum Lib. 1. contra Goldastum c. 12. *Spiritus Calvinistarum est diabolicus Spiritus.* Non illud Lutheranorum : nam Calvinistæ Heidelbergenses eorum Catechismos tanquam nullius momenti proscripserunt. Itaque privatus cujusque Spiritus nequit esse Judex fidei.

Ad II. Loc. cit. Prophetam velle explicare , quod lex gratiæ sit lex charitatis & non timoris , interioris sanctitatis & virtutis non solius exterioris legalis purificationis : ideo dixit : *dabo legem meam in visceribus eorum.* Hinc propter affluentiam luminis interioris atque signorum obvia erit cognitio unius Dei , nec dabitur de facili hujus veritatis ignorantia , ut sub statu veteris legis sæpe contingebat : eapropter *vir non docebit ultra proximum suum dicens : cognosco Dominum* : abundanter namque patebit cognitio unius Dei , & Evangelii doctrina , tantaque erit interioris luminis irradiatio , ut lex gratiæ facile sit evulganda. Ex hoc autem nequaquam inferri valet , in omnibus fidei mysteriis

steriis taliter esse illuminatos fideles, ut unusquisque per privatum spiritum sit sibi regula fidei. Et hoc argumentum ferit Novatores. Si enim vir non docebit ultra proximum suum, cur Ministri reformati quotidie clamant Scripturas explicando? etsi falsè? cur prædicant cœnam & baptismum verbo concionis sanctificari? cur Christus mandavit Apostolis, ut omnes gentes instruerent? Ecce quomodo Novatores halucinentur?

Ad III. Iterum contra Novatores instatur: si unctis in fide per Spiritum sanctum necessaria non est exterior doctrina, cur Joannes hanc scribit Epistolam tot mysteriis refertam? Itaque S. Apostolus scribit fidelibus in substantialibus fidei jam opportune edoctis, nam v. 22. ait: *Non scripsi vobis quasi ignorantibus veritatem*: eos admonens v. 26. ut à seductoribus caveant: *Hæc scripsi vobis de his, qui seducunt vos*. Eapropter suasor est, ut alios non audiant, cum Lumen fidei, quam susceperunt, quia verax est, sufficienter necessaria doceat: idcirco dicit: *Sicut unctio ejus docet vos de omnibus, & verum est, & non est mendacium --- manete in eo*.

Ad IV. Si per interiorem illustrationem quisque sufficiens Judex est probativus veritatis, cur S. Joan. regulam subnectit, quam in judicando servare debemus? *In hoc cognoscitur Spiritus Dei: omnis Spiritus, qui confitetur Jesum Christum in carne venisse, ex Deo est &c.* 1. c. 4. v. 2. Cur aperte declarat omni spiritui non esse credendum? *Nolite omni spiritui credere*. Monent igitur tum S. Joannes tum S. Paulus fideles jam in fide edoctos, ut caveant à Pseudoprophetis: proindeque ut doctrinam, quam excipiunt, perpendant, utrum auditis per veros Christi Ministros sit consona, ut suscipiatur, aut reprobetur.

Ad V. Lumen Propheticum potissimum darè ad futura, seu abscondita dignoscenda. Quamvis tamen ipsi competeret Scripturarum interpretatio, adhuc esse debet juxta fidei principia, dicente Apostolo: *Prophetiam secundum rationem fidei* loc. cit. ita

ut nemo vaticinetur, aut interpretetur contra rationem fidei. Cæterum hoc privato spiritui non patrocinator, cum perperam fideles singuli dicantur Prophetæ, reclamante Apostolo 1. ad Corinth. c. 12. v. 29. *Numquid omnes Prophetæ?*

Ad VI. Ariani, Sabelliani, & alii veteres hæretici se non minus spirituales credunt quam Calviniani: ergo prædicti judicant, & non judicantur: ergo erunt Judices fidei. Spiritualis ergo qui judicat, & non judicatur, is plane est, qui tanquam Doctor alios instruere debet, ut ex Apostolo ad Galat. cap. 6. v. 1. evincitur: *vos, qui spirituales estis, hujusmodi instruite in spiritu lenitatis: Cumque non omnes sint legis Doctores, in aperto est, prædictum textum non deservire ad probandum privatum spiritum, quem singulis fidelibus donant Calvinistæ.*

Ad VII. Oves quidem Christi ejusdem vocem audire: verum Christus non solum per Scripturas loquitur: sed apertissime per suos Pastores & Vicarios: *qui vos audit, me audit*, quibus ipsas oves Joan. c. 21. v. 17. commendavit, *Pasce oves meas.* Non igitur Scriptura proprio spiritu explicata est vox Dei, sed prout à Pastoribus fidelibus proponitur. Etiam Pelagianis teste S. P. August. lib. de natura & gratia c. 39. solemne erat ad Scripturas confugere: *Credamus, quod legimus, & quod non legimus, nefas credamus adstruere:* & tamen quia ipsam proprio Marte interpretabantur, etiam à Novatoribus inter hæreticos enumerantur. Præterea dum Christus ait: *Oves meæ vocem meam audiunt:* sensus est, quod eam audiant, & sequantur, dum gratiæ prævenientis & vocantis se participes reddunt, qua cum destituti vixerint negligentes Judæi, tanquam incredulis reposuit Christus: *Vos non creditis, quia non estis ex ovibus meis, oves meæ vocem meam audiunt.* Ad credendum enim non solum requiritur externa credendorum propositio, sed insuper necessaria est gratia præveniens, alliciens, vocans, & quasi suaviter ad credendum trabens secundum illud Joan. c. 6. v. 44. *Nemo potest venire ad me, nisi Pater, qui misit me, traxerit eum.* Ad

Ad VIII. Qui sint alieni, qui audiendi non sunt, manifestat Christus loc. cit. in argum. v. 8. *Omnes, quotquot venerunt, fures sunt & latrones, & non audierunt eos oves.* Itaque Pseudodoctores (Novatores) evitandos monet, quia non veniunt, nisi ut furentur, & mactent animas fidelium. Econtra non sunt alieni Pastores illi, qui parati sunt animam suam dare pro ovibus suis: sed ab his fideles excipere debent doctrinam, quia ad ipsos pertinet de ovibus suis.

Ad IX. Datam interpretationem textus citati non solum esse arbitrariam, sed plane literæ contrariam: subditur namque: *Alii quidem per spiritum datur sermo sapientiæ, alii autem sermo scientiæ - - - alii Prophetia, alii discretio spiritum - - - alii interpretatio sermonum.* Non igitur quilibet donum habet interpretandi Scripturas. Unicuique tamen deservit ad utilitatem donum etiam alteri collatum: siquidem illud confertur ad utilitatem totius Ecclesiæ, cujus membrum singuli fideles sunt: quomodo sanitas uni membro corporis phisici collata confert toti corpori commodum.

Ad X. Argumentum ferit Adversarios: etenim declarat privatum cujusque sensum aliorum subijciendum esse iudicio, ut post pauca subditur: *Ceteri dijudicent: spiritus Prophetarum Prophetis subiecti sunt.* Verum ut palam fiat, quantum à veritate aberrant Novatores.

Notandum est 1. Apostolum citato in argumento loco intendere, eminentiam doni Prophetiæ præ dono linguarum manifestare: *Major est, qui prophetat, quam qui loquitur linguis.* Deinde fideles erudit circa modum instituendi spirituales collationes sive prævie, sive post synaxim, ut in ædificationem, omniumque utilitatem cedant, ita quod sint, qui Scripturas explacent, qui exhortentur, qui hymnum, qui psalmum cantent. Nam ut Tertull. in Apologetico. c. 39. & Justinus in Apologia 2. circa finem. Scribunt, in primitiva Ecclesia conventus  
Chri-

Christianorum hac serie actionum fiebant: Primo fideles in Ecclesia canebant psalmos, Lector deinde sacram Scripturam, & Prophetiam legebat, cessante Lectore Episcopus concionem habebat, postmodum fiebat Sacrum seu Cœna, in qua omnes communicabant, hinc variis linguis psalmos, & hymnos canebant quasi divina gratia ebrii, quos inter nonnulli Prophetias eructabant, & alii interpretabantur reliquis audientibus & interrogantibus. Conventum absolvebat Convivium charitatis, cui hymni & orationes subdebantur, & Conventus dissolvebatur,

Notandum 2. Prophetarum nomine impræsentiarum venire Doctores, qui Sancto afflati Spiritu obscura pandunt, & occulta manifestant: igitur *Prophetæ duo, & tres dicant*, proferant videlicet sua dogmata, revelationes, prophetias, ut alii discant. *Cæteri dijudicent*, id est, cæteri Prophetæ, Doctores, non autem vulgus, attendant, & videant, an recta sint, quæ promuntur. *Quod si alii revelatum fuerit sedenti, prior taceat*: nempe si quid alter habeat utilius, taceat prior, & iste loquatur. *Potestis enim omnes per singulos prophetare, ut omnes discant, & omnes exhortentur*: scilicet si præscriptus ordo servetur, omnes prophetæ, Doctores, quid sentiant, dicere poterunt, & omnes ab omnibus audire. Hic indubie est literalis sensus ab Apostolo enuntiatus: sed quid hoc ad Spiritum privatum?

Ad XI. Male adduci textum Joannis: nam nomine *Spiritus* eo loco intelligitur aer, ut in aperto est, qui hinc inde discurrens auditur quidem, sed ignoratur, unde veniat, aut quo vadat. Quo exemplo inuitur beneficium vocationis ad fidem medio baptismo liberaliter prorsus à Domino huic vel illi concedi. Esto tamen pro Spiritu: intelligantur dona gratiæ & fidei dari gratuito à Deo juxta illud Pauli 1. ad Corinth. c. 12. v. 11. *Hæc omnia operatur unus atque idem Spiritus dividens singulis prout vult*: non inde evincitur, quod Spiritus hujusmodi  
fit



fit Judex fidei: largiendo namque Deus sua dona Hierarchicum in Ecclesia nequaquam inmutat ordinem, per quem dedit quosdam Apostolos, quosdam Prophetas, alios vero Evangelistas, alios autem Pastores & Doctores, à quibus notitia veritatis exquirenda est, secus à Spiritu privato.

Ad. XII. Si ita est, cur adeo à Novatoribus reprehenduntur Ariani, Sabelliani, imo & Romani? Ipsi quoque sunt sub lege gratiæ: argumentum itaque nullius est momenti, cum probet nunquam fuisse, nec fore hæreticos. Quare ubi Spiritus Domini, ibi non venit illa carnalis libertas, qua unusquisque putat sibi licere quodcumque sive in agendo, sive in credendo, secundum quam Libertini sese tum à Divinis tum ab humanis legibus exemptos deprædicant; sed intelligitur illa libertas spiritualis, qua fidelis profecto illuminatur, & recte Divinis affectus amore justitiæ, non timore pænæ Deo per actus fidei, spei, & Charitatis inservit. Apostolus siquidem excellentiam status gratiæ contraponit legi veteri, in qua homines sub figuram velamine detinebantur, acti timore Deo servientes.

Ad XIII. Etiam Pelagiani credebant in Filium Dei: ergo lumen & donum habuerunt interpretandi in dogmatibus? intendit ergo Evangelista ostendere testimonium Dei Patris de Filio suo majus fore, quam testimonium Prophetarum: illud enim quilibet credens percipit, hoc vero nisi interior illustratio & motio præcedat, non perseverat: sicut Christus testimonium habuit à Joanne Baptista Joan. c. i. v. 7. *Hic venit in testimonium, ut testimonium perbiberet de lumine*, sed majus habuit à Patre v. 9. & seq. *Si testimonium hominum (id est Prophetarum) accipimus, testimonium Dei majus est: quoniam hoc est testimonium Dei, quid majus est, quoniam testificatus est de Filio suo: qui credit in Filium Dei, habet testimonium Dei in se. Qui non credit Filio, mendacem facit eum (id est Patrem) quia non credit in testimonium, quod testificatus est Deus de Filio suo.*

T

Ad

Ad XIV. Hoc argumentum non esse ad rem una cum textu allato. Nam prædicante Christo in Synagoga Judæi mirabantur: *quomodo hic scit literas, cum non didicerit*: credebantque ipsum à Dæmone eruditum: non enim studio veritatis ipsum audiebant: eapropter Christus dixit: *Si quis voluerit voluntatem ejus facere, id est, si quis rectam voluntatem, atque intentionem haberet, & sincero corde me audiret, plane nosceret doctrinam meam à Deo esse, quia eam Scripturis consonam intelligeret.* Hinc Joan. c. 5. dicitur: *Quomodo vos potestis credere, qui gloriam ad invicem accipitis.* Et Lucæ c. 16. v. 14. *Audiebant autem omnia hæc Pharisei, qui erant avari, & deridebant illum.*

Ad XV. Augustinum loqui de cognitione interioris bonitatis baptizandorum, circa quam homines indubie non sunt infallibiles: atque rem declarat exemplo illorum, qui baptizant ficto accedentes animo, esto exteris videantur sincere Sacramentum petere. Ex quibus clare patet, non loqui de Judiciis proprie dictis, sed de his, qui aliorum voluntates exquirunt.

Ad XVI. Augustinum loc. cit. externam doctrinam non reprobare, sed solum negare, prædicationem proficere gratia interiore non movente. Verba S. Patris sunt: *Sic sunt ista verba fratres, quæ forinsecus dicimus, quomodo agricola ad arborem forinsecus operatur, adbibet aquam, & diligentiam culturæ, quæ licet forinsecus adbibeat, numquid poma format? remque probat ex Apostolo 1. ad Corinth. c. 3. v. 7. Neque qui plantat est aliquid, neque qui rigat, sed qui incrementum dat Deus.*

Ad XVII. S. Ambrosius est contra ipsos Hæreticos. Audiatur, quid præmittat S. Doctor: *Veniant plane, si qui sint, ad Ecclesiam, audiant cum populo, non ut quisquam eorum Judex resident.* Admittit ne omnes de plebe ut Judices? Sciendum itaque,

que, tunc temporis populum non jam jus electionis Episcopi, sed usum postulationis habuisse. Agebatur de eligendo Episcopo Mediolanensis Ecclesiæ. Ariani maxime Auxentio addicti hunc quasi purioris fidei hominem præeligere volebant; Ambrosius vero in Domino confidens, quod adversarium disputantem vinceret, petiit, ut populus ad concertationem veniret, eumque sequeretur, quem melius disputantem agnovisset.

Ad XVIII. Quilibet sua Fide salvatur, quia cuilibet liberum est revelatis assentiri, & quilibet in se media habere debet, ut salvus fiat. Cæterum nequaquam cuilibet datur optio credendi, quod vult, atque pro libitu acceptare, quæ ipsemet revelatum credit; immo hoc contra fidei naturam est, hæc namque vult intellectum captivare in obsequium Dei: eapropter opus est, credentem suo nequaquam inniti iudicio.

Ad XIX. Instantiam allatam favere Arianis, Sabellianis &c. unde neg. min. quæ falsa est. Nam interius Spiritus S. lumen non destruit Hierarchicum Ecclesiæ ordinem, in quo sunt Pastores & Doctores, nec tollit naturam fidei, quæ est ex auditu, adeoque per aliorum sententiam regulari debet. Lumen interius illud est, quod incrementum dat: verum incrementum non datur, nisi adsit, qui forinsecus plantet, & riget. Et merito quidem, nam interius lumen fallax quandoque deprehenditur, cum sæpenumero Angelus tenebrarum in Angelum lucis transfiguratus appareat. Nec inducta probatio urget: etenim si perfectius Agens nolit se solo operari, utendum est alterius ministerio. Deus in visibili Ecclesia non vult se solo interiori motione fideles erudire, sed mediis Doctoribus, ac Ecclesiasticis Iudicibus.

Ad XX. Argumentum hoc esse pro nobis. Nam Christi doctrina proprio ipsius Christi iudicio non regebatur, sed Patris, quem, ut ipse fatetur, semper audiebat: unde etiam fides nostra regulari nequaquam debet à particulari iudicio, sed eo-

T 2

rum,

rum, quos præcepit Deus audire. Præterea dicendum, Christum non assumere testimonium ex indigentia, cum esset primus Judex, primus legislator omni gratiæ & sapientiæ dono relictus, sed in ordine ad alios, ut ibidem loc. cit. innuitur: *Vos misistis ad Joannem, & testimonium perhibuit veritati: Ego autem testimonium ab homine non accipio, sed hæc dico, ut vos salvi sitis.* Similiter Scriptura & Fides nostra quoad se nulla indigent testificatione, cum nullo modo à veritate aberrant, sed in ordine ad alios testimonium necessarium est.

Ad XXI. Cum S. Chrysostr. Homil. 7. in 1. ad Corinth. Quod Paulus in 1. textu non velit, omnes & quoslibet fideles accepisse Spiritum ex Deo ad omnia, quæ revelata sunt, perscrutanda & percipienda, sed quod omnia; quæ à Deo nobis donata cognoscimus ex revelante Spiritu, qui ex Deo est, & sensu Christi sciamus. Non enim idem est dicere, omnia, quæ fide cognoscimus, ex Spiritu S. Magistro discimus, & cognoscimus; quod dicunt Catholici; ac dicere, ex Spiritu S. Magistro cognoscimus omnia, quæ revelavit Deus ex Scripturis, quod dicunt Protestantes. Ad 2. textum dico, eum explicando sub dist. spiritualis, id est, fidelis Christianus in fide & virtutibus profectus judicat omnia, hoc est, percipit sublimiorem doctrinam, quam animalis, seu imperfectus Christianus intelligere nequit, Conc. judicat cum auctoritate definiendo, neg.

Ad XXII. Apostolum eo loco agere de donis Spiritus S. & quidem v. 10. de dono interpretandi Scripturas, quod tamen omnibus dari inibi non dicit, nec id negat summo Ecclesiæ Pastori & Concilio. Præterea sicut ex eo, quod unus atque idem Spiritus operetur donum Prophetiæ, & illud det, cui vult, non sequitur, illud dari omnibus: alias sequeretur, donum Prophetiæ, quia datum est Amos Pastori, datum esse omnibus Pastoribus: ita ex eo, quod unus atque idem Spiritus operetur donum interpretationis, & illud det, cui vult, non sequitur,  
illud



illud dari omnibus : quia privilegia paucorum non constituunt legem communem.

Ad XXIII. Conc. ant. neg. conseq. Disp. est: quia gratia Prophetiæ, & revelationes novæ non sunt necessariae in summo Pontifice pro Ecclesia Dei, uti tamen est explicatio doctrinæ acceptæ, & iudicium de dogmatibus fidei, pro quibus Pontifici & Ecclesiæ, non vero singulis hominibus est promissa assistentia Spiritus S. ne errori succumbat. Cæterum donum Prophetiæ est donum gratis datum: ergo potest illud Deus conferre, cui vult.

Dices: Matth. c. 23. v. 8. ait Christus: *Vos autem nolite vocari Rabbi, unus est enim Magister vester* : ergo præter Christum, aut Spiritum privatum non est agnoscendus Magister seu Iudex. R. Christum hoc loco non prohibere, ne Rabbi sive Magistri, qui Scripturam interpretentur, in Ecclesia habeantur: sed tantum ambitionem illius honoris vetare. Deinde nunquid D. Paulus 2. ad Timoth. c. 1. v. 11. se vocat Doctorem gentium dicens: *positus autem ego Prædicator & Apostolus (veritatem dico, non mentior) Doctor gentium*. Et nonne apud Protestantes tot fere vocantur Magistri, quod Præcones? dicitur ergo Christus unus Magister, quatenus est primarius, & præcipuus, cuius nomine alij loquuntur; non autem quod ipse solus instruat interius omnes; alias cur misisset in omnem terram Apostolos?

Pro Hæreticalium Sophismatum ulteriori solutione advertendum, duplicem dari interpretationem, seu explicationem Scripturæ. Prima dicitur simplicis notitiæ, & cognitionis, seu eruditionis. Secunda Jurisdictionis, & authenticæ auctoritatis. Prima non est Iudex, fideique tribunal, & sæpe in privatis eminenter reperitur. Secunda constituit tribunal fidei, & solum in Patribus seu Episcopis conciliariter congregatis invenitur. In Exemplo: in politicis sunt, qui apprime norunt jus Civile, & licet circa litigantium jura recte judicent, eorum ta-



men iudicium litem non absolvit, quia ius ferendi sententiam ipsis non competit; e contra si idem iudicium proferatur ab habente jurisdictionem, sententia est iudicialis, & litem dirimit. Ita in spiritualibus: fidelis quilibet habet saltem substantialem eorum notitiam, quæ credere, & facere debet, ut salutem consequatur; & eruditiores omnia fidei mysteria alte perpendunt; sunt deinde Iudices à Domino constituti, nempe Papa, & Concilium: priorum iudicium est pure discretivum, aliorum vero definitivum & Iudiciale. Hæretici, cum utrumque confundant, ideo tam misere hallucinantur, & falluntur.

### §. III.

**Dico 3. Nec Principes sæculares, nec multitudo fidelium sunt Iudices Controversiarum fidei.**

**P**ROBATUR Conclusio quoad 1. partem. Apostolus ad Ephesios c. 4. *Et ipse (Christus) dedit quosdam Apostolos &c.* loquens de Ecclesiæ regimine usque ad finem mundi duraturo, & recensendo eos, quibus Ecclesiæ regimen à Christo commissum est ad fideles in fide continendos, & contra nequitiam ac fraudes Hæreticorum tuendos, nullam facit mentionem Principum sæcularium, sed post Apostolos Solorum Pastorum, nempe Episcoporum. Ergo.

Confirmatur 1. Ex perpetua praxi Ecclesiæ omnes fidei controversiæ hætenus in Ecclesia exortæ non Principum sæcularium, sed Romani Pontificis, & aliorum Episcoporum iudicio diremptæ sunt: ut legenti Historiam Ecclesiasticam palam fiet: ergo.

Confirmatur 2. SS. Patres hanc Principibus in controversiis fidei iudicandi potestatem negant, ut S. Athanasius, qui Epistola ad solitariam vitam agentes sic ait de Constantino Impera-

pera.

peratore eum reprehendens, quod, Ecclesiasticam Jurisdictionem usurparet: *Quando à condito ævo auditum est? quando iudicium Ecclesiæ auctoritatem suam ab Imperatore accepit? aut quando unquam hoc pro iudicio agnitum &c. - - - Nunc autem novum spectaculum ab Ariana Hæresi editur &c. - - - quis videns eum in decernendo Principem se facere Episcoporum, & præsidere judiciis Ecclesiasticis, non merito dicat, illum eam ipsam abominationem dissolutionis esse, quæ à Daniele prædicta est? Nec dicatur: Athanasium de intrinseca auctoritate Ecclesiastica loqui Sacerdotum, non vero de extrinseca. Non inquam dicatur: nam eum loqui de externa potestate sat ejus verba indicant: etenim præsidere Episcopis, convocare concilia, judicare causas Episcoporum, definire res fidei omnino sunt actus jurisdictionis exterioris. Ergo.*

S. Ignatius Martyr anno post Christum 71. in Epist. 7. ad Smyrneneses docet: *Primum honorem deberi Deo, secundum Episcopo, tertium Regi. Item Epistola ad Philadelphieneses scribit idem S. Ignatius: Principes subditi estote Cæsari, milites Principibus, Diaconi Presbyteris. Presbyteri vero & Diaconi, atque omnis Clerus simul cum omni populo & militibus, atque Principibus, sed & Cæsare obediant Episcopo: Episcopus vero Christo, sicut Patri Christus, & ita unitas per omnia servetur. Ergo.*

Hosius Cordubensis Episcopus, qui primo Concilio Nicæno interfuit, in eo Constantinum Imperatorem affatus est his verbis relatis ab Athanasio in Epistola ad solitariam vitam agentes: *Desine quæso Imperator, ne te misceas Ecclesiasticis, neque nobis in hoc genere præcipe, sed potius ea à nobis discere. Tibi Deus imperium commisit, nobis, quæ sunt Ecclesiæ, concredidit, & quemadmodum qui tuum Imperium malignis oculis carpit, contradicit ordinationi Divinæ, ita & tu Cave, ne quæ sunt Ecclesiæ, ad te trabens magno crimini obnoxius fias. Ergo.*

S. Cyrillus Hierosolymitanus Catechesi 17. inquit: *Ad bodiernam usque diem cernimus mundanos Principes regi & instrui ab Eccle-*

*Ecclesiasticis ; - - - Si Ecclesiastici regunt Reges in spiritualibus, sunt Reges ergo subditi, inferioresque illis.*

S. Cyprianus anno 250. vivens lib. 1. Epist. 3. radicem hæresum innuens scribit: *Neque enim aliunde hæreses obortæ sunt, aut nata sunt Schismata, quam inde, quod Sacerdoti Dei non obtemperatur: nec unus in Ecclesia ad tempus Sacerdos, & ad tempus Judex vice Christi cogitatur. Ergo quia Judicem hunc in Ecclesiasticis causis non cogitat Anglia penes Sacerdotium, hæresim defacto fovet & Schisma contra veram Christi Ecclesiam.*

Probatur Conclusio 2. Ex veteri testamento: Levitici c. 10. v. 8. legitur: *Dixit quoque Dominus ad Aaron: vinum, & omne quod inebriare potest, non bibetis tu & Filij tui, quando intrabitis in tabernaculum testimonij &c. Ut habeatis scientiam discernendi inter Sanctum & prophanum: inter pollutum & mundum: doceatisque Filios Israel omnia legitima mea &c. Cui hæc dicit Dominus, Regi ne? nequaquam, sed Sacerdoti. Ezechielis c. 44. habetur: *Sacerdotes autem & Levitæ filij Sadoc &c. Et populum meum docebunt, quid sit inter Sanctum & pollutum: inter mundum & immundum ostendens eis. Et cum fuerit controversia, stabunt in judiciis meis, & judicabunt. Sacerdotes dixit judicabunt, non Reges. Paralip. 2. c. 19. dicitur: ubicunque quæstio est de lege, de mandato, de cæremoniis, de justificationibus, ostendite eis: id est Sacerdotibus per civitates distributis. v. 11. Amarias autem Sacerdos & Pontifex vester in his, quæ ad Deum pertinent, præsidebit.**

• En inter Sacerdotes constitutos ad docendum unus Primus est, cui cæteri subordinantur. Et statim eodem v. sequitur: *Porro Zabadias filius Ismael qui est Dux in domo Juda, super ea opera erit, quæ ad Regis officium pertinent. Ecce non negotia Ecclesiastica, sed sæcularia Regibus demandantur. Aggæi c. 2. v. 12. habetur: Hæc dicit Dominus Exercituum, interroga Sacerdotes legem. Non dixit interroga Regem. Malachiæ c. 2. v. 7. dicitur: Labia Sacerdotis custodient scientiam, & legem requirent ex ore ejus,*

*quia*

quia *Angelus Domini exercituum est*. Labia Sacerdotis non Regis : Sacerdos non Rex , Angelus Domini est , id est nuntius & interpres Iivinae scientiae & voluntatis. Ipsimet Principes & Reges ad Sacerdotes confugere debent, ut Divina discant. De Josue constituto ad regendam multitudinem dicitur Numerorum. c. 27. v. 21. *Pro hoc si quid agendum erit, Eleazar sacerdos consulet Dominum. Ad verbum ejus egredietur, & ingredietur ipse & omnes filii Israel cum eo, & caetera multitudo.* En supremus in politia temporali omnino à Sacerdote dependens quoad spiritualia. Ergo:

Probatur Conclusio 3. ex novo Testamento. Ad illos pertinet judiciaria fidei potestas, supra quos aedificavit Christus Ecclesiam : sed Christus non aedificavit Ecclesiam super Reges ac Principes, sed super Apostolos: ergo ad hos non ad illos pertinet judiciaria fidei potestas. maj. constat: qui enim potestatem & primatum habet in aliquo ordine, est fundamentum, cui talis ordo innititur. min. etiam patet: quia non Rex sed Apostolus erat, cui dixit Christus Matth. c. 16. v. 16. *Tu es Petrus, & super hanc petram aedificabo Ecclesiam meam.* Non Reges erant, sed Apostoli, de quibus dicitur ad Ephes. c. 2. v. 20. *Super aedificati super fundamentum Apostolorum, & Prophetarum, ipso summo angulari lapide Christo Jesu.* Non sunt Reges & Principes terrae, de quibus dicitur ad Ephes. c. 4. *Et ipse dedit quosdam quidem Apostolos, quosdam autem Prophetas, alios vero Evangelistas, alios autem Pastores & Doctores ad Consummationem Sanctorum in opus ministerii, in aedificationem Corporis Christi.* Non erant Reges, quibus dictum est Matth. c. 16. *Tibi dabo Claves Regni Caelorum. &c.* Joan. c. 21. *Pasce oves meas.* Act. c. 20. *Attendite vobis & universo gregi, in quo vos Spiritus S. posuit Episcopos, regere Ecclesiam Dei.* 1. Petri c. 5. *Pascite, qui in vobis est, gregem Dei &c.* Joan. c. 20. v. 22. & 23. *Accipite Spiritum S. quorum remiseritis peccata, remittuntur eis &c.* Marci c. 16. *Euntes in Mundum universum, praedicate Evangelium omni Creaturae.* 1. Corinth. c. 4. *Sic nos existi-*

met homo, ut *Ministros Christi, & dispensatores Myſteriorum Dei.* 2. Corinth. c. 5. *Pro Christo legatione fungimur.* Ergo: Reges ergo ſicut non habent auctoritatem ſpiritualem in reale Chriſti corpus: cum nequeant illud conficere: ita nec habent auctoritatem ſpiritualem in corpus Chriſti myſticum, ſeu poteſtatem judicariam: nam poteſtas ſpiritualis in corpus Chriſti myſticum oritur ex poteſtate in corpus Chriſti reale. Ergo.

Confirmatur: Sub primordiis Eccleſiæ nullus Imperatorum Poteſtatem judicariam fidei habuit: cum nullus Imperator ſub primordiis Eccleſiæ fuerit Chriſtianus: ergo nec nunc.

Probatur Concluſio 4. Ex Jure Canonico. Gelafius I. ad Anaſt. Imp. diſt. 96. c. 10. inquit: *Duo ſunt Imperator Auguſte, quibus principaliter hic mundus regitur, Auctoritas ſacra Pontificum, & Regalis poteſtas; in quibus tanto gravius eſt pondus Sacerdotum, quanto etiam pro ipsis Regibus hominum, in Divino reddituri ſunt examine rationem. Noſti etenim Fili Clementiſſime, quod licet præſideas humano generi dignitate rerum terrenarum, tamen Præſulibus Divinarum rerum devotus colla ſubmittis, atque ab eis cauſas tuæ ſalutis expetis, inque ſumendis cæleſtibus Sacramentis, eiſque (ut competit) diſponendis ſubdi te debere cognosceſ religionis ordine potius, quam præeſſe. Noſti itaque inter hæc ex illorum te pendere judicio, non illos ad tuam velle redigi voluntatem. Ex quo habemus primo, Imperatorem præeſſe humanis: ſecundo in Divinis ſubeſſe Pontificibus: tertio in his pendere à Sacerdotum Judicio. Ergo.*

Omiſſis aliis innumeris textibus Juris Canonici unicus ſufficiat Innocentius III. de Majorit. & obedient. c. 6. ita diſcurrens: *Non negamus, quin præcellat Imperator in temporalibus illos duntaxat, qui ab illo accipiunt temporalia: ſed Pontifex in ſpiritualibus excellit, quæ tanto ſunt temporalibus digniora, quanto anima præfertur corpori &c. Noſcere debueras, quod fecit Deus duo magna luminaria in Firmamento cæli, Luminare majus, ut præeſſet diei, & Luminare minus, ut præeſſet nocti, utrumque magnum, ſed al-*  
terum



terum majus. *Ad firmamentum igitur cæli, hoc est universalis Ecclesiæ fecit Deus duo luminaria magna, id est, duas instituit dignitates, quæ sunt, Pontificis Auctoritas, & Regalis Potestas: sed illa, quæ præest diebus idest spiritalibus, major est; quæ vero carnalibus, minor: ut quanta est inter solem & lunam, tanta inter Pontifices & Reges differentia cognoscatur. Ergo.*

Probatur Conclusio 5. Ex Conciliis. Constantinus Magnus in Concilio Primo Nicæno, ut refert Rufin lib. 1. Hist. c. 2. & Sozomenus lib. 1. c. 16. dixit: *Vos à Deo nobis dati estis Dii, & conveniens non est, ut homo judicet Deos &c. & ideo his omissis illa, quæ ad fidem Dei pertinent, absque ulla animorum contentione distinquite &c.* Quibus Laicus Princeps causas fidei ad Præsules Ecclesiasticos pertine- falsus est. Hoc exemplo & doctrina utitur Greg. Magnus lib. 4. Epistolarum Epist. 75. Nicolaus I. Epist. ad Michaellem Imperatorem Greg. VII. lib. 7. Epist. 21. Ergo.

In Concilio Ephesino Theodosius & Valentinianus Impp. in Epistola ad Patres Synodi habent: *Igitur Candidianum præclarissimum Religiosorum, domesticum comitem ad sacram vestram Synodum abire iussimus, sed ea lege & conditione, ut cum quæstionibus & controversiis, quæ circa fidei dogmata incidunt, nihil quidquam commune habeat. Nefas enim est, qui Sanctorum Episcoporum Catalogo adscriptus non est, illum Ecclesiasticis negotiis & consultationibus se immiscere.* Ergo iudicio Imperatorum Laici Principes carent potestate judicandi res fidei. Nec rideant nos Adversarii, quod à Comite arguamus ad Regem. Nam vis non consistit in Comite, sed in illo dicto universali Imperatorum: *Nefas enim est, qui Sanctorum Episcoporum Catalogo adscriptus non est, illum Ecclesiasticis negotiis & consultationibus se immiscere.* Atqui nec Comes, nec Rex Laicus adscriptus est Catalogo Episcoporum: ergo & Comiti & Regi Laico nefas est se sacris immiscere.

In Concilio Chalcedonenſi Marcianus Imperator in oratione habita ad Concilium fatetur clare, ſe nullam habere poteſtatem circa controverſias fidei, ſed ſolam protectionem pro removendis impedimentis, & promovenda Decretorum executione, ut refertur diſt. 96. Can. *Nos ad fidem confirmandam non ad aliquam potentiam oſtendendam, exemplo Religioſiſſimi Principis Conſtantine Synodo intereſſe volumus, ut inventa veritate non ultra multitudo pravis doctrinis attrahita diſcordet &c.* Ergo.

Concilio VIII. Interfuit Baſilius Imperator, qui rotundis verbis in oratione habita ad Patres fatetur, ſe nullam habere partem in iis, quæ ad Religionem pertinent, immo hæc ad Sacerdotium ſpectare. Occaſione, namque Photianorum Hæreticorum dicit: *Hæc autem inveſtigare & quærere, Patriarcharum, Pontificum & Sacerdotum eſt, qui regiminis officium ſortiti ſunt, qui ſanctificandi, qui ligandi, & ſolvendi poteſtatem habent, qui Eccleſiaſticas ac cæleſtes adepti ſunt claves: non noſtrum, qui paſci debemus, qui ſanctificari, qui ligari, vel à ligamento ſolvi egemus.* Ergo. Nec dicatur ab Adverſariis: Baſilium non eſſe multæ auctoritatis eo, quia occidit Michaelem Imperatorem, ejusque Imperium invalit. Non inquam dicatur: verum eſt, quod Baſilius occiderit Michaelem, ſed juſte, utpote injuſtum ſui invaſorem. Faluſum autem eſt, Baſilium Imperium invaſiſſe, ſed recta via, per varios videlicet Magiſtratus gradus, quos diligenter & prudenter exercuit, illud promeruit, ut veteres & Recentiores Hiſtorici teſtantur.

Concludo conſtitutione Juſtiniani Imperatoris in authent. conſtit. 123. ita habente: *Si Eccleſiaſticum negotium ſit, nullam communionem habento Civiles Magiſtratus cum ea diſceptatione, ſed Religioſiſſimi Epiſcopi ſecundum Sacros Canones ſinem impoſunt.* Ergo decernit Imperator ſæculares Principes non debere ſe immiſcere negotiis, & diſceptationibus mere Eccleſiaſticis.

Pro-

Probatur Conclusio 6. ex testimoniis ipsorum Hostium S. Romanæ Ecclesiæ. Lutherus, qui ordinem Ecclesiasticum, sacraque judicia subjecerat Laicali potestati, asserta hæc retractavit lib. de bello adversus Turcas. *Salutet Deus vos Infideles Principes vestrorum subditorum. Quis diabolorum vobis in mandatis dedit tam vehementer non commissa Ecclesiastica negotia peragere, quæ ad Deum, & conscientiam spectant? Tomo 2. contra articulos Lovanienses habet: Non est Regum & Principum veram doctrinam confirmare, sed Ecclesiæ subijci & servire. Lib. de sæculari potestate scribit: Si quando sæcularis tuus Princeps tibi mandat hoc vel illo modo credere, aut jubet libros abjicere; sic dices: non licet Luciferum sedem suam juxta Altissimum ponere. Benevole Princeps, omnem corporis, & fortunæ obedientiam tibi dabo. Manda mihi pro ea, quam in terris obtines potestate, & sequar te. Si quid autem præceperis de fide, aut libris ablegandis, non tibi dicto audiens ero. In bis Tyrannum te præbes, modum excedis, atque ea præcipis, in quibus nullam potestatem obtines. Idem in Comment. Psal. 102. Audite nobilissimi Angli, qualis vestri Regis Primatus sit ex mente Lutheri. Luciferinum tentatum, Diaboli magisterium, Tyrannis usurpatio. Ergo.*

Calvinus idem sentit: nam in Comment. c. 2. l. 4. Instit. c. 11. 43. Laudat Ambrosium, quod vocatus ad conferendum de fide coram Imperatore recusaverit: & cap. 20. asserit: Apostolicum munus Regi non convenire. Cap. 11. 15. Si Scripturam & vetera exempla intueamur, quis est, qui non astruat, in causa fidei Episcopos solum de Imperatoribus Christianis, non Imperatores de Episcopis judicare. Ergo. de primo ad ultimum Principes sæculares non sunt Judices Controversiarum fidei.

Probatur jam Conclusio quoad 2. partem. Quia neque Scriptura, neque traditio potestatem judicandi de rebus fidei attribuunt populo: neque unquam in Ecclesia Christi controversiæ fidei, quæ tot ac tantæ hætenus exortæ sunt, ab eo

sunt decisæ: quia recta ratio plane dictat, judicium authenticum de Controversiis fidei, non debere pertinere ad populum, qui doceri debet à Pastoribus Ecclesiæ, & cujus maxima pars ignara est: alioquin enim idem esset officium gregis & Pastoris, populus posset non audire, imo posset spernere Pastores Ecclesiæ contra illud Christi Lucæ c. 10. *Qui vos audit, me audit: & qui vos spernit, me spernit*: adeoque totus in Ecclesia ordo everteretur. Unde S. Greogorius Nazianzenus orat. 9. populum Christianum ab hac præsumptione & insania avocet his verbis: *Oves pastores nec poscite, nec supra fines vestros assurgite: satis enim vobis est, si recte pascemini, Judices ne judicate: nec Legislatoribus leges præscribite. Non est enim dissensionis, & confusionis Deus, sed pacis, & ordinis. Ne quis igitur caput sit, qui vix aut manus, aut pes, aut vilius quiddam aliud membrum est, &c.* Ergo

## O B J E C T I O N E S.

**O**bjicies I. Contra 1. partem Conclusionis. Moyse fuit Princeps Laicus (Sacerdos enim primus in lege veteri fuit Aaron) sed Moyse jure Divino habebat jurisdictionem & primatum in rebus Religionis, ut constat Exod. c. 18. *Esse tu populo in his, quæ ad Deum pertinent, ut referas, quæ dicuntur ad eum: ostendasque populo cæremonias, & ritum colendi.* Ergo etiam Principes Laici habent jurisdictionem, & primatum in rebus Religionis: ergo.

II. Josue erat Dux Laicus, & nec formaliter Sacerdos: sed Josue habuit jus exercendi acta Religionis, & exercuit etiam tale jus: hinc cap. 3. præscribit Sacerdotibus, quod portent Arcam foederis. Item cap. 4. Explicat mysterium duodecim lapidum, quos in transitu Jordanis erexit. Item cap. 5. & 8. circumcidit filios Israel, & ædificavit Altare Domino:  
popu-

populum admonuit, ne iniret foedus cum gentibus; quæ munera non exercuit Eleazarus, qui pro tunc erat summus Sacerdos. Ergo Laici Principes jus habent Divinorum.

III. Revocare populum ad cultum Dei, constituere Levitas & Sacerdotes, prædicare universo populo jejunium, & exhortari ad fidem, sunt actus proprii Jurisdictionem habentis in Divinis: sed Josaphat simplex Rex Laicus hæc munia exercuit: ergo. min. quod constituerit Levitas & sacerdotes habetur 2. Paralip. c. 19. v. 8. *In Jerusalem quoque constituit Josaphat Levitas, & Sacerdotes, & Principes familiarum ex Israel, ut iudicium & causam judicarent habitatoribus ejus.* Quod universo populo prædicaverit jejunium habetur cap. 20. v. 3. *Et prædicavit jejunium universo Juda.* Quod exhortatus fuerit ad fidem habetur c. 19. v. 4. *Egressus est ad populum de Bersabee usque ad montem Ephraim, & revocavit eos ad Dominum Deum Patrum suorum.* Ex quibus arguunt AA. Mittens est superior misso: sed Rex Josaphat misit Levitas & Sacerdotes pro reformatione Syragogæ: ergo erat superior Levitis & Sacerdotibus: ergo

IV. Ubi intervenit præceptum, ibi adest vera Superioritas, & Jurisdictio: sed Rex Josaphat præcepit: nam 2. Paralip. c. 19. v. 9. habetur: *præcepitque eis dicens &c.* Ergo Rex Josaphat habuit veram superioritatem, & Jurisdictionem.

V. In Codice fontali 2. Paralip. c. 19. v. 12. non extant illa verba: *quæ ad Regis officium pertinent:* sed solum *quæ ad res Regis pertinent*, id est, terrenam politiam: ergo non arguitur sola laicalia pertinere ad Regem.

VI. Reservata Sacerdotibus in illis verbis 2. Paralip. c. 19. v. 12. *In his quæ pertinent ad Deum* intelliguntur ea solum, quæ pertinent ad sacrificia, non vero ea omnia, quæ spectant ad res Divinas, doctrinam, & iudicium fidei: ergo.

VII. David potestate Regia abstulit à templo claudum & cæcum 2. Reg. c. 5. v. 6. *Non ingredieris hic nisi abstuleris cæcos & claudos.*



*claudos*. Ergo ad David pertinebat auferre abusus Ecclesiasticos, cum hi oriantur vel ex incuria, quod in officio claudicetur: vel ex incitia, qua homines dicuntur cæci.

VIII. Reges reprehenduntur, quod excelsa non abstulerint, id est abusus & corruptelas: nec reprehenderentur, nisi eorum officium foret: sed ad quos pertinet abusus Ecclesiasticos tollere, pertinet etiam jurisdictio Ecclesiæ: ergo.

IX. 1. Paralip. c. 13. v. 12. Imperio David Arca perducta est ad constitutum locum quietis: ergo David habuit jurisdictionem in Divinis.

X. 2. Reg. c. 6. v. 14. Arca translata & deportata est ipso Rege David præeunte, & præsaltante, quod significat, Davidem Regem tenuisse primatum in negotio Arcæ deportandæ: cum ante Arcam saltaverit præ gaudio Jurisdictionis: si enim ob humilitatem, retro ivisset, & saltasset. Ergo.

XI. Rex Laicus David Ministros, ministeria, & officia templi disposuit: ergo habuit jurisdictionem in Divinis.

XII. Qui ædificat, & dedicat templum Deo, & Summum deponit Sacerdotem, habet in Ecclesia Jurisdictionem: sed Salomon ædificavit, & dedicavit templum Domino, ut habetur 2. Paralip. c. 6. v. 2. Et deposuit summum Sacerdotem Abiathar, ut habetur 3. Reg. c. 2. v. 27. & illi surrogavit Sadoc Sacerdotem, ut legitur 3. Reg. c. 2. v. 35. Ergo.

XIII. 4. Reg. c. 22. & 23. v. 2. & 3. Josias Rex librum legis populo legi & promulgari fecit: fædus inter Deum & populum novum iniit: præcepit Pontifici, reliquisque secundi ordinis Sacerdotibus, ut ejicerent de templo, atque exurerent vasa omnia, quæ Baali sacra fuerant, & ut excelsa demolirentur. Mandavit post de Paschate novo faciendo: denique de religione tota reformatanda. Hi autem actus sunt sacri, & à Rege præcepti: & ubi præcipit Rex, paret Pontifex Regi: ergo Rex Laicus habet jurisdictionem in Divinis, & est Judex Ecclesiæ.

XIV.

XIV. Ezechias Rex Laicus Auctor fuit foederis inter Deum & populum: ingressus est templum: confregit serpentem æneum, qui erat Christi figura, quia illi offerebant Hebræi sacrificia, suffitus adhibendo, ut sit imaginibus à Pontificiis: venerando illum, & thurificantes ratione accepti beneficii &c. Hæc autem omnia denotant potestatem judicariam in Divinis. Ergo.

XV. Novos ritus inducere, & antiquos dispensare arguit potestatem Judicariam: sed Ezechias sua auctoritate novos ritus non præceptos induxit, & antiquos dispensavit; nam jussit populo, ut voluntarias oblationes Deo faceret, jussit Levitis, ut juvarent sacerdotes in extrahendis pellibus holocaustorum, jussit Pascha celebrari tempore non suo, id est mense secundo, &c. Ergo.

XVI. Quod facere potest Custos Regis, potest facere ipse Rex: sed Jojadas Sacerdos ut Custos Joas septennis foedus iniit inter Deum & populum: ergo.

XVII. In testamento veteri Reges dicuntur Filii Altissimi, Dii, uncti Domini, in solio Dei sedentes, Dei famuli, Angeli Domini, facti juxta cor Dei, lumina Israelis, nutritii Ecclesiæ &c. Sed hæc omnia probant supremam in Ecclesia judicariam potestatem: ergo.

XVIII. Ille judicariam potestatem habet, cui omnes obedire debent: sed omnes obedire debent Regibus juxta illud ad Rom. c. 13. *Omnis anima potestatibus sublimioribus subdita sit.* Cum igitur dicat scriptura *Omnis anima*: ergo omnes includit, & nullum excipit: ergo Reges habent in Ecclesia judicariam potestatem.

XIX. Potestas Regum à Deo est, ergo se extendit ad omnia, quæ ad Deum pertinent: atqui ministeria Sacra, Evangelium, quæstiones fidei ad Deum pertinent: ergo ad hæc potestas Regum se extendit: ergo.

XX. Subjectio in iis, quæ ad conscientiam pertinent, Religionis ordinem tangit: sed tenentur omnes subjici Regibus etiam in iis, quæ pertinent ad conscientiam, ut habetur ad Rom. c. 13. *Non solum propter iram, sed etiam propter conscientiam: ergo.*

XXI. Ejusdem est definitiva potestas & gubernativa, cujus est coactiva in contumaces: sed potestas Regia est coactiva in contumaces, ut dicitur ad Rom. c. 13. v. 4. *Dei enim Minister est, vindex in iram ei, qui malum facit: ergo.*

XXII. Jurisdictio illa est spiritualis, cujus finis est pietatis promotio, & conservatio: atqui Jurisdictio Regia est hujusmodi, & ideo præcipue pro illis est orandum juxta illud 1. Timoth. c. 2. *ut quietam & tranquillam vitam agamus in omni pietate & castitate: ergo.*

XXIII. Illi, quibus ut ministris Dei reddendum est non solum tributum, sed & amor, & honor, & timor, potestatem judicariam habent in Ecclesia: sed tales sunt Reges, ut dicitur ad Rom. c. 13. *Ministri enim sunt, in hoc ipsum servientes. Reddite ergo omnibus debita, cui tributum, tributum: cui vectigal, vectigal: cui timorem: timorem; cui honorem, honorem: ergo.*

XXIV. Joan. c. 18. v. 36. dicit Christus: *Regnum meum non est de hoc mundo.* Et Lucæ c. 12. v. 14. *Quis me constituit Judicem, aut divisorem super vos?* Ergo si Christi regnum non est de hoc mundo, si Christus non est Judex, erunt Reges.

XXV. Ille habet potestatem Judicariam in Ecclesia, cui etiam Successores Christi tenentur reddere rationem doctrinæ suæ: sed Regibus tenentur reddere rationem doctrinæ suæ: ut duo exempla monstrant Christi Domini: cum enim dictum esset Christo, quod Herodes eum quæreretur ad mortem, misit reddere rationem sui operis dicens Lucæ c. 13. *Ite, & dicite vulpi illi, ecce ejicio Dæmonia, & sanitates perficio hodie, & cras, & tertia die consummor.* Item Joan. c. 18. coram Pilato fassus est se esse veritatem: ergo.

XXVI.

XXVI. Is, à quo Patres Conciliaria acta petunt emendari, habet potestatem judicariam in Ecclesia: sed Patres Concilii Arelatenfis petunt à Carolo Magno statuta Conciliaria emendari: Can. ult. *Ut si quid minus est, ejus prudentia suppleatur, si quid secus quam ratio babeat, ejus judicio emendetur: si quid rationabiliter taxatum est, ejus adjutorio Divina opitulante Clementia perficiatur.* Ergo Carolus Magnus habitus est pro Judice in Divinis. Pariter alia Concilia, ut Turonense, Moguntinum, Rheimense, Francofordiense se Carolo subjecerunt: & alteri Congregationi Francofordiensi ipse Carolus astitit, audivit Sacerdotes, locutus est, distribuit loca & sedes Episcopis: primum dedit Romano Pontifici, secundum Italiæ Episcopis, tertium Germanis, quartum Gallis: decrevitque, quid esset sentiendum in causa fidei contra Epiphanium Toletanum: ergo.

XXVII. Patres Concilii Chalcedonensis cap. 14. Tom. 4. petunt supplices ab Imperatore, ut definita in Concilio robur habeant. Patres pariter Concilii C. P. sub Menna in libello Epistolarum ad Justinianum Imp. act. 1. clare ostendunt plenitudinem discretionis in Hæreticos esse penes Imperialem potestatem. Et act. 4. dum flagitant Patres Hæreticos feriri anathemate, respondit Menna: *Nil eorum, quæ moventur in Ecclesia, convenit feri præter Principem, & jus pii Imperatoris &c.* Ergo Jus habet Imperator in causas Religionis.

XXVIII. Fugitivos Sacerdotes revocare, & Ecclesiis restituere: inhibere Monachis, Presbyteris, & Clericis, ne palatium adeant: Abbates, Canonicos, & Regulares in officio continere circa regularem observantiam, actiones sunt Jurisdictionis Ecclesiasticæ: sed in has jus habere Principem agnoscit Concilium Parisiense, quatenus rogat Ludovicum, & Lotharium, ut horum & aliorum disciplinæ Ecclesiasticæ curam habeant, ut constat ex lib. 3. c. 13. 14. & 18. Ergo.

XXIX. Ea quæ sunt cælestia cogitare , populos ab errore revocare , & eis veritatem serenæ lucis ostendere , sunt actus proprii Jurisdictionis Ecclesiasticæ , sicut auctoritative præcipere Symboli recitationem , quod est formula fidei ; atqui hæc omnia factus est ad suam potestatem pertinere Reccaredus Rex in Concilio Tolentino III. cap. ultimo. Et in cap. 2. mandatur , legibus Regis & jussis esse obediendum. Pariter Gundemanus in altero Concilio Toletano dedit legem Religionis , & innocentia. Ergo.

XXX. Curare , & intendere , quæ respiciunt ad utilitatem nostræ Reipublicæ , & præcipue quæ feruntur ad immaculatam nostram fidem , potestatem sonant Jurisdictionis ; sed hæc ad suam curam pertinere asserit Imperator Constans in proæmio sui typi pro Monathelitis : eamque potestatem illi tribuunt Patres Concilii Romani Consult. 2. sub Martino I. cum præsidium implorent , *ut turbo diabolicæ fraudis suæ Clementiæ rigore valeat comprimi.* Et licet abusus sit sua potestate pro hæresi stabilienda , quæ tamen de suo munere dixit , vera sunt ; ergo.

XXXI. Ex Aristotele lib. 6. Politicorum habetur : qui cogit , summam potestatem habere debet in Republica : sed Principatus cogit : ergo habet summam potestatem in Republica : atqui Principes sæculares habent vim coactivam etiam in causis fidei : ergo. Hinc D. Petrus Epist. 1. c. 5. ait de Episcopis : *Neque ut dominantes in Cleris , sed forma facti gregis :* ergo.

XXXII. Aliqui Imperatores Christiani , præsertim Justinianus , leges tulerunt circa fidem & res Ecclesiasticas : ergo.

XXXIII. Aliqui Imperatores præfederunt Conciliis , ut Chalcedonenſi Marcianus : sexto Constantinus Pogonatus : septimo Irene & ejus Filius : octavo Basilius. Ergo.

XXXIV. In lege naturæ Principes erant summi Sacerdotes : ergo etiam in lege gratiæ possunt judicare de rebus fidei. Ergo.

SOL-



# SOLUTIONES.

**R:** **A**D I. Moyſen fuiſſe ſimul Principem, Ducem, Prophe-  
tam, & Sacerdotem populi Iſrael, velut Pſalm. 98.  
dicitur: *Moyſes & Aaron in Sacerdotibus ejus*: & docet S. P. Au-  
guſtinus Lib. 3. de vita Moyſis. Nazianzenus in oratione co-  
ram Gregorio Nyſſeno Item S. Hieronimus lib. 1. Contra Jovi-  
nianum. Unde Moyſes erat figura Chriſti: Aaron primi ſum-  
mi Sacerdotis à Chriſto conſtituti: ſicut ergo in Chriſto erat  
dignitas Regis, Prophetæ, Sacerdotis, & inſtitutoris primi Ec-  
cleſiæ legis gratiæ: ita & in Moyſe erat dignitas Principis,  
Prophetæ, Sacerdotis, & primi promulgatoris legis Hebrai-  
cæ; unde ſicut Chriſtus qua primus inſtitutor, qua Prophetæ,  
qua Sacerdos juſ habebat adminiſtrandi Eccleſiam in Divinis:  
ita Moyſes qua primus promulgator legis, qua Prophetæ, qua  
Sacerdos juſ habuit regendi in Divinis Synagogam. Verum  
Moyſes erat ſummus Sacerdos immediate à Deo conſtitutus, &  
extraordinarius, cum majori amplitudine in Synagoga, velut  
Chriſtus in Eccleſia; Aaron vero erat ſummus Sacerdos ordi-  
narius & ex officio à Deo conſtitutus, velut Petrus à Chriſto.  
Hoc idem bene explicat S. P. Auguſt. lib. 3. de vita Moyſis:  
poſtquam enim oſtendit utrumque Sacerdotem eſſe, quærit, quis  
ex illis eſſet potior? & reſpondet: *Et ipſe ſummus propter veſtem*  
*Pontificalem, id eſt Aaron: ille vero propter excellentius miniſterium*  
*id eſt Moyſes.* Item S. Th. in 4. diſt. 19. q. 1. ad 1. *Quod Moyſes*  
*fuit Sacerdos quaſi ſacra dans, quia immediate à Deo accepit ſacra,*  
*& ea primo dedit populo: non vero fuit Sacerdos ex officio offerendi.*  
*Ex officio id eſt jure ordinario.* Hoc modo conciliantur illi,  
qui negant Moyſen fuiſſe Sacerdotem, id eſt, ordinaria inſti-  
tutione. Et dato non conceſſo, Moyſen non fuiſſe Sacerdotem,  
fuit tamen Prophetæ, & ideo Divina poterat tractare, & ipſos  
Reges conſtituere, ut alii Prophetæ fecerunt: ut Achias, qui

inunxit Jeroboam in Regem super Israel: ut Elisæus, qui constituit Jehu in Regem Acabi stirpe deleta, nullus autem Principum sæcularium est simul Rex, Propheta, Sacerdos: ergo.

Dices: Moyfes fuit simul Rex, Propheta, & Sacerdos: ergo & alii Principes Laici. R. Argumentum à clara revelatione Scripturæ ad nullam Scripturæ revelationem esse nullum: Deus enim determinate dicit soli Moyfi: *esto tu populo in his, quæ ad Deum pertinent*: ergo ad alios Principes Laicos extendi nequit.

Ad II. Enumerata in argumento Ducem Josue exercuisse executive, & dependenter à Summo Sacerdote. Nam Numer. c. 27. ubi ex præcepto Domini Moyfes initiavit Josue Rectorem populi, eique mandata Domini observanda exposuit, præcipitur manifeste, quod in his, quæ ad Deum & Religionem pertinent, nihil agat sine dependentia & Consilio summi Sacerdotis: sine Consilio inquam summi Sacerdotis, non tamen libere amplectendo vel rejiciendo, sed de jure sequendo, ut patet ex Numer. c. 27. v. 21. *Pro hoc, si quid agendum erit, Eleazar Sacerdos consulat Dominum. Ad verbum ejus egredietur, & ingredietur ipse, & omnes filii Israel cum eo, & cætera multitudo.* Unde sicut Aaron dependebat à Moyse, ita Josue ab Eleazaro.

Ad III. Regem Josaphat solum adjutorium brachii sæcularis executivum exhibuisse, non vero judicium & sententiam in materia Religionis & fidei tulisse. Cum enim propter bella, & divisionem inter Regem Israel & Juda, & impietatem dominantium, religio esset fere deperdita, & omnia fere confusa; Rex viriliter agens reduxit populum ad pristina, quantum potuit: imo etiam curavit pristinarum legum observantiam timore gladii, quam restitutionem non poterant consequi solis exhortationibus Sacerdotes. Reposuit Sacerdotes & Levitas in locis, ubi deficiebant, & Duces in temporalibus, ubi exigebat

gebat necessitas: non tamen ipse consecravit personas: vel definivit causas fidei & Religionis. Et hæc erat Missio Josaphat, scilicet adjutorii. Nec etiam verum est, quemlibet mittentem qua talem esse Missio rigoroſe ſuperiorem, alias Pater æternus mittens eſſet Filio ſuo miſſo Major: quod dicere eſſet deſtruere Ss. Trinitatem. Præterea legatur contextus in 2. Paralip. c. 19. v. 10. *Omnem cauſam, quæ venerit ad vos (Sacerdotes conſtitutos) - - - ubicunque quæſtio eſt de lege, de mandato, de cæremoniis, de juſtificationibus, oſtendite eis, ut non peccent in Dominum - - -* Et v. 11. *Amarias autem Sacerdos, & Pontifex veſter in his, quæ ad Deum pertinent, præſidebit. Porro Zabadias filius Iſmael, qui eſt Dux in domo Juda, ſuper ea opera erit, quæ ad Regis officium pertinent.* Ergo ex Sacerdotibus conſecratis designavit Rex Josaphat aliquos pro judiciis cauſarum ſpiritualium, ut poteſtatem, quam de ſe vi officii habebant, in exercitio exercere poſſent. Et hoc omnibus Regibus conceditur, nempe Sacerdotes conſecratos nominandi, præſentandi, pro exercitio officiorum ſuorum: ſed per hoc Sacerdotibus poteſtatem non conferunt, ſed ſolum idoneos designant, & præſentant ad judicia Dei populo facienda, & monſtranda: ex hoc autem Rex Laicus non erit Judex, ſed ſolum Cuſtos, & Defenſor.

Ad IV. Illud præceptum nil aliud fuiſſe, quam manifeſtationem obligationis uniuſcujuſque: juſſitque conſtitutis Sacerdotibus ad opus ſuum, quod illud adimplerent, & cauſas Religionis ſibi debitas rite & ſedulo pertractarent.

Ad V. Summa temeritate negari Codicem, quem legit univerſalis Eccleſia, Hieronymus, Auguſtinus & alii. Præterea textus aperte ponit particulam contrapoliitivam, ſcilicet Amariam eſſe in his, quæ pertinent ad Deum: Zabadiam vero in his quæ ad Regem: explicatque textus juſ Divinum, ſtatutum jam Deut. c. 17. ut Vatablus & Pagninus advertunt.

Ad VI. Antecedens esse absolute falsum, ut patet ex textu loc. cit. 2. Paralip. c. 19. v. 10. *ubicunque quæstio est de lege, de mandato, de cæremoniis, de justificationibus ostendite eis, id est, Sacerdotibus.* Ergo intelliguntur in illis verbis omnia divina, & non solum ea, quæ pertinent ad sacrificia.

Ad VII. Jebusæos incoluisse tunc temporis Jerusalem, quam David intellexerat esse sedem Dei & templum ejus: unde ut illam possideret, applicuit exercitum, postulavit deditiorem. Cui Jebusæi responderunt: *Non ingredieris buc, nisi abstuleris cæcos & claudos dicentes: non ingreditur David buc.* Quid autem veniat, nomine cæcorum & claudorum, multiplex expositio est, verior est, quæ asserit, quod in contemptum Davidis Jebusæi posuerint super muros veros cæcos & claudos, quasi dicerent: urbem adeo munitam esse, quod claudi & cæci sufficerent ad defensionem. Ita Joseph lib. 7. c. 2. Glossa interlinealis. Theodoretus q. 16. 17. Abulensis q. 7. & alii. Sed quid hoc ad potestatem judicariam in Divinis? Aliam responsum habebis in colliges ad ultimum.

Ad VIII. Abusum fuisse in eo, quod sacrificabant in excelsis, ubi non erat tabernaculum, & cum divinitus per Prophetas constiterit in excelsis immolationes fieri non debere, sed in solo templo: ideo reprehendit Dominus Reges, quod hujusmodi abusum non abstulerint, ad quod faciendum tamen tenebantur. Cur autem Reges præ Sacerdotibus fuerint reprehensi, ratio est: quia populus Judæorum ob duritiam cordis non curabat exhortationes Sacerdotum, & monita Prophetarum, neque aliter quam vi, & auctoritate Regis ab errore hoc abducendus erat: ut constat 3. Reg. c. 3. & 22. Itaque cum in hoc exequendo Reges negligentes fuerint & desides, merito à Deo sunt reprehensi, quo Sacerdotum monitis suam operam executive non adjunxerint. Ex quo non eruitur potestas judicaria in Divinis.

Ad

Ad IX. Non solum Regem Davidem perduxisse arcam ad constitutum locum, sed etiam populus, ut habetur 2. Reg. c. 6. v. 15. *David autem & omnis domus Israel ducebant Arcam testamenti Domini in Jubilo.* At nemini licebat eam tangere nisi solis Sacerdotibus: hinc Oza, quod tangere eam præsumperit, cum Sacerdos non esset, morte à Deo punitus est. Ergo sicut omnis populus non habuit potestatem judicariam in Divinis ratione hujus, quod Arcam ad locum constitutum perduxerit, ita nec Rex David. Præterea non arguitur potestas judicaria in eo, qui transfert Eucharistiam de loco viliori ad digniorem: ita nec in Davide transferente Arcam, quæ erat figura Eucharistiæ.

Ad X. Davidem per præcedentiam declarasse suam inferioritatem coram Arca & Sacerdotibus in actibus Religionis, ergo Davidis gaudium non fuit ex ambitione potestatis judicariæ, sed magis in signum humilitatis & subjectionis in Divinis, ut eruitur expresse ex 2. Reg. c. 6. v. 22. *Et ludam, & vilior fiam plus, quam factus sum: & ero humilis in oculis meis.* Non solus David præcedebat, saltando, sed etiam populus: imo etiam boves præcesserunt Arcam Domini.

Ad XI. Ea omnia jam erant jure Divino disposita & expressa: unde à Davide non potuerunt constitui. David ergo solum curavit promovere executionem. Et si etiam quid aliud muneris Aaronici fecisset, illi fuisset permissum tanquam Prophetæ, non autem tanquam Regi.

Ad XII. Salomonem ædificasse templum: ædificavit & Centurio Julæis Synagogam: ædificaverunt & alii pii homines, templa absque eo, quod potestatem judicariam in Ecclesia haberint. Salomonem dedicasse templum Deo, id est, Deo mancipavit, & obtulit: atqui Deo & cultui ejus aliquid offerre non est signum potestatis judicariæ: nam ut legitur Exod. c. 35 *Israellitæ tam viri quam sæminæ de populo dedicarunt Deo*  
Y byssum,



byssum, purpuram, coceum, & pilos caprarum: dedicarunt & alii pii homines plura Deo, nec tamen eis conceditur judiciaria potestas. Salomon per Sacerdotes, adeoque mediate, obtulit sacrificia: offerunt & fideles hoc modo talia, quin habeant judiciariam potestatem: ergo. Salomon proinde solum fuit executor operis præintenti à Patre suo Davide, qui ex præcepto Domini ei indicavit ædificationem templi, ut habetur 3. Reg. c. 18. Salomon deposuit Abiathar summum Sacerdotem Sadoc ejus loco subrogato: an autem licite & bene fecerit? probandum est, cum à Catholicis defendatur injuste factum: nec ex Scriptura aliter constat: fuit enim Israelitis semper persuasum, Reges nihil posse in Sacerdotes. Hinc cum Saul vellet occidere David & Sacerdotes pro ipso stantes: & præcepisset hoc **S**ervis suis Hebræis, illi recusaverunt, ut habetur 1. Reg. c. 22. *Noluerunt autem servi Regis extendere manus suas in Sacerdotes Domini.* Si vero servi credidissent Regem posse aliquid in Sacerdotes, æquo animo in illos irruissent sicut in David, cum etiam ipsi nocentes apparerent ac David, cui patrocinebantur. Præterea data etiam justa depositione Abiathar: Salomon non ex Regia, sed prophetica potestate, & ex peculiari instinctu Dei id fecit. Nam id ipsum olim Heli summo Sacerdoti fuit prædictum à Deo per Samuelem, quod officium Sacerdotale propter impunitos à se filios aliquando auferetur à familia Heli 3. Reg. c. 2. v. 27. Ut ergo hæc Prophetia impleretur, Salomon novo constructo templo novum Sacerdotium prophetico Spiritu nominavit, & abstulit divino motus instinctu summum Sacerdotium ab Abiathar, qui erat ex familia Heli. Tandem etiam Sacerdotes deposuerunt Reges; Jojadas summus Sacerdos deposuit Athalias Reginam, eamque occidit, & Joas Regem in locum ejus substituit 4. Reg. c. 11. quidni potius inferatur, summum Sacerdotem potestatem habuisse super Regem?

Dices

Dices 1. Spiritu prophetico Salomon deposuit Pontificem: ergo & id possunt alii Reges. R. Nathan tanquam subditus Davidis spiritu prophetico potestative redarguit Davidem Regem: ergo quilibet subditus potest auctoritative redarguere Regem. Quod dabitur pro responsione, erit pro solutione.

Dices 2. Salomon benedixit omnem Ecclesiam: ergo est ea superior, cum minor à majore benedicatur. R. Etiam populus benedixit Regem: ergo populus est major Rege? Ergo benedicere ibi sumitur pro gratias agere. Deinde Ecclesia, quam benedixit, est populi congregatio ab ipso facta praeclive à Sacerdotibus.

Ad XIII. Quod Josias, ne in iram Dei incideret, curaverit collapsam observantiam reparare, exequendo praescripta in libro: in quo alias partes non egit, nisi adjutrices manus praestando. Jam ad singula: ad 1. Josiam Regem librum non legisse: sed librum ab Helcia Pontifice transmissum coram Rege legit Saphan scriba templi: liber vero eo fine Regi fuit missus, ut eum promulgari faceret: cum Rex vi plus efficere pollit, quam summus Sacerdos verbis: hinc Pontifex executionis libri sibi eum adjunxit socium, ut ita quod Helcias exequi vellet verbis juxta tenorem libri reperti, Rex exequeretur vi & auctoritate Regia ad id cogendo. Promulgari quidem Rex librum fecit, sed juxta mentem subinsinuatam Helciae summi Sacerdotis: ex quo non potestas judiciaria, sed potius dependentia à Sacerdote, & subordinatio colligitur. Ad 2. Misit Sacerdotem consulere Prophetissam: quia consulere Dominum non erat sui officii, sed Sacerdotum & Prophetarum. Missio autem non fuit praeceptiva, sed debiti convenientiae, cum munus Pontificis esset Deum consulere. Ad 3. Congregavit populum, ut librum perlegeret, etenim ad hunc finem eum transmisserat Pontifex. Ad 4. Legit librum populo: sed ex hoc nulla colligitur potestas judiciaria: nam & ancillae & stabularii legunt

Biblia coram aliis : quin eis competat talis potestas. Ad 5. Fœdus percussit cum Domino : hoc est , promissit , custodire mandata : nonne ad hoc tenebatur ? nonne tenentur & omnes fideles ? Ad 6. Adjuravit populum ad idem fœdus : nonne tenetur Rex procurare observantiam legis Dei in suis subditis ? sicut Paterfamilias in suis domesticis. Ad 7. Præcepit Pontifici & Sacerdotibus secundi ordinis , ut vasa sacrata Baali auferrent. Cur ipse Rex non fecit ? quia sui muneris non erat , sed Sacerdotis : unde non fuit præceptum superioris ad inferiorem : sed commonitio , & remotio prohibentis : non poterant enim Sacerdotes antecederet hoc facere obstante potentia impie regnantium. Ad 8. Dissipavit excelsa : hoc præceptum erat Domini , & ad ipsum spectabat manum dare , cum aliqua excelsa regia essent , alia favori Regum innixa. Ad 9. Occidit Sacerdotes excelsorum : sed quos ? Samariæ Idololatrias : pepercit tamen veris , licet reis utpote Sacrificantibus in loco prohibito , ob excellentiam dignitatis : poterat tamen & hos obtruncare , quia lex certam statuebat pœnam huic delicto. Ad 10. Mandavit celebrari Pascha : sed jure merito : nam præceptum Domini diu fuerat intermissum : executionem procuravit , sicut totius legis observantiam , sed non sine dependentia à Pontifice , qui ad hunc finem librum legis transnūlit Regi.

Ad XIV. Ex glossa ordinaria , ex sententia , & doctrina Hebræorum Ezechias nullum horum egit sine dependentia & consilio Sacerdotum. Jam ad singula. Ezechias auctor fuit fœderis inter populum & Dominum , id est , curavit legis adimplentionem : quid inde ? Fecit , quod debuit. Princeps enim non potest ferre leges Divinas , vel Ecclesiasticas , si tamen videat illas inobservatas , maxime cum hæresi admixta , potest præcipere , & adimplentionem urgere , ultor est enim malorum. Ingressus est templum : pro omnibus patet ingressus templi , non pro solis Regibus. Confregit serpentem æneum præcepto Domini

mini erectum, typum Christi ferentem. Quomodo hoc Regi licuit? Licuit, sicut cuilibet de populo juxta præceptum Deut. c. 7. v. 5. Cultus enim in superstitionem, & idololatriam tranſierat. Illud tamen falſum eſt, quod Sacrificia ſerpenti offeriebantur, ſolæ enim incenſationes fiebant. Etiam verum non eſt, hæc facta in memoriam beneficiorum, cum verior ſit expoſitio S. P. Auguſt. lib. 10. de Civit. c. 8. adoratum non fuiſſe ut Deum. Paucis, Ezechias præſtitit præciſe adjutorium executionis, non definitionis, adimplendo præcepta Domini, ut expreſſe conſtat 2. Paralip. c. 29. v. 25. *Secundum diſpoſitionem David Regis, & Gad videntis, & Natban Propheætæ. Siquidem Domini præceptum fuit per manus Prophetarum.*

Ad XV. neg. min. Omnia fecit Ezechias dependenter à Sacerdotum conſilio. Deinde ob defectum Sacerdotum ſanctificatorum, quia videlicet Sacerdotes nondum ſanctificati fuerant, admittit Levitas in adjutorium Sacerdotum. Paſcha autem tranſlatum eſt in ſecundum menſem propter cauſam à Scriptura 2. Paralipom. cap. 30. v. 3. *Inſinuatam: quia Sacerdotes, qui poſſent ſufficere, ſanctificati non fuerant.* Porro lex ipſa præcipiebat, quod impediti propter immunditiam à celebratione Paſchæ primo menſe, celebrarent menſe ſecundo: hic vero erat defectus Sacerdotum ſanctificatorum, ac proinde caſus legis. Quod vero induxerit populum ad voluntarias oblationes ob ſolemnitatem purificati templi, & inaugurationis Regni ſui, actum ſupererogationis procurariſſe indicat, & nil aliud. Unde illatio Novatorum, quod nunc liceat tollere imagines exemplo Ezechiaſæ ſerpentem comminuentis, inſana eſt: non enim cultus imaginum eſt ſuperſtitioſus, ut ſuo loco monſtrabitur.

Ad XVI. In Scriptura nullam fieri mentionem, quod Jojadas fuerit pueri Regis procurator, ſed ſolum, quod abſconditum in templo puerum ſubtractum à gladio Athaliaſæ interficientis omne Semen Regium, reſervaverit. Cæterum quæ fe-

cit, nempe Athaliæ occisionem præcipiendo, & Joas substituendo ac coronando in Regem, & adstringendo populum juramento fidelitatis, & Regem adjuratione obligando ad legis observantiam, &c. non exercuit authoritate Regia, quam nec habebat à jure, nec collatam à Rege, qui nondum Rex erat, sed exercuit potestate judiciaria Sacerdotali propria: ex quo potius Sacerdotum principalitas supra Reges habetur.

Ad XVII. Scripturam hos titulos enumeratos etiam aliis à Regibus tribuere. Nam 1. Omnes justi dicuntur *Filii Dei* 1. Joan. c. 3. *Qualem charitatem dedit nobis Pater, ut Filii Dei nominemur, & simus.* Dii vocantur Judices, quia ad hos Christus loquitur Joan. c. 10. v. 34. *Ego dixi dii estis.* Et patet etiam ex Exod. c. 22. v. 8. *Si latet fur, Dominus domus applicabitur ad Deos.* Etiam Prophetas Christus appellat Deos Joan. c. 10. v. 34. *Nonne scriptum est in lege vestra, quia ego dixi, Dii estis? Si illos dixit Deos, ad quos sermo Dei factus est &c.* Etiam Sacerdotes dicuntur *uncti Domini*, ut patet ex Levit. c. 4. v. 3. & Exod. c. 29. Imo Reges unguuntur à Sacerdotibus, & non vicissim. Reges inunguntur in brachio, Sacerdotes in capite, ad designandum, Potestatem Regis esse solius brachii auxiliatoris, Pontificis judiciariam potestatem & primatum habentis. Etiam Episcopi sedent in solio Dei: imo non Regibus sed Apostolis concessum est, quod sint concessuri cum Christo in Judicio Matth. c. 19. Episcopi, & omnes pii Christiani sunt *servi Dei*: ut habetur ad Rom. c. 6. v. 22. Etiam Sacerdotes sunt *Angeli Dei*, ut dicitur Malach. c. 2. v. 7. cum hac tamen differentia à Regibus, quod Sacerdotes vocentur Angeli, à quibus requirenda est lex, quod de Regibus non dicitur. Omnes, qui faciunt voluntatem Dei, sunt viri secundum cor Dei. Reges vocantur lucernæ Israelis 2. Reg. c. 21. v. 17. Sed Apostoli vocantur lux mundi Matth. c. 5. Episcopi vocantur stellæ Apoc. c. 1. at lux & stellæ præcellunt lucernas. Demum Reges vo-  
can-



cantur nutritii Ecclesiæ Isaïæ c. 49. sed explicatur de divitiis, quas Ecclesiæ tradiderunt Reges ad fidem conversi. Jam quid ex his ad potestatem judicariam in divinis pertinet?

Ad XVIII. Sensus Scripturæ esse, quod omnis homo, qui habet superiorem, teneatur illi obedire in iis, in quibus superior est: & quia, qui sunt membra alicujus Reipublicæ politicæ, superiorem habent, ideo in politicis ei obedire debent. Sed Scriptura nihil innuit de superioritate Regum in spiritualibus. Præterea argumentum in AA. retorqueri potest: Paulus loquitur de subjectione etiam Principibus Ethnicis exhibenda: sed Principes Ethnici, cum non sint membra Ecclesiæ, non habent potestatem judicariam in Divinis: ergo nec alii Principes Laici: vel si hi eam habent, habebunt & illi.

Ad XIX. Etiam potestas Sultani & cæterorum barbarorum Principum est à Deo: ergo habent potestatem judicariam Divinorum? Sensus ergo est, omnem potestatem in eo genere, in quo est, esse à Deo, non autem omnia, quæ à Deo sunt, subdi cuilibet potestati, quæ à Deo est. Cæterum AA. probare debent, Regiam potestatem à Deo esse circa divina, & ministeria Religionis.

Ad XX. Neg. min. Nec hic sensus est verborum Pauli: solum enim significant obediendum esse Regibus in politicis, non tantum propter timorem pænæ temporalis, sed etiam propter conscientiam, quæ læditur non obediendo, cum etiam leges civiles obligent, & Deus in iis præcipiat obedientiam. Unde absurda est interpretatio AA. qua deducitur subjectio directionis, judicationis, definitionis in spiritualibus apud Reges Laicos.

Ad XXI. Regem esse ministrum Dei in politicis: gladium portare, ut perturbatores pacis castiget. Et Potestas coactiva executionis non arguit potestatem judicationis: Potestas Regia & gladii est solius executionis in his, quæ pertinent ad Divina: brachium enim Sæculare in adjutorium deservit Ecclesiæ.

Ad

Ad XXII. Paulum ibi loqui de Principibus infidelibus, pro quibus orandum est, ut ad fidem convertantur, & eodem modo loquitur de omnibus, & propter idem motivum, quia Christus pro omnibus est mortuus, quia Deus vult omnium salutem, & omnes salvare, ut ex toto contextu Pauli loc. cit. patet. Nec est in textu illud verbum, *præcipue pro Regibus*: quod in argumento interseritur: immo oppositum habetur, cum primo loco enumeret populos, dum dicit *pro omnibus hominibus*, deinde *pro Regibus* &c.

Ad XXIII. Textum nil aliud intendere, nisi ut reddamus unicuique respectively, quod debemus: temporalia Principi, Spiritualia Deo: uti Christus ipse declarat Matth. c. 22. *Reddite ergo, quæ sunt Cæsaris Cæsari, & quæ sunt Dei, Deo*. Sicut ergo non valet, Christiani sub ditione turcica degentes tributum solvunt sultano: ergo illum agnoscunt Judicem in Divinis, & causis Religionis: ita non valet: fideles reddunt tributum Principi Laico: ergo illum agnoscunt ut Judicem in causis Religionis. Pariter Honor debetur parentibus, timor Dominis, Ludimagistris: ergo parentes, Domini, Ludimagistri sunt Judices causarum Religionis: quæ illatio?

Ad XXIV. Mirabilem, & risu explosibilem esse conclusionem deductam: potius oppositum inferri debet: quia Christus est Rex spiritualis, non administrat Regnum temporale: ergo quia Principes Laici sunt Reges temporales, non debent administrare Regnum spirituale. Christus ergo in causa temporalis dixit: *quis me constituit Judicem super vos?* Ergo Reges Laici dicere debent in causa spirituali: *quis nos constituit Judices super vos?* Et sic bona erit argumentatio.

Ad XXV. Christum non reddidisse rationem suæ doctrinæ Herodi, quem potius contempsit, sed misit testes suorum operum, & miraculorum, ut eum ad sanitatem reduceret. Nec Pilato, cui ex libera sua dispensatione, ut impleret mysterium cru-

crucis, se submisit in iudicio, nec inter vincula defuit evangelizare, & veritatis testimonium perhibere. Immo hoc argumentum subdit ipsum Christum Regibus, quem tamen Paulus toties clamat esse caput Ecclesiæ.

Ad XXVI. Enarrata Concilia se non submisisse Carolo tanquam Judici Divinorum: sed Carolum ministeriales solum egisse partes in procuranda restauratione disciplinæ Ecclesiasticæ, & ideo quinque simul Concilia Provincialia per Romanum Pontificem convocari, & celebrari institit, in quibus tamen omnia per Sacerdotes disponi voluit, ut Rhegino ostendit ad annum 813. Cæterum tam Concilium Arelatense, quam Cætera Concilia specificata quia tangebant, & continebant plura decreta civilia Laicos afficientia v. g. quod Laici non ejiciant presbyteros à suis Ecclesiis: ut Laici non exigant munera à Presbyteris propter commendationem Ecclesiæ: ut Judices non accipiant munera pro Judicio: ut diebus Dominicis publica non fiant mercata &c. quæ principis auxilio indigebant, ideo ab Imperatore postulant Patres, ut sua prudentia emendet, si quid non bene fuerit dispositum. Decretum fidei contra Tolletanum Concilium in Francofordiensi synodo cūsum fuit ex dependentia Romani Pontificis, quem expresse consuluit.

Ad XXVII. Patres Concilij Chalcedonensis solum petysse ab Imperatore Marciano supplices adjutrices, & executrices, legibusque suis observantiam promoventes. Quæ vero ex C. P. Concilio sub Menna proferuntur, non urgent, nam Concilium illud non erat legitimum, quando illa facta sunt: donec post celebrationem accessit confirmatio sedis Apostolicæ. Præterea dicendum, quod Justinianus Novella 42. manus solum adjutrices habere in causis Ecclesiasticis fateatur: erat autem valde necessarium adjutorium brachy sæcularis, cum Hæretici suæ causæ fiderent innixi patrocinio curialium personarum. Et Menna ipse apud Romanum Pontificem in causis Ecclesiasticis

Z

tribunal

tribunal supremum admittit ; unde addit : *Nos enim ( sicut scit Charitas Vestra ) Apostolicam sedem sequimur , & ei obedimus.*

Ad XXVIII. Neg. min. Non enim agnoscunt Patres jus penes Imperatorem , sed petunt præcise adjutorium ministeriale , eo quod disciplina Ecclesiastica suum non habebat vigorem defectu appretiationis legum Ecclesiasticarum , quas dissoluti parvi faciunt , sæpe sæpius confisi sæcularium auxilio.

Ad XXIX. Reccaredum , quæ deliberaverat , subjecisse examini Conciliari , ut loc. cit. dicitur. Item can. 2. Quare nec robur habuit Decretum , nec rationem Decreti Rex jussit habere , nisi firmatum assensu & subscriptione Patrum. Verum quidem est , suo Civili statuto actis Concilii dedisse munimen , & in unum colligi curasse ; sed hæc ministeriale , & executionis officium includunt ; quale & Gundemanus exercuit promovendo legem innocentiae , & Religionis.

Ad XXX. Ea peragere ministerialiter è munere Principis esse , non vero definitive , & legislative ; & ideo quia fraudibus Hæreticorum voluit errorem suo decreto corroborare Constans Imperator , lapsus est in Hæresim : & ipse & illa decreta damnata sunt à Martino I. in Concilio Romano , & Numidiensi , & Bizaceno , & quia in typo edendo excessit terminos suæ potestatis : *Imperialem typum sacrilego ausu totius plenum perfidiæ* vocat Martinus in Epistola ad Amandum. Patres Concilii ipsi dogmata definierunt , & ut definita executioni mandarentur , præsidium sæculare implorarunt maxime tunc necessarium , cum totum robur Hæreticorum in aulica potentia consisteret.

Ad XXXI. Aristotelem optime discurrere in ordine Civili , de quo agit. Vis coactiva , quæ Regibus conceditur in causis Religionis , est defensionis , & supponit judicium prius Sacerdotale exercitum : hoc enim proprium est defensionis , supponere rem defendendam. Episcopis negatur dominatio despotica , & gentilitia , non autem superioritatis , & auctoritativæ directionis cum benignitate conjunctæ. Ad

Ad XXXII. Ejusmodi leges non fuissenova decreta ab ipsis condita, sed intimationes canonum jam ab Episcopis conditorum: potestas enim Regia Ecclesiasticam adjuvare potest, & debet. Justinianus quidem aliquid ultra præsumpsit: sed hoc singulare exemplum fuit ab Ecclesia reprobatum; & edictum, quod consultis & approbantibus aliquot Episcopis contra errores Origenis promulgavit, non habuit vim nisi per consensum Ecclesiæ, seu summi Pontificis, & Episcoporum.

Ad XXXIII. Ad 1. Marcianum & Pulcheriam non præsedisse ut fidei Judices, sed dumtaxat ut Concilii Protectores, & ordinis ac pacis conservatores. Ad 2. In multis actionibus sexti Concilii quidem dici: *Præsidente piissimo Imperatore Constantino*: sed hæc verba solum significare Constantinum in loco honorificentissimo sedisse ut Ecclesiæ & Concilii defensorem, non vero ut controversiarum fidei judicem. Unde & Imperator post omnes Episcopos subscripsit non ut definiens, sed ut consentiens: dum Episcopi se subscripserunt his verbis: *N. Episcopus - - - definiens subscripsi*. Imperator vero hac formula: *Constantinus in Christo Deo Rex atque Imperator Romanorum legimus, & consensimus*. Ad 3. Cum in Concilio Nicæno II. de Irene Imperatrice dicitur: *Præsidente ipsa cum simul regnante Filio, & universa synodo &c.* ibi verbum *præsidere* significat tantum sessionem honorariam: & tota synodus non prælidet, sed legati Papæ. Ad 4. In Concilio octavo Generali dicitur quidem *Præsidente Basilio Imperatore*: at præsedet non auctoritate, sed solo sessionis honore, quem ipsi detulit Concilium ut Ecclesiæ Protectori, & ejus Decretorum Executori, non ut controversiarum fidei, aut causarum Ecclesiasticarum Judici.

Ad XXXIV. Neg. conseq. Quia Deo libere volente Regia & Sacerdotalis potestas simul junctæ erant in lege naturæ: sed postea Deus voluit eas in lege scripta & Evangelica esse separatas. Ex his pro solvendis aliis AA. objectionibus.



Colliges 1. Aliud esse, Principes ferre leges Ecclesiasticas, & judicia Religionis exercere: aliud Ecclesiasticos subijci legibus civilibus ad bonum publicum pertinentibus: primum negatur: secundum admittitur, non quidem quia à Principibus sæcularibus habentibus superioritatem in clerum, sed quia lex Dei præcipit servandam esse iustitiam. Et in hoc, non primo sensu interpretandi sunt SS. Patres.

Colliges 2. Ex singulari facto unius alteriusve Principis Laici usurpantis potestatem circa Divina, legitimam potestatem judicariam Divinorum non probari. Cum plures sunt contrarii.

#### §. IV.

Dico 4. Christus constituit Caput visibile Ecclesiæ, & Judicem Controversiarum fidei in determinata persona: adeoque non in omnibus Ecclesiæ Pastoribus, aut majore eorum parte.

**N**OVatores ut suam quisque fidem ad suum placitum fabricatam suis obtrudant sequacibus, omnem lapidem movent contra supremum Christi in terris Vicarium Romanum Pontificem, ei dignitatem capitis & Judicis Controversiarum fidei denegando. Quia tamen optime noscunt, Regimen Ecclesiæ, utpote ordinatissimum à Christo institutum, exigere aliquem gubernatorem, ne Romanum Pontificem talem agnoscere cogantur, in varias abiere sententias.

Calvinus Lib. 4. Inst. c. 6. docet: Solum & unicum Christum Judicem & Caput Ecclesiæ esse, qui sine ullo alio in terris Vicario, aut successore munus regendæ Ecclesiæ sustinet.

Lutheri asseclæ admittunt quidem Judicem, & Caput Ecclesiæ visibile in terris, verum illud in uno determinato Vicario

rio Christi docent non consistere, sed vel in omnibus Ecclesiæ Præpositis, aut saltem parte eorum potiore verbum Dei purum profitentium, & Sacramentorum legitimo usu utentium. Contra hos est statuta conclusio Catholica.

Ante probam Notandum 1. Certum esse tum apud Catholicos, tum accatholicos, Caput Ecclesiæ essenziale, primarium, & invisibile esse solum Christum: ut satis clare testantur sacræ paginæ: ait enim Apost. ad Ephes. c. 1. v. 22. *Et ipsum dedit Caput supra omnem Ecclesiam, quæ est corpus ejus.* Item c. 5. v. 23. *Vir Caput est mulieris, sicut Christus est Caput Ecclesiæ.*

Notandum 2. Certum etiam esse, Christum Dominum, dum in terris degeret, Caput Ecclesiæ visibile fuisse: fundavit enim Ecclesiam, duodecim Apostolos & septuaginta Discipulos Ecclesiæ Ministros instituit, sub visibilibus signis condidit Sacramenta, novum Sacerdotium, novum sacrificium, novas leges instituit: visibiliter Ecclesiam gubernavit docendo, prædicando, monendo, increpando: ut palam testantur Evangelistæ.

Notandum 3. Certum etiam esse, Christum post Ascensionem suam in cælum, Capitis obtinere dignitatem Ecclesiam suam invisibiliter gubernantis, corda fidelium movendo, Pastorum mentes illuminando, atque fidelibus suis internas gratias conferendo, ut de se ipso Christus testatur Matth. c. 28. v. 20. *Ego vobiscum sum usque ad consummationem sæculi.*

Notandum 4. Jam Paragrapho primo, & secundo probatum fuisse: Ecclesiam Christi esse visibilem, atque adeo Christum Ecclesiam suam invisibiliter gubernantem, aliud in Ecclesia Caput visibile, & Judicem sibi subordinatum constituisse, sui loco visibiliter, ut regat fideles, & gubernet: in præsentī ergo paragrapho ostendimus, Christum tale Caput visibile, & Judicem in determinata constituisse persona: qualis tamen hæc sit? in sequenti ostendemus paragrapho. Jam ergo

Probatur Conclusio 1. Juxta Calvinii effatum lib. 4. Instit. c. 6. §. 10. Alius Ecclesiæ typus quærendus non est, nisi in Scriptura, Evangelio, & Apostolorum epistolis: atqui in Scriptura, in Evangelio, & Apostolorum Epistolis palam constat, supremum Ecclesiæ Regimen in uno esse constitutum: ergo. min. prob. Synagoga erat typus Ecclesiæ Christi: nam ut ait Apostolus 1. ad Corinth. c. 10. v. 11. *Hæc autem omnia in figura contingebant illis.* Atqui in Synagoga supremum regimen penes unam determinatam personam erat: nempe Pontificem: nam Deut. cap. 17. v. 12. apud Judaicam gentem unus tantummodo erat lege Divina Sacerdos, quem omnes revereri, eidemque obtemperare debebant: ergo pariter in Ecclesia una determinata persona tanquam suprema est designanda, quæ aliis præficiatur, ipsique obsequantur fideles.

Confirmatur 1. Ideo juxta Calvinum lib. 4. Instit. c. 6. §. 2. gens Judaica undique ab idololatriis circumsepta unum supremum Principem, qui eam in unitate servaret, habere debuit, ne variis distraheretur Religionibus: atqui Christi fideles quaquaversum Sectis aberrantium circumdati sunt: ergo multo magis uno supremo capite petunt gubernari, ne decipiantur.

Confirmatur 2. Apoc. c. 21. v. 2. Ecclesia assimilatur Sponsæ: *Vidi Sanctam Civitatem Jerusalem novam, descendentem de caelo à Deo, paratam sicut sponsam ornatam viro suo.* Et ad Ephes. c. 5. v. 32. *Hoc Sacramentum magnum est: ego autem dico in Christo, & in Ecclesia.* Atqui Sponsa unum solum habet virum, ut dicitur 2. ad Corinth. c. 11. v. 2. *Despondi enim vos uni viro Virginem castam exhibere Christo:* quod si pluribus sui copiam faciat, adultera merito censetur: ergo Ecclesia ab una determinata persona regitur, & adulteram faciunt, qui pluribus eam viris regendam commendant. Pariter 1. ad Timoth. c. 3 v. 15. Ecclesia Domui comparatur: *ut scias, quomodo oporteat in domo Dei conversari, quæ est Ecclesia Dei vivi:* atqui domui  
unus

unus præponitur œconomus: Luc. 12. v. 42. *Quis putas, est fidelis dispensator & prudens, quem constituit Dominus super familiam suam?* ergo etiam Ecclesia unum solum debet habere Rectorem.

Probatur Conclusio 2. Quælibet pars Ecclesiæ Universalis ab uno determinato regitur, cui omnes in ea parte contenti subjiuntur: ergo etiam ipsa tota Ecclesia Universalis ab uno determinato dirigi debet. ant. docet Calvinus lib. 4. Instit. c. 4. §. 4. sequentia scribens: *Quod autem singulæ Provinciæ habeant inter Episcopos Archi-Episcopum, quod item in Nicæna Synodo constituti sint Patriarchæ, qui essent ordine & dignitate Archi-Episcopis superiores, id ad disciplinæ conservationem pertinebat. Et c. 6. §. 6. Quid aliud evincit, quam singulis Ecclesiis debere suos Episcopos attribui.* Atqui sicut una Provincia, aut particularis Ecclesia nequit recte gubernari, nisi Archi-Episcopus præcellat Episcopis, Episcopus Parochis, & Parochi Clericis præsent, ita universa Dei Ecclesia recte non potest dirigi, nisi unus determinatus præsit Primatibus, Archi-Episcopis, Episcopis, Parochis &c. Et sicut non servatur disciplina in singulis Ecclesiis & Provinciis, nisi unus adsit supremus: quia non foret, qui judicaret, qui singulos in suo munere contineret, atque ad illud exequendum cogeret; ita nisi quis toti præsit Ecclesiæ, non esset, qui Primates, Archi-Episcopos, Episcopos judicaret, atque eos ad sua adimplenda munia impelleret: Ergo.

Si dicant Novatores: quod dicta præeminentia sit solius honoris, non vero potestatis judiciariæ.

Contra est 1. Dicant Adversarii, si dicta præeminentia sit solius honoris, quas suppetias affert disciplinæ Ecclesiasticæ, si æqualis omnibus sit potestas judiciaria? Sic enim Episcopo resistet Parochus, Episcopus Archi-Episcopo, & hic Primati quomodo taliter subsistet disciplina Ecclesiastica? Ergo frivola & inanis est responsio Novatorum.

Con-

**Contra 2.** Si dicta præeminentia est solius honoris & dignitatis, non vero potestatis Judiciariæ, quare Apostolus Episcopum Presbyterorum judicem nuncupat? ut habetur 1. ad Timoth. c. 5. v. 19. *Adversus Presbyterum accusationem noli recipere, nisi sub duobus aut tribus testibus.* Cur Concilium Carthagenſe III. c. 45. Concedit primati, ut Clericos cujuscunque Diæceſis valeat ad Episcopatum aſſumere proprio renuente Præſule, ſi nullum eſt in poteſtate judiciaria diſcrimen? ergo dicta præeminentia non eſt ſolius honoris & dignitatis, ſed ſimul poteſtatis judiciariæ.

**Probatur Concluſio 3.** Nequit ſervari Eccleſiæ unitas, niſi in fide ſentiant idem omnes: atqui talis ſentiendi unitas nequit dari, niſi determinata perſona ſit Judex unus, cui alii obſequantur: ergo. min. conſtat: nam fieri nequaquam poteſt, in obſcuris & difficiliſſimis quæſtionibus plures poteſtate pares, ingenio diſpares in unum convenire, niſi quis determinatus poteſtate præcellat, atque ſuo imperio juſta decernat: ergo.

Res clareſcet exemplo, quidquid in oppoſitum oblatrent Novatores: cur à ſeptenario Lutheranæ defectionis Zwingliani & Sacramentarii emerſerunt? Cur Rigidi & Molles Lutherani adeo obſtinate invicem pugnant, & fruſtra diſputationibus franguntur? Cur in dies Calvinus dividitur, atque in contrarias ſectas diſcerpitur? ſi ut ajunt Magdeburgenſes, Conſiliis, atque Epiſtolis exoptata unitas conciliari poteſt, cur à tot annis iſta unitas adhuc deſideratur? Atqui unde hæc? Inde: quia unus deeſt, qui cæteris præſit, quique eos Imperio regat. Ergo. Unice mirandum, Novatores in unum convenire adverſus Romanam Eccleſiam Catholicam, & Pontificem: inter ſe autem minimè, ſed adeo inter ſe digladiari, ut ne generale quidem Concilium celebraverint, ubi tamen Apoſtolica ſedes tot ſolemnia habuit. Smalkaldicam forſan, & Dordrecenſem ſynodum. Ilegabunt: aſt hæc particulares fuerunt: nam prima à Lutheranis, altera à Calvinianis fuit congregata Hanc



Hanc primam veritatis regulam ( quod videlicet unus debeat esse determinate, qui cæteris omnibus potestative præsit ut Judex ) apprime necessariam agnoverunt ipsimet etiam Hæretici: eapropter ut suos errores absque falsitatis nota evulgarent, ad Romanum Pontificem appellabant. Sic *Pelagius* & *Cælestius* ab Africanis damnati ad Innocentium I. & ad Zosimum Pontifices venerunt. Sic *Julianum* ad Bonifacium, *Nestorium* ad Cælestinum, *Eutychetem* ad Leonem Magnum, *Sergium* ad Honorium legimus accessisse: ergo in comperto est, ad servandam fidei & Ecclesiæ unitatem unum determinatum requiri, à quo cæteri regantur, & dirigantur.

## O B J E C T I O N E S.

**O**bjicies I. Eodem modo loquendum est de statu novæ, ac veteris legis: atqui in statu veteris legis non erat Caput & Judex in determinata persona omnium fidelium constitutus: ergo neque in statu novæ legis. min. prob. Judæorum Pontifex solummodo jus suum dicebat Hebræicæ genti, non vero Gentilibus Deo famulantibus, quos inter Job recensetur: hi enim Sacramentis legis naturæ salvabantur, deque fidei rebus à Prophetis instruebantur, inter quos nullus erat prælationis potestativæ ordo: ergo etiam in nova lege per universum terrarum orbem diffusa non est Christi fidelibus unus determinate præficiendus, sed plures æqualis potestatis.

II. In lege gratiæ sicut nullus salvari potest absque fide Mediatoris, qui inter Deum & homines reconciliationis fœdus suo sanguine firmavit, ita in veteri lege nullus live inter Gentiles, five inter Hebræos absque fide futuri Mediatoris salvari potuit; atqui non obstante unitate fidei futuri Mediatoris non erat unus supremus Judex & Caput Hebræorum & Gentilium: ergo etiam non obstante unitate fidei Mediatoris præsentis non

A a

erit

erit unus supremus determinate Judex & caput fidelium per universum orbem commorantium.

III. Modus regiminis Ecclesiæ sub una fide conformari debet modo Regiminis sub ejusdem proximo typo, nempe Synagogæ Hebræorum; atqui non una determinata persona in Synagoga præfuit: ergo. min. prob. Tempore David Regis Sadoc & Abiathar erant summi Sacerdotes: Sadoc, quia ex Aaron per familiam Eleazar descendebat 1. Paralip. cap. 24. Abiathar, quia ab eodem Aaron, sed per familiam Ithamar descendebat, hicque usque ad Salomonem sacrorum fuit caput. Ergo.

IV. Per se, & ex Divino mandato plures constituti sunt supremam habentes auctoritatem in Judaismo: sic Moyfi dedit Dominus pares septuaginta in regimine, ut habetur Num. c. 11. v. 17. *Tradamque eis, ut sustentent tecum onus populi, & non tu solus graveris.* Item Exod. c. 28. v. 1. *Applica quoque ad te Aaronem fratrem tuum cum filiis suis de medio filiorum Israel, ut Sacerdotio fungantur mihi.* Pariter Machabæorum temporibus septem fratres Israeliticæ gentis Ductores fuere. Ergo.

V. Nequit dici, quod Christus genus Regiminis in Ecclesia constituerit, quod Deo in Hebraismo displicuit: atqui Monarchicum regnum Deo in Hebraismo displicuit; cum 1. Reg. c. 8. Israelitis, abjecto Judicum regimine, Regem exposcentibus iratus est Deus, pluraque comminatus est mala; ergo.

VI. Scriptura satis innuit iratum Deum Israelitis, quia Monarchicum Principatum utpote pessimum in tyrannidem degenerantem expetierant; hinc ad Samuelem dixit 1. Reg. c. 8. v. 9. & seq. *Verumtamen contestare eos, & prædic eis jus Regis, qui regnaturus est super eos - - - Filios vestros tollet, & ponet in curribus suis - - - Agros quoque vestros &c.* Rem probavit eventus sive in Saule, sive in Roboam, sive in Jeroboam, sive in Achabo, aliisque iniquissimis Regibus. Ergo.

VII.

VII. In Monarchico regimine, ubi unus gubernat, gravia sunt onera, quam ubi plures gubernant; dum enim unus gubernat, sibi consulit, alios spernit, & gravat oneribus; secus evenit in Régimine Aristocratico, sive Democratico: qui enim populos regunt, sedulo subditorum felicitati incumbunt, ne à suscepto munere amoveantur. Scimus summa laude Romanorum, Atheniensium, Lacedemonum floruisse Respublicas: ergo asseverare audendum non est, Christum relicto optimo pejorem Ecclesiæ suæ dedisse Principatum.

VIII. Non expedit, imo non potest orbis Univerfus ab uno determinato Principe regi in politicis: singula namque Regna habent suos Principes: ergo nec in spiritualibus. Unde Protestantes in Confess. Bezana c. 5. a 5. dicunt: *Deum solum esse, qui huic oneri sustinendo par esse possit.* Et in Apologia Ecclesiæ Anglicanæ inquirunt: *neminem unum esse posse, qui summa rerum universæ præsit.*

IX. Apost. Ad Ephes. c. 4. v. 3. unitatem, quæ esse in Ecclesia debet, recensens scribit: *Solliciti servare unitatem spiritus in vinculo pacis; unum Corpus, & unus spiritus, sicut vocati estis in una scpe vocationis vestræ; unus Dominus, una fides, unum baptisma.* Atqui si Ecclesia foret Monarchica, indubie addidisset, *unus summus Pontifex*: ergo cum hoc non fecerit, signum est, Ecclesiam non esse Monarchicam: ergo.

X. Ecclesiæ regimen est Democraticum: ergo non est Monarchicum: ergo Christus non constituit caput & Judicem Ecclesiæ in determinata persona. Ant. prob. Regimen Democraticum est, ubi suprema potestas est penes populum: atqui in Ecclesia suprema potestas est penes populum, seu multitudinem: ergo. min. prob. Matth. c. 18. v. 17. Incorrigibilis jubetur denuntiari Ecclesiæ, id est, (inquiunt ibi SS. Hilarius, Anselmus, & D. Thomas, ac L. 4. Epist. 38. D. Gregorius)

congregationi fidelium: ergo suprema Ecclesiæ potestas est penes multitudinem, seu universum fidelium cætum: ergo.

XI. Populus in Apostolum elegit Mathiam, uti legere est Actor. c. i. v. 15. & 26. Ergo suprema potestas est penes populum.

XII. S. Cyprianus Epist. 2. dicit: quod olim Episcopi electi fuerint à populo: ergo verum est, supremam potestatem esse penes populum.

XIII. Actor. c. 6. v. 3. Apostoli ad populum dixerunt: *Considerate fratres viros ex vobis boni testimonii, quos constituamus super hoc opus*: ergo penes populum est potestas sibi creandi Judices.

XIV. S. Ambrosius Epist. 32. de judicio fidei agens, scribit: *ille populus judicat*. Et S. Cyprianus L. 3. Epist. 14. ad Presbyteros & Diaconos de quibusdam fratribus inquietis & factiosis scribit. *Interim prohibebantur offerre, & tueri & apud nos, & apud plebem universam causam suam*. Per quæ verba *apud plebem universam* docere videtur, appellationes & judicia devolvi ad plebem: ergo.

XV. Septem sunt Spiritus, qui throno Dei assistunt, duo majora luminaria, plures cælestes orbes, totidemque motrices intelligentiæ: ergo plures etiam in Ecclesia Dei debent supremi esse Rectores.

XVI. Scriptura formam Ecclesiastici Regiminis satis innuit ad Ephes. 4. c. Atqui ibidem non ponitur unus, qui alios regat, sed plures, nempe Apostoli in æquali ordine constituti referuntur: *Et ipse dedit quosdam quidem Apostolos, quosdam autem Prophetas, alios vero Evangelistas, alios autem Pastores & Doctores*: ergo uni determinatæ personæ non subordinantur.

XVII. Paulus eo in ordine constituit Apostolos, ut quilibet superiorem non patiatur: unde 1. ad Corinth. c. 12. v. 28. ait: *Et quosdam quidem posuit Deus in Ecclesia, primum Apostolos, secundo*

*secundo Propbetas* : hoc in loco dixit *primum* sed si uni determinate supremo subordinarentur capiti, non dicerentur *primum* in Ecclesia positi : ergo.

XVIII. Esto S. Paulus in jam laudatis Epistolis varia donorum munia collata referat : nulli tamen membro mystici corporis plenitudinem, qua Christus præminebat, communicatam dicit : imo omnia ad mensuram distributa affirmat ad Ephes. c. 4. v. 7. *Unicuique autem nostrum data est gratia secundum mensuram donationis Christi* : atqui ad rationem supremi capitis requiritur plenitudo perfectionis Christi ; ergo.

## S O L U T I O N E S.

R. **A**D I. Ecclesiam sub triplici statu spectari : *Naturæ* videlicet ab Adam bis mille circiter annis ad Abraham usque : *legis scriptæ* & circumcisionis bis mille annis circiter ab Abraham ad Christum ducem. *Gratiæ* demum à Christo ad finem mundi usque. In primo alterove ex his statibus, ne ab unitate deficeret, dati sunt primarii Duces ; in primo *Adam, Seth, Henoch, Noe, Melchisedech*. In secundo *Abraham, Isaac, Jacob, Levi* ejusdemque Successores : ergo & in tertio designandi sunt supremi Sacerdotes à Christo usque ad consummationem sæculi successive regnantes. Quoniam vero status illi ab omnimoda fidei perfectione deficiebant, nempe primi duo, utpote ad statum gratiæ ut pædagogi ordinati, ideo eadem unitatis excellentia, qua Ecclesia Christi gaudet in tertio statu, non præminebant. Hinc etsi Israeliticam gentem sibi in populum electum adoptaverit Deus, non abrogavit tamen etiam ipsos inter Hebræos omnimode sacramenta legis naturæ : eapropter pro fæminis ad expiandam originalem noxam, & pro parvulis ante octavum diem remedium legis naturæ in salutem præsto erat : quare pro iis, qui inter gentes vitam agentes juxta legis naturæ præscripta vivebant, salutis aditus non erat interclusus : & licet Aaronicum regimen ad ipsos non se extenderet,



ex speciali providentia regebantur per Prophetas. Lex autem Christi undequaque perfecta est, ut notat Apost. ad Hebræ. c. 7. tantaque in ea est unitatis ratio, ut abrogata lege circumcisionis una quaquaversum prorsus sit, adeoque idem caput ad omnes se extendit, sicut Christus Sacerdos.

Ad II Absque dubio nec Hebræum nec gentilem absque fide futuri Mediatoris salvari potuisse: attamen hujus fidei status non erat omnino unus: etenim non alligabatur iisdem sacramentis, & iisdem notionibus: fideles siquidem versantes apud gentiles non iis coarctabantur legibus & sacramentis Hebræorum, nec claram adeo notitiam futuræ redemptionis habebant sicut Israelitæ, qui utpote assumpti in typum Christi fidelium proximius, perfectiusque unitatem referre debebant. Mediatoris autem Fideles omnes nunc eisdem legibus & sacramentis alligantur, utpote omnibus fides tam Hebræis quam gentibus ubique prædicata, per consequens uno eodemque capite ubique diriguntur.

Ad III. Per accidens, nempe ob juris ignorantiam, contigisse Synagogæ illam supremorum Sacerdotum pluralitatem. Ad cujus intelligentiam sciendum est, ex Aaron duplicem descendisse familiam, unam per Eleazar, alteram per Ithamar. Illa primum habuit Sacerdotium ad tempora usque Samsonis, quibus ob ineptitudinem filiorum Eleazar cessavit, & ad familiam Ithamar seu Levi usque ad Abimelech translatus est: cumque hunc Saul in odium David mactasset, Abiathar ejus filius ad David accessit petens Patris Sacerdotium, annuit Rex, eique Sacerdotium contulit. Sadoc econtra apud Saulem Sacerdotium petiit, etenim extinctis Sacerdotibus Heli ad familiam Eleazar Pontificatum rediisse affirmabat: & ipsi Saul consensit. Unde duo sub probabili iure utriusque partis regnabant; hocque in causa fuit, cur sedente super thronum Israel loco Saulis Propheta David uterque Sacerdotis munere fungeretur.

retur. Innotuit tamen speciali Numinis revelatione jus ad Sacerdotem pertinere 1. Paralip. c. 29. quem deposito Abiathar super sedem firmavit Salomon. Nec aliter sane poterat evenire: promiserat namque Deus Phinees filio Eleazari perpetuum in ejusdem Domo Sacerdotium. Ergo ex hoc nil aliud colligitur, nisi quandoque contingere posse propter juris ignorantiam pluralitatem capitis, ut vidit Ecclesia sub Concilio Constantiensi, quando Romani Pontificis nomen ferebant Gregorius XII. Benedictus XIII. & Joannes XXIII.

Ad IV. Septuaginta non fuisse Moyfi æquales, sed ejusdem Ministros, & pro levioribus tantum causis: majores siquidem immediate ad Moysen referebantur, ut habetur Exod. c. 18. v. 16. *Quidquid autem gravius erat, referebant ad eum, leviora tantummodo judicantes.* Ita etiam Pontifex plures Episcopos & Pastores habet veritatem ab eo definitam populos edocentes. Nec Aaron par fuit Moyfi, nec Aaron cum filiis suis: Sacerdotalem quidem designavit Dominus Aaronis stirpem: cæterum solus Aaron Sacerdotalibus indutus fuit vestibus, solusque, dum vixit, sacrificia obtulit; quo defuncto, vestibusque spoliato iisdem Moyfes Eleazarum Aaronis filium induit, ut legitur Num. c. 20. v. 28. Ex quo clarescit, uno obeunte in Ecclesia capite aliud subrogandum esse, ut figuræ respondeat figuratum: Christi figura fuit Moyfes, Aaron summi Pontificis. Pariter Filii Machabæorum septem quidem fuerunt, sed unus post alium regnavit, ut sacra testatur Historia.

Ad V. Concedendo, Deo displicuisse, quod Israelitæ petierint Regem talem, qui quasi à Deo independens, more nationum seu gentilium regeret populum Israeliticum, ut innuit cit. cap. v. 5. petierunt Regem sicut *universæ habent nationes* seu gentes. Negando vero Deo displicuisse, quod Israelitæ absolute petierint Regem.

Ad

Ad VI. Deum Israelitis iratum non ideo, quia absolute Monarchicum Principatum expetierant, sed quia absolutum Dominium exoptabant, ne ad Dei nutum regi deberent, & ideo dixit Deus Samueli 1. Reg. c. 8. v. 7. *Non te abjecerunt, sed me.* Iratus itaque fuit Deus propter hujus gentis superbiam, quæ, quomodo punienda foret per subsequos Reges, eis per Samuelem prædixit. Hinc facile conceditur Monarchiam quandoque in tyranidem degenerasse, verum hoc hominum non Principatus vitio vertendum est. Etiam perperam adstruitur, graviora esse onera, ubi unus, quam ubi plures regnant; nam in Aristocratico, & Democratico regimine persæpe privata potius quam publica inspiciuntur jura, & gravamina primatibus impune spectantibus inter subditos dividuntur. Laudabiles proinde sunt Respublicæ, Monarchico Imperio tamen juste & recte administrato nequaquam prævalent.

Ad VII. Responzionem patere ex mox antecederentur di-  
ctis.

Ad VIII. Transf. ant. neg. conseq. Disp. est: quia ad Ecclesiæ conservationem necesse est, ut circa res fidei omnes idem sentiant, easdem habeant leges, iisdem utantur Sacramentis &c. ergo necesse est, ut Ecclesia in spiritualibus ab uno regatur Principe. Econtra ad statum politicum totius orbis conservandum non est necesse, ut omnes mundi partes utantur iisdem legibus, ritibus, moribus &c. ergo necesse non est, ut orbis universus in politicis ab uno Principe regatur: diversæ siquidem nationes cum sint, diversa & sunt politiæ genera, adeoque & diversitas Principum.

Ad IX. S. Paulum ibidem eam unitatem recensere, quæ apprime deservire valet, ut charitatem, & pacem ad invicem fideles habeant: ad hanc autem ea potissimum spectant, quæ communia sunt: & quamvis explicite unius Capitis non meminerit, implicite tamen satis innuit: si enim unum corpus nuncupatur

cupatur Ecclesia, certo uno Capite insigniri debet. Et sane Calvinus incongrue omnino unitati Capitis refragatur: si enim fides una, unum baptisma, una spes, unus spiritus, corpus itidem unum, cur multiplex fingit Caput? etiam Spiritus S. in Scriptura non dicitur Deus unus cum Patre & Filio explicitè: ergo non est Deus.

Ad X. Neg. ant. ad prob. neg. min. ad ejus prob. conc. ant. neg. conseq. Nam ea ipsa denuntiatio sit Ecclesiæ, si fiat illi, qui cum suprema judiciaria potestate præest Ecclesiæ, ac ratione officii sui Ecclesiam ipsam repræsentat. Unde S. Chrysost. Epist. 61. Teophilactus, Evthymius, Hugo Card. Cajetanus, Sylveria & alii illud *Dic Ecclesiæ* explicantes, nomine Ecclesiæ intelligunt Pastores & Gubernatores Ecclesiæ; ut patet ex verbis Christi Matth. c. 18. *Subjēctis: quæcunque alligaveritis super terram &c.* quasi diceret, inquit Sylveria tom. 4. in Evang. l. 6. c. 11. exposit. 3. *Dic Ecclesiæ, illius nempe Præsidi, apud quem est auctoritas ligandi pænis & censuris ejusmodi contumacem.* Nec aliud volunt SS. Hilarius, Gregorius &c. Nam dicere toti Ecclesiæ per orbem diffusæ non potest facile fieri: ergo dicendum est Ecclesiæ Præposito, seu ejus Ministris.

Ad XI. Neg. conseq. Nam ex illo jure, quod populus, olim in electione Ministrorum Ecclesiæ habuit, non sequitur, potestatem Ecclesiasticam olim extitisse apud populum, & fuisse popularem: nam populus non creavit, aut ordinavit illos Ecclesiæ Ministros, sed solum nominavit, & designavit eos viros, quos desiderabat ordinari ab Episcopis per manuum impositionem. Et sic Mathias, qui à Deo potius, quam à populo electus fuit, ab Apostolis ordinatus est Episcopus.

Ad XII. Neg. conseq. Sicut enim ex eo, quod hodie Cardinales eligant summum Pontificem, & Cathedralis Ecclesiæ Canonici Episcopum, non sequitur, supremam potestatem aut regimen esse penes Cardinales & Canonicos, vel dari ab his: ita pariter.

B b

Ad

Ad XIII. Neg.<sup>o</sup> conseq. quia ex cit. textu plus non sequitur, quam quod Apostoli permiserint populo, ut boni testimonii, seu probitatis fidei, scientiæ, ac prudentiæ viros quærat, & offerat, qui creentur ab Apostolis. Deinde ex eo, quod populus sibi possit creare Magistratum, non sequitur, regimen Ecclesiæ esse Democraticum, aut supremam potestatem esse popularem: nam primi Reges à populo, & Imperatores apud Romanos olim à militibus creabantur; atque nunc Romanorum Imperator ab Electoribus Imperii creatur; & tamen Regum ac Imperatorum regimen olim non erat nec hodie est Democraticum? ad hoc enim requireretur, quod major auctoritas esset in populo quam in Principe, & quod à Principis sententia posset provocari ad tribunal popolare: quod nec in Imperio Romano, neque in Ecclesia Romana fit.

Ad XIV. S. Ambrosium loque de privato iudicio, quo quilibet, quid sequi debeat, decernit, non autem de iudicio publico auctoritatem cæteros obligandi habente, ut aperte colligitur ex ejusdem D. Ambrosii verbis: *Veniant plane, si qui sunt, ad Ecclesiam, audiant cum populo, non ut quisque Judex resideat, sed ut unusquisque de suo affectu habeat examen, & eligat, quod sequatur.* S. Cyprianus omnia fere negotia tractavit coram clero & populo sponte, non vero per aliquam legem, quæ ipsum ad lic agendum obligaret, ut patet ex ipsis verbis ejusdem lib. 3. epist. 10. *Ego à primordio mei Episcopatus statueram: quod verbum non subjectionem ad clerum & populum sed spontaneam & liberam voluntatem significat) nihil sine consilio vestro & sine consensu plebis meæ privatim sententia gerere.* Et si autem D. Cyprianus sponte in suis negotiis ita processerit, & forsan etiam illorum factorum fratrum causam ad clerum & plebem devolvi permisisset, per id tamen nec suæ, nec aliorum Prælatorum Ecclesiasticorum Jurisdictioni & potestati præjudicare voluit, neque potuit; sicut Alverus per id, quod sapientum Esther c. 1. v. 13. *qui ex*

more



*more regio semper ei aderant, faciebat cuncta consilio: noluit suæ aliorumque Regum derogare authoritati.*

Ad XV. Septem sunt Spiritus throno Dei assistentes, sed unus est totius cælestis militiæ Princeps: duo sunt luminaria, sed unum præest diei, alterum nocti, hoc insuper ab illo dependet lumen recipiendo: plures sunt cælestes orbes, verum unus cæteris omnibus magnitudine & virtute præstat. Plures itaque in spiritu & veritate Deo famulantur: plura sunt Doctorum lumina Ecclesiam illustrantia: plures in ipsa Præsules: sed omnes uni primo servo Dei, Doctori, Episcopo subordinantur: qui ordo Monarchicum regimen constituit. Ecce proprio se gladio jugulant Protestantes.

Ad XVI. Eo loco Apostolum nil aliud intendere, quam referre varia donorum munia à Christo collata Ecclesiæ, Apostolorum videlicet, Prophetarum, Evangelistarum, atque eorum, qui populos docent. Hæc porro munia commendat ut ministeria ejusdem mystici corporis, ut ibidem dicit v. 24. *Unum corpus, & unus spiritus*: proindeque uni supremo capiti subordinata: corpus enim sine capite monstrum foret.

Ad XVII. In laudata Epistola Apostolum referre, quæ supra ad Ephesios scripserat, atque ex donorum diversitate id unum intendere, nempe palam facere, fideles non esse in muneribus, & ministeriis æquales, eo plane modo, quo humani corporis membra non eundem actum habent: unde subdit v. 19. *Nunquid omnes Apostoli? nunquid omnes Prophetæ?* posuit quidem Deus in Ecclesia primum Apostolos, utpote inter membra mystici corporis potiori gaudentes prærogativa, sed non cum exclusione, verum inclusione supremi capitis, & primo primi, cui alii omnes subordinantur.

Ad XVIII. Plenitudinem virtutis Christi & potestatis nemini utique concedi, quia Christus est absolutum caput non solum Ecclesiæ militantis, verum etiam purgantis & trium-

phantis, qui potest Sacramentorum effectus absque Sacramentis præstare, leges condere, atque immutare; plenitudo autem vicegerentis, superioritas nempe super omnes Episcopos & fideles, universalis quoque Jurisdictio in totam Ecclesiam in his, quæ ad ejusdem pertinent utilitatem, uni potest conferri. Quare licet Petro, si relate ad Christum spectetur, donorum portio sit solum impertita, ea tamen major est, quam quælibet cæteris Apostolis collata, ratione cujus plenitudinem superioritatis sortitus est. Ex his

Colligendum I. Regimen, seu Imperium juxta Aristotelem lib. 6. Politicæ c. 2. aliud esse *Monarchicum*, aliud *Democraticum*, & aliud *Aristocraticum*; vel enim potestas Imperii residet penes unum? & dicitur Principatus, ac Monarchia, uti est potestas Imperatoris in Germania, Regis in Hispania &c. vel regendi potestas est penes universos, aut majorem populi partem ita, ut omnes singulis imperent, & singuli omnibus obtemperent, sintque vices præcipiendi & parendi? & hæc potestas est Democratica: qualis olim erat Atheniensium, & hodie est Helvetorum. Vel denique suprema potestas est penes paucos, & hos optimates? & vocatur Aristocratia: qualis est Venetorum, Genuensium &c.

Colligendum 2. Formam regendi Monarchicam, qua unus solus gubernat, inter alias esse nobiliorem, ita præter Philosophos, Aristotelem lib. 8. Ethic c. 10. Platonem in Politico. Plutarchum in solonæ. Homerum in 2. Iliados. Philonem lib. de Confus. linquar. consentiunt SS. Patres: Hieronymus in Epist. ad Rusticum. S. P. Augustinus serm. 25. de Verb. Dom. Justinus in orat. exhort. ad gentes &c. Et ratio est: quia ubi plures eundem populum cum pari potestate regunt, ibi populus facilius in partes secatur, quarum una huic, altera alteri gubernatori adhæret: ex quo oriuntur jurgia, dissidia, quibus violatur pax inter subditos, & regnum non potest manere stabile

ac

ac diuturnum. Hinc Christus Lucae c. II. v. 17. ait: *Omne regnum in se ipso divisum desolabitur*; ut experientia in nostris Protestantibus docet, qui, quia uni supremo Ecclesiae capiti nolunt subesse, in varias sectas discinduntur, & inter se ipsos dividuntur, dum unus sic, alter aliter credit, ac facit. Prævalet ergo Regimen Monarchicum regimine Democratico, & Aristocratico.

Colligendum 3. Regimen Ecclesiae universalis Christianae esse Monarchicum. Ita Catholici omnes contra Protestantes, qui, ne cogantur admittere unum visibile Ecclesiae caput, a quo cæteri gubernentur fideles, absolute negant, regimen Ecclesiasticum esse Monarchicum. Contra ipsos tamen stat & S. Scriptura, & Ss. PP. ut jam vidimus, & amplius in subsequentibus videbimus. Ratio autem est: quia sicut membra Ecclesiae sunt homines visibiles ac sensibiles, visibile ac sensibile regimen requirentes, atque unum corpus Ecclesiae visibile constituunt, ita & caput unum visibile ac sensibile requirunt, cum caput corpori debeat esse proportionatum. Pariter tale caput unum & regimen Monarchicum exigit utilitas fidelium, ut scilicet in suis necessitatibus habeant sensibile refugium, in rebus dubiis certum oraculum, in suis gravaminibus familiarem accessum. Tandem & id exigit uniformitas fidei, quæ debet esse una: omnes namque fideles debent in rebus fidei prorsus idem sentire, & credere, quod in tanta judiciorum diversitate fieri nequit, nisi detur unus Rector & Judex summus, qui à Christo constitutus, & à Spiritu S. directus infallibiliter doceat omnes, & cujus sententiae acquiescant omnes. Ergo.



## §. V.

Dico 5. Christus solum Petrum constituit Caput visibile Ecclesiæ, & Judicem Controversiarum fidei, non vero Cæteros Apostolos; adeoque illa determinata Persona est Petrus solus, & non simul cæteri Apostoli à Christo constituta.

**P**ROBATUR I. Joan. c. 21. v. 15. & seq. legitur Christum brevi ascensurum ad Patrem, & visibili præsentia derelicturum Ecclesiam, Petrum his verbis affatum fuisse: *Cum ergo prædisserent, dicit Simoni Petro Jesus: Simon Joannis diligis me plus his? dicit ei, etiam Domine, tu scis, quia amo te. Dicit ei: pasce Agnos meos. Dicit ei iterum: Simon Joannis diligis me? ait illi, etiam Domine, tu scis quia amo te. Dicit ei: pasce Agnos meos. Dicit ei tertio: Simon Joannis amas me? contristatus est Petrus, quia dixit ei tertio, amas me? & dixit ei: Domine tu omnia nosti: tu scis, quia amo te. Dixit ei: Pasce oves meas.* Ex his tale conficitur Argumentum:

Christus solummodo Petrum personaliter alloquitur: sed ipsum alloquens universalem Ecclesiæ præfecturam ei confignat: ergo Christus Petrum solum constituit caput visibile Ecclesiæ, & Judicem. Maj. constat ex evidenti Evangelistæ testimonio mox adducto. Nam 1. *Dicit Simoni Petro Jesus: Simoni Petro*, ut non foret cum altero Simone æquivocatio. 2. *Ter interrogatur, & ter appellatur Simon Joannis*: quo nomine nemo alius nuncupabatur. 3. *Petrus discernitur ab aliis, diligis me plus his?* quo loquendi modo alii excluduntur. 4. *Ex contristatione, contristatus est Petrus*: non alius: memoratur: & cur contristatus? quia metuebat se decipi, cum dicebat *amo te*, sicut se deceptum novit, cum ait: *si oportuerit me mori tecum,*  
non

*non te negabo.* 5. Ex prædictione mortis: *Amen Amen dico tibi,* cum esses *Junior*, cingebas te &c. hæc enim verba antecedenti connectuntur periodo, & super eandem personam appellant, ut contextus legenti aperit. 6. Ex trina interrogatione, *Diligis me?* nam juxta S. P. August. serm. 29. de verbis Domini, ideo ter interpellatur de dilectione- quia ter Christum negaverat in prætorio: atqui solus Petrus personaliter ter negavit: ergo solum Petrum personaliter alloquitur Christus: subf. sed ei, quem alloquitur, dicit: *Pasce agnos meos, Pasce oves meas:* ergo soli Petro personaliter hæc dixit: ergo. maj. argumenti est vera. min. etiam claret: nam munus Pastoris est oves pascere: sed Pastor præfecturæ, superioritatis, potestatis, ac Jurisdictionis dignitatem super oves importat: sic Christus Joan. c. 10. v. 14. cum dicat: *Ego sum Pastor bonus, & cognosco oves meas:* qua Pastor est ovium Præpositus, caput, superior, ac Judex: sic ubi vulgata legit Psal. 2. v. 9. *Reges eos in Virga ferrea:* Hebraica habet: *Pasce eos:* similiter ubi Matth. c. 2. v. 6. legitur: *Ex te enim exiet Dux, qui regat populum meum Israel:* Græcus interpretatur: *qui pascet.* Ergo in idem redit munus Pastoris, Rectoris, Præsidis, & Ducis. Ergo.

Respondet ad hoc argumentum Calvinus lib. 4. Inst. c. 6. n. 3. 1. ut firmæ sint istæ probationes, ostendant inprimis oportet, ei mandari potestatem in omnes Ecclesias, qui pascere Christi gregem jubetur: neque ullibi in Scriptura stat Vicarius Christi. Sed

Contra 1. Vel omnium Ecclesiarum fideles sunt oves Christi vel non? Si non sunt omnes oves Christi, non sunt membra Christi, consequenter non sunt membra Ecclesiæ, de quibus proinde non est in præsentī sermo; si vero omnes Ecclesiarum fideles sunt oves Christi, in omnes Petro potestas à Christo sui loco tradita est, cum Petrus Pastor ovium Christi constitutus est: *Pasce oves meas:* ergo ei demandata est potestas in omnes Ecclesias, qui pascere Christi gregem jubetur.

Con



Contra 2. Christus non dixit Petro, *pasce bas oves meas*, vel *illas*: sed sine ulla restrictione dixit: *pasce oves meas*; ergo sine ulla restrictione omnes oves illi pascendas commisit: subsum. Sed oves omnium Ecclesiarum sunt oves Christi: ergo omnium Ecclesiarum Christus Petrum Pastorem constituit, & jubetur gregem Christi pascere.

Contra 3. Illæ oves Petro pascendæ à Christo sunt commissæ, quarum Christus bonus Pastor erat, & pro quibus animam suam posuit: atqui Christus omnium ovium Pastor bonus fuit, & pro omnibus animam suam posuit, mortuus enim pro omnibus est: ergo omnium ovium Petrus constitutus est à Christo Pastor.

Contra 4. Licet in Scriptura verbotenus non stet *Vicarius Christi*, in Scriptura tamen res significata per Vicarium Christi habetur: nam potestas Petro collata per verba: *pasce oves meas*, nil aliud denotat, quam tu mei loco eas pasce oves, quarum ego Pastor bonus sum: vices autem alterius gerere, est agere alterius Vicarium; ergo.

Respondet 2. Lutherus de potestate Papæ ad hoc argumentum: Petro Christum non credidisse omnes fideles, quia est usus Christus termino indefinito *oves*, & non universali *omnes oves*. Sed

Contra 1. Terminus indefinitus in materia necessaria, qualis est materia fidei, æquivalet universali: ergo Christus Petro dicendo: *Pasce oves meas*, idem est, ac si dixisset: *Pasce omnes oves meas*.

Contra 2. Ille terminus *Meas* magis explicat universalitatem, quam terminus *omnes*: nam nullus in Ecclesia existit, qui non sit ovis Christi, cum pro omnibus mortuus sit: ergo Christus dicens: *pasce oves meas*: de omnibus dixit nullam ovem excipiens.

Contra

Contra 3. Cum Christus dixit Petro, *Pasce oves meas*, vel omnes eidem credidit, vel nullas, vel solum aliquas? Si omnes: ergo falsa est responsio Lutheri, & stat Catholica contra eum veritas. Si nullas: ergo fallitur veritas textus. Si tantum aliquas: ergo Verbum Domini insipientiæ nota inuritur: quia cum non distinguat, quales istæ oves sint, idem est, ac si nullas commendaret, nescitur enim, quibus sit vigilandum, quæ pascendæ.

Contra 4. Universitas Ecclesiæ ex subditis & Pastoribus conflatur: sed Petro subditi & Pastores fuere commendati: nam bis dixit Christus, *Pasce agnos meos*, & iterum *Pasce oves meas*: ubi pro *Agnis* veniunt fideles, pro *ovibus* Pastores: oves enim sunt velut matres lactantes Agniculos: ergo. Sic discurret Eusebius Emislenus, seu Eucherius Lugdunensis Episcopus, aut alter antiquus Gallicanus Antistes Serm. de Nat. Ss. Petri & Pauli: Prius *Agnos*, deinde *oves* (Petro) commisit, quia non solum Pastorem, sed Pastorum Pastorem eum constituit. Pascit igitur Petrus *Agnos*, pascit & *oves*: pascit filios, pascit & matres: regit & subditos & Prælatos. Omnium igitur Pastor est, quia præter *Agnos* & *oves* in Ecclesia nihil est. Ergo.

Respondet iterum Lutherus loc. supra cit. Ly *Pascere* non significare Dominium, aut superioritatem: quia proprie est servi afferentis cibum: & quia usus est verbo præceptivo dicendo: *Pasce*. Sed.

Contra 1. Petrus non fuit constitutus à Christo ut Mercenarius, cujus est dapes afferre convivæ, sed ut bonus Pastor; & ideo trina dilectionis confessio exigitur. Bonus Pastor erat Christus, ideo animam suam posuit pro ovibus suis: sed ubi Petrum Pastorem constituit, vult, quod similiter animam suam imponat pro ovibus, eapropter subjunxit Joan. c. 21. v. 22. *Turne sequere*, quod de morte dictum fatetur Scriptura: ergo vult Petrum pascere oves non aliter ac ipse Christus: atqui Christus pavit oves non

C c

ut

ut inferior, sed ut Princeps & Dominator earum: ergo & Petrus.

Contra 2. Nullus sanæ mentis dixit unquam, servum pascere Dominum, ex quo illi porrigat panem; sed econtra servus à Domino pascitur, cujus sumptibus alitur: ergo.

Contra 3. Ideo juxta Lutherum dum Christus dixit Petro: *Pasce oves meas*: nullam contulit potestatem & superioritatem in illas, quia verbo usus est præceptivo: sed hoc ipso talem potestatem & superioritatem contulit: ergo. min. prob. Dum Christus Apostolis imperando dixit: *Euntes prædicate Evangelium omni creaturæ. Docete omnes gentes*: dedit illis potestatem Evangelizandi, & docendi. Dum Deus imperando dixit: *Crescite, & multiplicamini, & replete terram*: donavit hominibus fecunditatem. Dum Salvator præcepit Paralytico: *tolle grabatum tuum, & ambula*: simul largitus est virtutem progressivam. Dum dixit Christus imperative Adolescenti mortuo: *Ego dico tibi, surge*, vitam tribuit: ergo etiam dum Christus dixit Petro præceptive: *Pasce oves meas*: dedit ei potestatem & superioritatem super eas.

Contra 4. Ex eo, quod Christus imperative Petro fuerit locutus, evincitur magis, eum Petro dedisse potestatem, & Jurisdictionem: ergo ant. prob. Præceptum vel supponit, quod requiritur ad illud implendum, vel confert: ergo cum pascere oves Christi superioritatem innectat, hoc munus Petro mandans Christus vel in ipso supponit, vel dominium elargitur.

Dicunt Sectarii: si hæc verba: *pasce oves meas* accipienda essent ita unversaliter, etiam Petrus fuisset Pastor cæterorum Apostolorum, cum & hi vel maxime sint de ovibus Christi: sed cæteri Apostoli Petro non indiguerunt ut Pastore, eo quod suam doctrinam, suumque Evangelium prædicandi, & gentes baptizandi facultatem immediate receperint à Christo, qui ad eos omnes dixit *Euntes in mundum unversum docete omnes gentes, baptizantes eas &c.* Ergo. Sed

Con-

Contra 1. Etſi cæteri Apoſtoli Petro ut Paſtore non indiguerint ad doctrinam & memoratas facultates ſibi communicandas, indiguerunt tamen eo ut capite, cui obedirent, & ſubjicerentur in iis, quæ ad ſalutem animarum, & majorem Evangelii prædicationem magis conducere viderentur: item ad oves regendas & gubernandas, oves infirmas curandas, diſperſas colligendas, errantes ad ovile reducendas, & periclitantes à lupis defendendas: eis debite præſidendo, inter eas diſcernendo, eaſque judicando: ergo.

Contra 2. Si cæteri Apoſtoli Petro non indiguerunt ut Paſtore, cur Chriſtus Lucæ cap. 22. v. 31. & 32. dixit ad Petrum: *Ecce Satanas expet. vii vos, ut cribraret ſicut triticum; ego autem rogavi pro te, ut non deſiciat fides tua: & tu aliquando converſus NB. confirma fratres tuos.* Ergo.

Reſpondet 2. Calvinus lib. 4. Inſtit. c. 6. n. 4. ad argumentum: per has voces: *Pasce oves meas*: nihil Petro ſpeciale datur, quod non fuerit collegis etiam commune: quia alioquin non modo Perſonis fieret injuria, ſed claudicaret ipſa Doctrinæ Majeltas. Sed

Contra 1. Chriſtus per hæſ voces: *pasce oves meas*: Petro præter extraordinariam Apoſtoli poteſtatem, nempe prædicandi Evangelium in univerſo mundo, & docendi omnes gentes &c. quæ erat communis cum cæteris Apoſtolis, in morte cujuſvis Apoſtoli extinguenda: etiam dedit poteſtatem juridiſtionis, & Paſtoris ordinariam in omnes fideles, in Petro non extinguendam, ſed in ſucceſſoribus uſque ad finem mundi duraturam: adeoque dedit Chriſtus Petro poteſtatem univerſalis Paſtoris, cui cæteri etiam Apoſtoli tanquam oves ſubordinati eſſent: ergo per illas voces Petro quid ſpeciale datum eſt, quod non fuit collegis commune.

Contra 2. Pater cæleſtis non fecit injuriam cæteris Apoſtolis, dum ſoli Petro revelavit divinitatem Chriſti, Matth. c.

16. v 16. ergo neque Christus ullam fecit injuriam reliquis, dum soli Petro contulit specialem potestatem.

Contra 3. Christus unus & solus visibiliter Ecclesiam regebat servata Doctrinæ Majestate: ergo etiam eadem servatur, dum uni Petro vices suas Christus defert: hoc enim conformitas in doctrina, & perpetua ejusdem conservatio prorsus requirit. Ergo.

Respondent Sectarij 3. ad argumentum: Christum per illa verba: *Pasce oves meas*: Petrum quidem constituisse Pastorem, & superiorem, ast non primatu præeminentiae supra reliquos Apostolos, sed solum primatu charitatis; Christus enim dum post quæstionem, an à Petro plus his diligeretur? dixit: *Pasce oves meas*: solum declaravit reliquis Apostolis suis, quod à Petro superentur in amore, & hoc solo is sit illorum Primas; quia cum Christus amorem Petri non potuerit ignorare, ideo duntaxat voluit eum de amoris majoritate interrogare, ut ea etiam aliis, quos charitate superaverat, innotesceret. Addunt Sectarii; Christum ideo voluisse Petrum declarare Primatem in charitate, quia is plura illius erga Magistrum suum amoris dedit signa; ut dum super tumentis maris fluctus ambulavit, ut citius ad Christum perveniret; dum nudato gladio Christum defendit, & Malchi militis auriculam amputavit, quod ex ferventissimo in Christum Magistrum suum amore fecit juxta illud: *etiamsi oportuerit me mori tecum, te non negabo*; dum ægre sibi permisit pedes lavari à tanto Magistro: *Domine tu mihi lavas pedes?* En quam frivolas, quam impertinentes Sectarij, dum textu premuntur Scripturistico, ejus fabricent interpretationes? Sed

Contra 1. Vel Sectarii loquuntur de interno Petri erga Christum amore? vel de externo, seu per signa externa exhibitio? atqui neutrum dici potest: ergo. min. prob. non potest dici primum: quia internus amoris affectus nemini potest innotescere nisi soli Deo: siquidem solus Deus est scrutator cordi-  
um



um. Neque dici potest secundum : quia illa exteriora signa , quibus exhibitus est Petri amor , insufficientia sunt ad declarandam majoritatem amoris , qui fuit in Petro : ergo. ant. prob. Illa exteriora signa vel sunt verba Christi interrogantis : *diligis me plus bis ?* vel sunt verba Petri respondentis : *tu scis , quia amo te* : sed neutrum dici potest : ergo. min. prob. Non primum : quia evidens est , quod interrogatio alterius , an diligam eum ? sit insufficientis ad declarandum audientibus meum amorem in interrogantem. Nec secundum dici potest : quia alias verba Petri , factaque à Sectariis enarrata , quibus is suum amorem in Christum testatus est , erant insufficientia ad declarandam majoritatem amoris , qui fuit in Petro : nam ex iis verbis & factis Petrus semper retulit correptionem à Christo , dum enim Petrus marinos fluctus calcavit , dixit illi Christus Matth. c. 14. *Modica fidei , quare dubitasti ?* Dum exserto è vagina gladio Malchi auriculam amputavit , dixit ei Christus Matth. c. 26. *Converte gladium tuum in locum suum : omnes enim , qui acceperint gladium , gladio peribunt.* Dum Petrus dixit Lucæ c. 22. *Domine tecum paratus sum , & in carcerem , & in mortem ire* : item Matth. c. 26. *etiamsi oportuerit me mori tecum , non te negabo* : dixit ei Christus Lucæ c. 22. v. 34. *Non cantabit hodie gallus , donec ter abneges nosse me.* Dum Petrus dixit Matth. c. 16. *Absit à te Domine , non erit tibi hoc* , ut occidaris : respondit ei Jesus : *Vade post me Sathana , Scandalum es mihi.* Dum Petrus tergiversatus est ad Christum dicens Joan. c. 13. *Non lavabis mihi pedes in æternum* : Christus illi reposuit : *Si non laverò te , non habebis partem mecum.* Poterantne cæteri Apostoli , qui omnes has reprehensiones audierunt , ex iis conficere , se à Petro superari à Charitate erga Magistrum suum ? an non ex iis potius debebant inferre , Petrum amore sincero non dilexisse Magistrum ? Ergo & illa verba Petri : *tu scis , quia amo te* : erant insufficientia ad declarandam majoritatem amoris erga Christum.

Contra 2. Ss. Patribus, qui tamen certe magis illuminati erant, quam nostri Novatores, de isto primatu charitatis ex verbis & factis Christi ac Petri non constitit; nam ut 1. p. q. 20. a. 4. ad 3. S. Thomas refert, Patres multum dubitarunt, an Petrus, an Joannes magis dilexerit Christum? siquidem aliqui asseruerunt, quod Petrus plus dilexerit Christum in membris ejus, & ideo Christum Petro commendasse Ecclesiam; Joannes vero plus dilexerit Christum in se ipso, & ideo Christum Joanni commendasse Matrem suam. Alii dicunt, Petri amorem fuisse quidem majorem quoad fervorem & promptitudinem, ast non quoad familiaritatem, quia quoad hanc superabatur à dilectione Joannis. Ita citatus Doctor Angelicus, qui ibidem addit: *Præsumptuosum tamen videtur, hoc judicare, quia dicitur Prov. 16. Spiritum ponderator est Dominus, & non alius.* Unde ex primatu Charitatis non potest concludi, Petro fuisse datam supremam auctoritatem in Ecclesia; præsertim cum D. Hieronymus lib. 1. contra Jovin. ex pluribus titulis probet, Joannem fuisse chariorem Christo quam Petrum: & licet Tertullianus lib. de Præscript. c. 22. Joanni tribuat prærogativam dilectionis, Petro tamen concedit præminentiam potestatis, dum inquit: *Latuit aliquid, Petrum ædificandæ Ecclesiæ petram dictum, claves Regni cælorum consecutum, & solvendi & ligandi in cælis & in terris potestatem; latuit aliquid, Joannem dilectissimum Domino pectori ejus incumbentem, quem loco sui filium Mariæ commendavit.* Ergo

Contra 3. Etsi Petrus plus dilexerit Christum quam Joannes, potestas tamen Petro tributa per verba: *Tibi dabo claves &c. & Pasce oves meas*: non consistit in illa dilectionis eminentia: Primatus enim Petri & auctoritas illi tunc data consistit in prærogativa jurisdictionis: cum ligare & solvere non pertineat ad eminentiam dilectionis, sed ad prærogativam jurisdictionis: etsi ergo detur, Majoritatem amoris fuisse in Petro præ Joanne, & cæteris Apostolis: attamen hæc majoritas tantum

tum fuisset causa motiva, cur Petrus constitutus fuerit à Christo Pastor cum potestate jurisdictionis etiam super reliquos Apostolos. Ergo.

Respondent Sectarii 4. ad Argumentum : Petro non fuisse à Christo alium supra reliquos Apostolos Primatum collatum, quam *Vocationis*, eo quod scilicet Petrus Matth. c. 4. v. 18. & 19. sit primo loco vocatus. Sed

Contra: In scripturis Sacris triplex tantum reperitur discipulorum Christi vocatio: atqui in nulla Petrus solus invenitur primo loco vocatus: ergo inane est assertum Sectariorum. min. prob. *Prima vocatio* fuit Joan. c. 1. v. 40. &c. Ubi Andreas Petrus, Philippus, & Nathanael fuerunt ad Christum admissi tanquam familiares auditores, non quidem ut constanter apud ipsum manerent, sed ut viderent, ubi habitaret, & audirent, quid doceret: & hæc admissio, quæ successive facta est, non fuit proprie vocatio: imo in ea Andream præcessisse Petrum excit. cap. Joan. 1. certum est. *Secunda vocatio* erat Matth. c. 4. v. 18. & 19. sed ut ex textu constat, ibi Petrus solus non fuit primo, sed simul tempore cum Andrea vocatus. & consequenter Primatus vocationis non debetur soli Petro. *Tertia vocatio* fuit Lucæ c. 6. ubi Discipuli Christi proprie vocati sunt ut Apostoli, & ex iis duodecim ad id munus simul sunt electi v. 13. & 14. Ergo si duodecim simul tempore sunt vocati & electi: Petrus non erat vocatione Primas, seu Primus. Et hinc Ss. Patres dicunt, omnes Apostolos fuisse pares in electione ad Apostolatam, sive ad munus *Missionis*: Apostolus enim idem est ac Missus v.g. ad prædicandum Evangelium &c. Unde Melchiades in epist. ad Episcopos Campaniæ scribit: *Licet cunctorum Apostolorum par esset electio, Beato tamen Petro concessum est, ut aliis præemineret*, scilicet præeminentia non vocationis, sed dignitatis, potestatis, & jurisdictionis in omnes fideles, etiam cæteros Apostolos. Ergo.

Pro-

Probatur Conclusio 2. Argumento desumpto ex illo Matth. c. 16. v. 15. 16. 17. 18. Dicit illis *Jesus*: vos autem quem me esse dicitis? Respondens *Simon Petrus* dixit: Tu es *Christus Filius Dei* vivi. Respondens autem *Jesus* dixit ei: *Beatus es Simon Bar-Jona*, quia caro & sanguis non revelavit tibi, sed *Pater meus*, qui in caelis est. Et ego dico tibi, quia tu es *Petrus* & super banc *Petram* ædificabo *Ecclesiam meam*, & portæ inferi non prævalebunt adversus eam. Ex his tale conficitur argumentum.

*Christus* hoc loco aperte solum *Petrum* alloquitur: sed alloquitur promittendo primatum potestatis, & jurisdictionis *Ecclesiæ*: ergo soli *Petro* hunc promisit & contulit præ cæteris *Apostolis*. Maj. claret ex textu, in quo multifarie exprimitur sola *Persona Petri*; 1. duplici nomine, *Simonis*, quod primævum erat nomen, & *Petri* seu *Petræ*, quod erat ex *Christi* impositione. 2. Per nomen *Patris*, quoderat *Joannes*, & per *Crasin* dicebatur *Jona*. 3. Laudatione confessionis editæ de *Christi* Divinitate. 4. Repetitione illius pronomini *Tibi*: revelavit tibi, dico tibi &c. 5. Causali, quia tu es *Petrus*. 6. Remuneratoria responsione ob confessionem fidei: Et ego dico tibi. 7. Ex particula conjunctiva analogiæ *Petri* & *Petræ*: tu es *Petrus*, & super banc *Petram* ædificabo *Ecclesiam meam*. Ergo major constat. min. etiam patet: nam id præstat fundamentum in ædificio, quod caput in corpore, Gubernator in navi, Dux in exercitu, Pastor in grege, Paterfamilias in domo; sed Paterfamilias in domo, Pastor in grege, Dux in exercitu, Gubernator in navi, caput in corpore primatum significant: ergo fundamentum *Ecclesiæ* Primatum ejusdem signat; ergo sicut *Christus*, quia dicitur *Ecclesiæ* fundamentum, ab omnibus ut caput primum & principale reveretur, ita etiam *Petrus*, qui a *Christo* fundamentum suæ *Ecclesiæ* nuncupatur, a *Christo* ut suus Vicarius, caput secundarium designatus est super omnes fideles. Et ita *Petrum* agnovit primitiva, & universa *Ecclesia*, ante-

antequam Hæresiarchæ Lutherus, Calvinus &c. scirent lallare: ut testis est S. P. August. in Psalmum contra partem Donati ita scribens: *Numerate Sacerdotes vel ab ipsa sede Petri, ipsa est Petra, quam non vincunt superbæ inferorum portæ.* S. Dionysius Epist. ad Timoth. Petrum vocat *Fundamentum Ecclesiarum.* Et S. Hieronymus lib. 2. contra Jovin. ait: *Inter duodecim unus eligitur, ut Capite constituto Schismatis tolleretur occasio.* Item in Dial. contra Luciferan. inquit: *Ecclesiæ salus à summi Sacerdotis dignitate pendet, cui si non exors quædam, & omnibus eminens detur potestas, tot in Ecclesia efficiuntur Schismata, quot Sacerdotes.* Ergo.

Respondent 1. Lutherus lib. de potest. Papæ. Calvinus lib. 4. Instit. c. 6. §. 4. Magdeburg. Centuria 1. lib. 1. & 2. Et libellus Smalkaldici conciliabuli de Primatu Papæ. Christum citata verba non ad Petrum solum, sed ad omnes Apostolos locutum esse, adeoque Petro à Christo nullum Primatum promissum esse. En quomodo contra claros & expressos Scripturæ terminos Hæretici effrontes insurgant. Hinc

Contra 1. Nullus ex Apostolis præter Petrum est Filius Joannis: sed Christus locutus est soli Filio Joannis: ergo soli Petro Christus est locutus, & non cæteris Apostolis.

Contra 2. Christus illi est locutus soli, cui cit. Matth. c. 16. v. 23. mox dixit: *Vade post me Satana:* ut luce clarius ex contextu innotescit; Atqui fatentibus ipsismet Hæreticis, soli Petro, non cæteris Apostolis hoc dixit: ergo & illud, adeoque soli Petro est locutus Christus illis verbis. Vel dicant Novatores, cur donum Dei faciant commune, malum vero singulare.

Contra 3. Quotiescunque Christus in Evangelio utitur particula *Tibi*, ita ad personam particularem restringit, ut ad alios nequeat ampliari; sic cum dicit: *Amen dico tibi, bodie mecum eris in paradyso; Remittuntur tibi peccata multa; Adulescens tibi dico surge.* Non enim per hoc omnes latrones venia donavit:



omnibus mulieribus peccata dimisit: omnibus adolescentibus defunctis vitam contulit. Ergo etiam dum Christus dixit: *Et ego dico tibi, tu es Petrus*: ad personam Petri ita restringit, ut ad alios Apostolos ampliari nequeat. Conseq. tenet à paritate: etenim nulla ratio est assignabilis, cur per particulam *Tibi* in omnibus aliis locis Christus restrictive locutus fuisset, & in hoc solo loco ampliative, quando Petro specialiter locutus est.

Contra 4. A contrario, quotiescunque Christus sua dona pluribus largitur, nunquam utitur vocabulo singulari: ut cum dicit: *Sedebitis & vos super sedes duodecim; Accipite; & manducate; hoc facite in meam commemorationem; dabo vobis os & sapientiam; pacem meam do vobis; Prædicate Evangelium omni creaturæ &c.* Ergo quotiescunque utitur vocabulo singulari, perperam pluribus accomodatur locutio.

Contra 5. Christus dixit Petro: *Super banc Petram ædificabo Ecclesiam meam*: quia Petrus dixerat Christo: *Tu es Christus Filius Dei vivi*: discernens Christum ab aliis Prophetis; ergo Christus, ut vices rependat, ita dicit Petro, *super banc Petram ædificabo Ecclesiam meam*: ut ab aliis discriminet Apostolis: nam confessio & promissio sunt correlativa.

Respondet 2. Calvinus lib. 4. Inst. c. 6. §. 6. Petram, de qua loquitur textus, non esse Petrum, sed Christum: adeoque Petro nullum promitti Primatum. Sed

Contra 1. Christus alloquens Petrum, Hebræa, seu Syra lingua locutus est eidem: ergo ita eum affatus est: *Tu es Petra, & super banc Petram ædificabo Ecclesiam meam*. Ergo Petra, de qua loquitur textus, est Petrus, & non Christus. ant. est certum, quia textus originalis Evangelii Hebraici & Syriaci loco Petrus habent Petra. Nam Cephas interpretatur Petra, saxum, rupes. Et ubi latine legitur Petrus, Græce legitur Petros, Hæbraice vero aut Syriace Cephas id est Petra. Hinc S. Hieronymus c. 2. ad Galatas ait: *Non quod aliud significat Petrus aliud Cephas:*

*Cepbas: sed quia quam nos Latine & Græce Petram vocamus, hanc Hebræi & Syri propter linguæ inter se viciniam Cepham nuncupant. Unde Matthæus in suo Evangelio, quod Syra vel Hebræa lingua scripsit, ut testatur S. Hier. in Catalogo scriptorum Ecclesiast. non habet, Tu es Petrus, sed Tu es Cepbas.*

Contra 2. Ideo juxta Calvinum, dum Christus ait: *super banc Petram*: appellavit supra se ipsum, *Petra autem erat Christus* 1. ad Corinth. c. 10. v. 4. quia appellat super eum, quem Petrus est confessus, atqui Petrus non est confessus Christum Petram, sed Filium Dei vivi: ergo non appellat supra Christum, sed super Petrum.

Contra 3. Pronomen *Hanc* utpote demonstrativum appellat supra *Petram*, de qua proxime & de præsentī facta est mentio: sed non est facta mentio alterius Petræ quam Petri: ergo appellat supra Petrum, & non super Christum.

Contra 4. Hæc causalis debet verificari: *quia tu es Petrus, & super banc Petram*: sed non verificatur, si de Christo dicatur pronomen *Hanc*: quæ enim hæc consequentia: *quia tu es Petrus, & super me, qui sum Petra, ædificabo Ecclesiam meam?* Nulla sane: ergo ideo illam causalem posuit, *quia tu es Petrus*, quia Petrum volebat constituere caput Ecclesiæ.

Contra 5. Dum Christus Petro dixit: *Tu es Petrus, & super banc Petram ædificabo Ecclesiam meam*: Petri confessionem remuneratam voluit, ut ait S. Hieron. *Testimonio de se Apostoli reddit vicem. Petrus dixerat: Tu es Christus Filius Dei vivi: mercedem recepit vera confessio: Tu es Petrus &c.* atqui si textus Christo accomodetur, nulla prorsus est Petri merces; ergo.

Contra 6. Dum Christus ait: *super banc Petram ædificabo Ecclesiam meam*: ut sentit D. Hieron. innuit ædificationem Ecclesiæ in futuro promissam, non in præsentī datam: atqui supra Christum Ecclesia jam fuit ædificata: etenim ex S. Greg. Hom. 19.

in Evang. Ecclesia incipit ab Abel: salvabantur namque iusti teste D. Th. 2. 2. q. 2. a 7. ad 3. per fidem venturi Mediatoris; & in lege gratiæ cæpit Ecclesia à Christi prædicatione, cum Christus jam vocaverit Apostolos, sibi que plures fecerit discipulos, baptisma in Jordane fuerit institutum, atque ab Apostolis ministratum: ergo dicta verba ad Christum nequaquam referri possunt.

Respondent 3. Lutherani. Illa verba *super banc Petram*: non Petrum, sed confessionem fidei, quam Petrus edidit, afficere; nam Christus immediate ante ea verba dilaudavit Petri confessionem, & statim tunc subjunxit: *quinimo vero ego dico tibi, tu es Petrus, & super banc eandem Petram ædificabo Ecclesiam meam.* Quorum itaque verborum sensus iste est: *Tu es Petrus, vir saxeus, stans super confessione tua velut super saxo, aut Petra firmissima: & super banc Petram ædificabo Ecclesiam meam, ut sit saxeæ, immobilis, & inexpugnabilis, quamdiu super hac confessione vel doctrina (quod ego sim Christus Filius Dei viventis) stabit velut supra Petra immobili.* Hic

Observandum: Fidem, seu confessionem Petri duobus modis posse considerari: uno modo *absolute*, id est, sine relatione ad Petrum; altero modo *cum relatione ad Petrum*. Si confessio fidei sumatur cum relatione ad Petrum: vel determinate pro Petri fide: concedendum est: nam & Catholice defendimus, ob meritum fidei in confessione Divinitatis Ecclesiæ Primatu Petrum donatum à Christo fuisse, & constitutum, ut in fide Christi fors alios nutantes confirmaret juxta illud Lucæ c. 22. v. 32. *Rogavi pro te Petre, ut non deficiat fides tua, & tu aliquando conversus confirma Fratres tuos.* Ergo primo modo confessionem Petri sumere videntur Adversarii Hæretici, ut ex eorum verbis & principiis palam est: unde contra eorum responsionem datam.

Con-

Contra est 1. Hæc verba: *super banc Petram*: ita accipienda sunt, ut habeant sensum liberum, & nexum connaturalem cum præcedentibus: atqui ut habeant sensum liberum & connaturalem cum præcedentibus, non de confessione fidei absolute spectata, sed de ipso S. Petro sunt accipienda: ergo. min. prob. ut habeant sensum liberum, & nexum connaturalem *hanc* debet referri ad *Petram*, quæ immediate ante nominata erat: atqui Petra, quæ immediate antea nominata erat, non fuit confessio fidei absolute, sed Petrus, ut textum legenti patet: ergo.

Contra 2. Fides est quidem Ecclesiæ forma, seu id, in quo conveniunt fideles in credendo, atque fundamentum justificationis: attamen non est caput, & ideo D. Paulus ad Ephes. c. 4. dicit: *Unum corpus, una fides, unum baptisma*: Ergo aliud est fides, aliud est corpus; & per consequens aliud à fide est caput mystici corporis. Ergo.

Contra 3. Mysticum Ecclesiæ corpus est visibilis hominum multitudo: ergo debet habere caput visibile; atqui fides non est visibilis: ergo.

Contra 4. Si fides esset caput, non diceret Christus *ædificabo*, in futuro, cum fides jam extiterit in pluribus: adeoque jam tunc temporis fuisset Petra; ergo.

Contra 5. Super illum Christus statuit ædificare Ecclesiam suam, cui promisit, quod velit dare claves Regni cælorum: hoc enim dictorum nexus clare innuit: atqui claves Regni cælorum Christus non confessioni fidei, seu fidei absolute spectatæ, sed ipsi Petro dare promisit, ut ipsimet fatentur Hæretici: Ergo.

Respondet denuo ad argumentum Calvinus lib. 4. instit. c. 6. n. 6. Quod licet omnes à Christo interrogati sint, solus Petrus respondit suo & fratrum nomine, adeoque non pro se

solo, sed pro omnibus: adeoque & pro se & pro omnibus idem accepit responsum & potestatem. Sed

Contra 1. Petrus suo & non cæterorum nomine, pro se & non pro cæteris confessus est Christum esse filium Dei vivi: ergo. ant. prob. Si Petrus cæterorum nomine fuisset Confessus, Christum esse Filium Dei vivi, id Confessus fuisset ex consensu, aut commissione cæterorum: atqui cæteri Apostoli in id non consenserunt, neque ullam commissionem Petro dederunt: ergo. maj. patet: nam quo pacto aliorum causam quis agere potest, nisi consensum, aut commissionem ab illis prius habeat. min. prob. ex citato textu Matth. c. 16. v. 17. *Beatus es Simon Bar-Jona, quia caro & sanguis non revelavit tibi, sed Pater meus, qui in cælis est*; Atqui si Apostoli hanc Petro Commissionem dedissent, aut in hanc confessionem consensissent, falso diceret Christus, *Caro & sanguis non revelavit tibi, sed Pater meus, qui in cælis est*; quia tunc non Pater, sed Caro & sanguis, id est, homines id Petro dixissent: adeoque ab hac revelatione alii Apostoli excludi à Christo non potuissent: Ergo Apostoli id Petro non commiserunt, neque in id consenserunt, cum id ignorarent: ergo Petrus pro se solo, & non nomine cæterorum respondit.

Contra 2. Quamvis Christus omnes Apostolos interrogaverit: *quem dicunt homines esse Filium hominis?* Matth. c. 16. Soli tamen Petro Pater cœlestis revelavit, eum esse Filium Dei vivi excludendo alios: ergo etiam soli Petro dedit responsum, & potestatem excludendo alios. ant. patet ex dictis in priori contra: & conf. prob. Soli Petro excludendo alios dixit Christus: *Vade post me Satana* Matth. cit. c. 16. v. 23. Ergo etiam soli Petro dedit Christus responsum, & potestatem: ergo.

Probatur Conclusio 3. argumento desumpto ex eodem Matth. c. 14. v. 19. *Et tibi dabo claves Regni cœlorum. Et quodcumque ligaveris super terram, erit ligatum & in cælis: & quodcumque*



*que solveris super terram, erit solutum & in cælis.* Ex quo textur tale conficitur argumentum.

Per Clavium collationem in Scriptura S. significatur suprema, saltem Vicaria potestas: sed Christus Petro contulit claves: ergo & ei contulit supremam, saltem Vicariam potestatem. min. claret ex textu. maj. autem ostenditur: Isaïæ c. 22. v. 22. describitur nobis inauguratio Eliacim filii Helciæ in summum Pontificem his verbis: *Et dabo clavem domus David super bumerum ejus, & aperiet, & non erit, qui claudat: & claudet, & non erit, qui aperiat.* Ubi pro clave plane intelligit Propheta potestatem dominativam; siquidem antecederet descriptio depositionem alterius Pontificis, in cujus locum subrogatur Eliazim, præmittit v. 21. *Et cingulo tuo confortabo eum, & potestatem tuam dabo in manu ejus, & erit quasi Pater habitantibus Hierusalem, & Domui Juda:* Item Eliacim Christum referebat, de quo dicitur Isaïæ c. 9. v. 6. *Factus est Principatus super bumerum ejus; Et Apoc. c. 3. ad explicandum Christi Imperium habemus v. 7. Hæc dicit Sanctus & verus, qui habet clavem David, qui aperit, & nemo claudit: claudit, & nemo aperit:* quæ sententia in idem redit cum illa relata ex Isaia c. 22. quam Paraphrastes Chaldaicus exponit: *Dominiium Domus David;* item Apocal. c. 1. v. 18. *Habeo claves mortis, & inferni.* Ergo cum dicta Petro: *Tibi dabo claves Regni cælorum: quodcumque solveris &c.* omnino hisque apud Isaïam figurate de Christo in persona Eliacim, & in Apocalypsi literaliter leguntur, consona sint, palam est, Petro Primatum Ecclesiæ collatum fuisse. Unde etiam in jure verbum *Dabo* translationem Domini importat, ut constat ex L. *Traditio.* ff. de re donata. Item L. *Deos.* ff. de Precario. Item L. *Tertio.* ff. de possessione.

Respondent ad hoc argumentum Sectarij 1. Nomine Petri in cit. textu intelligi omnes fideles, adeoque Ecclesiam, vel saltem omnes Apostolos; adeoque non Petro, sed toti Ecclesiæ,  
vel

vel saltem omnibus Apostolis à Christo promissas, ac collatas esse claves. Quamvis hæc responsio jam sat sit impugnata in præcedentibus: adhuc tamen

Contra est 1. Si nomine Petri in cit. textu intelligeretur tota Ecclesia, sensus illorum Christi verborum: *super banc Petram* &c. redderetur ridiculus, talis videlicet, *super Ecclesiam ædificabo Ecclesiam meam*: sed hoc dici nequit: ergo.

Contra 2. Quomodo nomine Petri, vel Petræ possunt intelligi omnes fideles, omnesve Apostoli? cum Christus, dum solum Simonem mutato nomine vocavit Cephæ, seu Petrum, in singulari dixerit: *Tu, Tibi, super banc, solveris* &c. Non vero *vobis, solveritis* &c. Ergo.

Contra 3. Si Christus ibi nomine Petri intellixisset omnes fideles, omnibus fidelibus promississet, & contulisset claves: adeoque omnes fideles se ipsos ligare, ac solvere possent: quod tamen dicendum non est; ergo.

Respondent ad hoc argumentum Sectarii cum Calvino lib. 4. Inst. c. 6. n. 3. dicendo 2. Nihil speciale præ aliis Apostolis datum esse Petro à Christo; nam etiam cæteris Apostolis dedit claves, dum dixit Matth. c. 18. v. 18. *Amen dico vobis, quæcumque alligaveritis super terram, erunt ligata & in cælo, & quæcumque solveritis super terram, erunt soluta & in cælo.* Quæ verba tam amplam & irrestrictam denotant potestatem, ac illa, quæ Christus dixit Matth. c. 16. ad Petrum. Item Joan. c. 20. v. 22. & 23. habetur de Apostolis: *Hæc cum dixisset, insufflavit: & dixit eis: Accipite Spiritum Sanctum: quorum remiseritis peccata, remittuntur eis, & quorum retinueritis, retenta sunt.* Ergo eandem potestatem à Christo receperunt cæteri Apostoli, quam Petrus. Sed

Contra 1. Quamvis Christus Matth. c. 18. iisdem prope terminis cæteris Apostolis loquatur: *quæcumque alligaveritis, quæcumque solveritis, &c.* sicut Petro Matth. c. 16. *Quæcumque ligaveris, quæ-*

*quæcunque solveris &c.* illa tamen locutio facta Matth. c. 18. cæ-  
 teris Apostolis restringitur per Christi verba ad sola peccata re-  
 mittenda, vel retinenda: nullo vero modo illa locutio Christi  
 facta Petro Matth. c. 16. Ergo Christus majorem, adeoque il-  
 limitatam & irrestrictam potestatem dedit Petro per verba *quod-*  
*cunque ligaveris, quodcunque solveris &c.* quam non dedit cæteris  
 Apostolis Matth. c. 18. per verba *quæcunque alligaveritis, quæ-*  
*cunque solveritis &c.* ant. prob. Illorum ligandi atque solven-  
 di Christus Matth. c. 18. Apostolis dedit potestatem, de quibus  
 in citato capite ante hunc versum, & post hunc versum imēdiate  
 tractat: atqui in citato capite ante & post hunc versum imēdiate  
 tractat de peccatis, correctione, emendatione, & retentione pec-  
 catorum proximi: ergo hæc verba Christi Math. c. 16. *quæcunque*  
*alligaveritis, quæcunq; solveritis &c.* dicta cæteris Apostolis restringunt  
 eorum potestatem ad sola peccata: nullo modo vero illa verba  
 Christi Matth. c. 16. *quodcunque ligaveris, quodcunque solveris &c.*  
 cum hæc ex nulla circumstantia, nullis verbis seu antecedenti-  
 bus, seu subsequētib; limitationi aut restrictioni exposita vi-  
 deatur, uti illa locutio Christi Matth. c. 18. cæteris Apostolis  
 facta: ergo potestas data à Christo Petro est illimitata, & irre-  
 stricta, extendens se ad omnes fideles, cæterosque Apostolos,  
 non ad sola peccata, sed etiam ad omnia alia controversa in  
 materia fidei & morum: potestas vero à Christo data Aposto-  
 lis est limitata & restricta extendens se ad sola peccata. Min.  
 vero prob. Christus in citato capite Matth. c. 18. tractat deter-  
 minate de corrigendis fratribus, & retinendis peccatis: nam v.  
 11. habetur: *venit enim Filius hominis salvare, quod perierat. v. 14.*  
*Sic non voluntas ante Patrem vestrum, qui in cælis est, ut pereat unus*  
*de pusillis istis. v. 15. Si autem peccaverit in te frater tuus, vade,*  
*corripe eum inter te, & ipsum solum. v. 16. Si autem te non audierit,*  
*adbibe tecum adhuc unum, vel duos. v. 17. Quod si non audierit eos,*  
*dic Ecclesiæ; si autem Ecclesiam non audierit, sit tibi sicut Ethnicus,*

E e

❧

Et publicanus. Et super hoc immediate sequitur data potestas Apostolis remittendi & retinendi fratrum peccata sequente v. 18. *Amen dico vobis, quaecunque alligaveritis super terram, erunt ligata Et in caelo: Et quaecunque solveritis super terram, erunt soluta ut in caelo:* id est ea, de quibus Christus ante locutus est. Et post hanc potestatem remittendi & retinendi peccata cæteris Apostolis datam v. 21. accedens Petrus ad eum dixit; Domine quoties in me peccabit frater meus, Et dimittam ei? usque septies? dicit illi Iesus, non dico septies, sed usque septuagies septies. Atqui hæ omnes locutiones Christi antecedentes & subsequentes potestatem Apostolis datam à Christo manifeste indicant non esse universalem, illimitatam, sed limitatam & restrictam, ad sola peccata: uti magis se Christus explicat Joan. c. 20. Ergo.

Contra 2. Christus præter hanc potestatem ligandi atque solvendi Petro datam Matth. c. 16. Insuper Claves regni cælorum ei dedit: super eum tanquam fundamentum ædificavit Ecclesiam suam, adversus quam nec portæ inferi prævalebunt; atqui fundamentum hoc, super quod principaliter Christus ædificavit Ecclesiam suam, nullibi nominat Christus cæteros Apostolos: nullibi iisdem Claves Regni cælorum specialiter legitur dedisse: ergo Christus Petro majorem ac universaliorē potestatem dedit, quam cæteris Apostolis.

Contra 3. Petrus seorsim sumptus accepit à Christo promissam suam potestatem: reliqui vero Apostoli simul non seorsim sumpti acceperunt suam à Christo potestatem: alias enim quilibet Apostolus seorsim sumptus habuisset super totam communitatem, adeoque super omnes suos coapostolos potestatem, sicut Petrus habuit super omnes: atqui consequens nequit admitti, alioquin Andr. fuisset superior Joānis, & Joānes Andreæ &c. Ergo.

Contra 4. Potestas Petri fuit *ordinaria*, & ad posteros suos successores transmittenda: cæterorum vero Apostolorum potestas fuit *extraordinaria*, ex privilegio, quæ cum ipsis cæteris Apo-

Apostolis è vita decedentibus expiravit, atque ad eorum successores non transit: ergo.

Contra 5. S. Hieronymus lib. 1. Cont. Jovin. c. 4. ait: *Super Petram fundatur Ecclesia, licet id ipsum in alio loco super omnes Apostolos fiat, & cuncti claves Regni cælorum accipiant: & ex æquo super eos Ecclesiæ fortitudo solidetur; tamen propterea inter duodecim unus eligitur, ut Capite constituto Schismatis tollatur occasio.* Ergo licet cuncti Apostoli sint fundamentum, cuncti claves accipiant, tamen inter omnes Petrus eligitur, ut sit caput, ut ipso capite constituto Schismatis tollatur occasio. Præterea D. Cyprianus lib. de simplicit. Prælat. scribit, post resurrectionem à Christo cunctis Apostolis æqualem datam esse potestatem, tamen ut unitatem manifestaret, unam Cathedram constituit, & unitatis ejusdem originem ab uno incipientem sua auctoritate disposuit. Hoc erant utique & Cæteri Apostoli, quod fuit Petrus, pari consortio præditi & honoris & potestatis, sed exordium ab unitate proficiscitur. Primatus Petro datur, ut una Christi Ecclesia, & Cathedra una monstretur - - - Qui Ecclesiæ renititur, ac resistit, qui Cathedram Petri, super quam fundata est Ecclesia, deserit, in Ecclesia se esse confidit? Ita habetur in Manutii & Morelli editione, licet aliter legatur in editione ab Erasmo impressa. Ergo S. Cyprianus unum designat; Petrum nempe, à quo post Christum unitas exorditur Ecclesiæ. Quid porro est, à Christo fuisse dispositum, Petrum unum illum esse, à quo Ecclesiæ incipiat origo, nisi quod Petrus unus ille sit, in quem tanquam in caput cuncti referantur: sicut Rex unus ille est, à quo regni unitas exorditur, quia Rex is est, in quem tanquam in caput omnes Regni subditi debent convenire. Hunc unum autem à D. Cypriano intellectum fuisse D. Petrum ejusque successores, evidentissime manifestat sui illius tractatus ratio. Scribebat tum contra Novatianum, à quo Ecclesiæ unitas discissa fuerat renuendo illum unum agnoscere, à quo ejus unitas incipiebat, dum Cornelium



respueret Romanum Episcopum D. Petri Successorem affirmare.

Probatur Conclusio 4. Juxta Calvinistas & Lutheranos à Sæculo V. vel VI. Ecclesia cœpit deficere; sed ante Sæculum V. Ecclesia fatebatur, Petrum esse fundamentalem Ecclesiæ Petram: siquidem illud Ambrosii canebat, *Hoc ipsa Petra Ecclesiæ canente culpam diluit*, ut refert S. P. Augustinus lib. 1. Retractat. c. 21. *Dixi in quodam loco de Apostolo Petro, quod in illo tanquam in Petra fundata sit Ecclesia, qui sensus cantatur etiam ore multorum in versibus Beatissimi Ambrosii, ubi de Gallo Gallinaceo ait: Hoc ipsa Petra Ecclesiæ canente culpam diluit.* In Synodo Ephesina actione 3. Philippus Presbyter sedis Apostolicæ Legatus ait: *Certum & notum omnibus esse, quod Beatissimus Petrus Præsul, & Caput Apostolorum, columna fidei Catholicæ Ecclesiæ fundamentum Regni claves accepit à Domino, & hujus Successor Papa Cælestinus misit nos.* Ergo.

Confirmatur ex Ss. Patribus latinis ab ipsis Adversariis maxima cum reverentia observandis. S. Cyprianus epist. ad S. Cornel. ita habet: *Ipsè Dominus à multis discipulorum suorum derelictus, nihil aliud dixit ad Apostolos, quam hæc pauca: nunquid & vos vultis abire? at Petrus, super quem Ecclesiam ædificavit, pro omnibus respondit: Domine ad quem ibimus? Et in lib. de unitate Ecclesiæ continuo Petrum nominat caput fontem, & radicem totius Ecclesiæ.* S. Optatus Episcopus Milevitanus, qui contra Parmenianum Episcopum Donatistam scribit, ita loquitur: *Negare non potes, in urbe Romana Catbedram Episcopalem primum Petro fuisse datam, qui in ea sedit, cum esset omnium Apostolorum Princeps, ut per hanc unicam Catbedram omnes servarent unitatem.* S. Hieronymus lib. 3. Comment in Matth. ad cap. 16. ait: *Secundum metaphoram Petræ recte dicitur ei: ædificabo Ecclesiam meam super te.* Item lib. 1. Cont. Jovin. S. P. Augustinus in Psal. Cont. partem Donati ait: *Numerate Sacerdotes vel ab ipsa Petri sede: ipsa est*

est Petra, quam non vincunt inferorum portæ. Iterum epist. 162. modo 43. In Romana Ecclesia semper Apostolicæ Cathedræ viguit Principatus. Jam ex Adversariis quæro, S. Cyprian. S. Optatus, S. Hieronym., & S. P. Augustinus vel erant Patres antiquæ doctrinæ, & orthodoxæ fidei, vel non? Hoc ultimum non dicunt, eo quod sponte sua fateantur, primorum Patrum & Sæculorum doctrinam fuisse puram & veram doctrinam Christi. Primum ergo asserere coguntur. Quod si hoc? fateantur quoque necesse est, aut S. Petrum fuisse Apostolorum Principem & caput Ecclesiæ à Christo constitutum: aut si hoc inficiantur, se non sentire Catholice, primorumque Sæculorum & Patrum doctrinam. Ergo.

### *Adversariorum Objectiones.*

I. **I**N Ecclesia non est aliud caput quam Christus: ergo Petrus non est caput Ecclesiæ à Christo constitutus, ant. p. Paulus ad Eph. c. 4. v. 15. & 16. Christum vocat caput, & Ecclesiam corpus. Item ad Rom. c. 12. v. 5. inquit: *Multi unum Corpus sumus in Christo; singuli autem alter alterius membra*; atqui si omnes fideles sunt membra; ergo nullus præter Christum est caput: ergo.

II. Christus est sponsus Ecclesiæ: sed sponsus non patitur Vicarium etiam subordinatum: ergo nec Christus patitur Vicarium etiam subordinatum.

III. Si Ecclesia præter caput quod est Christus, adhuc aliud haberet caput nempe Petrum, Ecclesia duo haberet capita: sed hoc dici nequit, alias esset monstrosa, & biceps ergo.

IV. Caput & Corpus sunt correlativa: ergo si Petrus ut Vicarius Christi posset vocari caput Ecclesiæ, Ecclesia posset appellari Corpus Petri: atqui hoc dici nequit, quia Ecclesia dicitur Corpus Christi: ergo.

V. Christus in Scripturis Psalm. 109. v. 4. Item ad Hebræ. c. 7. v. 17. vocatur Pontifex *in æternum secundum ordinem Melchisedech* : ergo præter Christum non datur alius Pontifex, seu caput Ecclesiæ etiam secundarium.

VI. Petrus, qui dicitur juxta Pontificios, caput Ecclesiæ, obiit : ergo jam desit caput Ecclesiæ.

VII. Spiritus Sanctus, quia semper astitit & assistit Ecclesiæ, ne erret, semper fuit, & est Vicarius Christi : ergo Petrus, ejusque Successores non sunt Vicarii Christi.

VIII. Spiritus Sanctus in Scripturis dicitur missus, ut esset loco Christi in militante Ecclesia, & hanc gubernaret vices gerendo Christi : nam Joan. c. 14. v. 26. ait Christus : *Paracletus autem Spiritus S. quem mittet Pater in nomine meo, ille vos docebit omnia, & suggeret vobis cuncta, quæcunque dixerò vobis.* Hic notanda sunt verba *in nomine meo* : quasi diceret : quem mittet Pater meum Vicarium. Item Joan. c. 16. v. 7. inquit Christus : *si non abiero, Paracletus non veniet ad vos, si autem abiero, mittam eum ad vos.* Ergo.

IX. Regimen Ecclesiæ est penes Episcopos, ceu Optimates Ecclesiasticos : ergo non penes solum Petrum ejusque Successores. ant. prob. Joan. c. 20. v. 21. Christus ait ad Apostolos : *sicut misit me Pater, & ego mitto vos* : ut sitis mei delegati juxta id Pauli 2. Corinth. c. 5. v. 20. *Pro Christo legatione fungimur.* Sed Episcopi sunt successores Apostolorum. Ergo.

X. Actor. c. 5. habetur v. 6. *Convenerunt Apostoli & Seniores videre de verbo hoc* : ad primam, quæ in Ecclesia erat orta, controversiam de legalibus observandis definiendam à communi conventu Apostolorum, & Seniorum : ergo.

XI. Actor. c. 20. v. 28. Paulus dicit : *Attendite vobis, & universo gregi, in quo vos Spiritus Sanctus posuit Episcopos, regere Ecclesiam Dei* ; ergo.

XII.

XII. Juxta S. Hieronymum in cap. 1. ad Titum : Ecclesiæ olim gubernabantur à Presbyteris ; ergo non erat Primas seu caput.

XIII. Olim in Ecclesiis illud, quod Lucæ c. 22. v. 25. Christus mandavit : *Reges gentium dominantur eorum &c. vos autem non sic* : observabatur : ergo olim non fuit certus dominans.

XIV. Omnes Apostoli fuerunt à Christo constituti æquales in potestate : ergo Christus nullum agnovit majorem inter illos. ant. prob. S. P. August. de Agone Christiano c. 30. scribit. *Non enim sine causa inter Apostolos omnes hujus Ecclesiæ Catholicæ personam sustinet Petrus ; huic enim Ecclesiæ claves Regni cælorum datæ sunt, cum Petro datæ sunt ; & quod ei dicitur, ad omnes dicitur : amas me, pascere oves meas ; ergo ea, quæ committebantur Petro, omnibus Apostolis committebantur ; adeoque omnes erant in potestate æquales.*

XV. D. Cyprianus lib. de unitate Eccles. ita scribit : *Hoc erant utique & cæteri Apostoli, quod fuit Petrus, pari consortio præditi & honoris, & potestatis, sed exordium ab unitate profisciscitur, ut Ecclesia una monstretur. Ergo.*

XVI. S. Ambrosius cap. 6. Apoc. explicans illud Gen : c. 4. v. 4. *Abel obtulit de primogenitis* ita ait : *primogenita gregis sunt Apostoli, quos primos genuit Ecclesia, ex quibus Ecclesia nata est. Atqui si Apostoli sunt primogeniti, sunt æquales ; ergo.*

XVII. D. Hieronymus lib. 1. Cont. Jovinian. circa medium dicit : *Ex æquo super eos (Apostolos) fortitudo solidatur. Item Epist. 28. ad Damasum eandem Apostolorum æqualitatem agnoscit dicens : ut, qui Apostolos bonore sequeris, sequaris & merito. Ergo.*

XVIII. Ex Præfatione Missæ in festis Apostolorum habetur : *ut iisdem Rectoribus. (Ecclesia) gubernetur, quos operis tui Vicarios eidem contulisti, præesse Pastores. Ergo.*

XIX.

XIX. Reliqui Apostoli Actor. c. 8. v. 14. miserunt Petrum cum Joanne in Samariam. Item Actor. c. 11. Accusatus Petrus, quod ad gentes ingressus sit, respondet, & reddit rationem: ergo Petrus non est major cæteris Apostolis, nec primatum super illos habet.

XX. Petrus fuit reprehensus à Paulo ad Galat. c. 2. v. 11. dicente: *In faciem ei restiti, quia reprebensibilis erat.* Ergo.

XXI. S. Ambrosius in citatum c. 2. ad Galat. scribens, dicit de Paulo: *restitit ei (Petro) ut par:* Ergo Petrus non erat superior Pauli.

XXII. S. Paulus in cit. c. 2. ad Galat. v. 5. scribit: *Quibus neque ad horam cessimus subjectione:* ergo.

XXIII. S. Paulus in eodem c. 2. ad Galat. v. 6. loquens de primariis veris Apostolis, Petro, Joanne, & Jacobo ait: *Mibi, qui videbantur esse aliquid, nihil contulerunt:* ergo nec Paulus veris Apostolis celsisset subjectione. Hinc Gloria Augustini ita habet: *qui videbantur esse aliquid, scilicet Petrus, & qui cum Domino fuerant, nihil addiderunt mibi; in quo apparet quod illis inferior non ego sum, qui ita à Domino perfectus sum, ut nihil esset, quod in collatione perfectionis adderet.*

XXIV. S. Paulus cit. c. 2. ad Galat. v. 7. ait: *Cum vidissent, quod creditum est mibi Evangelium præputii, sicut & Petro circumcisionis; qui enim operatus est Petro in Apostolatum circumcisionis; operatus est & mibi inter gentes:* ergo Paulus à Christo eandem quam Petrus accepit potestatem. Conseq. prob. Ex hoc textu eruitur, quod Petrus solum fuerit *Apostolus circumcisionis*, seu Judæorum, & Paulus *Apostolus gentium*: sed si sic, ergo Petrus non fuit Apostolorum Primas, nec universalis Pastor Ecclesiæ. Ergo.

XXV. Plures è SS. Patribus asserunt, Petrum & Paulum fuisse æquales; imo aliqui quoque dicunt, Paulum fuisse majorem: ergo.

XXVI.



XXVI. Origenes lib. 1. Contra celsum. appellat Paulum fundatorem Ecclesiarum post Christum præcipuum : Ergo eruitur Paulum fuisse majorem Petro.

XXVII. S. Ambrosius lib. de Spiritu S. in fine ait : *Una gratia fulgebat in bis , quos Spiritus unus elegerat. Neque Paulus inferior Petro , quamvis ille Ecclesiæ fundamentum , & hic sapiens Architectus , sciens vestigia credentium fundare populorum. Neque Paulus indignus Apostolorum collegio , cum primo facile conferendus , & nulli secundus. Ergo.*

XXVIII. Paulus, ut expresse fatetur ipsemet ad Gal. c. 1. v. 12. Suum Evangelium & Apostolatum non accepit à Petro , sed immediate à Christo : ergo Paulus non fuit sub jurisdictione Petri ; ergo.

XXIX. S. Paulus 2. ad Corinth. c. 11. v. 28. ait : *Instantia mea quotidiana sollicitudo omnium Ecclesiarum.* Ergo Paulus est Pastor universalis, sicut est Petrus.

XXX. S. Paulus fuit Urbis Romæ Episcopus : atqui juxta Pontificios Urbis Romæ Episcopus est totius orbis summus Pastor : ergo. maj. prob. Epiphanius Hæres. 27. ait : *In Roma fuerunt Primi Petrus & Paulus Apostoli iisdem ac Episcopi.* Et infra : *Episcoporum in Roma successio hanc consequentiam habuit : Petrus , & Paulus , Linus , Cletus , Clemens &c.* Item Leo in serm. 1. de SS. Petro & Paulo ait : *Isti sunt Patres tui , verique Pastores.* Ergo.

XXXI. SS. Patres unam faciunt Petro & Paulo sedem : atqui unam sedem facit Episcopalis dignitas , non unitas laboris : ergo Petrus & Paulus ponuntur inter Episcopos Romanos jure Regiminis , non laboris, maj. prob. Adrianus II. Epist. 11. ad Basilium Augustum ait : *Precamur , ut eos ob amorem præcipuorum Apostolorum Petri & Pauli , à quorum sede mittuntur , benigne suscipias.* Item in alia Epistola ad eundem inquit : *Principum Apostolorum , à quorum sede remittitur.* Et ad concilium loquitur : *Pro veneratione Apostolorum , pro privilegiis defendendæ sedis ipsorum.*

S. Petrus Damianus opusc. 31. dicit: *Romana Ecclesia sedes est Apostolorum, utique Petri & Pauli. Ergo.*

XXXII. S. Paulus refertur Petro dignitate æqualis: ergo. ant. prob. S. Chrysost. in c. 2. ad Galat. ait: *Non se comparat Paulus aliis Apostolis, sed eorum capiti, ostendens eandem dignitatem utrique collatam fuisse.* S. Chrysologus serm. 6. in Psal. 99. Petrum Pauli collegam vocat. S. Leo serm. 1. de SS. Apost. ait. Paulus est confors gloriæ Petri. Et S. Gregorius lib. 3. Dialog. c. 12. inquit: *Paulus Apostolus Petro Apostolorum in Principatu Apostolico Frater.* Ergo.

XXXIII. Paulus non est minor Petro: sed particula negativa, nempe non distribuit omnia, quæ post se invenit: ergo in Paulo respectu Petri negatur minoritas quoad omnia. maj. prob. S. Ambrosius lib. 2. de Spiritu S. ait: *Nec Paulus inferior Petro; cum primo facile conferendus, & nulli secundus: nam qui se imparem nescit, facit æqualem.* Theodor. in c. 11. 2. ad Corinth. inquit: *Paulus non erat minor Petro.* S. Hieron. in c. 2. ad Galat. tractans illud Pauli, contulisse scilicet Evangelium cum Petro & Jacobo & Joanne, ait: *Inter conferentes æqualitas est.* Ergo.

XXXIV. Paulus totum orbem, universasque rexit Ecclesias affirmante S. Chrysostomo Hom. 18. in Epist. ad Roman. his verbis: *Christus S. Paulo omnem Evangelii prædicationem, omnia universa mundi negotia, mysteria sua, omnem denique Ecclesiæ administrationem concedit.* Item S. Petro Damiani opusc. 31. c. 4. his verbis: *Quandam, si dici liceat, cum Christo similitudinem Paulus tenet, dum non uni duntaxat Ecclesiæ, sed omnibus præsidet.* Et infra, *Plane ipse toto terrarum orbe universalem fundavit Ecclesiam.* Ergo.

XXXV. Paulus ita gubernavit orbem universum, ut in omnibus primatum habuerit, ut dicit S. Ambrosius in c. 2. ad Galat. cujus verba sunt: *Gratiam Primatus sibi soli (Paulo) vendicat concessam à Deo, sicut & soli Petro concessa est inter Apostolos:* ergo.

XXXVI.

XXXVI. Paulus æque est Petra, super quam uniuersa fundatur Ecclesia, sicut Petrus: nam Oecumenica VIII. Synodus ad Adrianum II. scribens habet: *Christus olim quidem illustrem, & præcipuam operatus est vestram magnam civitatem Romanam per eos sanctos lapides, qui ab oriente ad eam devoluti sunt, Petrum ajo & Paulum, eximiam ac principalem Apostolorum summitatem.* Hinc sicut Petro mutavit nomen, ita & Paulo, quod factum asserit Chrysostomus Hom. 1. in Epist. ad Rom. his verbis: *Ut eandem, quam habebat Petrus caput Apostolorum super eos prærogativam, & ipse haberet.* Ergo.

XXXVII. Paulus æque ac Petrus claves accepit, dicente Chrysostomo Hom. 7. in epist. ad Ephes. *Petrum & Paulum ipsas cæli & terræ claves hereditate accepisse.* Quod & S. Gregor. in orat. vigil. Apostol. Petri & Pauli indicat. Item S. Laurentius Justin. serm. de Apost. Ergo.

XXXVIII. Romani Pontifices dicuntur Vicarii Petri & Pauli, ut docet Adrianus I. ad Constant. & Helenam Imp. Epist. *Papæ Petri & Pauli Vicarii, eorumque throni successores dicuntur.* Imo Patres Petrum in simul & Paulum vocant Principes Apostolorum, duos duces, duo magna Ecclesiæ luminaria, duas bases Ecclesiæ, duo culmina Apostolorum, &c. Item Romani Pontifices in maioribus causis acta exercent auctoritate Petri & Pauli. Item in picturis Paulus à dextris & Petrus à sinistris depictus videtur. Ergo Paulus eadem cum Petro pollet dignitate & potestate.

XXXIX. Petrus & Paulus fuerunt vera Ecclesiæ capita, ut tradit S. Cyrilus Jerosolim. catechesi 6. Illuminatorum: *Duo Capita Ecclesiæ Petrus & Paulus.* Item S. Nazianzenus orat. 1. *Primus post Christum Paulus.* Item ut apud Clementem lib. 7. Constit. c. 46. legitur, Linus Claudiae filius Romanorum Episcopus à Paulo est constitutus. Ergo.

XL. S. Paulus 1. ad Corinth. c. 3. v. 11. dicit: *Fundamentum aliud nemo potest ponere, præter id, quod positum est Christus Jesus.*

*Iesus.* Ergo quando Christus dixit : *super banc Petram ædificabo Ecclesiam meam*, de se ipso locutus est Ergo Christus non Petrus Ecclesiæ primatum habet.

XLI. S. P. Augustinus serm. 13. de verb. Dom. & tractatu ult. in Joan. aperte fatetur, Petram hanc esse Christum his verbis: *Super banc Petram, quam, confessus es, ædificabo Ecclesiam meam.* Ergo lii Petra non potest accipi pro Petro.

XLII. Etiam alii Apostoli dicuntur Ecclesiæ fundamentum, sic ad Ephes. c. 2. v. 20. habetur: *super ædificati super fundamentum Apostolorum & Prophetarum.* Et Apocal. c. 21. v. 14. *Et murus civitatis habens fundamenta duodecim, & in ipsis duodecim nomina duodecim Apostolorum Agni.* Et Psal. 86. v. 1. *Fundamenta ejus in montibus sanctis*, id est in Apostolis & Prophetis interprete S. Hieronymo lib. 1. Cont. Jovin. c. 14. Ergo.

XLIII. Non bene infertur: supra Petrum est ædificata Ecclesia: ergo Petrus est Rector ejusdem: sicut nulla est hæc illatio: supra fidem est ædificata Ecclesia: ergo fides est Rector Ecclesiæ. Ergo. Ita argumentatur Lutherus.

XLIV. Illi dictum est, *Tibi dabo claves Regni cælorum*, qui Divinitatem Filii est confessus, *Tu es Christus Filius Dei vivi*: Sed Petrus nomine omnium confessus est Divinitatem: ergo omnibus promisit Christus claves. min. prob. Responsio interrogationi correspondet: sed omnes Apostoli fuerunt interrogati: *Vos autem quem me esse dicitis?* ergo omnium fuit responsio: ergo.

XLV. Quod narrat Matthæus c. 16. hoc describit Joannes c. 6. Atqui Joannes Petrum omnium nomine respondisse declarat v. 70. *Et nos credimus, & cognovimus, quia tu es Christus Filius Dei*: ergo etiam apud Matthæum nomine omnium Petrus respondit.

XLVI. Si Petri Confessio non fuisset communis, expectanda fuisset aliorum responsio, cum fuerit interrogatio communis;

nis; sicut quia Matth. c. 16. v. 33. & seqq. omnibus prædixit scandalizandos, & Petrus in persona propria respondit: *ego nunquam Scandalizabor*: subditur: *Similiter & omnes discipuli dixerunt*: cum ergo nulla aliorum confessio habeatur, palam est, unum Petrum pro omnibus confessum esse: ergo.

XLVII. Si Petrus omnium nomine non fuisset confessus, Christus non dixisset omnibus, ne ipsum manifestarent; atqui tunc præcepit discipulis suis, ut nemini dicerent, quia ipse esset *Jesus Christus*: ergo signum est nomine omnium respondisse.

XLVIII. Christus Marci c. 13. v. 37. ait: *quod autem vobis dico, omnibus dico*; ergo clare infertur, quæ uni Apostolo dicta sunt, fore omnibus dicta: ergo cum dixit Petro: *Tibi dabo claves*: omnibus dixit: ergo & confessio Petri erat omnium.

XLIX. Ss. Patres Chrysostomus, Hieronymus in dictum locum, & S. P. Augustinus Serm. 13. de verb. Dom. Lyranus, Glossa ordinaria, & interlinearis affirmant, Petrum fore omnium nomine locutum: ergo & retributio ipsi facta ad omnes extenditur. Ergo.

L. Christus claves promisit Petro tanquam figuræ Ecclesiæ: ergo Petro non promisit Primatum. ant prob. Christus Petro promisit claves, non quidem ut est filius Jonæ, sed ut cælestis Patris auditor est; *Beatus es Simon Bar-jona, quia caro & sanguis non revelavit tibi, sed Pater meus*; atqui de nullo certo homine nobis innotescit clare, ipsum esse Cælestis Patris auditorem: econtra compertissimum est, Ecclesiam Patrem revelantem audire: ergo.

LI. Si Christus Petro ut singulari personæ claves contulisset, post commendationem non eum à se repulisset; sicut enim Ecclesiam non repellit, ita neque caput: atqui Petrum immediate repulit Matth. c. 16. v. 23. *Vade post me Satana*: ergo non contulit Petro claves, nisi ut auditori, Patris Ecclesiæque typo.



LII. Habens Claves debet sapere , quæ Dei sunt , permanenter , quia claves continent doctrinam fidei , & adversus eam non prævalent portæ inferi : atqui Petrus non sapit permanenter , quæ Dei sunt , cum ei Christus dixerit , *quia non sapis ea , quæ Dei sunt* : & paulo post ter Dominum negavit : ergo Petrus non accepit claves in persona sua , sed ut personam Ecclesiæ repræsentans.

LIII. Illi claves contulit Christus , à quo illas accipit Successor Petri : sed ille accipit ab Ecclesia : ergo claves Christus dedit Ecclesiæ & non Petro in propria persona , sed ut figura Ecclesiæ. min. prob. Successor Petri ; dum inauguratur , vel habet claves vel non ? Si habet , ergo ante electionem est Pontifex : si non habet , ergo ab alio accipit : sed non est , qui dare possit nisi Ecclesia : ergo ab ea accipit.

LIV. Vel sede vacante Ecclesia habet claves vel non ? si habet , ergo Ecclesiæ datæ sunt , & ab Ecclesia recipit Papæ. Si non habet , ergo est fallibilis , & tunc temporis portæ inferi possunt adversus eam prævalere.

LV. Hoc argumentum valet : *quia Abraham credidit , reputatum est illi ad justitiam* ad Rom. c. 4. v. 3. ergo omni credenti fides reputatur ad justitiam ; ergo etiam valebit hoc argumentum ; quia Petrus confessus est Christum , & Patrem audivit , recepit claves : ergo omnis Christum confitens , & Patrem audiens easdem recipit ; atqui omnis credens est Ecclesia , non enim pro comperto est , num hic vel ille certo credat : ergo.

LVI. S. P. Augustinus Tract. 124. in Joan. dicit : *Sed quando ei dictum est , tibi dabo claves Regni cælorum , universam significabat Ecclesiam.* Quod pariter docet Tract. 50. Item lib. 1. de doctr. Christ. c. 18. Item lib. de Agone Christiano c. 30. Item in Psal. 108. ubi ita Petrum vult Ecclesiæ figuram referre , sicut Judam impiorum Personam gerere. Ergo.

LVII.

LVII. Si Christus Petro primatum contulisset, Apostoli inde non dubitassent, quis inter eos esset major: quod enim Petro jam dixerat Christus, ipsimet omnes Apostoli audierant; atqui Apostoli dubitarunt, & ideo dicitur Lucæ c. 22. v. 24. *Facta est contentio inter eos, quis eorum videretur esse major?* Ergo. Præterea ut contentionem dirimeret Christus, facile respondere potuisset, Petrum esse majorem: & tamen sic non respondit, sed eos increpavit subdicens: *qui major est in vobis, fiat sicut minor.* Ergo.

LVIII. Claves à Christo datæ nil aliud denotant, quam potestatem ligandi & solvendi; solvere & ligare autem nihil aliud est, quam potestas annuntiandi Evangelium, & secundum illud docendi, remissionem peccatorum esse beneficium Dei, retentionem vero esse pœnam; cum ergo liceat omnibus Evangelium enuntiare, omnes remittere peccata possunt, adeoque omnes esse Sacerdotes: etiam claves omnibus sunt communes. Ita argumentantur Novatores Calvini. Quam doctrinam suam falsam confirmare putant ex illo Pauli 2. ad Corinth. c. 5. v. 15. *Posuit in nobis verbum reconciliationis.* Pro Christo ergo legatione fungimur, tanquam Deo exhortandæ per nos. *Obsecramus pro Christo, reconciliamini Deo:* ergo.

LIX. Actor. c. 10. dubitat Petrus: an liceat evangelizare gentibus? v. 17. *Et dum intra se hæsitaret Petrus: hæsitatio in ipso exorta erat, quia illis evangelizaverat;* hinc. c. 11. v. 3. reprehenditur: *quare introisti ad viros præputium habentes?* Ergo ad ejus ovile non pertinebant gentiles.

LX. Universalis Ecclesia ex Agnis & hædis, ex hircis & ovibus, ex grano & palea coalescit; atqui Petro hæc omnia non fuerunt commendata: solum enim dictum est ei, *pasce oves meas:* oves porro soli sunt electi juxta illud Joan. c. 10. v. 27. *Oves meæ vocem meam audiunt, & ego cognosco eas, & sequuntur me; & ego vitam æternam do eis.* Ergo Christus Petro non commendavit universam Ecclesiam.

LXI.

LXI. Petro, quia Christum diligebat, dictum fuit, *Pasce oves meas*: ergo si ex hoc constitutus fuit universalis Ecclesiae Pastor, jam palam sit, in Petro cessante charitate pastorem quoque cessasse dignitatem; atqui Petrus pluries à charitate ex-cidit: ergo etiam à Primatu. min. constat ex trina negatione Petri.

LXII. Non constat, Petrum in reliquos Apostolos ullam exercuisse potestatem: ergo Petrus non fuit Apostolorum Pri-mas: quia alioquin solus Petrus Mathiam instituisset Aposto-lum, & non omnes Apostoli pro ista electione dedissent sortes, ut habetur Actor. c. 1. v. ult. Item alias non omnes duode-cim Actor. c. 6. elegerunt septem Diaconos. Alioquin à solo Petro, & non in pleno Concilio, & ab omnibus Actor. c. 15. fuisset decisa controversia de legalibus adeo, ut Jacobus v. 19. dixerit: *ego judico*. Ergo.

LXIII. Christus omnes Apostolos eodem modo allocu-tus est Matth. c. 18. v. 18: *Quaecunque alligaveritis super terram, erunt ligata & in caelo, & quaecunque solveritis super terram erunt soluta & in caelo*; sicut allocutus est Petrum, Matth. c. 16. v. 19. *Quodcumque ligaveris super terram, erit ligatum & in caelis, & quodcumque solveris super terram, erit solutum & in caelis*. ipsi ter-mini utrobique non discriminantur: ergo omnes Apostoli cum Petro aequaliter acceperunt claves Regni caelorum.

## SOLUTIONES AD OBJECTA.

**A**D I. Neg. ant. ad prob. conc. ant. neg. conseq. Quamvis enim Christus dicatur caput Ecclesiae Principale, prima-rium, & nunc invisibile, quodque mysticis membris interius influat gratiam, nihilominus tamen admitti debet adhuc aliud Ecclesiae caput, scilicet ministeriale, secundarium, subordina-tum, & visibile, quodque Ecclesiam solum exterius gubernet:  
&

& tale est D. Petrus, post ipsum Pontifices Successores. Omnes etiam fideles, etiam Petrus Vicarius Christi qua fidelis cum reliquis fidelibus constituit unum corpus mysticum, & à Christo recipit influxum fidei, & gratiæ, & sic spectatus Petrus non est caput, sed membrum Ecclesiæ; quoad gubernationem autem externam, & visibilem, Petrus est caput gerens vices Christi in externa Ecclesiæ gubernatione, adeoque Christus est caput Ecclesiæ primum, & nunc invisibile, Petrus vero est caput Ecclesiæ secundarium, ministeriale, visibile, ac Christo Ecclesiam invisibiliter regenti subordinatum.

Ad II. Conc. maj. dist. min. in physicis desponsationibus, conc. min. in moralibus neg. min. & consequ. sic corpus mysticum, & morale v. g. Regnum, potest habere duo capita mystica, unum primum & principale, scilicet Regem: & alterum secundarium, ministeriale, & subordinatum, scilicet Pro-Regem. Ergo etiam

Ad III. Dist. maj. Ecclesia duo haberet capita diversi ordinis & dignitatis, unum principale & invisibile, alterum secundarium, subordinatum, & visibile, conc. maj. duo haberet capita ejusdem ordinis & dignitatis, neg. maj. & sic dist. min. neg. consequ. Solutio ex dictis patet.

Ad IV. Dist. ant. Caput primum & corpus sunt correlativa, seu possunt ad se invicem dici, Conc. ant. caput secundarium & corpus sunt necessario correlativa, neg. ant. Ecclesia ergo dicitur non corpus Petri, sed Christi: sicut Regnum non dicitur Vicarii, sive Pro-Regis esse, sed Regis solum.

Ad V. Neg. consequ. Nam Apostolus cit. loco ideo solum addidit *in æternum*, ut ostenderet differentiam inter Sacerdotem seu Pontificem veteris, & inter Sacerdotem seu Pontificem novi testamenti; quæ differentia pro præsentis casu duplex est: 1. quod Pontifex veteris testamenti fuerit mortalis; Christus vero juxta Apostolum ad Rom. c. 6. *jam non moritur, mors illi ultra non dominabitur*, sed manet in æternum. 2. Quod Pon-

tifex veteris testamenti, dum moriebatur, indiguerit successore; Christus vero quia amplius non moritur, non indiget successore; nec ullus Catholicorum unquam dicit, quod Petrus fuerit, aut Papa sit successor Christi, sed Vicarius Christi: Vicarius autem distinguitur à Successore, quod hic alteri defuncto succedat cum pari potestate: Vicarius autem non habeat parem cum eo, cujus est Vicarius, potestatem, cum Vicarii potestas sit delegata, non principalis. Et instatur contra Novatores: Christus dicitur Sacerdos in æternum: ergo in Ecclesia non datur alius Sacerdos præter Christum? quod certo Novatores non admittunt. Ergo etiam.

Ad VI. Neg. conseq. Nam obiit & Christus: at hic & Petrus vivunt in Romanis Pontificibus, qui sunt Successores Petri, & Vicarii Christi.

Ad VII. Neg. ant. quod sapit hæresim Macedonii: nam Vicarius proprie talis est inferior, ac minor eo, cujus est Vicarius: eo quod Vicarii potestas sit delegata, adeoque minor potestate principalis. Ob quam rationem Calvinistæ errorem Calvini sui Magistri, qui, Christum esse Vicarium Dei Patris, scripsit, palliaturi, id scriptum interpretantur de Christo qua homine, qua ratione est minor Patre. Si ergo Spiritus S. esset Vicarius Christi esset minor Christo: ergo non foret Deus, quod est aperte Hæresis Macedonii.

Ad VIII. Spiritum S. quidem fuisse missum, sed non ut Vicarium Christi, neque ut vices illius gereret, sed ut tanquam Magister principalis & primarius Apostolos doceret ea, quæ Christus illis de sua passione, resurrectione aliisque mysteriis dixerat, & ipsi non plene intellexerant, ut habetur Lucæ. 18. v. 34. Ad additum *in nomine meo*: dico, illam expositionem esse falsam: sed illud *in nomine meo* additum est ideo, ut intelligeretur, quod Spiritus S. missus sit in gloriam nominis Christi secundum id, quod ipse Salvator Joan. c. 16. v. 14. dicit: *Ille*  
me



*me glorificabit, quia de meo accipiet, & annuntiabit vobis. Vel ideo, ut intelligeretur, Christum nobis Spiritus S. missionem promississe, ut ita illud in nomine meo idem sit, ac per merita mea. Primum docet Theophylactus: alterum Toletus cum aliis.*

Ad IX. Quamvis Christus omnes Apostolos miserit ut suos delegatos, Petrum tamen cæteris prætulit, & eorum Pastorem, ac caput constituit. unde illud *sicut* est accipiendum in sensu accomodo: si enim faceret omnimodam paritatem, sequeretur, quod Apostoli sint missi ad redimendum genus humanum, & ad patiendum & satisfaciendum pro peccatis hominum, sicut Christus ad eum finem missus est à Patre.

Ad X. Citatum locum nequaquam obesse, quominus supremus Princeps non possit alios sibi subordinatos adhibere in consilium, & sic Comuni sensu aliquid decernere. Imo cit. loc. dicitur: *Surgens Petrus dixit ad eos: viri fratres, vos scitis &c.* dicitur *surgens Petrus*, ut ejus super cæteros eminentia denotetur. Audiatur desuper S. Hieron. epist. 89. quæ est 11. inter Epistolas S. P. Augustini. c. 3. dicens: *Surgens quasi Princeps Apostolorum, & Primas Ecclesiæ, qui auctoritate disceptatione in utramque partem, primus quasi Judex definivit, cujus sententiam mox secutus est S. Jacobus* (etli hic foret Episcopus Jerolymitanus) *& reliqui omnes.* Nec obstat, quod Petrus in publico Apostolorum conventu mentem suam, & sententiam dixerit; id enim sat usitatum est in Regnis & Imperiis, ubi Rex aut Imperator aliquid statuit in publicis comitiis.

Ad XI. Supremum Episcopum & Principem posse habere alios Episcopos sibi subordinatos, per quos ea, quæ ipse propter negotiorum multitudinem, aut loci distantiam per se non potest, exequatur. Unde Apostolus loc. cit. solum Episcopos hortatur, ut suas Ecclesias particulares, & oves sibi concreditas debite pascant, & regant: non autem intendit Episcopis supremam adscribere universalis Ecclesiæ potestatem. Eodem

modo explicandus est S. Petrus, dum in sua 1. epist. c. 5. v. 1. & 2. ait. *Seniores, qui in vobis sunt, obsecro consenior, pascite, qui in vobis est, gregem Dei.* His enim verbis solum monet Seniores, id est, Presbyteros & Episcopos, ut erga greges suos strenue fungantur munere pastoralis. Porro quod D. Petrus loc. cit. se *Conseniorem*, vel ut textus habet Syriacus, *Presbyterum & socium seniorum*, aut ut epist. 85. S. Hieronymus legit, *compresbyterum* nominaverit, per id se non voluit ostendere æqualem istis Senioribus, sed id fecit modestiæ causa; in quo illum postea in suis Epistolis, ac Bullis secuti sunt summi Pontifices, qui in iis se *Fratres & Coepiscopos* appellant; quia licet illis superiores sint jurisdictione, potestate tamen ordinis Episcopalis sunt illis pares.

Ad XII. D. Hieronymum non loqui de Ecclesia universali, seu per totum orbem diffusa, sed de Ecclesiis particularibus, & quidem non de omnibus, sed solum de quibusdam. 2. dist. ant. Ecclesiæ olim à presbyteris gubernabantur, consulendo, conc. ant. statuendo vel imperando, neg. ant. Ita enim habet textus Hieronymi: *Antequam diaboli instinctu studia partialitatis in Religione fierent, & diceretur: ego sum Pauli, ego Apollos, ego autem Cephæ, communi Presbyterorum consilio Ecclesiæ gubernabantur.* 3. Valde mirabiles esse Protestantes, dum enim nos iis objicimus SS. Patres, rejiciunt illos dicendo: *Patres homines sunt, adeoque mendaces;* quando vero illi contra nos Patres producunt, volunt, ut victas demus manus. Sed cur Sectarii in sui erroris favorem proferunt SS. Patres? respondet Commonitorio 1. c. 12. Vincentius Lirinensis his verbis: *Cum sub alieno nomine Hæresin concinnare machinentur, captare plerumque solent veteris alicujus viri scripta Paulo involutius edita, quæ pro ipsa sua obscuritate dogmati suo quasi congruant, ut illo, nescio quid, quodcunque proferunt, neque primi, neque soli sentire videantur.*

Dices

Dices: Si Cephas fuit Primas, & fundamentum Ecclesiæ universalis, quilibet potuisset olim dicere: *Ego sum Cepha*, at hoc prohibuit S. Paulus 1. Corinth. c. 1. v. 12. Ergo. R. S. Paulum ibi solum prohibere divisiones, & voluisse, unumquemque debere ut caput & fundamentum primarium agnoscere Christum. Quare ibidem v. 13. ait: *Nunquid in nomine Pauli baptizati estis?*

Ad XIII. Neg. conseq. Nam ille textus observabatur secundum suum sensum legitimum, qui non est, quasi in Ecclesia non debeat esse major, cum in eodem cap. v. 26. Christus majoritatem in Ecclesia agnoverit dicendo: *qui major est in vobis* &c. sed solum Christus voluit præcipere humilitatem ac modestiam, & prohibere, ne Prælati superbum in alios exercent dominatum.

Ad XIV. dist. ant. fuerunt æquales in aliqua potestate, scilicet in potestate prædicandi Evangelium, baptizandi, fundandi Ecclesias, &c. conc. ant. in potestate suprema, & capitis, neg. ant. Ad S. P. Augustinum R. tametli hæc verba proprie & principaliter ad ipsum Petrum pertineant, utpote ei soli à Christo dicta: omnibus tamen Episcopis & Pastoribus quodammodo accomodari posse, quia videlicet omnes, qui in partem sollicitudinis à Petro vocantur, Petri formam in pascendo grege imitari debent & exemplum; quod ergo summo Pastori dicitur, id etiam suo modo, & servata proportionem aliis minoribus Pastoribus dicitur, sed non in æquali gradu.

Ad XV. Omnes Apostolos Petro fuisse æquales, priusquam Petrus per illa verba: *pasce oves meas*: accepisset Ecclesiæ Præfecturam: hac autem accepta, Petrus fuit aliis superior, ut patet ex ipsis verbis Cypriani: *exordium ab unitate proficiscitur* &c. Nam S. Cypriani intentum loc. cit. erat, explicare, quomodo dæmon jam per Schismata & hæreses Christianos in suas partes trahere adlaboret, ad quæ eos facile etiam perduceret, nisi esset unum, cui cæteri parerent, Ecclesiæ caput constitu-

stitutum. Unde infert S. Cyprianus, quod multi ad hæresim & Schisma deflectant, eo fit fratres dilectissimi, dum ad veritatis originem non reditur, nec caput queritur, nec Magistri doctrina servatur.

Ad XVI. Aliqui dicunt, illum commentarium in Genesin non esse D. Ambrosii. Præterea Apostoli dicuntur omnes Primogeniti Ecclesiæ, quia omnes à Christo sunt vocati, & Apostoli Ecclesiæ constituti, quam Christus primo fundavit: per hoc tamen non sequitur, quod Petrus cæteris Apostolis non præemineat, postquam Christus Petro dedit præfecturam Ecclesiæ: *Pasce oves meas.*

Ad XVII. S. Hieronymum ibi Petrum & Joannem inter se conferre, & ut doceat, virginitatem matrimonio esse præferendam (quod Jovinianus negabat) asserere, Joannem ratione virginitatis à Christo magis fuisse dilectum quam Petrum, qui fuerat conjugatus: ubi S. Hieronymus hoc sibi argumentum objicit: *At dicis Joviniane, super Petrum fundatur Ecclesia.* Ad quam objectionem respondet Hieronymus: *Licet idipsum in alio loco super omnes Apostolos fiat.* (scilicet ad Ephes. c. 2. v. 20. ubi omnes Apostoli Ecclesiæ fundamenta vocantur) & cum illi claves Regni cælorum Matth. c. 18. v. 18. accipiant, & ex æquo super eos Ecclesiæ fortitudo solidetur, tamen propterea inter duodecim unus eligitur, ut capite constituto Schismatis tollatur occasio. Quibus verbis, ut capite constituto &c. D. Hieronymus innuit 1. istud li. ex æquo non esse idem ac æqualiter, quia Petra ac fundamentorum caput plus faciunt ad fabricam, quam reliqua fundamenta. 2. Per ea verba docet, Petrum non pro sua tantum persona fuisse electum, sed etiam pro suis Successoribus, cum Ecclesia universalis nunc Protestantibus grassantibus maxime cavere debeat Schismata, & ultiores hæreses. Quod autem Joannes non fuerit electus caput Ecclesiæ D. Hieronymus rationem ibi reddit his verbis: *Ætati delatum est, quia Petrus Senior.*

nior erat; ne *Joannes adhuc adolescens ac penie puer progressis etate hominibus præferretur*. Alter textus S. Hieronymi est intelligendus, quod optet, ut, sicut Damascus successit Apostolis in honore, ita iis quoque succedat in virtute & merito.

Ad XVIII. In virtute & merito nunc omnes Apostolos esse Rectores, Vicarios, & Pastores Ecclesiæ, non vero Jurisdictione. Præterea D. Paulus dicitur Princeps, Rector, Vicarius & Pastor ob Magisterium prædicationis, & tanquam universalis legatus, qui sollicitudinem habuit omnium Ecclesiarum, & tanquam principalis Petri adjutor Evangelium etiam Romæ prædicans, & suo sanguine ibi confirmans; non vero ob plenitudinem potestatis, Primatus, & jurisdictionis, hoc enim modo solus D. Petrus est Rector, Vicarius, & Pastor Ecclesiæ.

Ad XIX. dist. ant. miserunt imperative: & Petrus de jure, & vi subordinationis respondit, & dedit rationem, neg. ant. miserunt consultive, & suasive ac missione charitativa, & Petrus respondit, ac dedit rationem motu proprio, conc. ant. neg. conseq. Missio ergo ex se non dicit inferioritatem: alias nec Petrus cæteris Apostolis fuisset æqualis sed inferior: imo Pater æternus esset major filio, & uterque Spiritu S. nam sæpius à tota communitate mittitur superior, & caput utpote majoris authoritatis & experimenti in rebus & negotiis gerendis: quo pacto legimus Josue c. 22. v. 13. filios Israel ad Rubenitas misisse *Phinees filium Eleazari Sacerdotem*, tametsi Phinees fuerit Sacerdos & Præpositus domus. Et si major ac superior de facto det rationem inferiori, est officium boni Pastoris, ut ipse Petrus epistola sua dicit c. 3.

Ad XX. dist. ant. Petrus fuit reprehensus à Paulo per correctionem judicariam, quæ jurisdictionem requirit, neg. ant. per correctionem fraternam & charitativam, conc. ant. S. Thom. 2.2. q. 33. à. 3. docet: aliam esse correctionem justitia, & aliam charitatis: prima est, qua superior ex officio admonet, redarguit,



guit, punit delinquentes subditos: secunda est, dum etiam inferior per simplicem charitatem admonitione & correctione emendat superiorem, servato tamen respectu: quo sensu Paulus correxit Petrum non errantem in aliquo articulo fidei, sed in facto incaute simulando Judaismum cum aliquo Scandalo gentium: ut S. P. August. epist. 19. nunc. 82. ad Hieronymum scribit. Item S. Cyprianus epist. 17. ad Quintum. & S. Greg. Mag. hom. 18. in Ezech. Et nunquid 2. Reg. c. 19. v. 5. legimus Davidem à Joabo, Regem à subdito fuisse reprehensum? Ita hoc & docuit S. Paulus ad Coloss. c. 4. v. 17.

Ad XXI. Expl. ant. sub dist. Restitit ei *ut par* quantum ad fidei & morum defensionem, conc. ant. *ut par* in Regimine totius Ecclesiæ, neg. ant. quia quoad hoc Paulus fuit subditus Petro.

Ad XXII. Expl. ant. sub dist. quibus falsis fratribus & Pseudo-Apostolis (ut ibidem v. 4. legitur) qui volebant nos legi circumcisionis subicere, neque ad horam cessimus, conc. ant. Quibus Petro, aliisque Apostolis veris, neg. ant. & conseq.

Ad XXIII. S. Paulum per id non significare, se non fuisse inferiorem Petro, sed tantum voluisse, se instar aliorum Apostolorum doctrinam suam, & Evangelium immediate accepisse à Christo, ut c. 1. ad Galat. v. 12. innuit. Et sic etiam explicatur Glossa Augustini.

Dices: S. Paulus 2. Corinth. c. 11. v. 5. inquit: *Existimo, nihil me minus fecisse à magnis Apostolis*: ergo infert Beza insignis Calvinista, Paulus in nullo est inferior magnis Apostolis, ergo nec Petro. R. S. Paulum hoc loco non agere de primatu & auctoritate, sed tantum voluisse significare, se in nullo eorum, quæ ibidem v. 4. præcedente, & v. 22. & seqq. enumerat, cedere ulli, nempe in prædicatione Christi, in donatione spiritus, in sinceritate Evangelii, in laboribus, & in gratiis Aposto-

stolicis. Eodem modo & illud, quod 2. Corinth. c. 12. v. 11 dicit: *Nil minus fui ab iis qui sunt supra modum Apostoli*: intelligendum est, nihil minus fui in Apostolatu, Apostolicis laboribus, gratiis, passionibus. Unde etiam D. Paulus antonomastice appellatur *Apostolus*, non quod fuerit Apostolorum Primas, sed ideo, quia nobis plura scripta reliquit, & in Evangelii prædicatione, quæ est proprium Apostolorum officium, aliis plus laboravit, ut ipse ait 1. ad Corinth. c. 15, v. 10.

Ad XXIV. Petrum & Paulum fuisse æquales in munere Apostolico: ut ipse textus sat explicat. Ad prob. neg. seq. Nam Petrus fuit tam gentium quam Judæorum Apostolus, ut patet ex eo, quod omnium primus gentibus annuntiavit Evangelium: ob quod actor. c. 15. v. 7. dixit: *Viri Fratres! Vos scitis quoniam ab antiquis diebus Deus in nobis elegit, per os meum audire Gentes verbum Evangelii, & credere*. Item ex eo, quod converterit *Coraelum Centurionem*, Antiochenos, Romanos, &c. qui omnes erant Gentiles. Quod autem Petro cit. loc. *Apostolatus circumcissionis* speciatim attribuat, ideo est, quia Apostoli avidi totum orbem cito subicere Christo, Provincias sibi divisere: & Petrus ab initio incubuit in salutem Judæorum, quia horum utpote populi electi conversio erat munus præcipuum. Similiter Paulus non solas gentes, sed & Judæos docuit, cum integram epistolam ad Hebræos scripserit, & Judæis quoque Actor. c. 9. 13. & 14. annuntiaverit Christum Salaminæ, Iconii, & alibi.

Ad XXV. Pro solutione hujus & aliorum plurium argumentorum observandum, Petrum tripliciter considerari potuisse 1. Tanquam *Supremum Pastorem*: cui soli Christus injunxit officium pascendi omnes suas oves totius orbis, seu regendi, ac gubernandi omnes fideles; ad quod officium exercendum essentialiter requiritur jurisdictio ordinaria in oves sive in fideles subditos. 2. ut *Apostolum*, & in ratione muneris Aposto-

H h

latus.

latus. 3. In ratione *virtutis*, *laboris*, ac *meriti*. Hoc observato ad argumentum R. si Petrus consideretur 1. modo: SS. Patres asserunt, Petrum omnibus Apostolis, adeoque & Paulo præcellere ratione jurisdictionis ordinariæ in omnes. Si vero Petrus consideretur 2. modo, dicunt SS. Patres, omnes Apostolos illi fuisse pares in munere Apostolatus, quia omnes fuerunt à Christo missi: omnes habuerunt facultatem prædicandi, & baptizandi gentes. Si tandem Petrus consideretur 3. Modo, asserunt SS. Patres Paulum in laboribus & ærumnis propter Christum toleratis, ac in suis scriptis præcelluisse Petro: incertum autem esse, uter eorum alteri præcelluerit in ratione virtutis ac meriti.

Ad XXVI. Origenem ideo solum Paulum appellare fundatorem Ecclesiarum præcipuum, quia is in Ecclesiis fundandis plus cæteris laboravit: non autem eum appellare fundatorem Ecclesiarum præcipuum ob jurisdictionem ordinariam in omnes fideles.

Ad XXVII. S. Ambrosium ibi loqui de Paulo & Barnaba, qui à Spiritu S. simul ad munus Apostolatus assumpti erant, ut legitur actor. c. 13. v. 2. *Ministrantibus autem illis Domino, & jejunantibus, dixit illis Spiritus S. Segregate mihi Saulum & Barnabam in opus, ad quod assumpsi eos.* Quæ verba D. Ambrosius post illa verba: *paruerunt ergo Paulus & Barnabas Spiritui S. imperanti paucis interjectis subdit: una enim gratia fulgebat in his, quos Spiritus unus elegerat:* collatione inter Paulum & Barnabam facta; pergit Ambrosius, & confert Paulum cum Petro inquires: *Necque Paulus inferior Petro: ubi & in quo?* in Apostolatus munere, & fundandis Ecclesiis: nam addit: *quamvis ille fundamentum, & hic sapiens Architectus:* ulterius dicit Ambrosius: *Nec Paulus indignus Apostolorum collegio, cum primo, scilicet Petro, facile conferendus in laboribus pro Evangelii propagatione susceptis & ærumnis toleratis: & nulli secundus: nam qui se in parem nescit,*

*nescit, facit æqualem, non in jurisdictione Ecclesiastica, sed in laboribus Apostolicis.*

Ad XXVIII. Distinguere oportet Primatum ab Apostolatu, & jurisdictionem ab officiis Apostolicis, omnes ergo Apostoli, etiam Paulus, in hoc fuerunt pares, quod Apostolatuum suum, & facultates prædicandi, baptizandi &c. immediate acceperint à Christo: munus autem Supremi Rectoris, Pastoris, cui essentialiter annexa est jurisdictio ordinaria, attributum est soli Petro: quia huic soli Christus dixit: *pasce oves meas.* Ergo cum Paulus etiam sit ovis Christi: Petrus in eum habuit jurisdictionem, & facultatem eum pascendi, si occasio dedisset.

Ad XXIX. Paulum recte dixisse sibi incumbere curam omnium Ecclesiarum, hæc enim data à Christo communis erat omnibus Apostolis, cum hoc tamen discrimine, quod Petri Primatus in ejus successores fuerit transfundendus, non item aliorum Apostolorum auctoritas: ideo successor Jacobi Jerosolymis in Episcopatu Simeon jam non habuit, nec successit in tanta amplitudine, sed duntaxat in Diœcesi Jerosolymitana suis limitibus contricta; sicut & successor Petri in Antiocheno Episcopatu Evodius, pariformiter tantum in Antiochena Diœcesi suis terminis clausa successit; econtra Linus, Clemens &c. Romæ Petri successores succedebant in universali gubernio omnium Ecclesiarum. Ita tamen reliqui Apostoli plenitudinem potestatis Ecclesiarum habuerunt, ut Petrus super eos tamen haberet Primatum, & eorundem esset caput amore unitatis, ut Schismatis tolleretur occasio. Hinc etiam dum Paulus dixit ad Corinth. c. 12. *Nihilominus fui ab iis, qui sunt supra modum Apostoli:* intelligendum est, quod necessarium fuerit Paulo, ut ipse suum Apostolatuum commendaret, ac reliquis Apostolis in hoc non esse inferiorem, esto plus aliis inter gentes laboraverit: & quidem hoc contra eos, qui ut Psevdo-Apostolo Paulo ne-

gabant æqualitatem cum reliquis Apostolis, quod is non sicut cæteri cum Christo in carne conversatus fuerit: quo non obstante Paulus dicit, se etiam æqualem Petro in hoc genere, quoad munus nempe Apostolicum, salvo tamen semper Primatu Petri.

Ad XXX. Dist. maj. S. Paulus fuit Romæ Episcopus *exercitio*, conc. maj. *sede*, neg. maj. & dist. min. sed juxta Pontificios urbis Romæ Episcopus *sede*, est totius orbis summus Pastor, conc. min. urbis Romæ Episcopus *exercitio* solum, neg. min. & conseq. Paulum fuisse Episcopum indubium est: nam Episcopi munus est Ecclesiis Prsbyteros præficere, quod factum à Barnaba & Paulo legimus Actor. c. 14. v. 22. Cæterum cujus Ecclesiæ fuerit Episcopus, incompertum est. Vulgarior opinio fert, nullius determinatæ Ecclesiæ fuisse, & recte quidem, cum enim fuerit electus, ut Minister huc illucque discurrens ad portandum nomen Jesu, nulli debuit sedi alligari, hinc est, quod nullam determinatam Provinciam ipsi legamus demandatam in divisione orbis, sicut cæteris. Ergo & Paulus fuit Romæ Episcopus sed solum *exercitio*, sicut etiam Ephesi, Athenis, Corinthi, Iystris, & cujuslibet Civitatis & loci, quem lustravit evangelizando: non autem fuit Romæ Episcopus *sede*: cum sibi Romanam sedem non desponsaverit, aut sponsus Ecclesiæ Romanæ fuerit, sed Petrus: Episcopus vero, ut ipse Paulus fatetur, debet esse unius uxoris vir, id est Ecclesiæ, ut Patres exponunt. Et ita exponendi sunt SS. Patres. Petrus proinde & Paulus titulum Episcopatus urbis Romanæ erexerunt doctrina, prædicatione, & labore, sed non ex æquo gubernio: primatus enim Regiminis & jurisdictionis soli Petro conveniebat. Dum ergo SS. Patres vocant Pontifices successores Petri & Pauli, non volunt, quasi Paulus cum Petro junctus fuerit caput Ecclesiæ, & Pontifex Romanus, sed quia cum Petro fundavit Ecclesiam prædicatione, miraculis,



lis, labore, Martyrio &c. Item Romani Pontifices dicuntur non solum Petri sed etiam Pauli successores, sed Petri in plenitudinem jurisdictionis, Pauli vero in plenitudinem legationis, id est, scientiæ: ergo in diverso genere.

Ad XXXI. Dist. maj. SS. Patres unam faciunt Petri & Pauli sedem, Petri sedem Magisterii, & Pauli adjutorii, conc. maj. sedem Petri & Pauli Magisterii neg. maj. Ad Cathedram Petri non solum pertinet jurisdictio, sed etiam doctrina: & quamvis Petrus ea polleret scientia, quæ ad sua apte obeunda munia censeretur oportuna, attamen quia Paulus excelluit sapientia divinorum, atque in stabiliendis dogmatibus, in ferendis legibus, in evulgando Evangelio tum Romæ, tum ubique terrarum, potissimum fuit adjutor Petri, ideo dicitur cum Petro sedisse, cum una sit sedes Episcopi & Coadjutoris: audiamus S. P. August. Epist. 36. ad Paulinum: *Adbuc in corpore posito Patre & Episcopo meo Sene Valerio, sedi cum illo, cum fuerit ejus Coadjutor.* Ita est explicandus Adrianus II. cum aliis.

Ad XXXII. Paulum esse æqualem Petro, ejus Collegam, Fratrem, quoad munus Apostolicum, quoad stabiliendam disciplinam Ecclesiasticam &c. non vero quoad dignitatem jurisdictionis ordinariæ, & Primatus in regendo, & gubernando fideles.

Ad XXXIII. Particula negativa prædicatum distribuit juxta Philosophos secundum subjecti exigentiam; quapropter cum citati Patres de munere Apostolatus loquantur, utique particula negativa excludit omnem inæqualitatem in prædicto gradu.

Ad XXXIV. Omnia præcitata verba apte omnibus Apostolis possunt accomodari, cum in omnem terram exierit sonus eorum: potissimum tamen Paulo competunt, quia plus cæteris laboravit; verum ex hoc nulla Primatus ratio habetur: sed Petro manet.

H h 3

Ad

Ad XXXV. Duplicem Primatum Patres agnoscere laudatos: nempe jurisdictionis: & primatum prædicationis gentium, & prædicationis circumcisionis: primatus jurisdictionis soli Petro est concessus. Primatus prædicationis gentium S. Paulo, primatus prædicationis circumcisionis S. Petro. S. Ambrosius non loquitur de primatu jurisdictionis, sed de primatu prædicationis gentium & circumcisionis: & inter hos facit paritatem inter Petrum & Paulum.

Ad XXXVI. Synodum quidem Petrum & Paulum ut lapides venerari, diversimode tamen, Petrum ut lapidem potentiae, Paulum ut lapidem sapientiae: unde Petrus Primatum obtinuit dominationis, Paulus prædicationis; Auctoritas Chrysostomi est conficta, ibidem enim ne verbum quidem de capite, sed solum de Sauli nominis mutatione agit.

Ad XXXVII. Et Petrum & Paulum claves accepisse: Petrum Clavem potentiae & jurisdictionis: Paulum Clavem scientiae: Paulus majorem cæteris Apostolis non habuit potestatem: sed omnes subordinabantur Petro tanquam capiti.

Ad XXXVIII. Diverso plane modo Pontifices dicuntur Petri & Pauli vicarii: nam Petri censentur Vicarii in plenitudine potestatis, Pauli vero in plenitudine scientiae. Cæterum si stricte & proprie nomen Vicarii spectetur, prout dicit non habere plenitudinem potestatis, quam habet Principalis, sic Pontifices nequeunt appellari Vicarii Petri & Pauli, sed Vicarii Christi. Petrus dicitur Princeps Apostolorum ut caput & Pastor ovium: Paulus dicitur Princeps Apostolorum ob munus Apostolicum exuberantissime adimpletum. Petrus dicitur Dux ut primus Pastor, Paulus dicitur Dux ut Coadjutor. Petrus dicitur luminare majus, Paulus minus. Verbo, quando Patres videntur Paulum coæquare Petro, loquuntur de muniis Apostolatus, non vero jurisdictionis ordinariæ: seu non loquuntur dogmatice, sed panegyrica laude eos extollunt. Pon-

tifi-

tifices in majoribus causis acta exercent non solum auctoritate Petri & Pauli, sed etiam omnium Sanctorum & Conciliorum, uti Nicolaus I. epist. 10. in Photii degradatione est usus. Explicat ergo Apostolica sedes auctoritatem Pauli, ejusque nomine potissimum utitur tanquam Coadjutoris. Quod in picturis Paulus à dextris & Petrus à sinistris videatur pictus vel sculptus: &c. Apud antiquos morem fuisse, quod junior cum seniore ambulans à dextera incederet senioris, eumque obsequii causa paululum præcederet: ex qua consuetudine fieri potuit, ut in imaginibus Paulus pingeretur, vel sculperetur à dextris Petri. Præterea dici potest, Paulum à dextris fuisse positum ob cumulum laborum, quos copiosiores exantlavit, quam Petrus, sed hoc tantum est signum honoris, non jurisdictionis. Ita etiam Paulus fatetur ad Galat. c. 2. v. 9. quod Jacobus, Cephas, & Joannes sibi ac Barnabæ dexteras dederint, in signum nempe honoris, concordiae, & convenientiae.

Ad XXXIX. S. Cyrillus non vocat Petrum & Paulum duo capita, sed duos Præsides, quod etiam cæteris Apostolis accommodari potest. Nazianzenus non asserit Paulum primum absolute post Christum, sed in charitate ponendi animam pro fratribus suis. Et esto etiam nuncuparentur Capita, nuncuparentur ideo, quia primo Ecclesiam fundaverunt: quo modo etiam cæteri Apostoli dici possunt capita, servata tamen debita subordinatione & dependentia ad Petrum. Paulus Linum Claudiae filium non constituit Romanorum Episcopum, sed solum ordinavit: porro Paulus ut Petri Coadjutor bene poterat Linum consecrare. Unde Adversarii textum vitiant, cum Clemens ibidem habeat: *ordinatus est*.

Ad XL. Christum esse Caput & fundamentum Ecclesiae primum, absolutum, independens, principale, & invisibile; Petrum vero secundarium, subordinatum, dependens, vices gerens, & visibile. Audiatur S. Hieronymus lib. 3. Comment.

cir-

circa caput 16. *Sicut ipse lumen Apostolis donavit, ut lumen mundi appellarentur, cæteraque ex Domino sortiti sunt vocabula; ita & Simoni, qui credebat in Petram Christum, Petri largitus est nomen, & secundum metaphoram petrae recte dicitur ei: ædificabo Ecclesiam meam super te.*

Ad XLI. S. P. Augustinum nullibi docere, quod hæc verba: *Super banc Petram*: solum de Christo sint intelligenda: sed solum monere, ea posse non tantum de Petro, sed etiam de Christo exponi tanquam de petra principali, & primaria ac fundamentalis, supra quam fundata est Ecclesia, ut infertur ex modo loquendi cit. loc. *Ideo Petrus à Petra, non Petra à Petro, quomodo non à Christiano Christus, sed à Christo Christianus vocatur.* Neque nos prætendimus Christum Petram in Petro fundari, sed Petrum supra Christum. Christus & Petrus sunt duæ petrae: Christus est prima Petra: Petrus secunda supra primam fundata, & super utramque ædificatur Ecclesia. Et S. P. Augustinus serm. 13. de verb. Dom. merito abstinere absolute dicere Ecclesiam fundatam esse super Petrum; quippe non deerant, qui (ut ipse ait) putantes homines ædificatos esse super alios homines, dicebant: ego sum Pauli, ego sum Apollo, ego Petri. Hinc quemadmodum Paulus audiens homines extolli, Christum autem deprimi, accensus zelo exclamavit: *Nunquid divisus est Christus?* Sic S. P. August. ne ansam præberet errori, sobrie abstinuit asserere Petram, supra quam fundata erat Ecclesia, esse Petrum, dixitque potius esse Christum. Atque nova hujusmodi cautelæ ratio à Donatistis Adversariis suis oriebatur: isti asseriebant à sanctitate Ministri pendere Sacramenti virtutem; idcirco veritus S. Doctor, ne Ecclesiam supra Petrum fundatam affirmans, audacius præsumerent de sanctitate Ministrorum, & in istis spirituale ædificium statuerent, abstinuit de Petro loqui, totum fundamentum construendo supra Petram Christum.

Ad

Ad XLII. Omnes Apostolos dici posse Ecclesiæ fundamenta doctrina & partitione Provinciarum: doctrina quidem, quia fides, cui innititur Ecclesia, Apostolis fuit revelata, ut eam scriptis & prædicatione evulgarent, nec alius auderet novum condere articulum præter veritates ab ipsis enuntiatas. Partitione Provinciarum, quatenus Apostoli terrarum orbem inter se diviserunt, cui verbum Dei facerent: hinc unus fundavit Ecclesiam Jerosolymis, alter Ephesi, alius Alexandriæ &c. & quoad hæc Apostoli omnes paria sunt cum Petro fundamenta Ecclesiæ. Sed loquendo de fundamento Ecclesiæ quoad gubernium & regimen Ecclesiæ, ac jurisdictionem, solus Petrus est fundamentum, & ordinarius Ecclesiæ universalis Pastor institutus, cui cæteri Apostoli subdebantur.

Ad XLIII. Ecclesia est ædificata supra Petrum, ab eo dependet consequenter tanquam à Rectore, ergo etiam Petrus est Rector Ecclesiæ. At vero Ecclesia est fundata supra fidem, consequenter ab ea dependet tanquam à primo principio totius sanctitatis Ecclesiæ, non tanquam à Rectore: ergo etiam fides est primum principium totius sanctitatis Ecclesiæ, non vero Rector. Ita argumentetur Lutherus: & sic urgebit consequentia. Posset etiam contra Lutherum ita instari: supra Christum fundata est Ecclesia: ergo Christus non est Rector Ecclesiæ. Quid ad hoc Luthere?

Ad XLIV. Conc. maj. neg. min. uti jam sub probatione conclusionis ostensum est: etsi enim Christus omnes interrogaverit: *vos autem quem me esse dicitis?* non tamen communi sed singulari respondit Petrus responsione: *Tu es filius Dei vivi:* ergo omnium nomine non respondit. Quando nomine omnium locutus est Petrus ex interrogatione omnibus facta, insimul & ex responsione communi satis indicatur, ut constet Joan. c. 6. v. 68. ubi interrogatis omnibus discipulis à Christo: *Nunquid & vos vultis abire?* communi respondit Petrus responsione: *Do-*



mine ad quem ibimus? verba vitæ æternæ habes: & nos credidimus, & cognovimus, quia tu es Christus Filius Dei. Præterea Juxta Hæreticos: quia interrogatio est communis, responsio Petri est communis: ergo etiam quia retributio est singularis: Tu es Petrus, & super hanc Petram ædificabo Ecclesiam meam: retributionis concessio debet esse singularis, nempe soli Petro, non communis aliis Apostolis.

Ad XLV. Neg. maj. Diverſa plane ab utroque Evangelista gesta narrantur. Quæ refert Matthæus, peracta fuere in partibus Cæſareæ Philippi; relata vero à Joanne in Synagoga in Capharnaum v. 60. *Hæc dixit in Synagoga docens, in Capharnaum.* Apud Matthæum, poſtquam docuit Chriſtus, Cavendum eſſe à fermento Pharifæorum & Sadducæorum, Petrus ejusdem Divinitatem proſitetur: apud Joannem poſt doctrinam de Eucharistiæ Sacramento: apud primum diſcipuli omnes credunt: apud alterum aliqui non credunt, & de doctrina ſcandalizantur. Adeoque inſtatur argumentum: quia apud Joannem pro omnibus Petrus reſpondet, plurali locutione ſignatur: *Nos credimus*; ergo quia apud Matthæum ſingularis eſt locutio, ſingularis etiam cenſenda eſt confeſſio. Et hic advertendum, quod licet alias jam audita ſit confeſſio Divinitatis Chriſti, ut Joan. c. 6. & Joan. c. 1. v. 49. ex Nathaniele. Et Matth. c. 14. v. 33. ab aſtantibus in navicula; nullibi tamen niſi Matth. c. 16. à Chriſto factam legimus promiſſionem; non alio ſane momento niſi propter excellentiam confeſſionis, ſiquidem Petrus ibi addidit *Dei vivi*, quod eſt expreſſivum formaliffimæ filiationis naturalis ſecundum proprium conceptum, cum filiatione ſit origo viventis à vivente; in aliis locis autem facta eſt confeſſio per verba abſtrahentia à filiatione naturali & adoptiva: vel ſi determinate de naturali, per verba ſignificantia identice non formaliter filiationem.

Ad

Ad XLVI. Quid erat necesse expectare aliorum confessionem? jam enim audierant Christum approbantem Petri confessionem tanquam veram utpote à Patre revelatam, adeoque completa erat quæstio à Christo instituta: *Quem dicunt homines esse filium hominis? Vos autem quem me esse dicitis?* hac ergo jam resoluta ultra immorandum non erat. Et instatur: quia nullam facit Scriptura mentionem aliorum, ideo non omnium ore Petrus locutus est: non enim reticet Scriptura, quæ ad substantiam mysteriorum spectant.

Ad XLVII. Abs re somniare Hæreticos indictum à Christo silentium ob communem Divinitatis confessionem. Nonne ejus Divinitas ex peculiari Petri confessione ab ipsomet Christo laudata innotuerat discipulis? cum igitur adhuc gentibus voluerit occultare mysteria, ipsis mandavit, ne audita revelarent.

Ad XLVIII. Christum ibi loqui de doctrina diei judicii, & de sollicitudine, quam habere debemus omnes, ut pro adventu Domini judicantis simus parati; ideo dixit v. 33. *Videte, vigilate, orate: nescitis enim, quando tempus sit.* Et iterum v. 35. *Vigilate ergo:* & postmodum concludit v. 37. *Quod autem vobis dico; omnibus dico: vigilate.* Cæterum ex Christo non habemus, quod uni vel vobis trado, omnibus trado: quapropter claves, quas Petro dedit, non omnibus dedit. Præterea si, quod uni dicitur, omnibus dicitur, universaliter esset verum: ergo omnibus dixit Christus: *unus ex vobis diabolus est. Amice osculo filium hominis tradis: vade retro Satana. Modicæ fidei quare dubitasti? mitte digitos tuos in loca clavorum:* &c. Quis talia affirmare audebit? ergo.

Ad XLIX. Dupliciter Patres asserunt Petrum locutum nomine omnium. 1. Quia caput ipsorum. 2. Quia Petri responsum reliqui ratam habuerunt.

L. Dist. ant. Christus claves promisit Petro tanquam figuræ, veræ, realis, & fundamentalis à Christo sui loco constitutæ Ecclesiæ,

fiæ, conc. ant. tanquam figuræ imperfectæ, Symbolicæ, ac parabolicæ, & repræsentativæ, velut erat Synagoga, neg. ant. & conseq. Petrus ergo non Symbolica, aut parabolica, sed realis Ecclesiæ figura fuit, proindeque in persona sua recepit claves Regni cælorum per se primo, deinde ut figuram Ecclesiæ. Hæreticorum probatio est undique textui violenta, & contraria; Christus namque expresse laudat Petrum ut filium Bar-Jonna, & ei propter meritum confessionis claves confert, quam non ex humana, sed ex Divina illustratione edidit. Unde notandum: in propositione Christi duplicem causalem adesse: *quia caro & sanguis: & quia tu es Petrus*. Prima causalis pertinet ad rationem formalem confessionis: secunda ad rationem formalem superædificationis Ecclesiæ, & donationis clavium. Jam mirandum, Lutherum asserere, nobis certe non constare, an Petrus Patrem audierit? cum Scriptura aperte dicat: *Revelavit tibi Pater meus*.

Ad LI. Christum Petrum non repulisse abjiciendo, cum nec defecerit in fide, nec in charitate; sed repulisse à se corripiendo atque instruendo. Cum enim Petrus adhuc perfecte non perceperit mysteria, affectu quodam raptus erga Christum eum à morte Divina retrahere cupiebat: ideoque Christus eum corripuit, & corripiendo instruxit, sed non abjecit. Verbum *Satana* non semper significat Diabolum, sed quandoque adversantem. Jam in eadem persona non sunt hæc duo impossibilia: quod ex munere Dei habeat, unde laudetur, & præmium mereatur: & ex propria infirmitate, unde corripiatur, & instruatur.

Ad LII. Conc. maj. intellectam de iis, quæ Dei sunt quoad infallibilitatem doctrinæ fidei & morum, & neg. min. Petrus enim constitutus caput Ecclesiæ permanentiter & in se, & in suis Successoribus habuit privilegium infallibilitatis in doctrina fidei & morum: quoniam pro eo solo specialiter Christus rogavit, ut non deficeret fides ejus. Nec obstat Christi repreh-

hensio: *quia non sapis ea , quæ Dei sunt* : siquidem in hoc , in quo reprehenditur , non fuit ignorantia circa essentialia ad munus capitis Ecclesiæ spectantia , sed solum circa particularia spectantia ad mortem Christi , à qua ipsum Petrus avertere conabatur , ideoque à Christo reprehenditur , quod non sapiat ea , quæ Dei sunt. Neque etiam quidquam officit trina Petri negatio : siquidem per hoc Petrus nil docuit contra fidem , sed ex metu tormentorum solum exterius fidem negavit , fidemque interior non amittit , quoniam lacrymis culpam admissam in exteriori negatione Christi statim deslevit. Demum etsi Christus tunc claves Petro promiserit , tamen eas eidem tunc non tradidit , sed primo post Resurrectionem , cum munus Redemptoris per mortem complevit & ad cælum ascensurus Vicarium in terris Petrum reliquit ; defecit igitur Petrus , quando claves illi promissæ , sed non tunc , quando actu concreditæ erant.

Ad LIII. Neg. min. Claves Pontifici non dat Ecclesia , sed Christus. Ecclesia solum personam in Vicarium Christi designat , cui postmodum Christus confert clavium potestatem. Unde non sequitur , Pontificem secum asferre claves , vel eas ab Ecclesia recipere. Hinc mortuo Petro claves quasi reversæ sunt ad manus Christi , à quo illas Linus Petri Successor accepit , non traditione nova , sed institutione antiqua.

Ad LIV. Sede vacante Ecclesia habet claves in inferioribus Ministris quoad necessaria eorum munia. Claves vero præ-eminentiæ & superioritatis habet in jure , ratione cujus sufficienter dicitur , & est infallibilis , nec permittere potest Deus ipsam in doctrina fidei errare. Unde mortuo Pontifice claves sunt in manibus non Ecclesiæ , sed Christi , à quo eas novus Papa accipit , non traditione nova , sed institutione antiqua : eo fere modo , quo novus Pro-Rex priore mortuo suam potestatem accipit à Rege in casu , quo Rex decretum fecit , quod pro Pro-Rege in locum prioris defuncti semper velit admittere , &

quidem cum eadem, quam primo concesserat, potestate, illum, quem Proceres elegerint. Sicut ergo in hoc casu novus Pro-Rex suam supremam Vicariam potestatem non ab iis, à quibus eligitur, sed à Rege accipit, & quidem institutione antiqua, sive vi primi decreti; ita summus Pontifex suam supremam Christi Vicariam potestatem non ab Ecclesia, à qua eligitur, & Christo veluti præsenteretur: sed à Christo accipit, & quidem non traditione nova, sed institutione antiqua, sive vi primi decreti, quo Christus voluit, ut quivis ab Ecclesia legitime electus & acceptatus Pontifex succedat in eadem D. Petri potestate. Claves igitur mortuo Papa non in Ecclesiæ, sed in Christi manibus sunt principaliter, & immediate.

Ad LV. Duo habuit Abraham ex fide: & quod initiative justificatus sit: & quod fuerit Pater multarum gentium & Benedictus in semine. In primo omnis credens Abraham imitatur: in secundo nullus, nisi ipsi succedens in primatus circumcisionis munere. Duo habuit Petrus ex confessione, quod beatus sit dictus: & quod claves acceperit. In primo omnis credens imitatur Petrum, quia fides est justificationis & beatitudinis initium: in secundo nullus, nisi Successor. Et ratio est: quia fides, justitia, beatitudo, & alia virtutum dona sunt bona animæ, proindeque omni habenti profunt; Primatus, Claves sunt munia potestatis, propterea non sequuntur fidem, sed dignitatem & characterem. Quod autem certo nesciamus hunc vel illum habere fidem, nihil evincit, sat namque est nos certo scire in Sacris Ministris claves potestatis adinveniri.

Ad LVI. Huic argumento jam est responsum supra ad L. Imo data responsio magis confirmatur: nam S. Pater ita asserit Petrum Ecclesiæ figuram in susceptione clavium, sicut Judam ponit figuram inimicorum Christi in prodicione: sed Judas absque dubio in sua persona Christum prodidit: ergo Petrus in sua persona vere claves recepit. Merito etiam dicitur Petrus  
figura



figura Ecclesiæ, quia claves non recepit pro se tantummodo, sed ut reliquis proportionaliter communicandas Ministris: adeoque ut supremus omnium Pastor universos referebat Præsules, ut scite exponit S. Pater Tract. 50. in Joan.

Dices : Ecclesiam habere judiciale[m] potestatem, ideo dicitur Matth. c. 18. v. 17. *Dic Ecclesiæ*: ergo. R. Potestatem judiciale[m] corrigendi utique habere Ecclesiam in suis Ministris, non vero habere immediate in singulis membris. Unde omnes Ss. Patres citata verba ex Matthæo interpretantur de Pastoribus, ita ut sensus sit : Dic Prælati[s] Ecclesiæ, ut potestate publica hominem contumacem corripiant, atque publicæ eum subijciant pænæ.

Ad LVII. Christum non responsione, sed reprehensione litem exortam sedasse, ut cognoscerent fideles Primatum ex ambitione quælitum quovis tempore reprobandum. Et hoc argumentum est contra Adversarios: si enim promissio Clavium foret omnibus una, non contendissent, quis esset major. Cum ergo contenderint, suspicio occurrebat, quis major esset, & certe non de alio dubitatio suboriri poterat, quam de Petro, cui Christum claves promississe audierant: attamen cum Petrus actu non fuisset Ecclesiæ caput constitutus, & cæteroquin discipuli adhuc non essent in divinorum mysteriorum cognitione perfecti, nec in sanctitate ita firmati, ut suis affectibus aliquando non distraherentur, & noverint, Christum quandoque Petrum reprehendere, atque Joannem singulari dilectionis significatione prosequi, nil mirum, si oborta sit contentio, quis eorum videretur esse major?

Ad LVIII. Clavim juxta phrasim Scripturæ significare potestatem dominativam, legislativam, punitivam, remissivam peccatorum, & resolutivam quæstionum legis & fidei: ergo Christus promittendo Petro Claves Ecclesiæ hanc potestatem omnem dedit: ergo ligare & solvere plus dicit, quam solum annun-

annuntiare Evangelium, & remittere peccata, ut Novatores Calvini prætendunt. Et inſto contra AA. Remittere ſeu ſolvere eſt docere: ergo ejus oppoſitum, ligare ſeu non remittere erit non docere, aut contra docere: ergo ligare nil aliud erit, quam falſis dogmatibus fideles implicare. Si dicant, ſolvere eſt homines ab erroribus eripere: nos reponimus: ergo ligare erit erroribus involvere: opponuntur namque ſolvere & ligare contrarie, contraria autem ſunt circa idem. Nec obſtat auctoritas Apoſtoli citata: etenim verbum reconciliationis, quod à Chriſto accepit, aliud ſane non eſt, quam efficacia exhortandi fideles, ut Deo reconcilientur, ſed per media ab ipſo decreta, puta per baptiſmum, aut pænitentiam: verum hoc non evincit, ad peccatorum remiſſionem ſufficere concionem, ut prætendunt Novatores.

Ad LIX. Negatur, Petrum ignoraffe gentibus fore prædicandum: audierat enim hoc à Chriſto Matth. c. ult. v. 19. & Lucæ c. 24. v. 45. Ratio autem cur Petrus hæſitaverit, eſt: cum enim dixerit Apoſtolis Dominus Actor. 1. v. 8. *Eritis mihi teſtes in Jeruſalem, & in omni Judæa & Samaria, & uſque ad ultimum terræ*: dubitabat Petrus, an tempus eſſet prædicandi gentibus, ſatisque prædicatum foret Judæis? & ob hoc fuit re-prehenſus; ſed Deus viſione Linteoli Petrum admōnuit, & Petrus narratione viſionis, tempus adveniffe fidelibus declaravit. Ita explicat S. Chryſoſt. in commentariis hujus loci hom. 24.

Ad LX. Ibidem non electos ſolum, ſed & reprobos comprehendendi: Chriſtus enim mandavit Petro pſcere Agnos, & oves, pro quibus Chriſtus Paſtor dedit animam ſuam: ſed Chriſtus dedit illam pro electis & reprobis: ergo. Alias ſequeretur, nec Chriſtum fuiſſe univerſæ Eccleſiæ Paſtorem: nam ibidem fatetur Chriſtus ſe unum ſolummodo habere ovile ex ovibus conſlatum.

Ad

Ad LXI. Hæreticos ob hoc argumentum malignare , & acta Ministri peccatoris non valere , atque crimina dignitate privare velle. Sat est dicere , Scripturam nos monere obediendum esse etiam Discolis , unde compertum est acta Præfulis peccatoris non esse irrita. Unde in pastione gregis duo considerata sunt : actus seu munus pascendi , & rectitudo operis : substantia actus potestati respondet : rectitudo charitati. Et quia Christus Petrum non qualemcunque , sed optimum Pastorem volebat ; ideo ter amoris pignus exegit. Congregant Novatores varia crimina , quæ Petro affingunt , sed mera sunt mendacia.

Ad LXII. Petrus suum Primatum in Ecclesia exercuit per dicta & alia gesta in Actis Apostolorum c. 1. v. 21. c. 15. v. 12. de quibus ait hom. 21. in Acta Apostol. S. Chrysostomus : *In summa ubique Petrus primus invenitur : quando eligendus Apostolus ( loco Judæ Iscariotis ) hic primus , quando loquendum Judæis , non esse Apostolos ebrios : quando curandus claudus : quando concionandum : quando agendum contra Principes Judæorum : quando ab umbra ( Petri ) sanitates fiebant , primus hic erat Petrus.* Præterea hac sua potestate ob modestiam uti non voluit in reliquos Apostolos , præsertim cum iidem Apostoli per se munia sua quam diligentissime exquerentur , adeoque non indigerent Petri imperio. Ad alterum de electione Mathiæ & septem Diaconorum respondet S. Chrysost. hom. 3. in Acta quærens : *Quid ? an non licebat ipsi Petro eligere ? licebat ei quidem maxime , verum id non fecit , ne cui videretur gratificari.* Attamen solus Petrus propria autoritate ad electionem Mathiæ in locum Judæ omnes convocavit discipulos , & ipse primus instituit istos septem Diaconos : ad quam institutionem cuncti concurrerunt , quilibet pro sua dignitate. Ad ultimum : illa de legalibus seu circumcisione quæstio non ad solum Petrum , sed ad alios quoque Apostolos delata est , ut ejus decisio fieret cum majori partium litigantium satisfactione.

K k

Imo .

Imo Petrus primariam suam in eo concilio auctor. c. 15. auctoritatem patenter ostendit, dum v. 10. ut Concilii caput, & Controversiæ Judex definitivam sententiam pronuntiavit, ac dum eo loquente omnes tacuerunt, ejusque sententiæ acquieverunt. Quod autem Jacobus dixerit, *ego judico*: non obstat, quia de concilio omnes & singuli fuerunt vocati ad hoc, ut suas proferant sententias, quibus prolatis ad Petrum tanquam ad concilii caput pertinuit rem definire & concludere. Cum autem quæstio mota fuerit Jerosolymis, ubi Jacobus erat Episcopus, suum debuit judicium prodere. Et dum dicitur ex Clemente lib. 1. recognit. Jacobum fuisse Principem Episcoporum, intelligendum est respectu tractus Jerosolymitani, non vero respectu universalis Ecclesiæ. Imo Clemens non dicit (ut perperam citant Novatores) Jacobum fuisse Episcopum Apostolorum, sed Jerosolymorum: & à Petro principaliter, à Joanne vero & altero Jacobo ministerialiter, consilio, & adjutorio fuisse ordinatum seu institutum Jerosolymis Episcopum.

Ad LXIII. Hoc argumentum jam supra inter probas fuisse solutum: ubi dictum, quod promissio Petro facta sit universalis & irrestricta: facta autem cæteris Apostolis à Christo restricta fuit ad correctionem fraternam, remittenda & retinenda peccata. In promissione facta Petro tria includuntur: 1. *Tu es Petrus, & super banc Petram ædificabo Ecclesiam meam.* 2. *Et Tibi dabo claves Regni cælorum* 3. *Quodcunque ligaveris super terram, erit ligatum & in cælis, & quodcunque solveris super terram, erit solutum & in cælis.* Duo priora nullibi à Christo fuere cæteris Apostolis promissa, vel data, sed soli Petro. Posterius vero aliis quidem commune fuit, sed ea potestatis coarctatione, quam affabre deprehendit Origenes tract. 6. in Matth. *Quoniam oportebat aliquid majus habere Petrum præ illis, qui ter arguerant, ideo illi quidem sic dixit: & Tibi dabo claves Regni cælorum &c.* Non ergo modica differentia est, quod Petro quidem datae sunt claves non  
unius

unius cæli, sed multorum cælorum, ut quæcunque ligaverit super terram, sint ligata non tantum in uno cælo, sed in omnibus cælis, & quæ solverit super terram, sint soluta non solum in uno sed in omnibus cælis. Ad eos autem, qui multi sunt ligatores & solutores interra, sic dicit: ut solvant & alligent non in cælis sicut Petrus, sed in uno cælo; quia non sunt in tanta perfectione sicut Petrus. Unde quamvis reapse, & in proprietate sit unicum cælum, in quo fit remissio, plurali tamen significatione exprimitur, ut ampliorem intelligamus vim fore solutivam & ligativam in Petro, quam in aliis. Potestas ergo data cæteris Apostolis, sit ea jam quælibet, semper fuit cum subordinatione ad Petrum tanquam ad Caput.

## §. VI.

Dico §. 1. Pontificatus Petri jure Divino habet Successionem 2. Romanus Pontifex legitime electus, & ab Ecclesia acceptatus est Petri Successor tanquam Caput Ecclesiæ eam visibiliter loco Christi Post Petrum gubernans.

**A**bsolute Petri Primatu Ecclesiam post Christi ascensionem visibiliter loco Christi gubernantis, sequitur, ut inquiremus de gubernatore Ecclesiæ loco Petri, ejusdem videlicet & in Cathedra, & in officio, ac dignitate Successore, eam more Christi, & exemplo post Petrum Christi Vicarium gubernante; duplex autem in præsentem est quæstio, 1. An Primatus & Pontificatus Petri jure Divino successionem & successorem habeat? 2. An Episcopus Romanus iste Petri sit Successor?

Luthero-Calvinistæ Scripturis & invictis Patrum Auctoritatibus victi, quamvis inviti, Petro Ecclesiæ Primatum concedunt: verum ipso demortuo eum expirasse, nec ad alios



transire contendunt. Sic Calvinus lib. 4. Instit. c. 6. §. 8. inquit: *Iterum ut de Petro illud concedam, quod petunt, non est tamen causa, cur ex singulari exemplo universalem faciant regulam, & quod semel factum fuit, ad perpetuitatem trahant.* Lutherus de potestate Papa. Magdeburgenses in Centuriis. Synodus Smalcaldica de Papa. Græci similiter Schismatici in idem conflunt. His suppetias fert Marcus Antonius de Dominis lib. 4. de Repub. Christiana c. 6. dicens: *Nego autem, & pernego, aut ex Scripturis, aut ex traditione Apostolica, aut ex Conciliis, aut ex Patribus haberi etiam indefinite aliquem in singulari succedere Petro.* Concinunt Piceninus in triumpho c. 5. alique ejusdem furfuris homines. Contra hos stat Catholica veritas; quocirca

Probatur Conclusio quoad 1. partem 1. Non minus perpetua & firma debet esse Petra, supra quam fundatur Ecclesia, quam ipsamet Ecclesia: atqui Ecclesia jure Divino est perpetua, Matth. c. ult. v. 20. Et ecce ego vobiscum sum usque ad consummationem sæculi: ergo etiam Petra, supra quam fundatur, jure Divino est perpetua. Subsummo: sed Petra hæc jure Divino est Petrus juxta illud: *Tu es Petrus, & super hanc Petram ædificabo Ecclesiam meam:* ut in præcedentibus satis & fuisse probatum est: ergo Petrus jure Divino est perpetuus; atqui in se ipso, & gubernio personali non est perpetuus, ergo debet esse perpetuus in suis Successoribus. Hoc argumentum

Explicatur 1. Sicut se habent Apostoli ut Ecclesiæ membra ad Christum, ita se habet Petrus ut fundamentum ad Ecclesiam; sed quia Christus in Ecclesia perseverat usque ad consummationem sæculi, si *vobiscum sum* intelligitur de Apostolis in suis Successoribus tanquam Ecclesiæ membris: ergo quia Ecclesia ædificata supra petram est perpetua, si *super hanc Petram* intelligitur de Successoribus Petri.

Ex-

Explicatur 2. Christus in hac vita fuit caput Ecclesiæ visibile in externa gubernatione ; hæc gubernandi forma non est mutata post ascensionem Christi, ac proinde etiam nunc opus est visibili capite Ecclesiæ quoad externam gubernationem ; hoc caput non aliud fuit post Christum quam Petrus, cui dictum est à Christo, *pasce oves meas* ; ergo cum post mortem Petri non sit facta substantialis mutatio in regimine externo Ecclesiæ, necesse est, Petro successisse aliquem, qui eodem modo, quo Petrus, Ecclesiam gubernaret. Ergo.

Probatur Conclusio quoad 1. partem 2. Potestas ordinaria in Successores transit, ut ipsimet Novatores fatentur, ea propter concedunt, dignitatem Petri ut est particularis Romanæ Ecclesiæ Episcopus ad Successores derivari, sicut Jacobi dignitas in Jerosolymitana sede ad Successores derivatur ; atqui Pontificatus, & Primatus universalis Ecclesiæ in Petro jure Divino est ordinarius : ergo jure Divino transit in Successores. Min. prob. ex Joan. c. 21. Christus illis verbis : *Pasce agnos meos, Pasce oves meas* : Petro contulit universalis Pastoris officium, ut in præcedentibus probatum : atqui Pastoris munus indubie est ordinarium : ergo. Hoc argumentum.

Declaratur 1. In eo ordinarius Pastor à mercenario discriminatur, ut legere est Joan. 10. quod mercenarius non curat de ovibus, unde videns venientem lupum, fugit ; Pastor vero animam suam dat pro ovibus ; atqui cum Petro Christus tradidit pascendas oves, ab ipso amorem poposcit, eique mortem prædixit : ergo ipsum ordinarium inauguravit Pastorem : ergo.

Declaratur 2. Christus Petro commendavit oves suas : *Pasce oves meas* : easque declaravit in uno ovili usque in sæculum duraturas : atqui ipsi tradere non potuit pascendas oves in uno ovili usque in sæculum duraturas : ergo ipsi commendavit in Successoribus pascendas.

Probatur Conclusio quoad 1. partem 3. Synagoga, quæ fuit Ecclesiæ Pædagogæ, quovis tempore unum sortita est supremum Sacerdotem, quo regeretur: ergo Ecclesia unum semper habere debet supremum caput, quo dirigatur; si namque suprema Sacerdotalis dignitas in primo Sacerdote Aaron non expiravit, sed per carnalem propagationem ad alios derivata est; potiori jure suprema Sacerdotalis dignitas Ecclesiæ Successores habere debet: non enim melioris notæ est ancilla, quam Domina. Hoc argumentum.

Confirmatur: Synagoga Sacerdotalem successionem sortita est; quia unum necessum erat supremum tribunal, quod exurgentes lites componeret, fideique explicaret controversias, Deut. c. 17. v. 8. & seqq. atqui in Ecclesia juxta scripturarum vaticinia lites, fideique controversias exurgentes novimus, & experimur: ergo unum supremum debet semper tribunal adesse, quod eas dirimat, & explicet.

Probatur Conclusio quoad 1. partem 4. Eadem ratio, & motivum, propter quod Petro collatum fuit supremum Ecclesiæ gubernium, plane evincit quovis tempore in eadem perdurare debere. Equidem ratio unitatis postulavit præminentiam in uno Apostolorum: unde ut ait S. Hieron. lib. 1. adversus Jovinianum c. 14. *Inter duodecim unus eligitur, ut capite constituto Schismatis tolleretur occasio.* Optatus Millevitanus lib. 2. Contra Parmenianum: *In qua (Romana Cathedra) Sedit omnium Apostolorum caput Petrus - - - in qua una Cathedra unitas ab omnibus servaretur.* Cyprianus de simplicitate Prælatorum: *Hoc erant utique & Cæteri Apostoli, quod fuit Petrus, pari consortio præditi & honoris & potestatis, sed exordium ab unitate proficiscitur, ut una Ecclesia monstraretur.* Atqui Ecclesia semper una erit, in ea una fides, unum baptisma: ergo in ea semper unum supremum caput quoque erit.

Pro-

Probatur Conclusio quoad 2. partem 1. Ille legitimo jure succedit Petro in Pontificatu, qui sedem obtinet, in qua mortuus est Petrus; sed Romanus Pontifex sedem obtinet, in qua mortuus est Petrus: ergo Romanus Pontifex in Pontificatu Petro succedit. Maj. declaratur 1. quia aliquem succedere oportet, ille autem optime succedere censetur, qui sedem Antecessoris capit, quacum capit & una dignitatem: ut patet in Regibus & Monarchis sibi succedentibus, ubi Successor in plenum jus sui Antecessoris succedit. Maj. declaratur 2. Petri Successor una debet esse determinata persona, sicut ille, qui fuit Christi Vicarius una fuit determinata persona; secus forma gubernii alia foret à temporibus Christi & Apostolorum, proindeque amplius non eadem esset substantialiter Christi Ecclesia. Insuper hæc Persona ita debet esse determinata, ut hæc demonstrari ac ab aliis discerni possit; etenim una determinata persona, ut ajunt Adversarii, in genere, nec primum Ecclesiæ Regimen imitatur, nec Ecclesiæ bono inservit, cum fideles non scirent, ad quem accedere pro controversiarum decisionibus valeant. His jam suppositis sic discurrere licet: Petrus quamdiu vixit, Pontificiam habuit dignitatem propriæ personæ alligatam; ergo cum persona hæc non manserit usque ad consummationem Sæculi, reliquit sedi, in qua obiit, successionem dignitatis; siquidem successio nonnisi post mortem effectum fortitur; mors enim jus hæreditatis confirmat: & in aliis sive Ecclesiasticis, sive Politicis Successoribus solemne est, quod tribuatur loco, seu sedi per mortem consecratæ à persona habente jus, etiamsi loca mutaverit; hinc si unus Episcopus priori Episcopatu relicto ad alium transeat gradum, in eoque diem claudat extremum, successio propriè dicta ab ultimo loco denominatur. Jam subsummo: atqui Petrus Romæ obiit, ut omnes Patres ætati Petri viciniore fatentur: imo & Calvinus cum pluribus lib. 4. Instit. c. 6. N. 15. his verbis: *Propter hunc scriptorum*

*torum consensum non pugno, quin illic mortuus fuerit.* Cui concinit Marcus Antonius de Dominis lib. 4. de Repub. Christ. c. 1. n. 2. scribens : *Petrum Romæ martyrio coronatum fuisse, malo asferiri quam reluctari, ob plurimorum Sanctorum Patrum consensum.* Ergo Romanæ sedis reliquit successionem dignitatis ; cum enim aliquem succedere sit necesse, ne Regimen Ecclesiæ Christi mutetur, si non sui personam loco, saltem in locum personam succedentem relinquere debuit Petrus, ut Christi adimpleat intentionem, & Ecclesiam in eo statu relinquat, in quo fuit à Christo tum instituta tum relicta, per Petri gubernium continuanda, tum ab ipso Petro Romanis Pontificibus successoribus in eadem forma Regiminis relinquenda. Ergo.

Quod autem Romæ potius quam alibi successionem reliquerit Petrus: probatur 1. Illi sedis successionem Petrus alligavit, quam ipse sibi elegit ; atqui elegit Romanam, velut innuit epist. 1. c. 5. v. 13. *Salutat vos Ecclesia, quæ est in Babylone coelecta.* Ubi pro Babylone Roma intelligitur : nam sicut illa olim orbis extitit debellatrix prope universi, ita nunc Roma: uti sentit Hieron. de Scriptor. Ecclesiast. in Marco. Eusebius lib. 2. Hist. Eccles. c. 14. Et S. P. August. lib. 18. de Civit. Dei c. 22. Evangelista quoque Joannes in Apocal. c. 7. v. 5. Romam appellat Babylonem magnam, ut legere est apud Tertul. adversus Judæos c. 9. Item *Collecta* legunt codices, sed emendatiores legunt *coelecta*, id est, sibi electa, ut habet Cajetanus. Hinc autem semel assumptam Petrus nec vivens, nec moriens mutavit. Ergo. Probatur 2. Illi sedis Petrus successionem alligavit, cujus fides per universum orbem prædicatur, atque infallibilitatis gaudet privilegio ; sicut etenim à fonte tanquam à fundamento omnes oriuntur Scaturigines, ita illi fonti affixa est principaliter fontalis fides, à quo per orbem universum derivantur fidei Scaturigines, unde sicut fons habet infallibilitatem omnium Scaturiginum, ita fides Romana (si fons est) omnium



omnium Scaturigo, & fons infallibilis aliorum Christi fidelium est. Atqui fides Romanæ sedis ubique terrarum prædicatur testante Apostolo ad Rom. c. 1. v. 8. *Fides vestra annuntiat in universo mundo:* & habet infallibilitatis privilegium ut habetur Lucæ c. 22. v. 32. *Ego rogavi pro te, ut non deficiat fides tua, & tu aliquando conversus confirma fratres tuos.* Ergo Petrus Romæ successionem alligavit.

Dicit Marcus Antonius de Dominis: *Eo sane modo, quo Petrus fuit Romanus Episcopus, fuit etiam Antiochenus, & infinitarum Ecclesiarum, quas ipse fundavit, & in quibus ipse actu suum exercuit Apostolatum, sive Episcopatum: non minus igitur erunt Petri Successores Antiochenus & alii, quam Romanus. Sed*

Contra est.: Nam non dicendus est is illius Sedis Episcopus, quam reliquit, sed ejus, ad quam translatus est, atque in ea ad mortem usque perseveravit. Petrus Antiochenæ Ecclesia fuit Episcopus, sed pro tempore, nam ea Evodio commendata, Romanam ex post suscepit gubernandam: igitur Antiochenam sedem deferens, etiam illius quoque Episcopus esse desiit: atque illius sedis Episcopus evasit, quam Deo jubente usque ad obitum administravit, quæ fuit sedes Romana: unde in ea successionem reliquit post mortem suam. Aliud dein est Petrum plurium Ecclesiarum institutorem fuisse: aliud earundem fuisse Episcopum: institutio absque perpetua Episcopatus functione successionem non postulat, imo successionem expellit: solus Episcopatus cum perpetua ipsius functione conjunctus successionem in propria Ecclesia collocat. Petrus quidem Antiochenus aliquando Episcopus fuit, verum Antiochenam sedem in Romanam mutavit. Alexandrinam vero non per se, sed Marci opera constituit, sed in ea Episcopatum non gessit. In quibus proinde Ecclesiis successionem sibi comparare non potuit, sed in sola Romana, in qua usque ad mortem Episcopus permansit.

L I

Dicit:

Dicit 2. Idem Hæreticus: Dicant mihi obsecro, ut aliqua sedes ex multis, quas habuit Petrus, dicatur, & sit vera sedes Papalis, hoc est, firma & fixa Petri ab eo non amplius mutanda, aut transferenda, quid necessario requiritur? factum solum Petri, ut illa sit sedes Papalis, in qua Petrus sedens vitam suam finiat? an intentio & voluntas sola Petri, ut illa sit Papalis, quam, ipse sibi certam elegisset uti ipsius propriam, & non amplius in sua intentione mutandam? an & factum & intentio? factum profecto solum nihil facit: nam etiam concedente Bellarmino, merum accidens fuit, quod hic mortuus fuerit, & non ibi. Si sola sufficit intentio & electio, præsentia vero non sit necessaria: quomodo probabunt ex intentione Petri Antiochenam Ecclesiam non fuisse ab eo, electam in Papalem? si necessarium fuit utrumque, hoc est, & factum & intentio: sicut defuncto utrumque possumus admittere, Petrum & Romæ fuisse, & Romæ mortuum, ita de intentione ipsius non possumus nisi divinare. Sed

Contra: Intentio utique & factum insimul requiruntur: sed intentio ex facto apprime dignoscitur. Petrus Antiochenam reliquit Ecclesiam, ad Romanam se contulit, in ea Episcopatum per 25. annos gessit, hanc nusquam mutavit, dein in eadem extremum diem obiit. Quid ultra desiderari potest, ut Petri intentio innotescat? quid clarius ad dignoscendam Papalem sedem esse Romanam? non nos, sed Hæreticus in his non nisi divinat. Ergo.

Dicit 3. Idem Hæreticus: c. 6. n. 8. *Etiam si ex Divino jure successionis deberet aliquis Petro succedere in Primatu Ecclesiæ, adhuc tamen negandum esse, Romanum Pontificem fore Petri successorem.* Sed

Contra: Aliquis jure Divino debet succedere Petro in Primatu: ergo si Pontifex Romanus non, quod omnes antiqui Patres affirmant tamen eum succedere: ergo alius, quod hactenus nemo unus antiquorum Patrum dixit: ergo quis erit Successor? designetur ab hoc Hæretico: si potest ab eo designari?

nari? si dicat: unde constat Romanum Pontificem debere esse hunc Petri Successorem? Respondeo ex perpetua traditione, quam accepimus ab antiquis conciliis & Patribus, uti referemus. Præterea ex nostra proba adducta, si reponat: unde constat, jure Divino Romanum Pontificem debere succedere Petro? respondeo ex eo: cum enim Christus semel instituerit in Petro, ut Ecclesia gubernaretur ab uno visibili capite, seu Pastore loco Christi, necessum est, ex vi illius institutionis, ut moriente uno Pastore, succedat alius in ejus locum, velut in testamento veteri factum est, ut habet Paulus ad Hebræ. c. 7. v. 23. Alioquin nisi alter alteri succederet, non servaretur institutio Christi, qua voluit, ut Ecclesia usque ad consummationem sæculi haberet unum visibilem Pastorem loco sui, cui diceret, quod Petro dixit: *pascite oves meas*.

Probatur Conclusio quoad 2. partem 2. Auctoritate summorum Pontificum, quos ipsimet Hæretici venerantur, & pro sanctis declarant, utpote eorum sæculorum, in quibus (juxta placitum Hæreticorum) fides primæva incorrupta permanfit, & ab ea Ecclesia universa non defecit; ut saltem illi fidem faciant contra sentientibus, quos ipsimet venerantur ut Sanctos. S. Julius I. in epist. ad Orient. quæ extat in Apol. 2. S. Athanasii ita loquitur: *An ignari estis hanc esse consuetudinem, ut primum nobis scribatur, ut hinc quod justum est, definiri possit? quapropter si isthic ejusmodi suspicio in Episcopum concepta fuerat, id huc ad nostram Ecclesiam referri oportuit. Et infra: quæ accepimus à B. Petro Apostolo, ea vobis significo, non scripturus alioqui, quæ nota apud vos esse arbitror.* Quibus verbis indicat, causas Episcoporum ad se pertinere, & hoc jus à B. Petro se accepisse, atque id omnibus notum esse. Auctor certe est sanctus, & vetustissimus: epistola certa, & à S. Athanasio tota descripta: verba illius perspicua & clara, adeoque de veritate non dubitandum: mirum quod tamen Hæretici cæcutiant. S. Damasus in Epist. 4.

ad Episc. Numid. inquit. *Cuncta, quæ possunt aliquam recipere dubitationem, ad nos tanquam ad caput, ut semper fuit consuetudo, deferre non desinatis.* S. Innoc. in Epist. 22. ad Episc. Maced. docet: *Adverti, sedi Apostolicæ, ad quam relatio quasi ad caput Ecclesiarum missa currebat, fieri injuriam &c.* Item idem in epist. ad Concil. Carthag. quæ est 91. Romanam sedem dicit esse, *Fontem & caput omnium Ecclesiarum.* Leo Papa serm. 1. de Natali Apost. his verbis Romanam alloquitur urbem: *Per sacram Beati Petri sedem caput orbis effecta latius præsideres Religione Divina, quam dominatione terrena.* S. Gelasius in epist. ad Episc. Dard. ait: *Cuncta per mundum novit Ecclesia, quoniam quorumlibet sententiis ligata Pontificum, sedes B. Petri Apostoli jus babeat resolvendi, utpote quæ de omni Ecclesia fas babeat judicandi, neque cuiquam de ejus liceat judicare iudicio.* S. Gregorius Magnus l. 7. Epist. 63. ad Joan. Episc. Syracus. inquit: *De Constantinopolitana Ecclesia, quis eam dubitet sedi Apostolicæ esse subiectam? quod & Dominus piissimus Imperator, & frater noster Eusebius ejusdem Civitatis Episcopus assidue profitetur.* Et in epist. 64. ad eundem: *Nam quod se dicit sedi Apostolicæ subijci, si qua culpa in Episcopis invenitur, nescio, quis ei Episcopus subiectus non sit &c.* Nil clarius certo pro dignitate Romani Pontificis dici potest. Ergo.

Dicunt Magdeburgenses: Innocentium citatum nimis multum sibi arrogare, quocirca eum per contumeliam Nocentium vocant. Ast si ita est: cur veteres Patres hunc Innocentii errorem non reprehenderunt? cur S. P. Augustinus in epist. 106. ad Paulin. de his duabus epistolis Innocentii loquens ait: *Ad omnia ille nobis rescripsit eodem modo, quo fas erat, atque oportebat Apostolicæ sedis Antistitem.* Cur ibidem S. Pater August. Innocentium Beatæ memoriæ Papam appellat? contumeliose ergo Magdeburgenses hoc affingunt Innocentio Papæ.

Dicit etiam Calvinus lib. 4. Inst. c. 7. n. 12. Gregorium à nobis citatum tribuisse sibi jus corrigendi alios, non autem  
 paru-

paruisse ei nisi illos, qui volebant. Ast hoc est temerarium dictum ! nam Gregorius Sanctissimus & humillimus fuit, quocirca etiam Græci ejus diem festum colunt; & ipsemet Calvinus loc. cit. num. 22. Gregorium Virum Sanctum fuisse fatetur: non potest autem cum sanctitate consistere usurpatio juris alieni. Neque etiam esset macula venialis, injuste sibi subicere omnes Episcopos, sed intolerabilis superbia: quomodo igitur Gregorius Sanctus erat, si omnes Episcopos sibi injuste subjecit. Ergo.

Probatur Conclusio quoad 2. Partem 3. Auctoritate & statutis Principum, quæ clare contestantur Romanum Pontificem Successorem Petri. Imperator Justinianus novel. 131. ait: *Decernimus secundum Sacrarum Synodorum decreta Sanctissimum Veteris Romæ Episcopum primum esse omnium Sacerdotum.* Ubi bene advertendum est, Imperatorem non proprio Marte, & ex certa scientia id decernere; sed id statuit secundum Sacrarum Synodorum Decreta, & declarationes perpetua traditione conservatas. Lotharius in epist. ad Adrianum II. anno 868. dicit: *Quia Deus Omnipotens Princeps Pastorum in illa Sancta sede Vestri Pontificatus apicem sublimavit, vestrum multipliciter desideramus conspectum.* Carolus Magnus l. 5. leg. Francic. cap. 167. habet: *Quantum pertinet ad hujus temporis vitam, in Ecclesia nemo Pontifice potior, & in Saeculo Christiano Imperatore nemo celsior invenitur.* Ecce quam bene Rex jura spiritualis & politicæ jurisdictionis distribuat. Leo Imperator Græcorum apud Ignatium Fiumi lect. 5. clare edicit: *Unde manet usque in hodiernum diem Petrus sequens Christum in suo Successore.* Michael Palæologus Græcorum Imperator Anno 1272. in epist. ad Gregorium X. ita scribit: *Sanctissimo ac Beatissimo Patri, & summo Pontifici, Apostolicæ sedis Universalis Papæ, & communi Principi Christianorum, Omnium Venerabili Patri Imperii nostri D. Gregorio, Michael à Christo Deo fideliter Rex, & Imperator Græcorum.* Ex quibus omnibus



*Apostolicam sedem sequimur, & ei obedimus, & ipsius communica-  
tores, communicatores habemus, & condemnatos ab ipsa, & nos con-  
demnamus. Si ergo totum Concilium sedi Apostolicæ obedire  
se profitetur, certe Apostolica sedes toti Ecclesiæ cum autho-  
ritate præest. Septima Synodus act. 2. recipit, & probat Adria-  
ni epistolam ad Tharasium, in qua hæc habentur: Cujus sedes  
per totum terrarum orbem primum obtinens lucet, omniumque Ec-  
clesiarum Dei Caput existit. Unde & ipse B. Petrus Apostolus Dei  
jussu Ecclesiam pascens, nihil omnino prætermisit, sed ubique Princi-  
patum obtinuit, & obtinet. Ergo cum Hæretici ipsi in veram  
Ecclesiam, ac horum Sæculorum Concilia compromiserint, ho-  
rum inquam Sæculorum, in quibus juxta ipsos fides integra  
& inviolata, & primæva fuit: compromittere quoque necessi-  
tantur in dicta, & statuta Conciliorum, eaque admittere ne-  
cessitantur, & sic proprio ipsorum judicio condemnati manent,  
& veritas nostra Catholica ipsis testibus triumphum canit,  
Ergo.*

Probatur Conclusio quoad 2. partem 5. Autoritate Pa-  
trum primorum Sæculorum (in quibus juxta Adversarios te-  
stes fides mansit incorrupta) Hi unanimi consensu docent, Ro-  
manos Pontifices esse Petri Successores, tam Græci, quam La-  
tini. Optatus Milevitanus l. 2. Contra Parmenianum hæc ha-  
bet: *Petro successit Linus, Lino Clemens, Clementi Anacletus &c.*  
S. P. August. epist. 165. ad Generosum ait: *Si ordo Episcoporum  
sibi succedentium considerandus est, quanto certius, & vere salubri-  
ter ab ipso Petro numeramus, cui totius Ecclesiæ figuram gerenti Do-  
minus ait: supra hanc Petram ædificabo Ecclesiam meam: Petro enim  
successit Linus, Lino Clemens, Clementi Anacletus, Anacleto Eva-  
ristus &c. Philippus Presbyter in Concilio Ephesino c. 16. hæc  
dixit: Nulli dubium, imo Sæculis omnibus notum est, Sanctum Pe-  
trum Apostolorum Principem & Caput, Ecclesiæ Catholicæ fundamen-  
tum, per Successores suos hucusque semper vivere, causasque decer-  
nere,*

*Objectiones Contra I. partem Conclusionis.*

I. **Q**Uæ sunt de credibilibus fidei, ex S. Scripturis depromenda sunt: sed ex eisdem nequaquam habemus successivum fore Petri Primatum: ergo Pontificatus Petri jure Divino non habet Successionem.

II. Si ista verba: *Tu es Petrus, & super banc Petram ædificabo Ecclesiam meam*: Petro dicta essent in suis Successoribus: sequeretur, etiam ista Verba ad Petrum dicta: *Vade post me Satana*; Petro dicta fuisse in suis Successoribus: sed hoc nullus dicit: ergo nec illud.

III. Id per quod Pastor à Mercenario discriminatur, ad munus Regiminis indubie spectat: atqui dilectio, sicut & animam ponere pro ovibus, Pastorem à Mercenario distinguit: ergo dilectio, sicut & animam ponere pro ovibus, ad munus Regiminis spectat: subf. sed si sic, etiam ad Successores transire deberet: unde præ aliis charitatem habere deberent, atque pro Christo vitam fundere & pro ovibus: cujus tamen oppositum videmus; ergo.

IV. Firmitas fidei est certo certius essentialis conditio Primatus Petri: sed hæc ad Successores non transit: cum ex his nonnulli fidem negaverint: ergo.

V. Fides Petri firmat fratres post lapsum: ergo Petri Successores labi prius deberent, ut aliquando conversi fratres suos confirmarent.

VI. Sicut Petro dictum est, *pasce oves meas*: ita cæteris Apostolis dictum est, *sicut misit me Pater, & ego mitto vos*; atqui hoc non convenit Successoribus Apostolorum, cum Apostolatus successionem careat: ergo & illud non conveniet Successoribus Petri.

VII. Petri sedes Apostolica nuncupatur: atqui Petri Apostolatus non habet successionem: ergo neque ipsius sedes.

Mm

VII.

VIII. Quod singulariter uni dicitur , ad plures non extenditur: atqui Petro singulariter dictum est, *Tibi dabo claves*: ergo ad Successores nequaquam extendi valet.

IX. Dicta Petro: *Tibi dabo claves*, ad alios adstantes Apostolos non extenduntur: alias omnes Apostoli praesentes fuissent Pontifices; ergo fortiori jure ad absentes & futuros non extenduntur: alias omnes Apostoli praesentes fuissent Pontifices; ergo fortiori jure ad absentes & futuros non extenduntur.

X. Dignitas Petri ea erat , ut quidquid scriberet, & diceret, haberetur ut Spiritus S. Oraculum, & veritatis Canon; atqui privilegium hujusmodi defuncto Petro nulli debetur: ergo nec ejus dignitas: ergo Primatus Petri in alios non derivatur.

XI. Pastoralis dignitas Ecclesiae universalis utpote ordinarii juris excellentior censenda est quam dignitas Apostolatus, quae juris est delegati; ergo si Petrus ut Apostolus Canones exarabat, etiam ut Pastor eosdem condere poterat: cum ergo haec praerogativa ad Successores non transeat, neque pastoralis dignitas ad Successores transibit.

XII. Verbum Dei Ecclesiis omnia communia fecit, fidem, baptismum, Sacerdotium, gratiam, Sacramenta, gloriam &c. ergo idem Dei verbum, quod omnibus commune est, uni Successori Petri dominativam non confert potestatem.

## S O L U T I O N E S.

**A**D I. Dist. min. sed ex iisdem non habemus expresse, conc. min. æquivalenter, neg. min. Materialis expressio successionis in scripturis non invenitur: sed nec exigitur: alias cum neque literaliter in scriptura habeatur successio peculiaris Episcopatus, neque baptismum sub Sacramenti nomine regenerationis

onis mysterium exprimatur: etiam peculiaris Episcopatus non erit succesivus, nec baptismus inter Sacramenta recensendus: satis ergo est, ut æquivalentia habeantur. Hæc autem habentur; nam Christus suam Ecclesiam non instituit pro brevi aliquo, quo S. Petrus vixit, tempore, sed instituit illam ut duraturam usque ad finem mundi: ergo debuit ipsi pro omni futuro tempore providisse de aliquo supremo capite, & Rectore universali: ergo divus Petrus debuit semper successive habere aliquem successorem in Primatu, seu in supremo totius Ecclesiæ Regimine; siquidem Ecclesia post Christi & Petri tempora semper indiguerit, indigeatque supremo visibili capite, & Rectore universali, cum semper possint nasci hæreses, & oriri Controversiæ fidei, quæ absque supremo Iudice dignosci, atque decidi nequeunt: & oves semper indigeant Pastore.

Ad II. neg. seq. maj. Ad successores enim solum transeunt, quæ ad pastorale munus pertinent, secus quæ ad personalem conditionem referuntur. Porro potestas gubernativa proprie pastoralis muneris dos est, ideo ad successores transit. Ignorantia vero in peculiaribus quibusdam mysteriis, sicut & animi alienatio à Divinis, ab officio Pastoris aliena sunt, & hinc necesse non est ad Successores transire: & hujusmodi sunt ea, ob quæ Petrus à Christo increpatus fuit; non enim plene intelligens Passionis mysterium, atque plus justo præsentia Christi adhærens, Dominum à morte perperam retrahere satagebat.

Ad III. In opere Pastoris duo contineri, potestatem nempe & rectitudinem, sicut quædam ad valorem, quædam ad rectitudinem spectare. Quæ ad valorem spectant, substantialia sunt, & in Successores dimanant; quæ ad rectitudinem spectant, non sunt essentialia, unde nec in Successores formaliter, sed tantum fundamentaliter transeunt, quatenus transit debitum munus suum recte exercendi. Dilectio, seu status charitatis ad rectitudinem spectat, quæ fundat debitum exigens animi præparationem

M m 2

pro

pro morte subeunda urgente necessitate; adeoque quæ à Christo dicta fuere Petro, suo etiam modo Successoribus communia sunt.

Ad IV. Fidei firmitatem duo dicere, infallibilitatem in docendo, & constantiam in confitendo. Primum est essentiale muneri, & ad Successores transit. Alterum non est munus essentiale, sed actionis rectitudinem dicit, ideoque transit quoad obligationem, qua quilibet Petri Successor tenetur fidem exterius opportuno tempore confiteri.

Ad V. neg. Conseq. Non enim est necesse, quemlibet ex Successoribus deficere, ut Fratres in fide corroborare valeat; lapsus enim Petri fuit personalis.

Ad VI. In Apostolo considerandam occurrere & Apostolatus & Episcopatus dignitatem. Apostoli successionem habent in Episcopatus dignitate particularis Ecclesiæ, quia ordinarii juris est; secus in dignitate Apostolatus, quæ est delegata, ut clare innuit Paulus 2. ad Corinth. c. 5. v. 20. *Pro Christo legatione fungimur*. In Petro Pastoris universalis dabatur dignitas, quæ utpote juris ordinarii ad Successores transire debet. Apostoli etiam dignitas dabatur in eo, sed hæc Successionem non habet.

Ad VII. Petri sedem dupliciter dici Apostolicam, denominative & proprie. Quatenus fundata est à Principe Apostolorum, denominative Apostolica nuncupatur; in proprietate autem, quatenus eminenter in ordinario universalis Pastoris munere omnem Apostolatus excellentiam præcontinet, puta jurisdictionem in totam Ecclesiam, jus prædicandi Evangelium ubique terrarum, & hujusmodi. Quoniam vero in jure ordinario Episcopi peculiaris Ecclesiæ eminenter non continetur prærogativa Apostolatus, ideo Apostoli nec formaliter, nec eminenter in Apostolatus munere successionem sibi vendicant; secus in munere Episcopali.

Ad



Ad VIII. Quod uni dicitur non ut particulari personæ, sed tanquam Pastori alios continenti, optimo jure ad Successores derivatur. Equidem singulariter Christus Petro claves donavit, sed eum Pastorem Ecclesiæ universalis constituendo: eapropter in eo muneris ratio per se primo attenditur, quæ cum non sit personalis, merito Successoribus accomodatur.

Ad IX. Adstantes Apostolos tanquam ordinarios Præsules totius Ecclesiæ in Petro non contentos esse, sed solummodo tanquam oves; non enim Petri Successores deputati sunt. Successores autem licet absentes eadem muneris forma inaugurandi erant, propterea in Petro continebantur.

Ad X. Quod scripta Petri, ejusdemque doctrina Canonica sint, privilegium est Apostolatus aliis Apostolis commune: his à Patre in nomine Filii datus est Spiritus S. qui omnem doceret veritatem: & ideo quia fundamentales erant Petræ Ecclesiastici ædificii, per os ipsorum loquebatur Deus. Extructo jam hoc ædificio super fundamentum Apostolorum novi articuli fidei non conduntur, nec revelationes novæ necessariae sunt, quia tamen fides Petri ut Pastoris debet fratres confirmare, remanet propterea in Ecclesia potestas infallibilis declarandi, atque interpretandi Scripturarum Canones.

Ad XI. Secundum se jus ordinarium in aliquod munus excellentius esse jure delegato. Cæterum ratio, cur Petrus ut Apostolus oracula scriberet, ea sane est, quia insimul cum aliis Apostolis erat Ecclesiæ fundator. Verum ut Pastor ovile Christi regebat. Successores cum Rectores sint non fundatores, privilegium canonice scribendi non habent.

Ad XII. Lutheri Argumentum pro nobis concludere. Etenim divinæ sapientiæ ordinatio, quæ omnes Ecclesias in fide eadem, iisdemque Sacramentis Communicantes constituit, exposcit, ut unus omnium supremus esset Pastor: quemadmodum omnes simul unum efformant ovile, cui invigilando utique non

est uni particulari Ecclesiæ deservire, sed omnibus; adeoque illa Successori Petri collata dominatio communis est, id est, communi utilitati concessa.

### *Objectiones Contra 2. Partem Conclusionis.*

I. Si S. Petrus habuit aliquem Primatum, aut quamdam inter cæteros Apostolos eminentiam, hoc privilegium nonnisi personale erat; atqui privilegium personale non transit ad Successores: ergo neque primatus Petri transit ad Successores. min. Satis constat, quia privilegia personalia expirant cum persona. maj. vero prob. Si S. Petrus habuit aliquam eminentiam, hæc ipsi aliter non est collata, quam in præmium, quod Christum confessus fuerit Filium Dei, illumque se diligere ter affirmaverit; ergo sicut confessio Divinitatis, & amoris tantum personalis fuit, ita & præmium, quod propterea Petrus accepit, tantum personale erat. Subs. atqui hoc præmium consistebat in illis verbis: Tu es Petrus, & super hanc Petram &c. Tu pasc oves meas; Tu confirma fratres tuos. Ergo si qua Petri eminentia per hæc verba collata fuerat, ea tantum personalis fuit, adeoque non transitura ad Successores.

II. Si Primatus Petri transiret ad Successores, sequeretur, quod quivis Successor Petri potestatem clavium acciperet immediate à Christo, sicut Petrus eam accepit; atqui hoc manifeste non subsistit, cum notum sit, ejusmodi Successorem eligi ab Ecclesia; à qua proin, non vero à Christo immediate accipit potestatem, si quam accipit: ergo.

III. Tota ratio, cur Primatum Petri ad Successores transire contendunt Papistæ, in eo hæret, ne Ecclesia unquam careat Pastore, & Capite visibili; atqui hæc ratio prorsus nulla est; ergo. min. prob. Negari non potest, Sedem, quam S. Petri vocant, jam sæpius per longissimum tempus Capite & Pasto-

Pastore caruisse ; sic post S. Fabianum vacavit mensibus 16. Post Honorium I. 19. mensibus. Post Paulum I. 12. mensibus. Post Cælestinum IV. mensibus 20. Post Clementem IV. mensibus 33. Post Nicolaum IV. mensibus 27. Et post Clementem V. mensibus 24. Ergo Ecclesia potest carere Capite & Pastore visibili : ergo illa ratio est nulla.

IV. Romanus Episcopus non succedit S. Petro in Apostolatu : ergo neque in Primatu ; conseq. prob. Primatus, si quem habuit Petrus, erat connexus cum Apostolatu : ergo.

V. Quamvis S. Petrus se nomet Apostolum & Compresbyterum, nusquam tamen se dicit Episcopum Ecclesiæ Romanæ ; ergo Romanus Episcopus non est Successor Petri.

VI. Petrus immediate fuit vocatus à Christo, Pontifex Romanus immediata vocatione destituitur. Petrus Alexandriæ & Antiochiæ Episcopos ordinavit : atqui hoc Romano Pontifici non permittitur : ergo.

VII. Dato Petrum Romæ Cathedram habuisse, illam tamen Pontifex Romanus nunquam conscendit ; nam Petrus fuit Præco Evangelii, Pontifex Romanus docendi officium in aliorum humeros rejicit ; ergo. Ita novissime Hæreticus aliquis nomine *Hollazius* argumentatur. Qui & ulterius pergit obijciendo.

VIII. Pontifex Romanus neque in doctrina, neque in vita & moribus succedit S. Petro ; ergo. ant. prob. Non in doctrina, quia in plurimis sane articulis ab eo recedit, contrarium docendo. Non in vita & moribus : quia Pontifex est auri cupidissimus, cum tamen sanctus Petrus dixit : *aurum & argentum non habeo* Act. c. 3. v. 6. Pontifex gemmis & auro se ornat, quod non fecit Petrus. Pontifex damnat conjugium Clericorum, in quo tamen vixit Petrus. Multi Pontifices Romani fuerunt impii, Scortatores, cædium & bellorum auctores ; Petrus vero econtra pius, Sanctus, & honestus ; ergo.

IX.

IX. Sæpe fuit electus in Episcopum Romanum, qui plane non idoneus erat officio Capitis, & Summi Sacerdotis muneris in ordine ad universam Ecclesiam. Enimvero historia Pontificum docet, non paucos ad Romanam Cathedram evectos esse, qui ne quidem S. Ordinibus initiati erant, uti *Benedictus XI.* qui puer ferme decennis in Pontificem assumptus fuit. *Joannes XIX.* qui ex Laicali ordine repente constitutus est Præsul Romanus. *Joannes XII.* qui Pontificatum usurpavit vix annos undeviginti natus. Atqui non est verisimile, quod Christus ejusmodi subjecto incapaci supremam suæ Ecclesiæ curam velit committere; ergo.

X. Sunt ex Romanis Episcopis plures, qui ad Pontificatum sibi viam straverunt pecuniis, factionibus, & nescio quibus aliis modis, artibus, & Consiliis: uti sunt jam nominatus *Joannes XII.* qui malorum Consilio urbis Papa effectus est. *Joannes XIX.*, qui largitione pecuniæ Pontificatum obtinuit. *Benedictus IX.* qui à Patre Tusculano Comite intercedente thesaurorum pecunia sedi Romanæ impositus fuit. *Gregorius VI.* qui Pontificatus honorem pecunia emit à *Benedicto IX.* *Stephanus VII.* qui per Adalbertum Tusciæ Marchionem potentissimum quali vi intrusus fuerat. Demum *Vigilius*, qui per Theodoram Imperatricem, cui sponderat, quod Eutichianos hæreticos tueri velit, illicitis prorsus promissis & viis ad Pontificatum venerat. Atqui quis credat, quod Christus tales homines, viisque tam illicitis pro Ecclesiæ suæ supremo capite, suoque in terris Vicario agnoscere velit. Ergo.

XI. Verum Ecclesiæ Caput debet corpori mystico vitam, motum, sensumque largiri, membrorum spiritualium ordinem Sancire, & tueri, eorum necessitates cognoscere, preces exaudire, difficultatibus consulere; atqui tale Ecclesiæ Caput est solus Christus: ergo non Romanus Papa. Ita iterum citatus jam Hollazius.

XII.

XII. Si Romanus Episcopus succederet S. Petro in Primatu, tunc sequeretur, quod etiam fœmina posset esse caput Ecclesiæ, & Universalis Pastor; atqui hoc est inconueniens, & Christo maxime indignum; ergo. seq. maj. prob. Sæculo IX. Sedit Romæ sub nomine *Joannis VIII.* fœmina in throno Episcopali: ergo.

XIII. Cum Sæculo XIV. Sedes Pontificia Avennione in Gallys hæsit, per 70. annos successerunt in Primatu Præsules Avennionenses, nimirum *Joannes XXII. Benedictus XII. Clemens VI. Innocentius VI. Urbanus V. Gregorius XI.* Ergo jus succedendi S. Petro in Primatu, non convenit soli Romano Episcopo.

XIV. Nullibi in S. Scriptura legitur, quod S. Petrus iustus fuerit Romæ exigere Cathedram Primatus: ergo non apparet, quomodo Romanus Episcopus ex jure Divino succedat S. Petro in Primatu.

XV. Quod Romanus Episcopus succedat S. Petro in Primatu, unice dependet à factò humano, scilicet Petri, quod Romam libere elegerit pro sede sua. Ergo sicut hoc factum non fuit juris Divini, ita nec illud est juris Divini, quod in hoc factò fundatur, scilicet Successio Episcopi Romani in Primatu.

XVI. Totus Primatus, quem Romano Episcopo vendicant Papistæ, est Primatus tantum honoris, qui ei ob eminentiam urbis Romæ concessus fuit, quemadmodum habetur ex Concilii Nicæni Can. 6. cujus verba sunt: *Antiqua consuetudo servetur per Ægyptum, Lybiam, Pentapolin ita, ut Alexandrinus Episcopus horum omnium habeat potestatem, quia & Urbis Romæ Episcopo hoc consuetum est. Similiter in Antiocchia, & cæteris Provinciis sua privilegia & dignitates Ecclesiis serventur.* Ita citatus Hol-lazius. Qui exinde infert: ergo si primatus non est juris divini, quomodo Successio Romani Episcopi in primatu erit juris Divini.

N n

XVII.



XVII. Romanus Episcopus primatum jurisdictionis in universam Ecclesiam primum à tempore Imperatoris Phocæ ad initium Sæculi VII. usurpare cæpit; & Bonifacius III. tunc temporis Romanus Episcopus erat ille, qui à dicto Imperatore homine sceleratissimo hunc potestatis Primatum in universam Ecclesiam sibi confirmari petiit, nec sine dolo obtinuit. Quippe cum Phocas ob cædem Mauritiî Imperatoris acriter ab Episcopo Constantinopolitano corripere, Bonifacius ferro dum calet utendum ratus, Phocam contra Episcopum Constantinopolitanum defendit, ejusque facinus probavit; quamobrem à Phoca Primatum obtinuit. Ergo Papa non à Christo, sed à Parricida caput & Monarcha Ecclesiæ est constitutus. Ita infamiter arguit Hollazius.

XVIII. Præprimis, quia usque ad Constantinum M. in historia Ecclesiastica nihil reperitur de visibili capite Ecclesiæ. Prioribus tribus sæculis, ubi Ecclesia graves perpeffa est persecutiones, Episcopi se pro æqualibus agnoverunt. A tempore autem Constantini M. Ecclesia gubernata est per Patriarchas, Metropolitanos, & Episcopos. Metropolitanî sacris præerant in Provinciæ Metropoli, & erant quinque: *Romanus, Constantinopolitanus, Alexandrinus, Antiochenus, & Hierosolymitanus*; inter quos tamen *Romanus* ob urbis eminentiam Primatum honoris acceperat. Ergo. Ita idem Hollazius.

XIX. Zosimus Pontifex, ejusque Successores *Bonifacius I. & Cælestinus I.* dominatum in Ecclesiis Affricanas affectarunt; at Patres Affricani tam mascule sua jura & libertatem defendebant, ut Pontifices ob eorum factum palam increparint: ergo. Ita vere Calumniosus Hollazius.

XX. Si Petro in Primatu Succederet Romanus Pontifex, deberet habere eandem jurisdictionem & potestatem, quam Petrus: atqui hoc non videtur admittendum: ergo. min. prob. Si hoc admittatur, etiam admitti deberet, quod immediatus  
 Suc-

Successor Petri, nempe Linus fuerit superior reliquorum adhuc viventium Apostolorum : atqui hoc non videtur admittendum : ergo.

XXI. Nullus ex Apostolis viventibus Petro successit in Primatu : ergo neque alius etiam Romanus Episcopus.

XXII. Ideo juxta Papistas deberet continuo aliquis succedere in Primatu Petri, quia eum exigit bonum Ecclesiæ, cum Pontifex sit propter Ecclesiam, non Ecclesia propter Pontificem, sed hæc ratio non urget : ergo. min. prob. Etiam prophetæ erant propter Ecclesiam : qui tamen sibi continuo non succedunt : ergo etiam.

XXIII. Posita etiam successione, tamen necessarium non est, ut tantum unus succedat in solidum, sed possunt etiam esse multi : sicut etiam Imperium politicum esto primitus constitutum sit in uno, tamen successive partitum est in duo, nempe in Orientale, & Occidentale, in personis Valentis, & Valentiniani : ergo.

XXIV. Ideo Episcopus Romanus est successor Petri, quia Petrus Romæ gessit Pontificatum, & inibi mortuus est : sed hæc ratio est nulla : ergo. Moyse & Aaron in deserto mortui sunt Pontificatum gerentes : & tamen sedes Pontificatus Judaici non semper manlit in deserto. Imo Christus summus Christianorum Pontifex obiit Jerosolymis : ergo ibi, non Romæ sedes Pontificalis Christianorum esse deberet. Ergo etiam.

XXV. Solus Christus pro novo testamento fuit figuratus per Aaronem, qui fuit Monarcha, Primas, & Rector Synagogæ ; ergo solus Christus est totius Ecclesiæ Monarcha, Primas, & Rector ; ergo nec Petrus talis fuit ; ergo nec Romanus Pontifex in Primatu Petro succedit. ant. prob. Christus illam figuram in se ipso jam explevit ; ergo ob figuram veteris testamenti non est necessarius Rector in novo testamento, qui sit præter Christum figuratus per Aaronem : ergo. Ita Calvinus L. 4. Inst. c. 6. §.

N n 2

XXVI.

XXVI. S. Gregorius M. lib. 4. epist. 32. recusavit dici *universalis Episcopus*: imo hunc titulum lib. 6. epist. 30. acriter improbat his verbis: *Ego fidenter dico; quia quisquis se universalem Sacerdotem vocat, vel vocari desiderat, in elatione sua Anti-Christum præcurrit, quia superbiendo se cæteris præponit.* Et in Epist. 32. ad Mauritium Imperatorem scribit: *S. Petro cura totius Ecclesiæ & Principatus committitur, & tamen universalis Apostolus non vocatur.* Unde etiam can. primæ sedis. 3. dist. 99. ex Concilio Africano ita statutum refertur: *Primæ sedis Episcopus non appelletur Princeps Sacerdotum, ve' summus Sacerdos, aut aliquid huiusmodi, v. g. universalis Episcopus, sed tantum Primæ sedis Episcopus.* Atqui si Romanus Pontifex succederet Petro in Primatu, esset universalis Episcopus: ergo.

XXVII. Pontifices agnovere Imperatores ut suos Superiores: ergo Pontifices Romani non succedunt in Primatu Petri. ant. prob. S. Gregorius lib. 2. epist. 61. vocat Imperatorem *Serenissimum Dominum suum*, se vero *eius servum*, qui ei *obedientiam debeat.* Item ut liquet ex can. Hadrianus 22. dist. 63. Adrianus Papa II. Carolo Magno concessit *Jus eligendi summum Pontificem, & ordinandi Apostolicam sedem.* Quod & concessit Leo VIII. Ottoni I. ut habetur can. In Synodo. 23. dist. ead. Item Leo IV. à Ludovico Imperatore Judices petiit, & promisit, se eorum sententiæ pariturum, ut habetur can. Nos si. 41. caus. 2. q. 7. Ergo.

XXVIII. Pontifex in interiori foro conscientiæ est subiectus iudicio etiam coactivo sui Confessarii; quia hic ei pœnam seu pœnitentiam injungit; ergo etiam in foro exteriori Pontifex potest esse subiectus iudicio coactivo Imperatoris.

XXIX. Sicut Confessarius Pontificis est instrumentum & Minister Dei, ita & Imperator est Minister Dei; ergo sicut Confessarius Pontificis potest Pontificem judicare in foro interno, ita & Imperator potest Pontificem judicare in foro exter-

no.

no. Unde Paulus ad Rom. c. 13. v. 4. loquens de Principe sæculari, ait: *gladium portat, Dei enim Minister est.* Ita Novatores.

XXX. S. Paulus ad Rom. c. 13. v. 1. dicit: *Omnis* (Ergo & Romanus Pontifex) *anima potestatibus sublimioribus subdita sit.* Ergo Imperator potestatem habet judicandi Pontificem.

XXXI. Ipse S. Paulus judicavit se jure & juste posse ab Imperatore judicari: quia ad Imperatorem appellavit, ut habetur Act. c. 25. v. 10. & 12. Ergo etiam.

XXXII. De facto plures Imperatores etiam Christiani judicarunt Romanos Pontifices: ergo. ant. prob. Constantius in exilium misit Liberium Papam. Eadem pæna mulctavit Justinianus Sylverium Romanum Pontificem. Joannes I. à Theodorico Rege fuit detrusus in carcerem. Otto I. Joannem XII. deposuit à Pontificatu, & in ejus locum substituit Leonem VIII. Henricus III. deposuit Gregorium VI. & ejus jussu ordinatus est Clemens II. Ergo.

XXXIII. Nullus Romanus Pontifex fuit, aut est Pastor Ecclesiæ univèrsalis: ergo nullus Romanus Pontifex fuit, aut est Petri in Primatu Successor. ant. prob. Martinus V. in sua constitutione, qua Concilii Constantiensis censuras in *Huss*, & *Wicleff* confirmavit, addit: *Error est, si Wicleff per Romanam Ecclesiam intelligat universalem Ecclesiam:* ergo.

XXXIV. Nulli alteri Apostolo data est personaliter pro una singulari sede Successio; ergo nec Petro.

XXXV. Romanus Episcopus nequit inaugurare, aut exauctorare Patriarchas: ergo non est illis Superior, sed omnes insimul Ecclesiam regunt, ut S. Cyprianus dicit lib. de unitate Ecclesiæ: *Episcopatus unus est, cujus pars à singulis in solidum tenetur.* Ergo Romanus Episcopus non habet Primatum.

XXXVI. Si Romanus Pontifex succederet Petro in Primatu, esset Episcopus Episcoporum: sed hoc non, ut habetur ex

S. Cypriano in epist. ad Quintum his verbis: *Neque enim quisquam nostrum Episcopum se Episcoporum constituit: ergo.*

XXXVII. Si Romanus pontifex esset primas & Episcopus Episcoporum, ab eo reliqui judicari possent Episcopi: sed Episcopi à solo Deo judicantur dicente Cypriano loc. ant. cit. *Sed expectemus universi iudicii Domini nostri Jesu Christi, qui unus & solus habet potestatem & præponendi nos in Ecclesiæ suæ gubernatione & de actu nostro iudicandi; Ergo.*

XXXVIII. S. Cyprianus nullam agnoscit in Romano Pontifice auctoritatem super alios Episcopos: ergo nec primatum. Ant. prob. ex eo, quia cum Episcopi Comprovinciales Basilidem Asturicensem in Hispania Episcopum ob idololatriam exauctorassent, aliumque inaugurassent, ad Stephanum Pontificem appellavit Basilides, & ab eodem in Episcopalem sedem fuit restitutus: quo audito, Cyprianus Stephani iudicium reprobavit, atque factam tectamque Hispanorum Episcoporum sententiam dixit: Ergo. Nec dicatur, reponunt Hæretici, Cyprianum declarasse Stephani iudicium irritum, quia à Basilide ab eo fuit fraudulenter extortum. Non dicatur inquit, quia Cyprianus Stephani iudicium declaravit irritum ob carentiam jurisdictionis, ut patet ex Cypriano lib. 3. epist. 3. ad Cornelium.

XXXIX. Pontifices Ecclesiæ primatum ab Imperatoribus aucupati fuerunt. Etenim Constantinus M. decrevit, Pontificem ut Regem venerandum esse, ut colligitur ex can. Constant. dist. 96. Phocas teste Calvino lib. 4. inst. c. 7. §. 17. Papæ primatum supra Græcos donavit; supra Gallos, Germanos Pipinus, & Carolus M. Lutherus vero de potestate Papæ affirmat Constantinum IV. primatum Papæ detulisse, hac super re Platinam referens in vita Benedicti II. Ergo jure Divino Pontifici Romanon non competit Primatus.

XL. Scriptura interruptam vult Pontificum Successionem: nam Num. c. 24. v. 24. dicitur: *Venient in trieribus de Italia, super-*



*perabunt Assyrios, vastabuntque Hebræos, & ad extremum etiam ipsi peribunt; ergo successio in Primatu cessabit. Ergo non est juris Divini usque ad Consummationem Sæculi.*

LXI. Dignitas Primatus alligata fuit magnitudini urbis Romanæ: atqui hæc nunc desit: ergo & dignitas Primatus desit. maj. clarescere videtur ex Novel. Valentiniani III. Imperatoris: *Cum igitur Sedis Apostolicæ Primatum S. Petri meritum, qui Princeps est Episcopalis Coronæ, & Romanæ dignitatis Civitatis, sacræ etiam Synodi firmaverit auctoritas &c. Ergo*

XLII. Schismata, quæ in Ecclesia fuerunt, & illud potissime dicum, diuturnumque à temporibus Urbani VI. (quod plerique volunt ad annos 52. perdurasse) palam faciunt interruptam Pontificum successionem, cum eo tempore persæpe duo, quandoque tres computentur Pontifices. Ergo

## SOLUTIONES.

**A**d I. neg. maj. ad prob. Conc. ant. neg. conseq. Confessio Divinitatis, & amoris contestatio erat quidem occasio aut motivum, cur Christus S. Petro contulerit Primatum, præmiaturus actum heroicum. Verum quia ita Petro hanc dignitatem commisit, ut eum veluti fundamentum, & Petram suæ Ecclesiæ usque ad consummationem sæculi duraturæ constituerit, tantum abest, ut hanc dignitatem privilegium mere personale voluerit, ut dubitare nefas sit, eam non tam personæ, quam officio, quod Petro imposuit, annexum esse. Voluit Ecclesiam suam perpetuam; voluit ergo Pastorem quoque perpetuum, & caput visibile constituere. S. Petrus non potuit esse Pastor & Caput perpetuum in sua propria persona; igitur quidquid jurisdictionis, quidquid eminentiæ & potestatis in Ecclesiam S. Petro contulit, non tantum ipsius personæ, sed in hac omnibus etiam ejus in officio Successoribus contulit, adeo ut  
in

in Petro singulis dictum sit: *Tu es Petrus, & super banc Petram &c. Tibi dabo claves Regni Cælorum: Tu pascere oves meas: Tu confirma fratres tuos. &c.*

Ad II. Conc. maj. neg. min. una cum sua proba. Ecclesia tantum designat personam, qua designatione veluti conditione supposita Christus, ad cujus manus post mortem Petri, aut cujusvis Pontificis claves rediere, noviter electo immediate confert potestatem clavium, non quidem collatione nova, sed institutione prisca.

Ad III. Conc. maj. neg. min. ad prob. conc. ant. dist. conseq. Ergo Ecclesia potest carere capite & pastore visibili ad tempus, conc. conseq. in perpetuum, & pro omni tempore, neg. conseq. Primum ex adductis exemplis evincitur, non item secundum

Ad IV. Conc. ant. neg. conseq. Ratio Disp. est: quia dignitas Apostoli proprie talis illi duntaxat convenit, qui immediate aut à Christo Domino electus, aut à Spiritu S. speciatim segregatus, primis illis temporibus immediatus Verbi Divini in ordine ad universum orbem Minister extitit; quæ dignitas, cum fuerit mere personalis, exspiravit in Petro, proin Romanus Pontifex eidem non succedit in hac prærogativa, sicut tamen succedit in primatu, qui, quoniam non erat dignitas mere personalis, sed potius prærogativa muneris, cum Petro non exspiravit, sed una cum munere capitis ad omnes, quotquot sunt, successores transit.

Si dicatur: Romanus Pontifex non aliter succedit S. Petro, ac alii Episcopi succedunt cæteris Apostolis in suis, quas fundarunt, cathedris; atqui alii Episcopi succedunt cæteris Apostolis tantum in Episcopatu, non item in jurisdictione tam universali, quam isti habuerunt in universum orbem: ergo neque Romanus Pontifex aliter succedit Petro. R. neg. maj. Magnum est discrimen inter jurisdictionem, quam Petrus, & eam quam cæteri Apostoli in universum acceperunt orbem; cætero-  
rum

rum Apostolorum erat extraordinaria , Petri ordinaria. Nam cæteri Apostoli acceperunt jurisdictionem universalem præcise ratione Apostolatus, unde sicut Apostolatus erat privilegium mere personale , sic etiam ea jurisdictio tale fuit, & expiravit cum personis Apostolorum ; unde non mirum, si hæc jurisdictio cæterorum Apostolorum una cum cathedris non transeat ad Successores. Verum Jurisdictio Petri in universum orbem erat ordinaria, id est, non erat ipsi concessa præcise ratione Apostolatus , sed & ob rationem Capitis & Pastoris perpetui , quare sicut hoc munus Capitis & Pastoris perpetui non expiravit in Petro, sed transit ad omnes Successores, alias non esset munus perpetuum, ita neque jurisdictio Petri universalis cum eo expiravit, sed transit una cum munere ad Successorem, Romanum Episcopum.

Ad V. dist. ant. S. Petrus nusquam se dicit Romanæ Ecclesiæ Episcopum, dicitur tamen talis à constanti & perpetua traditione Patrum, conc. ant. secus neg. ant. Quod universa tenet antiquitas, quod vetustissimæ tradunt tabulæ, quod communis omnium sensus est, hoc Novatores sine fronte negant, sed maximo ipsorum probro.

Ad VI. quoad I. neg. ant. Romanus Episcopus succedit S. Petro in munere capitis, & Pastoris totius Ecclesiæ: ergo habet suam vocationem, sive munus & jurisdictionem, unde eam habuit Petrus; hoc enim vero dicit natura successionis, ut notum est illi, qui successionem à nova institutione discernere novit: ergo sicut S. Petrus suam vocationem habuit immediate à Christo, ita & Romanus Episcopus. Nec obstat, quod eligatur, hæc quippe electio, ut jam dictum, est mera designatio personæ, cui semel electæ Christus ex institutione antiqua confert supremam jurisdictionem. Quoad 2. neg. ant. quod Romano Pontifici qua Ecclesiæ capiti & Episcopo universali non liceat ordinare Episcopos extra Ecclesiæ, quæ Romæ existit, fines & terminos.

Ad VII. Romanum Episcopum equidem sibi adlegere plures laborum socios (id quod ipse Christus & Apostoli fecerunt) at propterea tam parum otiosum esse, quam parum lapis angularis, cui grande ædificium insistit, otiari dici potest. Ad ipsum pertinet cura omnium, ut loquuntur cum Irenæo Patres, ipse universum prorsus orbem Catholicum moderari debet. En quam lepidum sit argumentum Hollazii, & Novatorum?

Ad VIII. neg. ant. quoad utrumque membrum. Quod doctrinam concernit, non est inpræsentiarum singulos articulos vendicare. Centies jam ad oculum demonstratum est, veram doctrinam Christi & Apostolorum, proin etiam S. Petri in nulla, præterquam in Ecclesia Romana, & quæ cum Ecclesia Romana communionem habet, puram integramque inveniri. Ut erudite docet Petrocovienſis Synodus, quæ ipso Pseudo-reformationis à Lutherò incæpto tempore celebrata in sua confessione fidei Art. 2. de fide & Symbolo t. 28. ita loquitur: *Defecit Jerosolymitana Ecclesia, cui præsedet Jacobus: defecit Achaia, ubi Andreas: defecit Asia, ubi Joannes: defecit India, ubi Thomas: defecit Persis, ubi Judas: defecit Æthiopia, ubi Matthæus: defecit Phrygia, ubi Philippus: defecit Græcia, ubi Paulus: sola fuit, & est Ecclesia Romana, ad quam, sicut præclare scribit Cyprianus, nunquam accessum habere potuit perfidia.* Splendide ergo mentitur Hollazius, cum Romanum Episcopum non succedere S. Petro in doctrina asserit. Verum quid de vita & moribus est dicendum? Quatuor objicit Hollazius, quorum priora duo loquitur invidia, tertium incontinentia, postremum vero male affectata simulatio. Papam esse auri & argenti cupidissimum, calumnia est heterodoxis in Romanum Caput à longo tempore communis; legant ipsas Romanorum Pontificum sacratas leges, & docebuntur, quantum omni tempore ab hoc avaritiæ vitio abhoruerint, illud averſando imo severe reprehendendo. Si tamen unus vel alter ex tot Pontificibus ostendi queat, qui illo vitio fortè labo-

laboraverat, personæ labes fuit non officii. Néc ex illo: *aurum & argentum non habeo*, probabit Hollazius, Romanum Pontificem dedecere, ut habeat aurum & argentum. Christus equidem misit Petrum, misit & cæteros Apostolos ad prædicandum Evangelium sine auro & argento, sine pera, sine duabus tunicis, sine calceamentis, sine virga; sed elegit infirma, ut fortia confunderet, omnesque intelligerent, magnum Redemptionis, ac Evangelicæ veritatis prædicationis opus non humanum, sed divinum esse. Interea nullibi locorum prohibuit, ne crescente fidelium numero charitate & munificentia ipsa quoque Ecclesia dives fieret, majoremque in suis functionibus, templis, & vestibus Sacris servaret Majestatem. Quin etiam prædixit Apostolis, quod, etiamsi modo sine Sacculo, & sine pera ad prædicandum abirent, multis tamen divitiis in hac adhuc mortali vita sint cumulandi Lucæ c. 18. v. 29. & 30. Imo Romanus Pontifex tot sustentandos habet officiales pro expeditione causarum: tot Cancellarias: quæ magnam requirunt pecuniarum substantiam. Dein si successores Apostolorum aurum & argentum dedecet, cur Hollazius & cæteri Præcones, qui tamen licet falso se quoque jactant Apostolorum Successores, aurum & argentum non abjiciunt? Lepidam audiat invidus Hollazius historiunculam, quæ de indocto Pastore quodam & Parocho Catholico circumfertur. Contigit ut Parochus Catholicus generoso equo coram Pastore præterveheretur, aut equitaret. Acclamavit Pastor: quid hoc? An ergo Christus, an Apostoli, quorum Successores sumus, tam generosis infidebant equis? absit, pauperculis asinis vehebantur. Lepido clamori respondit lepide Parochus; Ita sane, verum dolendum, quod asini modo in Pastores assumantur, & nobis non amplius supersint, qui equorum loco fervirent. Hæc accomode ad illum Pastorem indoctum.

Oo 2

Sed



Sed Papa se gemmis ornat, & auro tegit, est altera invidiæ vox. Si quid ornamenti sumus rerum Antistes ejusmodi in rebus servat, contingit hoc plerumque in S. vestibus, quæ nunquam pretio suo, quantum quantum illud est, Divinam Majestatem, in cujus honorem summus Sacerdos sacra peragit, æquare possunt. Deo invident, quique aut templorum, aut Sacerdotum ornatum luxum reputant, & arbitrantur. Heterodoxorum & Pseudo-Policorum, qui non, quæ Dei, sed quæ sua, quæ mundi sunt, quærunt, hæc indoles est, & lividus clamor: *Dicite Pontifices in Sacris, quid facit aurum?* Nempe nesciunt, aut nescire volunt, quia nullius Religionis veræ sunt, aurum & gemmas nunquam magis ac dum in sui conditoris gloriam assumuntur splendescere. Quam pretiosum fuerit Solymæum templum, Hollazius cum suis ignorare non potest. Quam divites auroque graves Sacerdotum Vestes, antiquæ paginæ Scriptura edocet. Quam vero collocatæ ita divitiæ placuerint regnanti in cœlis Deo, stupenda patefecere mira, quæ nec negare, nec numerare quisquam potest. Nunquid ipse David vel in hoc solo maximam suam felicitatem collocaverit Psal. 25. v. 8. quod dilexerit decorem domus Domini, & locum habitationis gloriæ ejus? Nunquid quod veteri in testamento supremo Numini tantopere placuit, in novo displicere potest? fane non! displicet hoc solum Lutheri & Calvinii præconibus. Displicet hoc solum Pseudo-Policis, quorum sincera in Deum Religio est cura ultima. Quod si foret tamen Hollazius suis argumentis petat quoque vestes Papæ non Sacras, ejusque Palatium & totam aulam, fatendum quidem ea omnia servare Majestatem, quæ supremum orbis Catholici Monarcham decet: at præterea dicendum, injustissimam esse Hollazii invidiam, qua hæc arrodit. Si Dominus à famulo, si nobilis à plebejo, si Princeps à Cive, si denique, & ad hominem loquar, Hollazius, & ipsius in prædicanda Lutheri aut Calvinii secta focii se distinguunt à vulgo  
tum

tum in vestibus, tum in ædificiis, tum in famulatio, tum aliis, cur id non liceat in Hierarchia Ecclesiastica supremo Principi? Principem magnum decet pompa magna, Principem majorem decet major, Principem maximum decet maxima. Quamquam ut optime annotat Petrus de Alliaco lib. 2. c. 11. apud Raynaldum ad annum 1204. §. 11. *Magnificos hos apparatus sive in equis sive in vestibus, ac aliis exterioribus ornamentis, à tempore beati Sylvestri Papæ, SS. Patres non solum summi Pontifices, sed & alii minores Episcopi non ad suam, sed ad Christi & Ecclesiæ ejus gloriam extollendam introduxisse credendi sunt; quos exterius cum temperantiæ moderamine observare, interius tamen servata humilitate, non vanitatis, aut vitii est, sed virtutis, ac meriti.*

Porro quod S. Petrus vixerit in conjugio, Romanus autem Pontifex Clericorum conjugium damnet, non impugnatur, sed commendatur hujus virtutem & sanctitatem. Nunquid virtutis est, nunquid sanctitatis sequi consilia Evangelica Christi Domini? Inter aut certe juxta hæc esse cælibatum quis negabit? consilium igitur Evangelicum Christi Domini sequitur, & adimplet Romanus Pontifex, dum à conjugio abstinet, & etiam omnes, quotquot libere statum Clericalem eligunt, ad continentiae meritum stringit, & ducit: virtutis ergo & meriti est servare cælibatum. Verbum quod non capiunt omnes, omnium minime Protestantes. Vana itaque, imo vanissima ac ridenda est illatio; S. Petrus vixit in conjugio: Romanus Pontifex damnatur conjugium clericorum: Ergo non succedit S. Petro in Primatu. Quod vero S. Petrus vixerit in conjugio, inde factum est, quia acceperat uxorem eo tempore, quo Evangelium nesciebat. Interea ex communi doctrina Patrum advertendum, quod Petrus assumptus in Apostolum illico dimiserit officium conjugale, quod non obscure insinuat Lucas c. 18. v. 28. 29. & 30.

An præter S. Petrum etiam reliqui Apostoli fuerint matrimonio juncti ? res est maxime in bivio posita. Certe Tertullianus & S. Hieronymus sententiam negativam tuentur. Ille clare scribit in lib. de Monogamia. c. 8. *Petrum solum invenio maritum per Socrum.* Iste contra Jovinianum lib. 1. c. 14. ita loquitur: *Quoniam excepto Apostolo Petro non est manifeste relatum de aliis Apostolis, quod habuerint uxores: & cum de uno scriptum est, ac de cæteris tacitum, intelligere debemus, eos sine uxoribus fuisse, de quibus nihil tale Scriptura significat.* De S. Petro igitur habemus fundamentum, quo eum matrimonio junctum dicere valemus, non item de cæteris Apostolis. Dicit quidem S. Paulus 1. ad Corinth. c. 9. v. 5. *Nunquid non habemus potestatem mulierem sororem circumducendi, sicut & cæteri Apostoli, & fratres Domini, & Ceybas?* Verum S. Paulum per mulieres sorores hic intelligere *pro* mulieres, quæ illos sequebantur, & necessaria ad vivendum subministrabant, inter S. Scripturæ interpretes opinio, & sententia communis est. Cæterum etsi detur, præter Petrum etiam Andream, ut S. Ambrosius comment. in Luc. c. 4 sentire videtur; aut quoque Philippum, ut Clemens Alexand. lib. 3. Strom. p. 448. putat uxorem habuisse, ad Apostolatam tamen vocatus nullus eadem amplius ad conjugales amplexus usus legitur, multo minus scriptum invenitur, quod Apostolorum aliquis absque uxore ad Apostoli officium assumptus postea talem duxerit. Petrum filiam suam Petronillam ante Apostolatam genuit, ut communis iterum Patrum sensus est. *Petronilla* autem probabilius vocari cæpit primum postea in baptismo, à novo Patris nomine, quod *Petrus* erat.

Jam ad Argumentum, quo ultimo dicitur: S. Petrus fuit Sanctus, pius, castus, & honestus, non item multi Pontifices. At quid Calumniatores cum Hollazio plus inde inferri posse contendunt, quam Summos Pontifices, etsi in summitate arcis constitutos, tamen adhuc manere homines, conditio-

ni fragili usquequaque obnoxios. S. Paulus fuit Apostolus, & Doctor gentium Sanctissimus, in tertium jam raptus cælum, & tamen mansit homo, qui aliam legem in membris suis senserat repugnantem legi mentis, qui stimulo carnis erat subditus. Quod si Romani Pontifices non exuunt conditionem humanam, si eorum virtus in infirmitate perfici debet, si unus vel alter (paucissimi vero nominari poterunt, & cum Sergio III. vix ultra quatuor) de recto vitæ curriculo deflexit: fragilitatis humanæ labes est, non officii. Recogitent Protestantes, quæ scelerum sentina fuerit eorum Protoparens Lutherus, & Calvinus. En quæ futilia argumenta adversarii excogitent, ut simplicem plebem seducant? Jam

Ad IX. Conc. maj. neg. min. Deus quippe omnia suaviter disponit. Unde quamvis, quia humanis dispositionibus vim inferre non vult, nonnunquam permittat, ut minus idoneus ad Pontificiam sedem assumatur, tamen & in tali subjecto suum finem consequi novit, suamque conservare Ecclesiam; eo quod nec scientiæ, nec sanctitati, nec ulli ætati hominis divinis suis consiliis alligatus sit, & sæpe jam elegerit infirma mundi, ut fortia quæque confunderet, aut etiam mala permitteret, ut majus inde bonum educeret. Si per asinam Dominus loqui dignatus est Num. c. 22. v. 28. cur exigente Ecclesiæ necessitate non loquatur per hominem, quamvis gravibus vitiis coopertum? Spiritus, ubi vult, spirat etiam quandoque contra indolem & voluntatem loquentis. Pro exemplo est Caiphas, de quo habetur Joan. c. 11. v. 50. & 51. *Expedit nobis, ut unus moriatur pro populo, & non tota gens pereat: non a semetipso hoc dixit, sed cum esset Pontifex anni illius, prophetavit.* Etsi ergo aliquis Romanorum Pontificum à peccatis & vitiis non sit immunis, etsi ætate & virtute minor supremo sit fastigio, dum tamen Ecclesiæ & fidei causa agitur, non jam ipse, sed Deus per ipsum loquitur Ecclesiæ, juxta illud Matth. c. 10. v. 20.

*Non*

*Non enim vos estis, qui loquimini, sed spiritus Patris vestri, qui loquitur in vobis.* Cæterum quotquot ex ordine Laicali, aut nondum Presbyteri in Summum Pontificem adoptati fuere, SS. Ordinibus illico initiati sunt.

Ad X. Id ipsum, quod ad prius argumentum dictum, respondendum venit. Nam quamvis viæ, quibus unus vel alter supremum Pontificis solium conscenderat, essent maxime illicitæ, electionis tamen Canonicae defectum supplevit Ecclesia, dum talismodi subjectum pro Capite & Pastore agnovit, & acceptavit. Quibus addendum: si ullibi vigilantis pro sua Ecclesia Dei providentia elucet, his certe turbulentis in circumstantiis mirifice resplenduit, dum homines non adeo bonæ vitæ ad clavum sedebant, & tamen Petri navicula è periculo naufragii tam feliciter eluctata est. Quantumcunque hi fuerint alias incautæ vitæ, nullus tamen ex iis Arianus, nullus Donatista, nullus Pellagianus, nullus qui hæresim aliquam professus esset, unquam extitit. Imo *Vigilius* et si gravissime antea *Theodoræ* se obstrinxisset in favorem *Eutychetis*, vix Cathedram ascendit, non aliter quam olim *Saulus*, qui ex persecutore vas electionis factus, Spiritum Domini super se sentit, & dextera Excelli mirabiliter mutatus, omnium fortissime resistit & *Theodoræ* desiderio, & *Eutychetis* hæresi.

Ad XI. Conc. maj. dist. min. Atqui ejusmodi Caput est solus Christus Principale, conc. min. Ministeriale, neg. min. & conseq. Solutio jam ex dictis liquet.

Ad XII. Neg. seq. maj. Quam nec decantata fabula evincit. Cum res hæc altiori indagine sit digna: speciatim in præfenti refutandam assumimus. Igitur.

Origo hujus fabulæ est talis. Anno 1320. *Martinus Polonus*, & anno 1342. *Rudolphus Higeden*, & post hos alii Novatores, quorum non ultimus *Fridericus Sprembertius* produxerunt fabulam scribentes: quandam puellam ex Britannia, vel ut  
alij



alii volunt, è Germania oriundam, *Gilberdam* nomine obscuris natalibus, à quodam Amasio corruptam, dissimulato sexu *Joannis Angli* nomen assumpsisse, & variis Regionibus ac Academicis peragratis Athenas cum eodem pervenisse, atque ibidem optimis artibus imbutam, amasio mortuo, Romam concessisse, atque per tres annos magna cum laude & auditorum frequentia publice docuisse, & ob doctrinæ splendorem Leone IV. Pontifice defuncto circa annum Christi 857. communibus suffragiis in Papam esse assumptam; deinde ab aliquo cardinale gravidam, in publica ad ædem Lateranensem supplicatione infantem in medio vico peperisse, & subito animam exhalasse. Sedisse fertur duobus annis, mensibus quinque, diebus quatuor. Hæc series hujus fabulæ. Cæterum *Eminent. Lambertinus* Martinum Polonum, & etiam Marianum Scotum vindicat lib. 3. de serv. Dei Beatif. c. 10. n. 4. & invictis argumentis demonstrari posse addit, quod neuter hanc historiam notaverit: signat propterea antiquissima eorum MS. in quibus nec vestigium hujus historiæ detegitur, unde infert Sapientissimus Doctor, hanc historiam procedente primum tempore scriptis Mariani & Martini assutam fuisse haud dubie ab Hæreticis, quorum odium in Romanam sedem neminem latere potest. Et si *Franciscus Walcbius* Protestantium Göttingensis Professor satis celebris dicat: iniquum esse, si Protestantes hujus historiæ Authores proclamentur, eo quod eorum Religio junior sit ea fabula: quasi vero, si ipsi sunt Authores, etiam fabula junior esse nequeat. Placet tamen, quod *Walcbius* tam candide fateatur: *suam Religionem esse juniorem hac fabula*: Judicet jam quisquis velit, an Protestantium Religio sit vere Apostolica; cum ne quidem suam ætatem extendat usque ad hanc fabulam fatente ipso *Walcbio*? Jam quidquid sit, live à Protestantibus, sive aliunde hæc fabula ortum duxerit.

Refutatur sequentibus argumentis. Primum sumitur ex discordantia Authorum, qui de eo figmento in sedis Apostolicæ contumeliam scripserunt; nam discordant 1. *In Nomine*: Fulgosus enim, Joannes Hufs, & Francus eam fœminam confictam vocant *Agnetem*; Zwingerus eam nominat *Gilbertam*; alii illam appellant *Isabellam*; nonnulli *Juttam*: aliqui *Margaretham*; alii *Dorotheam*. 2. *In natali loco*: nam Fulgosus ait, eam fuisse oriundam ex *Anglia*; Boccatus è *Germania*. 3. *In loco studiorum*: nam Martinus Polonus *Albenis*: Scotenbergus *Lutetiæ*: Zwingerus vult in *Brittania* & *Romæ* eam studuisse. 4. *In moribus*: etenim Martinus Polonus scribit, illam à paterna domo fugisse: Boccatus ab adolescente seductam, & in Angliam transportatam esse: Baleus à Monacho Britano corruptam, & Athenas ductam: Francus magia iniciatam: Zwingerus & Boccatus fuisse virtutē & sanctitate iterum præstantem. 5. *In tempore Pontificatus*: nam Martinus cum aliis dicit, eam in Pontificatu successisse Leoni IV. & sedisse duos annos, menses quinque, dies quatuor: alii ajunt successisse Leoni V. alii Martino I. alii Benedicto III. aliqui vero dicunt successisse Nicolao I. aliqui initium ejus Pontificatus ponunt ad ann. 854. alii ad annum 904. Aliqui volunt regnasse duobus annis, sex mensibus: alii uno anno, ac quinque mensibus. 6. *In modo partus & mortis*: etenim aliqui, ut Martinus, scribunt, eam peperisse in supplicatione, & quidem ipso festo Corporis Christi (quod tamen festum modo anno 1264. sub Urbano IV. institutum est) subitoque mortuam esse: Boccatus vero ait, eam peperisse sub sacro, & non statim mortuam, sed superstitem in Tullianum conjectam esse: Annales Aquitaniæ referunt, id contigisse, cum *Joanna* per urbem equitaret. Scotenbergus ait, contigisse in ejus Palatio, cum in folio resideret. Tanta ergo dissensio scriptorum in omnibus magnum sane est argumentum falsitatis. Ergo Fabula anilis est.

Secun-

Secundum argumentum est: quod Joannes VII. longe ante Leonem IV. nempe 705. Joannes VIII. vero primum post Adrianum II. videlicet anno 873. Pontificatum tenuerit. Imo Scriptores vitarum Pontificum immediate post S. Leonem IV. ponunt Benedictum III. ita quidem, ut sedem quindecim tantum diebus vacasse asserant. Quod confirmat Hincmarus Rhemenfis Archi-Episcopus, qui epist. 26. asserit, se nuntios misisse Romam ad Leonem IV. qui vero Romam advenientes non jam Leonem, sed Benedictum Pontificem in demortui Leonis locum electum venerati sunt. Nicolaus I. successor immediatus Benedicti III. qui optime scire & potuit, & debuit, cui ipse, cui & Benedictus ejus Antecessor successit, attestatur in terminis scribens ad Concilii Suellionensis Patres, quod S. Leoni suffectus fuerit Benedictus III. Benedicto autem ipse. Ergo alterum argumentum falsitatis.

Tertium argumentum est: quod ex omnibus viginti quatuor Pontificibus, qui *Joannis* nomine fuerunt insigniti, nullus Britanus, aut Germanus reperiatur; nam septendecim erant Itali, inter quos Joannes VIII. Romanus; Tres Græci, inter quos Joannes VII. Unus Gallus: unus Lusitanus: & unus Illyricus: tandem unus Antiochenus. Ergo tertium falsitatis argumentum

Dices I. S. Antoninus scribit de ista historia: ergo de ea non est dubitandum. R. dist. ant. scribit cum hac restrictione: *Si quod Martinus refert, est verum*: con. ant. secus, neg. ant. Imo ipse Martinus, & alii Catholici quidam Authores Martinum secuti rem non pro certo, sed dubie proponunt, adhibendo has clausulas: *Dicitur: fama est &c.*

Dices 2. In templo Senensi, ubi omnium Summorum Pontificum effigies conspiciuntur, inter Leonem IV. & Benedictum III. interpolita cernitur imago *Joannæ Papissæ*; ergo verum est, quod Authores referunt. R. Pictorem illius imaginis vulgi ru-

morem secutum, sicque suo privilegio usum esse, de quo Poeta:  
*Pictoribus atque Poetis &c.*

Dices 3. In ejus vici, in quo peperisse *Joanna Papissa* refer-  
 tur, extremitate etiamnum cernitur in marmore sculpta statua  
 matris cum suo filio: ergo supradictæ imaginis sculptor non vul-  
 gi rumorem, sed veritatem est secutus. R. 1. neg. conseq. Nam  
 cæcus cæcum est secutus, vel Sculptor pictorem, vel pictor  
 Sculptorem. R. 2. neg. ant. Nam illa statua non foeminam, sed  
 flaminem (gentilem Sacerdotem) qui palmam in humerum in-  
 cumbentem habet, exhibet; neque Comes ejus Lateri adjunctus  
 est infans, sed ætate jam vegeta adolescens, quasi genius, &  
 Sacrorum minister.

Dices 4. Si ista statua *Joannam Papissam* non referat, cur  
 ergo Romani Pontifices, dum ex Vaticano in Templum latera-  
 nense procedunt, memoratum vicum adeo declinant, per lon-  
 giorum ambagem, scilicet per plateam S. Clementis viam insti-  
 tuentes? R. Summos Pontifices etiam per istum vicum institue-  
 re viam, nisi dum nimia multitudo populi exigit, ut per amplio-  
 rem D. Clementis plateam fiat processio. Jam

Ad XIII. dist. ant. Successerunt Præsules Avennionenses,  
 qui tamen reipsa simul erant Præsules, seu Episcopi Romani,  
 Conc. ant. secus, neg. ant. & conseq. Illi Pontifices omnes,  
 quantumvis in Gallia, quorsum Clemens V. sedem tunc tem-  
 poris ob Italiae factiones transtulerat, residerent, fuerunt reipsa  
 Episcopi Romani, nec alius interea electus, receptusque fuit  
 pro Episcopo Romano, ac ille ipse, qui tunc Avennione con-  
 sistebat, adeo ut verissimum sit illud, *ubi Papa, ibi Roma.*

Ad XIV. Conc. ant. dist. conseq. Ergo non apparet, quo-  
 modo Romanus Episcopus succedat S. Petro in Primatu jure  
 Divino scripto, conc. conseq. jure Divino tradito, neg. conseq.  
 Ex traditione compertum habemus, Primatum S. Petri transire  
 jure Divino in ejus Successores. Ejus successores alios non esse,  
 quam

quam Romanos Episcopos, iterum ex traditione novimus. Ergo. Imo & habemus ex jure Divino scripto implicite, licet non explicite, & expresse: Christus enim fundavit Ecclesiam usque ad Consummationem Sæculi duraturam.

Ad XV. transf. ant. neg. conseq. Licet Christus forte non jussit Petrum, ut Romam eligeret in Cathedram Primatus, supposita tamen libera hac electione per Petrum facta pronum est inferre Jus Divinum succedendi per se transiisse in Romanos Episcopos adeo, ut factum Petri per modum conditionis se habuerit, qua posita Jus Divinum se ipso transiit non aliter, ac modo sese habet electio Romani Episcopi, qua posita ex jure Divino transit Primatus in Episcopum noviter electum, quamvis cæteroquin electio sit factum humanum, quod Primatum non tribuit. Dixi *transf. ant.* Quia Patres sunt, qui Petrum jussu Dei Romam venisse, Cathedram fixisse, & Martyrium pertulisse asserunt. Quo in supposito Romani Episcopi Successio non jam amplius dependet unice à facto humano, sed insuper à voluntate Christi.

Ad XVI. neg. ant. Contrarium satis ex hucusque dictis constat. Nec Canon VI. Concilii Nicæni Pontificis Primatum, & quidem jurisdictionis infringit. Nam est in eo sensu intelligendus, in quo S. Synodus eundem condidit. S. Synodus autem eundem condidit in sensu, quod Episcopus & Patriarcha Alexandrinus eorum omnium habeat potestatem in omnes sui Patriarchatus Ecclesias, quam Romanus Episcopus & Patriarcha Occidentalis habet in omnes Ecclesias sui Patriarchatus; consequenter sicuti de Primatu Romani Pontificis non loquitur, ita eundem nec minime infringit. Quod ut clarius intelligatur.

Advertendum I. Romanum Episcopum, præterquam quod sit Papa universalis, & totius Ecclesiæ Caput, quoque dici *Patriarcham Occidentis*. Concilium itaque Nicænum in præsentiarum



non ut Caput totius Ecclesiæ, ac Papam universalem, sed ut Patriarcham eundem suspexit, & in hoc sensu dixit: Patriarcham Alexandrinum eorum omnium habere potestatem (intellige in Ecclesias sui Patriarchatus) quam habet Romæ Episcopus, intellige, ut Patriarcha Occidentalis in Ecclesias sui Patriarchatus.

Advertendum 2. Dum Novatores objiciunt Canonem prædictum secundum Rufini versionem lib. 1. Histor. Ecclesiast. c. 6. *Et ut apud Alexandriam & in urbe Roma vetusta consuetudo servetur, ut vel ille Ægypti, vel hic Suburbicariarum Ecclesiarum sollicitudinem gerat: nihil evincere contra Romani Pontificis dignitatem, cum comparatio intercedat inter Alexandrinum Episcopum ut Patriarcham, & Romanum similiter quoad Patriarchicam jurisdictionem, remanente suprema ejusdem dignitate per universum terrarum orbem. Nec momenti est, Patriarchalem jurisdictionem extendi ad solas suburbicarias Ecclesias, quod Patriarchæ incongruum videtur: nam sub nomine Ecclesiarum suburbicarum non illæ tantum veniunt, quæ prope Urbem positæ erant, sed complures tam in Italia, quam extra Italiam.*

Advertendum 3. Ferendo prædicto Canoni occasionem dedisse Meletium Lycopolitanum Episcopum: hic cum in persecutione Diocletiani lapsus esset, aliis etiam obnoxius criminibus, & à Petro Alexandrino Episcopo in Synodo quadam de super celebrata sede sua depositus, schisma conflavit, seque à Petri Patriarchæ Alexandrini non tantum communione subduxit; sed insuper contra jura Patriarchæ Alexandrini varios in Ægypto Episcopos consecravit non aliter, ac si ipse foret Episcopus Alexandrinus, qui ex prisca consuetudine in Ægypto solus juribus Metropolitæ fruebatur. Ægre rem tulit Concilium, & postquam sententiam dixit Meletio, ad reparanda Alexandrini Patriarchæ jura præcitatum Canonem edidit, utque rem totam præstaret majori cum efficacia & expressione, addidit

ea verba: quod Patriarcha Alexandrinus (in suo Patriarchatu) habeat omnium eorum potestatem, quam habet Romanus Pontifex (in suo scilicet Patriarchatu). Itaque in hoc Canone Primatum Romani Pontificis in universam Ecclesiam nequidem attigit, sed ejus Patriarchatum tantum.

Ad XVII. neg. ant. Ejus falsitas in aprico stat, si perpendantur, quæ dicta sunt. Quod Porro *Phocam* Imperatorem attinet, negatur, quod Papam constituerit Ecclesiæ Caput, & Monarcham. Justitiam administravit Bonifacio, præterquam nihil. Ab omni ævo Romanus Episcopus Ecclesiæ Caput, & universalis Pastor audit. *Cyriacus* tunc temporis Patriarcha Constantinopolitanus contra omne jus & fas *Occumenici* Patriarchæ titulum sibi arrogavit insistens vestigiis Prædecessoris sui Joannis cognomento *Jejunatoris*, quem jam Pelagius II. desuper severe arguit. Quod ipsum in Cyriaco Gregorius M. fecerat. Utroque autem nihil efficiente, tandem Bonifacius III. qui S. Gregorio successerat, à Phoca Imperatore, quem Græci non poterant non timere, obtinuit, ut edicto solenni Patriarcha Constantinopolitanus juberetur ab Episcopi *Occumenici* titulo, utpote non sibi, sed soli Romano Pontifici ex jure Divino proprio. En! hoc erat, quod à Phoca jure postulare potuit Bonifacius, & Phocas jure præstitit. Non igitur tribuit Romano Episcopo aliquid novi, instituendo quod non erat, sed confirmavit, quod erat, reprimendo temeritatem eorum, qui arrogabant sibi, quod alienum fuit. Interea Calumnia est, dum dicitur, Bonifacium Phocæ facinus, quo Mauritium morti tradidit, unquam approbasse.

Ad XVIII. Desiderari probationes eorum, quæ asseruntur. Non est credibile, Hollazium legisse Irenæum, Cyrillum, Cyprianum &c. quos in probis allegavimus, qui haud disertius quidquam adstruunt, quam visibile Ecclesiæ caput, & hoc quidem Romanæ Ecclesiæ Præsulem. Isti omnes vivebant,

bant, & scribebant eo tempore, quo vera Christi Ecclesia juxta ipsos Adversarios in pura doctrina perstitit. Semper erat Presbyter super Diaconum, Episcopus super Presbyterum, Romanus Pontifex super Episcopum. Constantinus munificus extitit in Ecclesiam, S. Petro, Petrique Successori Romæ residenti coronam, & omnem Regiam dignitatem in Urbe Romana, & in Italia, & in partibus Occidentalibus concedens, quam munificentiam invidia hæreticorum arrodere potest, pessime tamen assumit ad subvertendum Romani Pontificis Primum.

Ad XIX. Zosimum & reliquos Pontifices jure prætendisse dominatum in Ecclesias Affricanas; cum utique Ecclesiæ Affricanæ fuerint in orbe Catholico, & Romanus Episcopus est totius orbis Catholici, omnium omnino Ecclesiarum Pastor & Caput. Et quidem eo majori jure, quia quod ipsum inter & Affricanas Ecclesias vertebatur, jam dudum in Sardicensi Concilio Pontifici Romano adjudicatum, propriumque declaratum fuit, scilicet quod ad sedem Romanam semper pateat Sacerdotibus appellandi via. Falsum præterea est, quod Affricani Patres Pontificum fastum increparint. Non illico consensisse Papæ postulatis, fatendum est, quia non statim inveniuntur Canones, quos ex Concilio Nicæno pro se allegabat zosimus: in causa fuisse videtur, quia ij Canones revera fuerunt Canones Sardicenses, non item in ipso Concilio Nicæno editi. Interea tamen zosimus potuit eos laudare nomine Concilii Nicæni, quia Concilium Sardicense est quædam Concilii Nicæni confirmatio. At consenserunt tamen postea, seque penitus submiserunt.

Ad XX. Conc. maj. neg. min. Nec enim inconveniens est, ut immediatus Successor Petri fuerit Superior omnium Apostolorum adhuc tunc existentium; esto necessarium non fuerit hac potestate in eos uti in actu secundo.

Ad

Ad XXI. Conc. ant. neg. conseq. Ratio hujus esse potest, tum quod Pauci adhuc Apostoli tunc superfuerint: tum quod propter senium admodum onerosum illis fuisset tali gravissimo officio fungi: tum præsertim ne Pontificatus cum Apostolatu confunderetur, unum idemque esse putaretur, quæ tamen sunt distincta.

Ad XXII. Conc. maj. neg. min. ad prob. de Prophetis dico: Donum Prophetiæ utpote quid extraordinarium, per quam extraordinaria à Deo commissa nuntiantur, non ita est necessarium. At necessarium pro omni tempore est officium pastorale, utpote ordinarium ad pascendum gregem Dominicum, & regendam Ecclesiam nusquam usque ad finem sæculi interituram.

Ad XXIII. Neg. ant. Nullibi demonstrari potest, quod Christus admiserit formam Regiminis Ecclesiastici bicipitem, bene vero unum caput solum instituit, cujus forma est invariabilis. Cur autem variari possit forma Regiminis politici, ut factum in Imperio Romano, non vero forma Regiminis Ecclesiastici? ante omnia ratio est, quia hæc est institutionis Divinæ, non item illa. Cæterum Regnum politicum est temporale, temporalia autem consistunt in divisibili, consequenter dividi possunt, præsertim cum in toto universo diversæ sint nationes, quæ aliter ac aliter regi debent per oppositas leges humanas. At vero Regnum Ecclesiasticum consistit in re spirituali, & quidem principaliter in fide indivisibili, quæ ne dividatur, & invariabilis varietur, unam tantum requirit cynosuram visibilem, Romanum Pontificem.

Ad XXIV. Non ideo absolute Romæ est sedes Pontificis, quia Petrus Romæ gessit Pontificatum, & inibi mortuus est; sed quia inibi Pontificatum gessit cum animo inibi usque ad mortem manendi, per quod figendo inibi domicilium cum animo perpetuo manendi, fixit & sedem perpetuam, quam

Q q

post

post mortem suam una cum dignitate officij capeſſendam reliquit inibi facti ſuo Succelloribus. Moyſes vero & Aaron, quamvis in deſerto mortui ſint, non tamen inibi utpote in via exiſtentes & ad terram promiſſionis tendentes, ſedem aut domicilium fixerunt perpetuum, quia intentio eorum non erat manere in deſerto, ſed tranſire ad terram promiſſionis, ibique primo figere domicilium ex ordinatione Divina, quod cum morte in deſerto præventi complere non potuerint, id per ſuos perfecerunt Succellores, ſedem Hieroſolymæ Pontificalem figentes, in quam, qui ſucceſſit Sacerdos, in plenum juſ Aaronis ſucceſſit, regendi videlicet univerſam Synagogam. Ob eandem rationem ſedes Pontificis Chriſtiani non manſit Jeroſolymis, quia etſi Chriſtus ſummus Pontifex inibi mortuus ſit, non tamen aſcendit Jeroſolymam, ut ibi ſuum perpetuum figeret domicilium, ſed ſolum ut inibi mortem pro ſalute humani generis ſubiret: ut ipſe Chriſtus Matth. c. 20. v. 18. teſtatur. Poſt quod cum Apoſtolos miſerit in mundum univerſum prædicare Evangelium omni Creaturæ, & Petrum loco ſui Paſtorem nominaverit, ſequitur ibi ſedem Paſtoris loco Chriſti remanere, ubi eam Paſtor à Chriſto conſtitutus reliquit; cum ergo ille Romæ, & animo manendi vixerit, & mortem ſubiverit, manet inibi Petrum ſedem ſuam Succelloribus reliquiſſe.

Ad XXV. diſt. maj. S. Gregorius M. recuſavit dici univerſalis Epiſcopus in eo ſenſu, ut nemo unus præter ipſum ſit Epiſcopus, conc. maj. in eo ſenſu, quod univerſam Eccleſiam regat, ſervata ſingulorum Epiſcoporum ſubordinata jurisdictione, neg. maj. Pontifex ergo eſt Epiſcopus Eccleſiæ univerſalis, ita quod cæteri revera Epiſcopi ſint: ſed illi tanquam primo, & Eccleſiæ capiti ſubordinati; & in hoc ſenſu ſanctum nomen eſt & veritatis, & antiquitate venerandum, quo Leo in Chalcedonenſi Concilio appellatur: & Tertulliani ævo Pontifex dicebatur Epiſcopus Epiſcoporum, & Pontifex maximus, ut  
lege-



legere est lib. de Pudicitia. Etiam Gregorii Decessores usurparunt, ut Sixtus I. in inscriptione epistolæ 2. Victor. I. epist. I. Pontianus epist. I. Etiam alterum membrum argumenti dist. acriter improbat in illo, qui eum sibi non competentem ambitiose affectat, & in primo sensu mox dicto, conc. acriter improbat absolute, & quasi in secundo sensu Romano Pontifici non competentem, neg. Agit enim loc. cit. Pontifex adversus Joannem CP. Episcopum, qui universalem se dicebat Patriarcham, & Episcopum, cæteris omnibus nomen & Episcopalem dignitatem derogando: ut habetur ex ipso Gregorio lib. 4. Epist. 14. Hinc de mendacio redarguuntur Hæretici, dum Canonem 26. Concilii Carthag. III. in argumento citatum volunt dictum de Romano Pontifice; cum in aperto sit Affricanos Episcopos perstringere, qui ausu temerario sese summos Sacerdotes, imo Sacerdotum Principes inscribebant.

Ad XXVI. neg. ant. ad prob. Gregorium in fecisse ex singulari demissione, humilitate, & humanitate, qua etiam omnes Sacerdotes fratres, omnes Clericos filios, & omnes Laicos Dominos suos appellare solebat; non autem id fecisse, quod in Imperatore aliquam Superioritatem, aut jurisdictionem erga se agnosceret; noverat enim se Pastorem esse, & Imperatorem ovem. Cæterum D. Gregorius causam habuit tam humiliter loquendi, & scribendi Imperatori, eo quod hic suæ potestatis jura transcendens, nimium sibi in Ecclesia, & hujus Præsules tribueret: ex altera vero parte Gregorius amicitia ac ope illius adversus Longobardos acerrimos Ecclesiæ hostes indigeret. Ad alterum dist. ant. Adrianus concessit jus ordinandi sedem Apostolicam in bonis temporalibus, seu disponendi Principatum temporalem, conc. ant. in Spiritualibus, & Ecclesiasticis, neg. ant. Item per illud jus eligendi Pontificem, intelligitur facultas confirmandi electionem Summi Pontificis, & quidem confirmandi non per jurisdictionis potestatem, sed per

Qq 2

defen-

defensionis assistentiam, quia tunc sedes Apostolica indigebat ope & præsidio Imperatorum contra Longobardos, aliosque hostes. Et dato etiam ista duo Privilegia à Pontificibus concessa esse Imperatoribus, quia Longobardi & Græci insensissimi Romanæ Ecclesiæ hostes erant, ab aliis tamen postea sunt revocata. Legatur can. Hadrianus 2. cit. dist. ex quo patet responsio eadem de Leone VIII. Ad ultimum dico Leonem IV. se subjecisse judicio Imperatoris discretivo tantum, quod sine jurisdictione exercetur, & quidem pro isto duntaxat casu, si ut loquitur Pontifex, *nos incompetenter aliquid egimus, & in subditis justæ legis tramitem non conservavimus*; non autem se subjecisse judicio Imperatoris coactivo. Imperator ergo solum est petitus ut Judex arbiter, qualem etiam inter se, & subditos suos potest petere Imperator, manens eo superior.

Ad XXVII. Conc. ant. neg. conseq. Disp. est 1. Quia in interiori foro conscientiæ Confessarius est merum instrumentum Dei, nec ipse principaliter judicat, sed Deus per ipsum. 2. Quia Confessarius non potest pœnitentem omnino invitum cogere ad subeundam pœnam. 3. Quia in Sacramentali confessione fertur judicium de occultissimis quoque criminibus, quæ ad solius Dei pertinent cognitionem. At vero pro foro externo homo est (quamvis sit à Deo constitutus) verus & principalis Judex etiam ut homo; ideoque tantum judicat de manifestis, & potest etiam omnino invitum cogere ad subeundam pœnam.

Ad XXVIII. Dist. Imperator est Minister Dei, ast non habens jurisdictionem in Pontificem, aliasque personas, & causas Ecclesiasticas, conc. habens, neg. quia Imperator est ovis, Pontifex vero est ejus Pastor; ergo hic in illum, non ille in hunc habet jurisdictionem. Præterea Confessarius vi sui Sacerdotalis characteris habet potestatem clavium sive judicandi in omnes fideles, qui ei ab Episcopo vel à Pontifice subjiuntur  
fide-

fideles, adeoque etiam in ipsum Pontificem, si hic illi se in ordine ad absolutionem à peccatis subiciat. Imperator vero in nullum fidelem, multo minus in Pontificem, habet potestatem judicandi in causis spiritualibus.

Ad XXIX. S. Paulum ibi non loqui determinate de potestate sublimiori sæculari, sed generatim de omni potestate sublimiori, adeo quod Ecclesiastici debeant suis superioribus Ecclesiasticis, inter quos summus omnium est Romanus Pontifex, obedire, & sæculares suis Principibus sæcularibus. Quod autem D. Paulus cit. loc. cum restrictione ad sæcularem potestatem, quæ gladium portat, loquatur, ideo est, quia eum ad id circumstantia temporis adigebat; eo enim tempore Christiani erant accusati cujusdam criminis politici, scilicet rebellionis & seditionis ad forum sæculare spectantis. Pulchre in hunc locum S. Bernardus epist. 183. ad Conradum Imperatorem scribit: *Legi: omnis anima potestatibus sublimioribus subdita sit: quam sententiam cupio vos custodire in exhibenda reverentia Petri Vicario, sicut ipsam vobis vultis ab universo servari Imperio.* Capiant hoc nostri Protestantes.

Ad XXX. S. Paulum appellasse ad Imperatorem non tanquam ad judicem competentem, sed tanquam ad defensorem contra iniquas Judæorum vexationes, vel appellasse ad tribunal Cæsaris non tanquam ad forum judiciale, sed tanquam ad asylum. Vel Paulum ad Cæsarem appellasse *de facto*, non *de jure*, quia Cæsar etsi non de jure, de facto tamen erat ejus Judex, eo quod Judæi ejus accusatores alium (scilicet Petrum) non agnoscebant. Vel Paulum appellasse Cæsarem Agrippam non solum de facto, sed etiam de jure, quia Paulus accusabatur (innocens) in casu seditionis & tumultus in populo excitati, quæ fuit causa Civilis in Civilibus autem tunc Christiani subiciebantur Ethnicis Principibus, qualis Agrippa erat; quia lex Christiana neminem privat jure suo: ergo sicut homines ante susce-

ptam legem Christi subiciebantur Imperatoribus & Principibus Ethnicis, ita & post. Quare & Petrus 1. Petri c. 2. v. 13. & Paulus ad Rom. c. 13. ac ad Titum c. 3. hortantur fideles, ut subditi & obedientes sint Principibus suis, qui tunc Ethnici erant; quibus proinde Petrus Ecclesiæ Christianæ caput nihil præcipere poterat juxta illud 1. Corinth. c. 5. v. 12. *Quid enim mihi de iis qui foris seu extra Ecclesiam sunt judicare?* Aliud est de Principibus Christianis, hi enim Ecclesiam per baptismum ingressi oves Christi facti sunt, adeoque subjiuntur B. Petro, & hujus Successori Romano Pontifici ut Supremo Pastori ovium Christi, à quo Pastore debent legem acceptare, qua personæ Ecclesiasticæ immunes sunt ab eorum jurisdictione; secus erat de Cæsare Ethnico, quem proinde S. Paulus ut suum judicem agnovit, sicque jure ad eum appellavit.

Ad XXXI. Neg. ant. quod antequam per exempla probaretur, ostendi debuisset, ea esse bona, & secundum leges peracta, quia ut L. Nemo. Cod. de sent. & Interlocut. Item Can. Sana. 11. dist. 9. dicitur: *non exemplis, sed legibus judicandum est*; quia exempla sunt hominem facta, quorum aliqua sunt bona, alia vero mala & lege prohibita. Interim dico Liberium ut in epist. ad solitar. vitam agentes scribens testatur S. Athanasius, in exilium injuste fuisse pulsum: idem de Sylvesterio asserendum maxime, quia Justinianus Eutyhiana hæresi tinctus odium in Romanum Pontificem fovit. Quod Joannes I. à Theodorico Rege fuerit detrusus in carcerem, respondet D. Greg. lib. 4. Dial. c. 30. Theodoricum (idem asserit de Constantio) fuisse Ariana hæresi infectum, adeoque non potuisse tolerare Romanum Pontificem. De facto Joannis XII. dico, id ab Ottone ob dicti Pontificis corruptos mores fuisse factum ex nimio zelo: utrum licite fecerit an non? non est hujus temporis dicere, ait Otto Frisingensis l. 6. c. 23. Ad ultimum: Henricum non deposuisse Gregorium, sed tantum illi, eo quod vide-  
retur

retur simoniace ingressus, persuaserit, ut cederet: & quia Gregorius sponte cessit, postea legitime fuit electus Clemens.

Ad XXXII. Neg. ant. ad prob. neg. conseq. Nam Ecclesia Romana dupliciter sumi potest: 1. Pro ea Ecclesia, quæ est Romæ, & cujus Papa est Episcopus. 2. Pro complexu omnium Ecclesiarum particularium omniumque fidelium Romano Pontifici unitorum. In primo sensu spectatam dicere, vel intelligere universalem, est error; non vero si intelligatur in secundo sensu; etenim Martinus V. in eadem constituit. quoque addit: *Error est, si (Wicleff) negaret primatum Summi Pontificis super alias Ecclesias particulares.*

Ad XXXIII. Dist. ant. successio in perpetuum duratura, conc. ant. successio ad tempus, neg. ant. Nam Jacobo in Ecclesia Jerosolymitana successit Simeon Cleophæ filius, ut Eusebius lib. 3. Hist. c. 11. refert. Quod autem perpetua successio nulli alteri Apostolorum, sed soli Petro sit concessa, ratio discriminis est: quia illa in aliis Apostolis non erat ita necessaria, ut in Petro, utpote quem Christus Joan. c. 21. omnium suarum ovium supremum Pastorem constituit, & pro quo Lucæ c. 22. v. 32. rogavit; ut non deficeret fides ejus.

Ad XXXIV. Neg. ant. Nam Agapetus Papa Anthimum CP. Præsulem exauktoravit, & per se ipsum Mennam consecravit, ut refert Liberatus in Breviario c. 21. Item Gelasius, ut habetur in epist. ad Episcopos Dardaniæ, *Dioscorum secundæ sedis Præsulem sua auctoritate sedes Apostolica damnavit.* Non quidem adeo frequentes leguntur Patriarcharum consecrationes à Romano Pontifice peractæ; sed loci distantia in causa est, non jurisdictionis defectus. Nec urget Cypriani autoritas. Universalis Ecclesiæ Episcopatus, dicit S. Martyr, cui unus præest, singulis sua est portio distributa, quam recte administrantes Episcopi totius Ecclesiæ curam habere dicuntur. Itaque unus Episcopatus est, quia omnes Episcopi unum Episcopum tanquam



quam caput venerantur. Ita sensisse S. Cyprianum claret ex lib. 1. epist. 3. ad Cornelium.

Ad XXXV. S. Cyprianum inpræsentiarum non agere de Romano Pontifice, qui alias jure Episcopus Episcoporum valet appellari, ut legere est apud S. Bernardum lib. 2. de Confid. sed limitate loqui ad Episcopos in Carthaginensi Concilio congregatos in causa de rebaptizandis hæreticis. Eos inter Episcopos nemo unus erat, qui ita aliis præesset, ut Episcopus Episcoporum dici deberet, aliisque præcipere possit; idque unum intendit Cyprianus, ut pro libito animi sensa quilibet panderet.

Ad XXXVI. Loco à Novatoribus citato S. Cyprianum loqui de judicio causarum, quæ nonnisi dubitanter versantur, quas inter eam credebat controversiam de rebaptizandis hæreticis, & potissimum de intentione, qua quisque convenerat pro ea dirimenda: cum enim Cypriani sententia quibusdam displicere cæpisset, dubium suboriri poterat sincero animo non convenisse, proindeque judicio Dei. Cordis arcana perscrutantis rem totam ducebat remittendam.

Ad XXXVII. Hoc argumentum esse pro nobis: si enim Romanus Pontifex nullam in externos haberet jurisdictionem, nec Basilides ad eum appellasset, nec Episcopi de Stephani sententia solliciti fuissent. Cæterum recte hac super re sensit Cyprianus; non enim credidit, Pontificem appellationis jure carere, sed restitutionem nullam fore, cum fraudulenter Basilides ipsum deceiverit, ut palam declarat epist. 68. Ad additum respondetur, eo loci loqui Cyprianum vel de statuto Fabiani Papæ, vel de alio simili ex eo excerpto: ubi habetur, æquum esse, ut reus à propriis judicibus aut absolvatur, aut damnetur, neque permittendam esse appellationem iniquorum hominum in causis notis, atque manifestissimis criminibus; quod tamen pauci desperati, & perditī renuebant, criminantes Episcopo-

coporum auctoritatem, ut beneficio appellationis facile decipi possint exteri, ad quos confugiebant, ut evenisse narrat Cyprianus in facto Balilidis. Horum itaque appellationem utpote dolosam dicit S. Cyprianus non esse admittendam.

Ad XXXVIII. In citato Canone Constantinus Petrum Christi Vicarium, ejusque Successores ut totius Ecclesiæ Principes agnovit: cur idem non sentiunt Hæretici? Cæterum ex cit. loc. non aliud evincitur, nisi Imperatorem plura temporalia dono dedisse; non vero spirituales jurisdictionem & potestatem. Phocas ut legere est apud Bedam in lib. de sex ætatibus, non Primatum Pontifici detulit, sed Romanam Ecclesiam caput esse omnium Ecclesiarum declaravit, ut superbiam Episcoporum Ecclesiæ CP. compesceret, qui se Patriarchas universales dictitabant. Falsum deinde est, Pipinum & Carolum M. Pontifici jura dedisse supra Gallos & Germanos. Nam S. Leo, qui ante Pipinum 350. annis floruit, Pontificiam Jurisdictionem supra Gallos declarat epist. 89. ad Episcopos Galliarum. Eodem mendacii crimine laborat Lutherus; etenim Constantinus IV. Primatum nequitquam contulit Pontifici, sed jus remisit, quo contendebant Imperatores Pontificis electionem confirmare.

Ad XXXIX. Perperam afferri textum ad mentem Novatorum: siquidem Scriptura loquitur de Romano Imperio, ejusque potentia, quæ periit, in alienos translato dominationis jure.

Ad XL. Instantiam dissolvit Gelasius in epist. ad Episcopos Dardaniæ: *Mediolanum, Ravenna, Sirmium, Treveri, & Nicomedia multis temporibus sedes Imperii fuerunt, quibus cum nihil plus juris dignitatis, & prærogativæ ea de causa Ecclesiæ concessum fuerit, non immerito mendacii arguuntur, qui dicunt prædicta de causa Romanam urbem ad fastigium Apostolici muneris eveclam esse.* In idem concinit S. Leo epist. ad Marcianum. Cæterum Valen-

R r

tinia.

tinianus in citata novella rem nostram probe evincit, dum a-  
struit, Petri meritum Primatum firmasse, ipsumque Petrum esse  
Principem Episcopalis coronæ, atque dignitatem Romanæ Ur-  
bis; quibus innuit Romam splendorem à Petro mutuas-  
se; nisi quis dicere velit, Imperatorem loqui de jure Patriarchico, quod  
ex contextu colligi videtur.

Ad XLI. Perperam ex Schismate suffragium quærere No-  
vatores, etenim in quolibet semper legitimus unus Successor  
Petri extitit. Viginti sex enumerantur in Ecclesia Schismata,  
verum portæ inferi licet dire vexaverint, nusquam tamen ad-  
versus eam prævaluerunt.

Quæres: quomodo subsistet Regnum Summi Pontificis,  
seu Primatus, dum tempore Antichristi excidium patietur?  
R. Ecclesiam nihilominus perstituram, consequenter & Prima-  
tum etiam solum in ruderibus more aliorum jurium in solo  
conservandorum, ut tradunt Juris Consulti, præcipue autem  
tunc Christus provisionem faciet ante suum secundum adven-  
tum per Enochum & Eliam in conservanda Ecclesia sua sponsa  
unica cum suo capite.

Colliges: Aliud esse Successionem, & aliud rationem Suc-  
cessionis; nam Successio Romani Pontificis in Petri Pontifi-  
catum ex instituto Christi est; ratio autem Successionis, qua  
Romanus potius Pontifex, quam Antiochenus, vel aliquis  
alius succdat, ex facto Petri initium habet. Successio inquam,  
ipsa ex instituto Christi, & jure Divino est, quia Christus ipse  
instituit in Petro Pontificatum duraturum usque ad finem mun-  
di, ac proinde quicumque Petro succedit, à Christo accipit  
velut Petrus Pontificatum. At vero ipsa ratio successionis,  
quod Episcopus Romanus, quia Episcopus Romanus est, sit  
potius Petri Successor præ alio, id ex facto Petri ortum  
habet, non vero ex prima institutione Christi: nam po-  
tuisset Petrus nullam sedem particularem sibi unquam eli-  
gere

gere, sicut fecit primis quinque annis, & tunc moriente Petro, non Episcopus Romanus, neque Antiochenus successisset, sed is, quem Ecclesia sibi elegisset. Potuisset quoque Antiochiæ semper manere, & tunc Antiochenus sine dubio successisset; quia vero Romæ sedem fixit, & tenuit usque ad mortem, inde factum est, ut Romanus Pontifex ei succedat. Et quoniam S. Marcellus Papa in epist. ad Antioch. scribit: *Petrum Domino jubente Romam venisse*; & S. Ambrosius in orat. contra Auxent. Et Athanasius in Apol. pro sua fuga, dicunt: *Petrum Christi jussu Romæ Martyrium pertulisse*; non est improbable, Dominum etiam aperte jussisse, ut sedem suam Petrus ita figeret Romæ, ut Romanus Episcopus absolute ei succederet. Sed quidquid de hoc sit, saltem ista ratio successio- nis non est ex prima institutione Pontificatus, quæ in Evange- lio legitur, quamvis ipsa successio ex ipsa Christi sit institutione.

## §. VII.

Dico 7. Summus Pontifex est supremus Controversia- rum fidei Judex: adeoque & ejus est de vero Scriptu- ræ sensu judicare.

**P**ROBATUR 1. In veteri lege Judex controversiarum fidei & legis erat summus Sacerdos, Deut. c. 17. ut jam in præce- dentibus dictum; atqui summus Sacerdos novæ legis non est minoris auctoritatis, quam veteris legis Pontifex, corpus nam- que excedit umbram, figura figuratum: ergo.

Confirmatur: Ille supremus confendus est controversiarum Judex, qui habet universaliter claves scientiæ & potestatis: at- qui has habet summus Pontifex in Ecclesia Dei: nam Matth. c. 16. v. 19. Cum Christus dixit Petro: *Tibi dabo claves Regni Cælorum*, id ipsum dixit omnibus ejus Successoribus, ut etiam in præcedentibus jam probatum: ergo.

R r 2

Proba-

Probatur 2. ex perpetua omnium Sæculorum praxi, tum ex Græcis, latinisque Patribus, imo & Conciliis, ut ex præcedentibus constat. Pro majori robore adduntur sequentes antiqui Patres, Anastasius ad Felicem Papam epist. 2. scribit: *Præfatam Apostolicam, & summam expetimus juxta Canonum decreta sedem, ut inde auxilium capiamus, unde Prædecessores nostri ordinationes, & dogmata, atque sublevationem ceperunt.* Sophronius Patriarcha epist. ad Stephanum Episcopum scribit: *De finibus terræ usque ad terminos ejus ambula, donec ad Apostolicam sedem, ubi orthodoxorum dogmatum fundamentum existit, pervenias.* Stephanus Dorensis in libello ad Marinum Papam ait: *Annuntiamus hæc omnia omnium propositæ sedi. Dico autem summæ vestræ & principali, ad medicinale consultum emersi vulneris; quippe quoniam hoc potestative olim, & ab antiquitus facere per Apostolicam sive Canonicam consuevit auctoritatem.* Sanctus Maximianus Episcopus CP. epist. ad orientales de Petro, ejusque Successoribus loquens scribit: *Cui Cathedram Magisterii principaliter possidendam tenere perpetuo privilegii jure concessit, ut quisquis divinum aliquid, aut profundum nosse desiderat, ad hujus præceptionis oraculum, doctrinamque recurrat, nec illi humiliter referre, quod solvendum est, erubescat, etiamsi ipse, quod quæritur non ignoret.* Theodorus studites ad Michaellem Imperat. scribit: *Si aliquid dubitare, vel non credere videtur vestra Divina Magnificencia, ejus rei explicatio à Pontifice pie est postulanda. Magna & à Deo firmata manus Vestra, ut publicæ cupida auctoritatis, jubeat à veteri Roma petere declarationem, ut à Principio à Patribus nostris est traditum.* Quid ad hæc Novatores? Certe non nova, ut perperam blaterant, hæc est doctrina, sed antiqua & primitivæ Ecclesiæ. Ergo.

Confirmatur 1. ex D. Th. 2. 2. q. 1. a. 10. in ☉ ubi quærens, an ad Pontificem spectet fidei Symbolum ordinare, ait: *Ad illius ergo auctoritatem pertinet editio Symboli, ad cujus auctoritatem pertinet finaliter determinare ea, quæ sunt fidei, ut ab omnibus*



bus inconcussa fide teneantur; hæc autem pertinet ad auctoritatem summi Pontificis, ad quem majores & difficiliore Ecclesiæ quæstiones referuntur, ut dicitur in Decr. dist. 17. c. Multis. - - - Et hujus ratio est: quia una fides debet esse totius Ecclesiæ secundum illud 1. ad Corinth. c. 1. Idipsum dicatis omnes, & non sint in vobis Schismata: quod servari non posset, nisi quæstio fidei de fide exorta determinetur per eum, qui toti Ecclesiæ præest, ut sic ejus sententia à tota Ecclesia firmiter teneatur. Quid Clarius? Ergo.

Confirmatur 2. Ex eodem S. Doctore 2. 2. q. 9. a. 2. in **⊙**. ubi habet Certum judicium de re aliqua maxime datur ex sua causa, & ideo secundum ordinem causarum oportet esse ordinem judiciorum. Sicut enim causa prima est causa secundæ, ita per causam primam judicatur de causa secundæ. De causa autem prima non potest judicari per aliam causam. Et 4. Cont. gent. c. 76. habet: Manifestum est autem, quod quamvis populi distinguantur per diversas Dioceses & civitates, tamen sicut est una Ecclesia, ita oportet esse unum populum Christianum. Sicut igitur in uno spirituali populo unius Ecclesiæ requiritur unus Episcopus, qui sit totius populi caput, ita in toto populo Christiano requiritur unus, qui sit totius Ecclesiæ caput. Jam ex his tale formatur argumentum: Circa ea, quæ fidei sunt, contingit quæstiones moveri; ergo debet esse provisum, ut certum judicium fiat ex sua causa: ad hoc autem providit Deus Pastores & Doctores juxta illud ad Ephes. c. 4. v. 14. Sed in ipsis datur ordo, ita quod inferiores subordinentur primo, qui est Pontifex Romanus, sicut causæ secundæ subordinantur primæ; ergo judicium certum & perfectissimum pertinere ad summum Pontificem est necesse, ita quod ipse de aliis Doctoribus sententiam ferat; cumque inter ipsos etiam conciliariter congregatos dissensiones exoriantur, & ab aliis non judicentur, ad ejus judicium velut ad causam primam ultimate recurrendum est. Ergo.

## O B J E C T I O N E S.

I. **S.** Hieronymus epist. 57. scribit, solem doctrinæ fidei primum in Oriente fullisse, dein Oriente relicto, purum resplenduisse in Occidente. ergo S. Doctor certum non agnovit locum, ubi tribunal judicii perenne foret: ideoque non solum cum Damaso, verum etiam cum Petro Alexandrino sentiebat. Ergo Pontifex non est Supremus controversiarum Judex.

II. Tertullianus de Velan. Virg. ait: *Veritas Dei non admittit præscriptionem, nec durationem temporum, nec patrocinium personarum*: ergo tribunal veritatis Dei à Tertulliano Romæ non videbatur; quare de præscript. affirmat, ex fide probandas personas, non ex personis fidem, dubiumque in fide non ad Romanum Pontificem, sed ad Fratrem doctrina insignem remittit.

III. Liberius Papa se, suamque fidem Athanasii Criterio submisit, ab eoque confirmationem petiit, ut patet ex fragmento epistolæ ad eundem; ergo circa fidei dogmata non se Judicem sentit Pontifex.

IV. S. Leo in epist. de Incarnat. ad Flavianum, vim nullam agnovit, & auctoritatem, nisi quatenus à Chalcedonensi Concilio fuit approbata, ut ipsemet fatetur. *Cum & in Apostolicæ Sedis epistola universali assensu firmata tanta Divinæ auctoritatis testimonia noverimus esse congesta, ut nullus queat ulterius dubitare.* Et Concilium Ephelinum acta conciliaria Romanæ Synodi sub cælestino contra Pelagium emanata approbat, & firma esse definit: ergo.

V. Cum Patres Chartaginensis Concilii Innocentio I. significassent, Hæreticos Pelagium & Cœlestium se damnasse, atque exquisivissent, ut ipse idem præstaret, respondens laudat (ut apud S. P. August. epist. 90.) quod *memores antiquæ traditionis, Ecclesiasticæque doctrinæ totum judicium ad ipsum deferrent, à quo*

*à quo omnes discere deberent, quid probandum in doctrina fidei, quid dammandum.* Ita Marcus Antonius de Dominis Apostata Spalatenfis, qui dicit: hoc mirum fore Innocentii artificium, quod cæteri Pontifices imitati sunt, videlicet, ut his palpationibus ab aliis silentio extorqueant confessionem præeminentiæ, quam nullimode verbis facere voluissent. Ergo.

VI. Ideo Romanus Pontifex adstruitur Judex controversiarum fidei, quia ad ipsum undequaque confugiebant aliæ Ecclesiæ; sed hoc non evincit supremam in Pontifice auctoritatem; ergo. min. prob. Ideo aliæ Ecclesiæ ad Romanam confugiebant I. quia vel erant illius sorores, vel filiæ. 2. quia ea in urbe versabantur viri doctrina celeberrimi; porro qui instrui capiunt, ad doctiores accedunt. Nec responsa, quæ a Pontificibus dabantur, erant judicariæ potestatis, sed potius suasoria; hinc Clemens, quæ ad Corinthios scripsit, non ut Primus Magister definiens, sed ut suasor fecit, & Hieronymus respondebat quidem Synodicis consultationibus, sed quia ipse utpote vir doctissimus consulebatur. 3. Etiam Dionysius Corinthiorum Episcopus apud Eusebium lib. 4. c. 22. Sicut & alii Episcopi alias Ecclesias suis instruebant literis. 4. Non solum Ecclesiæ Catholicæ, sed illæ etiam Hæreticorum expetebant Romanæ Ecclesiæ communionem, non quia ipsam ut Judicem venerarentur, sed quia Sapientum Virorum consilia amabant; eapropter Marcellus Ancyranus de fide suspectus non solum Julii Pontificis, sed etiam Athanasii Alexandrini communione sese tuebatur. Hæc coacervat cit. Marcus Antonius: ergo.

VII. Iniquum est illud tribunal, in quo Judex est pars controversiæ dirimendæ, insimul & testis: quia nemini in propria causa credendum est, unde ipse Christus Joan. c. 5. v. 31. ait: *Si ego testimonium perhibeo de me ipso, testimonium meum non est verum;* atqui Pontifex est Pars controversiæ dirimendæ, & est testis: ergo.

### VIII.

VIII. Judex cognita causa judicare debet: ergo in eo prærequiritur scientia; atqui non omnes Pontifices habent scientiam Sanctorum & fidei, cum plures nec à longe sacram Scripturam & Theologiam salutaverint; ergo. Hinc compertum quisque habere potest, in quacunque facultate aptius ab eruditis exortas absolvi quæstiones, quam à Principibus Viris ea super re prorsus ignaris.

IX. Illi credi nequit judicium fidei, cujus doctrina pluribus impuritatibus, pravisque referta est affectibus; sed Romana Ecclesia est hujusmodi: ergo ibi fidei tribunal adesse non potest. min. est Gersonii confid. 5. dicentis: *Si dixerit aliquis, fiet recursus ad sedem, & curiam Summi Pontificis: non negabimus hoc, si Theologia illic habuerit suos Doctores non partiales, non seductos, non fastuosos, non quæstuosos, aut invidos, non potestati sæculari, non spiritali plusquam veritati faventes; alioquin tolerabilius nullos habere quam tales.* Ergo.

X. Si Pontifex foret tribunal fidei, ad eum majores causæ essent deferendæ: atqui hoc falso astruitur: ergo. min. prob. Majores causæ non eæ dicuntur, quæ de re majori agunt, puta de consubstantialitate Verbi, sed quæ difficiliore. In aliqua Diæcesi quædam causa erit major, atque ad superius tribunal dirigenda, secus in altera, in qua propter Theologorum spectatam doctrinam nullius momenti reputabitur: ergo majores causæ alio à Romana curia judicantur. Ergo.

XI. Donatistæ apud Optatum Milevitanum à Papa execrati ad Scripturas appellaverunt; ergo Papa merito non creditur Judex fidei.

XII. Fidei tribunal debet esse Divinum, cum fides ipsa Divina sit: atqui Papæ tribunal non est Divinum: ergo. min. prob. nullum testimonium præter Verbum Dei est divinum; atqui testimonium Ecclesiæ seu Pontificis, ut Pontificis proprium non est testimonium verbi Dei, alias non foret Pontificis pro-

proprium; quid enim est Ecclesia nisi hominum congregatio? quid Pontifex nisi homo? ergo nonnisi humanam habet potestatem; ergo. Hoc argumentum magni faciunt Hæretici. Et urgentibus Catholicis audiendam esse Ecclesiam, illico reponunt: *Obedire Deo oportet magis, quam hominibus. Act. c. 5. v. 29. Et sine causa colunt me, docentes doctrinas, & mandata hominum; ut habent in Confessione Augustana.*

XIII. Tempore Apostolorum, dum hi prædicabant, tanquam Ministri Evangelii non sua promebant sensa, aut suo, sed Christi nomine loquebantur; atqui Ecclesia nunc sua loquitur, cum suas promulget definitiones: ergo non loquitur nomine Christi.

XIV. Vox dici potest Divina, quia Divina profert, hoc est, quia dogmata à Christo revelata referebant Apostoli; eo plane modo, quo vox cujuslibet privati hominis de spiritualibus loquentis, atque Christi gesta narrantis vox Divina nuncupatur: ergo. Ita arguit Melanchton, qui nos asinos, stolidosque vocitat, cum aliter prædicta exponimus.

XV. Ergo fides laceratur, quia partim Deo, partim homini tribuitur: Deo, quia Auctor fidei: homini, quia testimonium Pontificis, esto Divina voce loquatur, est à Dei testimonio discretum.

XVI. Tunc fides laceratur, quando duabus causis diversi ordinis non subordinati attribuitur: atqui ita est; dum enim Pontifex fidei dogma declarat, modo prorsus humano se gerit, quandoque philosophicis utendo tricis, ut verbum Dei pro libito declaret, diversarum Academiarum opiniones adoptat, atque ad earundem mentem dogmata firmat: ergo agit ut causa quaquaversum naturalis, nec Deo agenti subordinata: verbum enim ejus non est philosophicum; ergo.

XVII. Ideo fides non laceraretur, quia naturalis investigatio, media Divina assistentia, audiri præcipitur à Deo tanquam



quam ipsiusmet vox: sed hoc divisionem non tollit: etenim Princeps mandat Prætoris vocem audiri, & tamen indubie alia vox est Prætoris, alia Principis, propterea à Prætoris ad Principem datur appellatio; ergo.

XVIII. Quotiescunque Pontifex ut Legislator pure humanus leges condit & decreta, juxta Dei mandatum audiri debet, sicut alius quilibet ex Principibus, omnis namque potestas à Deo est; atqui hoc non obstante Pontificis vox in hoc casu non est Divina censenda; ergo similiter cum fidei decreta evulgat, vox ejus non reputabitur Divina, quamvis juxta Dei mandatum audiri debeat.

XIX. Ideo Ecclesiæ vox dicitur Divina, quia Scriptura id docet; atqui id Scriptura docet, quia Ecclesia explicat: ergo vox Ecclesiæ ideo Divina est, quia Ecclesia dicit: atqui hic intervenit petitio principii, adeoque committitur circulus vitiosus: ergo. Hoc sophimate triumphant, & exultant Hæretici tanquam Victores capta præda.

XX. Jure & jure potest à Romano Pontifice ad alium Judicem appellari: ergo Romanus Pontifex non est Supremus Judex in Ecclesia. ant. probat Calviaus lib. 4. Inst. c. 7. §. 10. ex epist. S. P. Augustini 162. in qua refertur, causam Cæciliani Episcopi, quæ prius à Pontifice fuit judicata, postea jussu Imperatoris judicatam fuisse ab Episcopo Arelatensi; imo tertio ab ipso etiam Imperatore; ergo.

XXI. Prohibitum est, ad Romanum Pontificem appellare: ergo Romanus Pontifex non est Judex controversiarum. ant. prob. ex S. Cypriano lib. 1. epist. 3. dicente: *Cum statutum sit omnibus nobis. (Episcopis in Concilio Africano) & æquum sit pariter ac justum, ut unius cujusque causa illic audiat, ubi est crimen admissum - - - nisi paucis desperatis ac perditis minor videtur esse auctoritas Episcoporum in Africa constitutorum: ubi reprehendit appellantes ad Romanum Pontificem; ergo.*

XXII.

XXII. Damasus Papa epist. ad Theophilum & Anysium (quæ inter D. Ambrosii epistolas est 39.) ait: *Cum bujusmodi fuerit Concilii Capuensis judicium, ut finitimi Bonoso atque ejus accusatoribus Judices tribuerentur, advertimus, quod Nobis judicandi forma in id, quod jam à Concilio judicatum fuit, competere non potest; ergo ad Romanum Pontificem non datur appellatio.*

XXIII. Can. 22. Concilii Milevitani ita habet: *Quod si ab eis (Episcopis vicinis) provocandum putaverint, non provocent, nisi ad Africana Concilia, vel ad Primate Provinciarum suarum. Ad transmarina autem (scilicet Romana) Concilia, qui putaverit appellandum, à nullo intra Africam in Communionem suscipiatur; ergo.*

XXIV. Ecclesia est ultimum ac supremum tribunal; ergo non ad Pontificem, sed ad Ecclesiam appellandum est. ant. prob. ex illo Matth. c. 18. v. 15. &c. ubi habetur: *Si peccaverit in te frater tuus vade, & corripe eum. Si te non audierit &c. Dic Ecclesiæ: si autem Ecclesiam non audierit, sit tibi sicut Ethnicus & publicanus; quibus verbis (dicunt Sectarii) Christus alloquitur Apostolos suos & horum Successores, quibus injungit, ut Christianos incorrigibiles denuntient Ecclesiæ; à qua damnatos Christus non remittit ad ulteriorem judicem: ergo.*

XXV. Vel Papa est noster Frater, vel non est? Si non sit: ergo nec eundem nobiscum Patrem Deum habet, nec eandem Matrem Ecclesiam. Si vero sit noster Frater: ergo potest ab Ecclesia judicari, ni velit esse sicut Ethnicus & publicanus: ergo Ecclesia est altius tribunal Pontifice:

XXVI. Concilium Constantiense ante electionem Martini V. erat repræsentative Ecclesia sine capite; atqui erat auctoritatis & quidem majoris, quam Papalis; ergo Ecclesia sine capite est vera & auctoritativa Ecclesia. min. prob. Concilium istud exercuit jurisdictionem in Papam: ergo. ant. prob. 1. quia Self. 15. excommunicat Papam, dum omnes cujuscunque etiam Papalis dignitatis, qui ad Concilium accedentes impediunt,

anathemate percutit: ergo. 2. quia Sess. 17. coarctat potestatem Papalem, dum declarat Gregorium XII. non posse à futuro Pontifice privari honoribus ac privilegiis Eidem, eo quod Pontificatui sponte renuntiaverit, ab eodem Concilio concessis; ergo. 3. quia Sess. 39. præcipit futuris Pontificibus, ut singulis decenniis Concilium Generale congregent, & si contingat duos simul eligi Summos Pontifices, jubet sub divinæ maledictionis interminatione, ut statim se tali dignitate abdicent, & nisi obediant, privat eos omni jure, quod ad Pontificiam dignitatem habebant, ac declarat eos inhabiles ad omnes dignitates in futurum. Ergo.

XXVII. Matth. c. 23. v. 8. ait Christus: *Vos autem nolite vocari Rabbi, unus est enim Magister vester*: ergo præter Christum, non est agnoscendus Judex.

XXVIII. Si Pontifex judicat de Scripturis, sequitur Pontificem esse supra Scripturam, & verbum Dei accipere robur & firmitatem à verbo hominis: sed hoc dici nequit; ergo.

XXIX. Si sensus Scripturæ dependet à judicio Pontificis: ergo fides nostra dependet à judicio Pontificis: consequenter à verbo hominis: ergo à verbo fallibili: nam juxta S. P. Augustinum l. 2. contra Cresconium c. 21. Christus solus semper veraciter judicat: Ecclesiastici autem Judices, sicut homines plerumque falluntur.

XXX. Dum Papistæ legitimum Scripturarum sensum à Romano Pontifice expectandum asserunt, circulum vitiosum committunt: nam infallibilitatem Pontificis per Scripturam, & vicissim legitimum sensum Scripturæ per judicium Pontificis probant: ergo.

SOLU-

# SOLUTIONES.

**A**d I. In Oriente primo quidem effulſiſſe lucem fidei, quia ibi Chriſtus ſuam fundavit Eccleſiam, Apoſtoli prædicationis miniſterium initiaverunt, Petrus deferendi Evangelium gentibus mandatum habuit: dein ad occidentem tranſiſſe, cum Idemmet Petrus Romæ evangelizavit, ibique Primatum erexit, atque per mortem perpetuo firmavit. Hieronymus porro communicabat cum Petro Alexandrino; quia Romanæ Eccleſiæ adhærebat, communicaturus etiam cum Proteſtante, ſi ejus fides Romana eſſet.

Ad II. Citata Tertulliani verba male aſſumi. Etenim dum ait, *veritatem Dei non admittere patrocinium perſonarum*, nil aliud innuere vult, quam id quod nos ultro fatemur, videlicet crimen cujuſcunque perſonæ fidem non improbare, ſicut pondus veritatis non acquirere ex illuſtrium perſonarum converſione, ſed ex Deo revelante. Cæterum Tertullianum, antequam ad Montanum declinaret, Catholice ſenſiſſe in aperto eſt ex lib. de Præſcript. c. 36. *Si Italiam adjaces, habes Romam, unde nobis quoque auctoritas præſto eſt.* Nec urget, quod additur, nam quis prohibet dubium in fide mittere ad virum doctum, ut inſtruatur?

Ad III. Liberium Papam fidem ſuam nequaquam Athanaſio ſubdiſſe auctoritate examinandam, ſed amicabili quodam communicationis modo; cum enim Ariani, ut errorem ſuum adverſus verbi conſubſtantialitatem propugnarent, plures fidei formulas ſub æquivocis verbis ederent, probandasque liberio tanquam judici deferrent, is ut Athanaſium inſenſiſſimum Arianorum hoſtem tutius defendere poſſet, atque ſecurius ſe à calumniis vindicaret, ab eodem petiit, num formula, qua conſubſtantialitatem profitebatur, cum ſua & aliorum Episcoporum in proprietate locutionis conveniret, ut ſubdolæ inter-

Ss 3

preta-

pretationi aditus omnis adimeretur; eapropter liberius iudicio usus est Athanasii tanquam eximii Theologi; quod à iudici-  
bus alienum non est.

Ad IV. Palam esse, Patres Chalcedonenses literas Leo-  
nis approbasse, non tanquam Iudices, sed obsequenti animo  
tanquam fidei regulam: ut patet ex Epistola Synodica ad Leo-  
nem data Act. 16. Eodem modo ab Ephesina Synodo Acta  
consiliaria Cælestini approbata fuere.

Ad V. Patres Carthagenenses, dum confirmationem ex-  
petierunt damnationis in Pelagium & Cælestium latæ, agnovisse  
in Pontifice summam iudicandi facultatem. Audiatur S. P.  
Augustinus cum aliis Episcopis laudati Concilii ad Innocen-  
tium epist. 90. *Hoc it. que gestum est Domine Frater Sancte, Cbari-  
tati Tuæ intimandum duximus, ut statutis nostræ mediocritatis etiam  
Apostolicæ Sedis adhibeatur auctoritas pro tuenda salute multorum, &  
quorundam perversitate etiam corrigenda..* Nec Innocentii respon-  
sum artificium est, ut perperam dicit Spalatenfis, sed quia Ec-  
clesia Romana est controversiarum Iudex, & è re Christiana est  
ejusdem iudicium in rebus fidei expectare, ut clare evincitur  
ex Epistola S. Cyrilli Alexandrini ad Innocentium Papam:  
*Quamvis hæc ita se habeant, non prius tamen Nestorii communionem  
confiteri deserere ausi fuimus, quam hæc ipsa Pietati Tuæ indicare-  
mus. Digneris proinde, quid hic sentias, declarare, quo liquido no-  
bis constet, an communicare cum Nestorio nos oporteat, an vero libe-  
re ei denuntiare, neminem cum eo communicare, qui ejusmodi erro-  
neam doctrinam fovet, ac prædicat. Quid ad hæc Apostata?*

Ad VI. Conc. maj. neg. min. ad 1. prob. Aliæ Ecclesiæ  
non in obsequium accedebant Romanam, sed tanquam ad Ca-  
put, tanquam ad Ecclesiarum Principem confugiebant: audia-  
tur Irenæus lib. 3. contra hæreses c. 13. dicens: *Ad banc (sup-  
ple Romanam) Ecclesiam propter potentiorē principalitatem necesse  
est omnem convenire Ecclesiam, hoc est, omnes qui sunt undique fide-  
les,*



les, in qua semper ab his, qui sunt undique, conservata est ea, quæ est ab Apostolis, traditio. Ad 2. prob. Extare quidem viros doctissimos Romæ: verum illuc non confluebant eruditionis causa fideles, sed, ut ait Sozomenus lib. 3. c. 7. *propter Sedis dignitatem ad ipsum* (id est Julium) *cura omnium spectabat.* Nec Clemens suasorias solum literas ad Corinthios scripsit, sed coercitivas, & potentissimas, ut ait Irenæus lib. 3. Contra hæreses c. 13. *ad Pacem eos congregans, & reparans fidem eorum:* sic ait S. Maximianus CP. Epist. ad Orientales. S. Hieronymus erat quidem adjutor Damaso in Synodicis consultationibus, ejusque ministerio utebatur Pontifex: sed hinc non licet inferre, Hieronymum responsa dedisse sed Damasum; quo pacto Rex in condendis legibus utitur jurisperitorum ministerio, aut non isti sed ille leges condere merito dicitur. Ad 3. prob. concedendo, plures Episcopos ad alias Ecclesias instructorias literas direxisse, solum tamen Pontificem judiciaria uti potestate, quia ut scribit S. P. August. epist. 162. ad Glorium: in Ecclesia Romana *semper Apostolicæ Cathedræ viguit Principatus.* Ad 4. prob. Expetiisse Hæreticos Romanæ Ecclesiæ communionem, quia optime noverant ipsam esse Arcam (teste Hieronymo ad Damasum epist. 57.) in qua si quis non fuerit, diluvio peribit; & licet aliarum etiam Ecclesiarum exquirerent communionem, eæ tamen erant, quæ ob adhæSIONem Romanæ boni nominis erant.

Ad VII. Insto argumentum: sicut iniquum est tribunal, in quo Judex est pars, ita potiori jure iniquum erit censendum, in quo Judex insensibilissimus est hostis; atqui Protestantes non solum sunt partes, sed Romanæ Ecclesiæ hostes insensibilissimi: ergo suo privato acti spiritu non possunt, æquitatis jura servando, adversus Romanam Ecclesiam ferre sententiam. Quid ad hoc Protestantes? Deinde sicut Christus objicientibus Judæis Joan. c. 8. v. 13. *Tu de Te ipso testimonium perbibes, testimonium tuum non est verum;* Respondit Jesus, & dixit eis: *Et ego testi-*  
monium

*monium perbibeo de me ipso, verum est testimonium meum, quia Scio, unde venio, & quo vado: poterit ergo similiter & Pontifex verum de se ipso, immo de fide testimonium ferre: nam & Paulus ad Galat. c. 2. & alibi, testimonium de suo Apostolatu protulit.*

Ad Conciliandos textus

Advertendum, Christum considerari posse ut loquentem præcise in se & ad se: vel ut loquentem, & dicta sua operibus, atque scripturarum consonantia probantem. Christus primo modo loquens, cum Deus esset, summæ erat infallibilitatis & veritatis; Judæi tamen cum nondum de ejusdem Divinitate evidentiam credibilitatis haberent, eidem non credebant. Altero vero modo loquens ejusdem erat infallibilitatis & veritatis, sed quia miraculis & scripturarum concordantia evidentia credibilitatis habebatur, jam tenebantur Judæi eum tanquam Deum venerari. Quando ergo Christus dicit: *Si testimonium perbibeo de me ipso, testimonium meum non est verum*, loquitur de testimonio secundum se, & ab operibus & Scripturis discreto, affirmans sine his non esse juridicum, id est, non habere evidentiam credibilitatis, & ideo subdit: *Alius est, qui testimonium perbibet de me: nempe opera quæ ego facio, testimonium perbibent de me, quia Pater misit me.* En testimonium signorum. Accipe nunc illud Scripturarum: *Scrutamini Scripturas, quia vos putatis in ipsis vitam æternam habere, & illæ sunt, quæ testimonium perbibent de me, & non vultis venire ad me, ut vitam habeatis.* Ex his & ex testimonio Joannis habebant Judæi evidentiam credibilitatis, propterea erant inexcusabiles.

Præterea ad argumentum dico: falsum esse, Pontificem esse partem Controversiæ insimul & testem: causa enim est Christi, totius Ecclesiæ, omniumque fidelium, cum de his agatur, quæ ad populorum salutem deserviunt. Cum ergo leges condit, fideique Pontifex declarat mysteria, non ad propriam, sed ad communem utilitatem respicit; & testes, qui afferuntur,  
sunt

sunt perpetua Ecclesiæ traditio, Conciliorum sanctiones, Sanctorum Patrum doctrina; qui testes sunt omni exceptione majores, à quibus hæc omnia firmata habuimus, antequam Protestantes falsa dogmata somniasent; ergo legitima est Judiciaria potestas Romani Pontificis. Adde, supremum Judicem posse dicere sententiam, etsi causa ad ipsum spectet, ut Jura, & perpetua traditio declarant, & consuetudo ostendit: cap. Novit. de Judiciis. Rex in causa fiscali constituitur legitimus Judex. Quidni & Romanus Pontifex ut Supremus in Ecclesiastica Hierarchia Princeps?

Ad VIII. Ignorantiam Pontificis (si quæ est) non impedire assistentiam Spiritus S. quæ ad officium Pontificis in decisione controversiarum necessaria est. Indocti & fuere Apostoli, & hos inter Petrus, qui piscator erat: & tamen infallibiliter à Spiritu S. instructos nemo inficiatur. In Accademiis porro facilius resolvuntur quæstiones doctrinaliter, verum juridice sententia à Romano Pontifice expectanda est.

Ad IX. Divini Numinis assistentiam Pontifici non ratione sanctitatis promissam esse, sed quia est caput Ecclesiæ. Alias in Ecclesia Romana quoad doctrinam nulla fæditas est; quod si quid criminofum in curia sit invenire, fidei summam non attingit, aut vitiat. Immo si Gersonius absolute & universaliter loquatur, turpiter errat, habet enim Roma suos Doctores non partiales, non seductos, non fastuosos, aut quæstuosos, sed candidos veritatis amatores, quæ Dei sunt Deo, quæ Cæsaris Cæsari dantes, nec omnibus vicio verti debent, quæ singularia sunt.

Ad X. Arbitrariam esse illam distinctionem à Gersonio expositam; nam jura aliter sentiunt, & majores causas eas vocant, quæ ad fidem, ad mores, & hujusmodi pertinent; minores vero, quæ ad possessiones, ad privata crimina, & ad similia referuntur. Concedimus, in aliqua Diæcesi, sive Provinciali

Consilio sæpe solutam fore controversiam fidei, quæ alibi majori adhuc indagine perpenditur; verum hoc non evincit, Diæcesim illam habere judiciariam potestatem definiendi fidei dogmata, & tunc temporis Pontificia non egere sententia, quæ clare veritas eluceat.

Ad XI. Concedendo, Donatistas à Papa appellasse ad Scripturas, quibus non renuit Melchiades, sciens eos propriis armis confodiendos, cum Scripturæ adversus ipsos starent, utinam Scripturis se fidere voluissent; sed rabida audacia, ut ait Constantinus Imperator, modo ad Papam, modo ad Concilium, modo ad Imperatorem provocabant: ubique damnati, quia iniquitati nullum firmum suppetit patrocinium.

Ad XII. Hominum ministerium sive ad propagationem, sive ad fidei conservationem necessariam fore clare evincitur ex Divina Providentia, quæ media ad salutem necessaria suppetat; non esset autem satis consultum, nisi aliqua auctoritas Magistra, fideique Judex extaret; Scripturis siquidem edocemur, rectam & certam fidem requiri ad salutem, & ipsam per se, vel humanæ rationis viribus assequi nequit animalis homo, ut dicitur 1. ad Corinth. c. 2. v. 14. ergo hanc ab alio discere debet: ergo certum tribunal fidei assignari opus est, unde dubitationes solvantur. Porro vocem hujus tribunalis auctoritativi esse divinam, innumeræ pene declarant Scripturæ: sic Matth. c. 10. v. 20. *Non enim vos estis, qui loquimini, sed Spiritus Patris vestri, qui loquitur in vobis.* Joan. c. 17. v. 14. *Ego dedi eis sermonem tuum, & mundus eos odio habuit, quia non sunt de mundo, id est, quia non loquuntur, quæ terrena sapiunt, quem enim misit Deus, verba Dei loquitur.* Item 1. Joan. c. 3. v. 34. *Et 1. ad Thessal. c. 2. v. 13. Cum accepissetis à nobis Verbum auditus Dei, accepistis illud non ut verbum hominum, sed Verbum Dei.* Ergo.

Ad XIII. Scripturam sæpenumero testari, verbum prædicationis Apostolorum permanfurum in æternum: Deus igitur

tur nunc etiam in Successoribus Apostolorum loquitur. Clarius patet ex Joan. c. 17. v. 20. *Non pro eis rogo tantum, sed & pro eis, qui credituri sunt per verbum eorum in me, ut omnes unum sint.* Hic Christus sermonem habet de his, qui usque ad consummationem sæculi credituri sunt, ut ait S. P. August. Tract. 109. in Joan. Sed verbum, per quod Credituri sunt homines, est verbum fidei Apostolorum, ergo non est humanum, sed divinum: & alias usque ad consummationem sæculi ab Apostolis non evangelizatur, utpote demortuis: ergo ab eorum successoribus, dicente Isaia c. 59. v. 21. *Spiritus meus, qui est in te, & verba mea, quæ posui in ore tuo, non recedent de ore tuo, & de ore seminis tui, dicit Dominus, amodo & usque in sempiternum:* en! quomodo in successorum ore permanet Dei Verbum, atque per illud loquitur Deus. Rursus Joan. c. 14. v. 16. *Et alium Paracletum dabis vobis, ut maneat vobiscum in æternum, spiritum veritatis;* quo pacto manet in æternum in Apostolis, si non manet in Ecclesia in eorum successoribus?

Ad XIV. Ecclesiæ vocem, seu ejus Capitis esse divinam non solum ex parte objecti, quatenus de Deo loquitur, sed & ex parte subjecti, quod nonnisi ex divina motione verba promittit. Unde adverte, aliud esse rem, quæ agit: aliud virtutem, per quam agit. Sic in igne aliud est Corpus, quod calefacit, aliud virtus, per quam calefacit. Si virtus, per quam quis agit, est effectui proportionata, dicitur connaturalis; si vero agens affectum sibi non proportionatum attingit, ex motione superioris agentis operatur. Pontifex itaque cum definitive loquitur, per humanum quidem organum loquitur, virtus vero, qua movetur ad definitiones, est divina, nempe specialis motio, atque peculiariter assistentis Divini Spiritus illustratio; unde ejus definitio non solum Divina est, quia dogmata profert Dei, sed etiam quia ex Divina motione procedit.

T t 2

Ad



Ad XV. Quamvis Pontificis testimonium à testimonio Dei distinctum sit, tanquam operatio instrumenti ab operatione agentis principalis, nihilominus tamen non est laceratum & avulsum à Dei testimonio, sed huic subordinatum atque Coniunctum. Unde definitio ab utroque est, sicut effectus & à causa principali, & ab instrumento. Hinc dicitur Act. c. 5. v. 28. *Qui vos audit, me audit. Visum est Spiritui S. & nobis.* Item Exod. c. 14. v. 31. *Timuitque populus Dominum, & crediderunt Domino, & Moyse servo ejus.*

Ad XVI. neg. min. Deus unumquodque juxta suæ naturæ conditionem movet. Pontifex est instrumentum liberum atque humanum, proinde modo humano à Deo movetur. Quare illæ ratiocinationes Philosophorum, atque Academiarum sententiæ sunt velut dispositiones, quibus inquiritur, num hoc illudque sit contra Scripturas, congruat vel non Conciliorum Sanctionibus: hinc Deus specialiter assistit, ne quid Pontifex erroneum proferat.

Ad XVII. neg. min. nec urget proba: nam quis unquam Prætoris vocem, quoties ex imperio Principis loquitur, ejusdem vocem non censuit? quis unquam absque Principis injuria ausus fuit illam contemnere? Similiter falsum est, à Prætoris sententia semper appellari posse ad Principem. Adverte: Prætores quandoque ut Judicem ordinarium ferre sententiam: quandoque ut delegatum; si Prætor primo modo spectetur, appellatio intervenire potest; secus si secundo modo judicet, quia tunc per ipsum Princeps judicium absolvit. Tribunal Pontificis in Ecclesia ultimum est tanquam ipsius Christi Vicarii: ideoque nulla admittitur appellatio in terris, neque ad Christum in rebus fidei, cum ejusdem judicium sit infallibile, ut inferius dicemus.

Ad XVIII. Si attendatur radicale principium legis æternæ, à qua aliæ leges dimanant, si spectetur finis ultimus, ad quem

quem omnes referuntur, & primum principium moderativum, quod mandat cuilibet legitime præcipienti obediendum esse, leges omnes nuncupari possunt divinæ, quia lex æterna, finis ultimus, primusque moderator est Deus. Si vero lex consideretur ex parte modi ferendi, quatenus Deus ministerio Prophetarum & Angelorum illam dictat, dicitur absolute & primario Divina. Si humano utatur modo, sed specialiter, ne error subrepat, assistat, & invariabilis sit materia, dicitur similiter Divina; humana vero, licet infallibilis, si specialiter quidem assistat, sed variabilis sit materia. Si vero materia mutationi subest, nec inferenda lege adsit peculiaris Dei assistentia, lex talis humana est & fallibilis, ut sunt leges civiles. Cum ergo Pontifex in definitionibus fidei speciali gaudeat Spiritus S. assistentia, & materia sit invariabilis utpote ad fidem spectans, nec ea decreta condantur ad has illasve contingentes circumstantias attendendo, sed inspecta immediate divina revelatione circa ea, quæ quidem quoad se, & in se revelata erant, secus quoad nos, nisi post legitimam Papæ declarationem: jam sequitur fidei sanctiones divinas esse, divinamque fore vocem definitientem. Hæc porro Principi Laico, immo & ipsi Pontifici aptari nequeunt, dum leges condunt ad Politicum Regimen deservientes.

Ad XIX. Circulum vitiosum tunc in ratiociniis intervenire, quando ex uno ad aliud fit regressus secundum idem; hoc est, quando consequens illatum, nulla alia notitia probatum quam vi antecedentis, assumitur ad idem antecedens probandum; quando autem regressus fit penes diversa, nullum intervenit circulationis vitium: hinc definitum assumitur ad probandam definitionem, causa ad ostendendum suum effectum. Hoc in præsentī verificatur, fit enim regressus in diverso genere causæ. Scriptura assumitur ut Canon divinæ revelationis, quæ est ratio formalis assensus fidei: & Ecclesia seu Pontifex assertus

T t 3

ut

ut regula Scripturæ sensum explanans , & ut Judex , quare est solummodo conditio assensus fidei. Præterea perperam arguitur de vitiosa circulatione , quoties quis ex præsuppositis , vel ab Adversario concessis arguit ad concludendum contra ipsum : & hoc in præsentī evenit. Hæretici admittunt Scripturas : per easdem probamus Ecclesiam sive Pontificem esse tribunal fidei ; eapropter nulla est battologia. Si vero contra Ethnicos negantes Scripturas agendum est , ad eosdem revincendos utendum est motivis credibilitatis.

Et argumentum contra Adversarios Protestantes instatur : inquiratur à Protestante , cur credis in Cæna non adesse reale Christi corpus ? respondebit , quia Scriptura hoc docet illis verbis : *Hoc est corpus meum* : At quomodo scis hunc verum esse Scripturæ sensum , cum Lutherus refragetur ? reponet , quia Spiritus S. unicuique assistens ita interpretatur. Verum unde constat , Spiritum S. cuilibet assistere ? dicet , quia Scriptura hoc docet. Ergo Scripturam per Spiritum privatum probas , & Spiritum privatum vicissim per Scripturam : ergo committis circulum vitiosum. Quid ad hoc mi Protestans ? Tibi dico illud cum S. P. Augustino in Psal. 139. *Ipse est labor impiorum* , qui de vitioso circulo nos criminantur , cum ipsimet *in gyrum eant erroris*.

Dices : Ecclesia in eodem genere ad se ipsam regreditur ; nam se ipsam proponit tanquam fidei regulam : ergo in eodem genere habetur vitiosa circulatio. R. Instantiam urgere in Spiritu privato , qui se ipsum ut Judicem fidei proponit ; in Christo , qui se ipsum ut verum Messiam declaravit ; in Joanne , qui se ipsum verum testem c. 21. v. 24. descripsit ; in Apostolis , qui se ipsos enuntiabant tanquam testes præordinatos à Deo. Deinde , sicut lux se ipsam demonstrat , & prima principia scientiarum suam necessitatem & dignitatem probant , & supremi Magistratus absque vitiosa circulatione suam potestatem ;  
ita

ita Ecclesia se ipsam merito tanquam regulam proponit, accedentibus motivis credibilitatis: nam juxta Philosophos, ad unam rationem formalem non datur alia ratio formalis; & quod est ratio manifestandi alia, est etiam ratio manifestandi se ipsum: sic quia sol illuminat alia, etiam se ipsum illuminat.

Ad XX. Neg. ant. ad prob. Calvinum agere falsarium: siquidem Donatistæ causam Cæciliani judicandam non detulerunt ad Pontificem, sed immediate ad Imperatorem, à quo illa ad Pontificem tanquam ad solum Judicem competentem transmissa est. Unde S. P. August. reprehendit Donatistas, quod forum incompetens accesserint, & laudat Constantinum, quod causas ad forum Ecclesiasticum spectantes non sit ausus suscipere, nec ad judicandum cognoscere. Cæterum Pontifex, ut Donatistis satisfaceret, & illi acquiescerent, omnesque suspitionum umbræ ab illis averterentur, permisit, alios quoque ab Imperatore assignatos isti judicio, vel potius revisioni intervenire: quod, ait S. P. August. factum est non ex necessitate, sed tantum ad obstruenda ora Donatistarum. Unde Imperator nonnisi venia prius à Pontifice Romano & Episcopo Arelatenſi petita, invitus cognovit Cæciliani causam, quamvis hæc ad ipsius forum non pertineret, adeoque ipsius judicium foret invalidum.

Ad XXI. Neg. ant. ad prob. neg. conſeq. nam S. Cyprianus solum reprehendit eos, qui de manifestissimis criminibus à suo proprio Episcopo Judice convicti & judicati appellant ad Romanum Pontificem. Non vero reprehendit eos, qui justam causam appellandi habent, uti jam in præcedentibus dictum. Ad illud, quod Cyprianus addit, Episcopos Africæ non esse *minoris auctoritatis*, dico: istud ly *minoris* non referri per comparisonem ad auctoritatem Romani Pontificis, sed ad causam, de qua agebatur, ut ita sensus sit, Episcopos Africæ non esse *minoris auctoritatis*, quam ad illam causam sufficiat.

Ad

Ad XXII: Illam epistolam nec esse Damasi, neque Ambrosij, cum hujus in illa prorsus nulla fiat mentio, sed esse cujusdam incerti, epistolisque ab Ambrosio congestis additam. Dato autem non concessio esse eam epistolam Damasi Papæ, dico, Damasum in ea epistola non dicere, sibi absolute non competere facultatem in ea causa judicandi; sed quia Concilium omnibus mature expensis rectissime jam judicavit, ideo Damasum dicere, sibi non competere *judicandi formam*, seu modum. Quid enim vel quomodo judicaret, si jam omnia rectissime judicata esse adverterit?

Ad XXIII. Concilij Milevitani Canonem esse intelligendum vel de negotiis levis momenti, vel de appellationibus Clericorum Episcopo minorum, ut patet ex 162. epistola S.P. Augustini, qui isti concilio interfuit: alias Pontifex Innocentius I. illud certe non approbasset Concilium, si Apostolicæ sedi in illo derogatum fuisset, uti tamen approbavit, prout ex ejus ad idem Concilium data litera constat.

Ad XXIV. Cur ergo Protestantes, si sint fratres, & non sicut Ethnici & Publicani, non audiunt Ecclesiam? cur hanc fallibilem, atque erroribus obnoxiam clamant? deinde sensus verus illius citati textus est: si frater tuus, sive Christianus coram te, vel sciente te peccaverit, ac secretæ fraternæ tuæ correctioni non acquieverit, dic Ecclesiæ, hoc est, proprio, qui Ecclesiæ præest, Pastori, sive hic Episcopus sit, sive Parochus, vel alius delinquentis superior Ecclesiasticus, ut explicant S. Chrysost. hom. 16. in Matth. S. Thomas in 4. dist. 19. Innocentius III. in cap. Novit. 13. de Judiciis. Ratio hujus explicationis est: quia in citato textu nomine *Ecclesiæ* non potest intelligi corpus acephalum, seu cætus fidelium sine capite, sive suo Prælato Ecclesiastico, quorum Primas est Papa. Unde Sectarij turpissime errant, dum in cit. textu nomine *fratris* Papam, & nomine *Ecclesiæ* Concilium generale intelligunt,  
cum



cum in textu nec verbum habetur de Papa, aut de concilio. Deinde licet Papa peccaret, ejusque delictum ad Concilium deferretur generale, ab hoc tamen non posset judicari, quia Concilium in Christi Vicarium nullam habet jurisdictionem, nullam præminentiam. Fuerunt quidem aliqui Pontifices, qui propriæ innocentiae tuendæ, & se ipsos à calumniis sibi inflictis purgandi causa se particularium Synodorum judicio submiserunt, at judicio solum *discretivo & arbitrario*, non *coactivo*, cui se subicere non potuerunt.

Ad XXV. Pontificem esse simul *Fratrem* nostrum sive Christianorum omnium, & *Patrem*; Frater noster est, quia nobiscum ab eodem Deo Patre per baptismum regeneratus est. Pater noster & Princeps, ac caput Ecclesiæ est, quia nos omnes ut Pastori commisi sumus. Frater ergo noster est, at non subjectus, sed præsidens Ecclesiæ, & consequenter ab hac non judicabilis. Deinde dum dicitur, *si peccaverit in te frater tuus &c. dic Ecclesiæ*: vel Ecclesia intelligitur cum capite suo? & sic perinde est ac dicere, *si peccaverit in te Papa, dic Papæ*. Vel Ecclesia intelligitur sine capite? & tunc non est Ecclesia, sed corpus acephalum, & Schismaticum, seu discissum à capite.

Ad XXVI. Neg. maj. quia Ecclesia sine capite visibili non est Ecclesia vera, cum hæc ex D. Cypriani definitione sit *plebs adunata suo Sacerdoti*: ergo Concilium sine capite nec representative est vera Ecclesia, nisi prout hæc tempore vacantis sedis dicit habitudinem ad suum caput, scilicet ad futurum Pontificem, sic enim est vera Ecclesia: sicut homo mortuus est verus homo ob habitudinem, quam dicit ad animam. Deinde transeat maj. neg. min. ad prob. Ante Martini V. electionem adhuc durasse tempus Schismatis, ad quod tollendum fuit celebratum illud concilium; tempore Schismatis autem pertinet ad Concilium generale providere necessitatibus Ecclesiæ, ade-

U u

oque

oque & necessaria statuta condere, quæ tamen plus roboris non habent, quam prout approbata à futuro summo Pontifice. Ad 1. prob. Istam censuram esse latam in eos, qui erant dubiæ ac incertæ dignitatis Papalis, in quos Concilium tempore durantis Schismatis habuit auctoritatem. Ad 2. prob. Concilium non coarctasse potestatem Papalem futuri Pontificis, quia eum ad id non coegit, sed rogavit tantum, ne Gregorio absque nova justa causa emergente aliquid de honoribus & privilegiis illi concessis detraheretur. Ad 3. prob. Concilium id proprie non præcepisse, sed suavisse; potest autem inferior superiori aliquid ut conveniens suadere. Deinde potest etiam Concilium leges ferre, quæ Pontificem quoque quoad vim directivam obligent, præsertim si ordinentur ad conservandum bonum publicum: nam ut dicitur can. Quæ contra 2. dist. 8. *Turpis omnis pars* (præcipue caput) *est suo universo non congruens.*

Ad XXVII. Per id à Christo non prohiberi, ne Rabbi sive Magistri, qui Scripturam interpretentur, in Ecclesia habeantur, sed ambitio illius honoris tantum vetatur. Nunquid Paulus 2. ad Timoth. c. 1. v. 11. se vocat Doctorem gentium? Et nonne apud Protestantes tot fere vocantur Magistri, quot Præcones?

Ad XXVIII. Duobus modis posse intelligi Ecclesiam vel Pontificem de Scripturis judicare; uno modo ita, ut judicet, an verum sit vel falsum, quod Scripturæ docent: altero modo ita, ut præsupposita certissima & verissima doctrina Scripturæ judicet, quis verus Scripturæ sensus, & interpretatio sit. Si primo modo judicaret Ecclesia Scripturam, esset omnino Ecclesia supra Scripturam; sed hoc ne quidem cogitare possumus, quamvis Protestantes nos calumnientur, dicentes, quod Scripturam pedibus Papæ subjiciamus. Quando ergo Ecclesia judicat de Scripturis, judicat secundo modo, quod non est Ecclesiam esse supra Scripturam, sed supra judicia privatorum hominum; siquidem  
hoc

hoc modo Ecclesia non de veritate Scripturæ, sed de intelligentia mea, tua, & aliorum judicat; neque hinc Verbum Dei accipit aliquod robur, sed intelligentia nostra; per hoc enim, quod Ecclesia Scripturam interpretetur, & verum ejus sensum determinet, non fit illa verior, & certior, sed mea sententia & interpretatio verior redditur, quando Ecclesiæ judicio & sententia confirmatur.

Ad XXIX. Insto argumentum: Ergo fides Protestantium dependet à judicio privato: ergo à judicio hominum, ergo debilissimo nititur fundamento. Nec dicant: judicium privatum esse à spiritu Dei dirigente, & inspirante: nam dicam & ego: si judicium privatum est à spiritu Dei, cur non etiam judicium Ecclesiæ? si spiritus privatus juxta Protestantes est spiritus Dei, cur non item spiritus Ecclesiæ est spiritus Dei? deinde dist. Fides nostra dependet à judicio Pontificis ex se loquentis, neg. Ex spiritu Dei loquentis, conc. Judicium Ecclesiæ proponentis, & determinantis verum sensum Scripturarum, non est judicium pure hominis, quia non profertur ab homine ut homine & errori obnoxio, sed ut directo & gubernato à Spiritu S. Et ita explicatur S. Pater: & habetur, quod Scriptura non autoritate hominis ex se loquentis, sed à Spiritu Sancto directi & gubernati sit intelligenda.

Ad XXX. neg. assumptum: quia tunc juxta Philosophos committitur circulus vitiosus, quando hoc probatur per illud, & vicissim illud per hoc respectu ad eum, qui neutrum concedit, non autem qui alterutrum ex illis duobus admittit, v. g. si quis Platonem & Aristotelem unquam extitisse negaret, circulum vitiosum omnino committeret, si apud eum Platonem extitisse probaret ex Aristotele, & vicissim Aristotelem extitisse probaret per Platonem, quia ipse, apud quem probat, utrumque negat, vel de utroque dubitat: probatio autem fieri debet à notis ad ignota, à certis ad incerta; si vero ille alterutrum

U u 2

con-

concedat: v. g. si Aristotelem extitisse concedat, & Platonem neget, recta erit & non vitiosa circulatio, si ei probet Platonem extitisse ex Aristotele, quia tunc procedit probatio illa à noto, certo, & concesso Aristotele, ad ignotum, incertum, & non concessum Platonem. Taliter se res habet in nostro casu; Catholicus circulum vitiosum quidem committeret, si Ethnico, qui nec Ecclesiam, nec Scripturam admittit, probare vellet Scripturam esse infallibilem, quia Ecclesia dicit: & Ecclesiam esse infallibilem, quia Scriptura dicit: quia neutrum ab Ethnico admittitur. Minime autem committit circulum vitiosum, si unum per alterum probet Protestanti, qui admittit Scripturam, & negat Ecclesiæ infallibilitatem. Recolligantur dicta ad XIX.

Quæres I. Qua ratione Christianus Romano-Catholicus aliquando sine ullo vitii circulo suam fidem resolvat in auctoritatem Ecclesiæ? R. hac ratione; Si quis à me petat: *unde scis*, Jesum Christum esse Salvatorem mundi? R. quia Divinæ literæ id me docent. Si ulterius quærat: eas literas esse Divinas *unde scis*? R. quia Ecclesia à Spiritu S. edocta eas sua infallibili auctoritate proponit. Si ulterius quærat, est *unde scis* hanc Ecclesiam esse infallibili auctoritate præditam, & à Deo constitutam veritatis Magistram? R. Me id credere ob auctoritatem Dei per eandem Ecclesiam loquentis, & sonantis. Si ulterius quærat, *unde scis* Deum per os Ecclesiæ verè loqui? R. Me id credere, quia volo, seu quia intellectum imperio voluntatis flecto, ac captivo in hoc fidei obscuræ obsequium. Hic jam mutatur motivi genus, transeundo ab intellectu ad voluntatem; quo tamen facto filum resolutionis, nondum abrumpitur. Nam si alter ulterius quærat: *unde vero tibi* est hæc voluntas captivandi te, & acceptandi hanc Ecclesiam ut vivam fidei regulam & organum Dei? R. quia perspicue video, id adeo rationi, honesti, & prudentiæ legibus congruum esse, ut manifestæ sit temeritatis, impietatis, & insanix, in re tanti momenti

menti id non facere. Quod si demum alter instet: *unde perspicue scis* creditu dignissimum esse, quod hæc sit vera & infallibilis Dei Ecclesia? R. quia evidentissimum est, huic Ecclesiæ eas notas ac proprietates inesse, quæ cætera quæcunque Dei organa reddidere hominibus credibilia, quæque jure ad hoc desiderari queunt: evidens est enim, hunc hominum cœtum, seu hanc Romano Pontifici ut visibili capiti junctam congregationem esse ab Apostolis plantatam; evidens est, eam hucusque in unius Dei & Salvatoris confessione perstitisse, cum perpetua Pastorum ac Doctorum successione; evidens est, in ea semper floruisse plurimos sapientia, vitæ innocentia, sæculi contemptu, miraculorum gloria, ac ipsa sanguinis profusione conspicuos; evidens est, vetera Prophetarum de splendore ac amplitudine veræ Ecclesiæ vaticinia mirifice convenire huic Ecclesiæ Romano-Catholicæ; evidens est, in ea summam esse doctrinæ consensionem, nullas sectas: ac denique nullam in ea unquam factam esse doctrinæ ad fidem pertinentis mutationem, quidquid frustra obloquantur Novatores.

Quæres 2. Cur non Catholici, sed Protestantes dicantur committere circulum vitiosum? R. Ideo, quia non Catholici, sed Protestantes probant idem per idem. Nam quando Catholici contra Protestantes aliosque Hæreticos ex Scripturis probant Ecclesiæ infallibilitatem, tunc non probant vicissim ex Ecclesiæ infallibilitate Scripturas, quia has contra Protestantes probare non est necesse, cum isti Scripturas sua sponte aliunde admittant, ergo non probant idem per idem. Quando autem contra Gentiles aliosque, qui Scripturas non admittunt, probant Scripturarum auctoritatem, tunc eam probant ex infallibilitate Ecclesiæ, hanc vero contra istos probant non ex Scripturis, sed ex motivis credibilitatis, & notis veræ Ecclesiæ; ex quibus, postquam isti sat didicerunt nostram Ecclesiam esse veram, facile agnoscent, eam in credendorum propo-



sitione falli non posse; alias non esset vera & à Deo profecta ac gubernata Religio; ergo iterum non probant idem per idem. Econtra nostri Protestantes, dum interrogantur, cur credant hanc Scripturam esse Divinam, & purum verbum Dei? Respondent, id sibi constare ex interna Spiritus S. testificatione; & si rursus interrogentur, unde ipsis constet, eam internam testificationem esse testificationem Spiritus S. & non potius dictamen Spiritus privati, atque erronei? R. id sibi constare ex Scriptura: ergo probant idem per idem, adeoque committunt Circulum vitiosum.

## QUÆSTIO SEXTA.

1. *An Protestantes queant esse certi se habere S. Scripturam, & purum Verbum Dei?*
2. *An Vulgata Catholicorum S. Scriptura sit authentica?*

### §. I.

Dico I. Protestantes nequeunt esse certi se habere S. Scripturam, & purum Verbum Dei.

**P**robatur I. Istam certitudinem nequeunt habere ex *judicio Ecclesiæ*, quia hanc Protestantes erroribus obnoxiam, & fallibilem reputant: non *ex traditione*, quia hanc exhibitant: non *ex suo*, aut suorum Prædicantium *judicio*, quia hoc utrumque humanum & fallax, ac sæpissime discors est: non *ex efficacia ejusdem Scripturæ*: alias enim quilibet Scripturam legens, hanc efficaciam experiri deberet, & agnoscere, quinam sint libri Canonici, & qui apocryphi: si sic, cur ergo *Lutberus* Scripturam legens, *Jacobi* epistolam irridet, ut stramineam? & quare *Calvinus* etiam Scripturam legens, eandem epistolam amplectitur

Etitur ut Divinam & Canonicam? Si dicat Calvinus, se Scripturam legere animo magis præparato: hoc ipsum quoque dicit Lutherus; cui eredendum? Neutri: neuter enim habet quidquam de Bibliis suis certum atque securum.

Quid igitur faciet Protestans disputare volens cum Catholico super aliquo inter illos articulo controverso? si Catholicus illi neget dari Scripturam S. ex qua sola Protestans juxta sua principia articulum controversum probare tenetur? quid inquam faciet? Certe probare tenetur existentiam S. Scripturæ: atqui existentiam S. Scripturæ probare non poterit sufficienter: ergo min. prob. Medium seu motivum, quo Protestans probaret existentiam S. Scripturæ, vel esset *ipsa S. Scriptura*? vel certa *Criteria* ex parte Scripturæ se tenentia? vel *Revelatio* ipsi Protestanti facta? vel *Spiritus privatus* internus, seu ut Calvinistæ eum appellant, propriæ conscientiæ sensus, quem (sed false) dicunt esse internum Spiritus S. testimonium? atqui nullum ex his recensitis potest esse medium, quo Protestans sufficienter, seu infallibiliter (agitur enim de articulo fidei divinæ) probaret existentiam S. Scripturæ, seu quo probaret dari aliquam Scripturam S. sive Divinam: ergo existentiam S. Scripturæ Protestans sufficienter seu infallibiliter probare non poterit. maj. patet ex sufficienti enumeratione, ultra quæ enumerata nihil restat, quod Protestans admittat: nam Traditionem, aut Ecclesiæ auctoritatem tanquam verbum Dei non scriptum, ex quo solo infallibiliter circa existentiam S. Scripturæ doceri posset, cum suis asseclis non admittit. min. vero per partes probatur, & quidem

imo Istud medium probativum non potest esse *ipsa sacra Scriptura*: ergo prima pars minoris est vera. ant. prob. 1. De S. Scripturæ existentia esset lis: ergo si Scriptura probaretur per Scripturam, idem probaretur per idem, atque id quod est in quæstione, supponeretur; ergo. ant. prob. 2. Si Scripturam  
esse

esse sacram ac Divinam, atque Verbum Dei, posset probari per Scripturam, esset vel ideo, quia tota Scriptura sibi conciliat Divinam auctoritatem, & dicit se esse Verbum Dei? vel ideo, quia una Scripturæ pars, v. g. Evangelium, alteri Scripturæ parti, v. g. illis, quæ in Deuteronomio habentur, Divinam tribuit auctoritatem? sed neutrum dici potest: ergo min. prob. *non primum*, tum quia in tota Scriptura, si Prophetiæ excipiantur, vix est aliquid, quod se dicat Verbum Dei; tum etiam, quia multi nefandi libri, ut *Alcoranus* Machometis, *Talmud* Hebræorum, & libri Pseudo-Prophetarum sæpissime repetentium: *Hæc dicit Dominus*: eandem Divinam sibi arrogant auctoritatem. Tales Pseudo-Prophetarum libros duos, teste Eusebio lib. 4. Hist. c. 8. excogitavit quidam Hæreticus *Simonides*, eorumque unum esse *Barcobam*, alterum *Barcham*, asseruit. Ergo. *Nec secundum*: alias enim hoc ipso progrediretur in infinitum; quia illa Scripturæ pars, quæ Divinam alteri conciliaret auctoritatem, eandem auctoritatem non haberet à se, ergo eam habet ab alia Scripturæ parte, & de hac alia succellive semper deberet quæri, à quam Scripturæ parte ipsa suam habet auctoritatem Divinam? est enim par ratio de una Scripturæ parte ac de altera: ergo daretur processus in infinitum. Insuper ignotum probaretur per ignotius; & committeretur Circulus vitiosus, dum Scriptura probaretur per Scripturam: ergo.

Accedit: Principia Protestantium sunt 1. nihil esse credendum, nisi fide Divina & propter S. Scripturam. 2. pro obtinenda ex Bibliis notitia S. Scripturæ, & ad determinandum ex Bibliis articulum fidei, prius debere invocari Spiritum S. Jam posito casu: Protestans expandit sua Biblia, volens inter alia credenda determinare hoc, quod detur Spiritus sanctus: hic jam Protestans tenetur invocare, & invocat Spiritum S. antequam Scripturam legat: ergo jam credit Spiritum S. atque  
hujus

hujus Divinitatem jam credit: quia juxta fidem Protestantis, nullus quam Deus est invocandus; atqui Protestans non credit fide Divina, seu propter Scripturam: quia hanc nondum legit: ergo credit fide humana, vel arbitraria, seu quia ita ei placet. En! quomodo Protestantes peccent contra sua propria principia.

2. Istud medium probativum non possunt esse *Criteria* seu *proprietates* ( ut quidam ex Protestantibus loquuntur ) *Scripturæ*: ergo 2. pars minoris etiam est vera. ant. prob. Nomine *Criterionum* vel *proprietatum Scripturæ* ab adversariis intelliguntur *Bibliorum antiquitas: mirabilis eorum inter tot casus conservatio: miracula in eorum conservationem facta: eventus rerum, quæ in Bibliis prædicebantur futuræ: rerum, quæ in iis continentur, sanctitas atque Majestas: verborum energia ad permovendos animos: & mira contentarum rerum concordia*; atqui hæc omnia nequeunt esse sufficiens medium ad infallibiliter probandam existentiam S. Scripturæ, five ipsorum Bibliorum; ergo. min. prob. Omnia & singula recensita possunt absolute reperiri in libro quodam mere humano unius pluriumve Auctorum; cur enim talis liber non possit esse *antiquissimus*: à Deo mirabili providentia *conservatus*; res *majestate & sanctitate* plenas continens: ac tanta *verborum energia* proponens, ut homines ad meliorem vitam, vel etiam, sanguinem profundendum permoveantur; cum Plato quoque licet Ethnicus per suum de *animæ immortalitate* librum ita legentium animos commovisse dicatur, ut sibi quidam necem consciscerent? quare Deus ejusmodi librum ab uno vel pluribus viris probis *mirabili consensu ac concordia* conscriptum, non possit etiam *miraculis* tueri ob utilitatem, quam Reipublicæ affert materia in tali libro contenta? cur ejusmodi liber non possit in se etiam continere *Propbetias ac vaticinia de eventibus futuris*: cum gentilium sybillarum libri ( quos tamen Sectarij nostri utique pro sacris Bibliis non habent ) pleni fuerint præ-

ditionibus rerum, quæ postmodum evenerunt? ergo. Hinc *Walenburchenses* tom. 1. pag. 493. n. 12. referunt, se à quodam ex Protestantibus viro docto olim audivisse sequentia: *Si libri S. Scripturæ separatim compacti traderentur homini Ethnicò, atque inter eos separatim traderentur tres priores libelli Thomæ à Kempis, ut ex iis judicaret, quinam essent proprie Divini? futurum esse, ut facilius rejiceret librum Proverbiorum, Cantica Canticorum, & Apocalypsim, quam ullum ex libellis Thomæ pietatem undique spirantibus.*

Præterea: de iisdem recensitis *Criteria* Adversarii non habent evidentiam, aut certitudinem: ergo ea esse nequeunt medium sufficiens ad infallibiliter probandam existentiam S. Scripturæ. Ant. constat, quia Sectariis de istis *Criteriis* nonnisi ex relatione humana, quam tamen semper fallibilem esse contendunt, constat; siquidem ipsi 1. ea *miracula*, si quæ facta sint, non spectarunt præsentia. 2. Absque relatione humana ignorant, num ea ob hunc finem patrata sint, ut ostenderent aliquos libros, præsertim hos, quos Sectarii pro Divinis habent, esse Divinos. 3. Nesciunt, nisi ex fama, quod ea, quæ futura prædicebantur, certo *evenerint*, vel si *evenerint*, postea à nequitioso impostore certis libris auctoritatem Divinam machinante in his codicibus primum scripta sint. Imo multi libri, quos Adversarii pro Divinis habent, & librorum capita, non continent *Propbetias*, res *Majestuosas*, *sublimes*, *concordantes* &c. sed aliqua potius in S. Bibliis apparent secundum speciem vilia, falsa, aut contradictoria, & captu difficilia, ut S. P. Augustino, aliisque expositoribus laborandum fuerit in plurimis Scripturæ locis à contradictione vindicandis; ergo

Accedit: si ista *Criteria* sufficienter probarent existentiam S. Scripturæ, etiam sufficienter probarent veritatem Religionis Romano - Catholicæ, ut adeo Adversarii non minus hanc pro vera Christi Ecclesia agnoscere deberent, quam existentiam S. Scri-



Scripturæ: consequens AA. non admittunt; ergo nec antecedens admittere possunt. seq. maj. prob. Religioni Romano-Catholicæ competunt omnia ista *Criteria* recensita; quia Religio ista est *Antiquissima*; inter gravissima Judæorum, Gentilium, & Hæreticorum persecutiones semper *conservata*; non sine *miraculis* plurimis, quæ in ipsius dogmatum contestationem facta sunt à viris prodigiosa *Sanctitate* conspicuis, & *Propbetiæ* dono claris, qui numerosissimi vitam quoque ac sanguinem pro eadem Religione promptissime obtulerunt; ergo.

3. Illud probativum medium nequit esse *revelatio* Protestanti facta: ergo & 3. pars minoris est vera. Ant. prob. 1. Revelatio est via extraordinaria, qua Deus non solet uti, cum juxta Paulum ad Rom. c. 13. v. 2. *ea, quæ sunt à Deo, ordinata sint*; ergo. 2. Si à Deo fieret specialis revelatio de existentia S. Scripturæ, & de libris Canonicis, illa vel fieret omnibus fidelibus, vel aliquibus, aut uni tantum? non omnibus, ut per se patet, cum plures hucusque fuerint, qui aliquos libros Canonicos, quos etiam Lutherani defacto admittunt, repudiarent: inter quos fuit ipse Lutherus, qui tamen utpote Reformator Ecclesiæ, pro quo se extulit, illa revelatione maxime indignisset. Nec aliquibus: quia non est major ratio, cur his et non aliis fiat, cum omnium intersit, sacros libros nosse. Neque uni tantum: quia huic in re tanti momenti non fidetur, nisi in suæ sibi factæ revelationis contestationem Protestans miraculum faciat: quale nunquam fecit, neque faciet; ergo.

4. Illud medium probativum nequit esse *Spiritus privatus*, & *intermus*: ergo etiam 4. pars minoris est vera. Ant. prob. tum quia talis spiritus est prorsus incertus, ac dubius, an sit à Deo: nec ne? tum quia talis spiritus est in diversis hominibus diversus ac contradictoria docens: nam Calvinistis dictat, epistolam Judæ esse librum Canonicum: Lutheranis vero dictat, eam

non esse librum Canonicum, &c. ergo nequit esse testimonium Spiritus Sancti, utpote qui falsum, & contradictoria docere nequit. Tum, quia etsi Deus, sicut Prophetas, ita quemlibet hominem possit per internam illustrationem infallibiliter docere, id tamen ordinarie non solet: quia Providentia ejus exigit, ut homines per publicum & ab omnibus perceptibile testimonium erudiantur, dari v. g. aliquam Scripturam Divinam, & quidem hanc; ita enim præsentis nostræ vitæ ratio, & hominum status requirit, ut testimonium illud sit externum ac tale, quod omnes cognoscere valeant, ne unus hoc, alter hujus contradictorium alleget, uti fieri posset, si testimonium esset mere internum, quale est spiritus privatus, & conscientiæ sensus; de hoc Spiritu privato recolligenda sunt dicta antecedentis quæstionis §. 2.

Probatur Conclusio 2. Protestantes non possunt sufficienter probare Canonem suæ Scripturæ: ergo. ant. prob. si eum possent probare, deberent eum probare vel ex S. Scriptura, quæ juxta illos sola potest parere certitudinem infallibilem: sed ex hac eum nequeunt probare: tum quia nullibi in Scriptura vel clare vel obscure dicitur, hos omnes, quos A.A. pro Divinis & canonicis habent, libros & non alios etiam, quos rejiciunt, esse vere Divinos & Canonicos. Tum quia dato etiam non concessio, quod in aliquibus Scripturæ libris legeretur, eos esse Divinos, ij tamen libri non possent esse ejus infallibilis Judex, quod est in quæstione circa illos: atqui circa illos est in quæstione, an sint libri sacri & Divini? ergo hujus non possunt esse infallibilis Judex, alias supponeretur id, quod est in quæstione. Si recurrant ad sua *Criteria* Scripturæ intrinseca: frivole recurrunt, quia ista *Criteria* non sunt clara & evidentiæ: cum in tota Scriptura non videant hanc claritatem Gentiles ac Pagani, nec Judæi in libris novi testamenti: neque etiam Christiani viri Sanctissimi & doctissimi eam clare cernunt, imo de quibusdam, quos

quos AA. pro Canonicis agnoscunt, libris, uti est epistola 2. Petri, epistola 3. & 4. Joannis, etiam Patres aliqui antiquitus dubitarunt, ut AA. ipsimet fatentur, & lib. 3. c. 25. testatur Eusebius. Præterea cur claritas & ista Criteria non apparent Lutheranis in epistola ad Hebræos, in epistolis SS. Jacobi & Judæ, nec in Apocalypsi? cum tamen appareant Calvinistis, qui alias volunt esse Lutheranorum fratres, præsertim cum res contra Catholicos agitur? cum ergo ista Criteria sint obscura, non possunt facere certitudinem infallibilem. Recursus ad Spiritum privatum æque est inanis; cum æque vel magis incertum sit, an ille Spiritus internus, seu propriæ conscientiæ sensus sit illustratio Divina, quam incertum sit, quod ipse Canon sit Divinus. Imo quantum internus Sectariorum nostrorum spiritus à veritate hucusque aberraverit, exinde constat, quod Lutherus & Calvinus ex S. Scripturæ Canone contra antiquissimam universalis Ecclesiæ traditionem integros veteris testamenti libros, nempe *Tobiæ, Judith, Sapientiæ, Ecclesiastici, Baruch, Machabæorum, ac additamenta ad Esther & Daniëlem* per summam & inauditam temeritatem expunxerint, cum tamen prædicti libri in primis sæculis, ubi etiam juxta AA. Ecclesia pura extitit, pro Canonicis habebantur. Imo Lutherus adhuc Calvino Bibliomastix insolentior novo etiam testamento sacrilegas manus iniecit expungendo *epistolam B. Pauli ad Hebræos, epistolas SS. Jacobi & Judæ, ac Apocalypsim S. Joannis.*

Probatur Conclusio 3. Protestantes in suis principiis non possunt sufficienter probare legitimam suorum Bibliorum versionem, seu quod habeant Biblia rite & de puris fontibus in suas linguas translata: ergo. ant. prob. si hoc possent probare: ergo ex Scriptura: cum juxta AA. nihil sit, quod ad aliquid infallibiliter probandum valeat, præter Scripturam; atqui ex hac id nequeunt probare, quia in Scriptura nullibi dicitur, totum vel illum Canonem esse ex textu fundamentalis Hebraico, aut Græco legitime versum: ergo. Ac-

Accedit: quod Bibliorum versiones, quas habent AA. sint suspectæ à suis Auctoribus, utpote hominibus privatis, adeoque erroribus obnoxiiis: à suis Auctoribus votifragis, Apostatis, perfidis, odio & invidia in Romanum Pontificem inflammatis: & in has malevolas animas introisse veram sapientiam, & peculiarem ad tam grande opus Spiritus S. illustrationem quis credat?

Insuper Novatorum versiones continent manifestos errores: nam Lutherus vertens verba Gen. c. 17. v. 1. *Esse perfectus*: in Germanico sic ponit: *esto pius*. Vertens v. 5. Ps. 98. *Adorate Scabellum pedum ejus*: illi assuit præpositionem *Coram*, ut hic falsus sensus evadat: *adore* non ipsum Scabellum, sed Deum *coram Sabello pedum ejus*. Vertens verba Matth. c. 2. v. 2. *Pœnitentiam agite*: illa in germanico ita expressit: *emendate vos*. Vertens verbum tollit peccatum mundi Joan. c. 1. v. 29. id ita germanice reddidit: *portat*. Vertens versum 20. ad Rom. c. 3. *Per legem enim cognitio peccati*: addidit, *tantum*: quasi lex tantum ferviret ad hoc, ut in ea tanquam in speculo cognoscamus peccatum, non vero quod servanda sit, ut evitetur peccatum. Versui 28. ejusdem epistolæ: *arbitramur, justificari hominem per fidem*: Lutherus de suo apposuit *ly Solam*. Vertens id 1. Corinth. c. 9. v. 5. *Nunquid non habemus potestatem mulierem sororem circumducendi?* de suo adjecit, *in uxorem*. Dum v. 10. 2. Petri c. 1. *Magis satagite, ut per bona opera certam vestram vocationem & electionem faciatis*: transtulit, in eo omisit: *per bona opera*. Imo ut L. 2. de Verbo Dei. c. 11. Bellarminus habet: In novi Testamenti à Luthero facta versione fere mille errores notantur. Ad hoc

Si dicant Lutherani: Versionem Lutheri nec sibi esse authenticam, sed esse examinandam ad fontes Hebraicos ac Græcos.



Contra est: tum quia omnes Lutherani possunt, ac debent sua Biblia non authentica, sed quæ fallibilia esse fatentur, legere: ergo legendo exponunt se periculo addiscendi errores. Tum quia plurimi ex Lutheranis non callent perfecte, imo nullo modo linguas Hebraicam & Græcam, ut corrigere valeant versionem Lutheri. Tum etiam posito, quod plures ex illis etiam perfecte calleant istas linguas, & in his examinent versionem Lutheri: ergo isti erunt Judices in textibus Scripturæ legitime vertendis? isti inquam, qui homines, consequenter mendaces, & fallibiles sunt. Tum quia ipsi fontes Hebraici & Græci non sunt puri, & eorum autographa non extant. Ergo Protestantes ubi purum Verbum Dei scriptum, cui unice inniti volunt, & juxta sua principia debent, infallibiter invenient?

Deinde quis credat, versiones ab uno alterove sædisfrago, & rebelli Monacho, aut Sacerdote factas, quæ versioni ab universali Ecclesia per mille & plures centenos annos, & quidem illis jam, quibus etiam juxta ipsos AA. Ecclesia in sua puritate habebatur, receptæ, usitatæ, & approbatæ repugnant, esse bonas, legitimas, & authenticas? atqui versiones omnes Lutheranorum, Calvinistarum, &c. in multis repugnant versioni vulgatæ, quæ ab universali Ecclesia Romana, antequam Novatores contra eam insurrexerunt, fuit recepta jam, jam usitata, jam approbata: ergo.

Præterea apud Lutheranos non sunt Biblia ejusdem versionis, seu eadem Biblia: nam inter illos varia habentur, nempe *Biblia Lutheri, Oecolampadii, Theodori Bibliandri, Castalionis, Junii, Termellii, Mynsteri, Bezae, & tot aliorum, ut Rauchelinus, alias Capnion vocatus, enuntiaverit: tot Scripturæ versiones haberi, ut melius fuisset, si lucem non vidissent, vel exortæ mox periissent.* Cum igitur variorum, quæ inter se consentanea esse nequeunt, Bibliorum tot sint: dicant AA. quænam ex iis apud illos pro veris ac legitimis habeantur? An forte illa,



illa, quæ Lutherus prima vice typis germanicis commisit? sed in illis circiter 1400. loca Scripturæ mutata, truncata, vel etiam falsificata reperta sunt, ut ita Bucerus quamvis Lutheri discipulus ad Philippum Melancthonem suum Collegam stomachabundus dixerit: *Lutherus pro Deo vult haberi, cui omnia licent, & nemo contradicere debet.* Vel forsitan erunt illa Biblia, quæ Lutherus secunda vice fabricavit? ast ibi in solo S. Matthæi Evangelio adusque 34. textus aliter, quam in prioribus suis Bibliis dedit. Aut fortasse erunt ista Biblia, quæ Wittebergæ impressa sunt? At vero in istis Lutherus textum: *Tres sunt, qui testimonium dant:* audacter omisit. Vel forsitan erunt Biblia Luneburgica? quibus memoratus textus iterum insutus est? Forte erunt Biblia ista, quæ circa annum 1707. Lipsiæ neo-impressa, & multis approbationibus, ac encomiis celebrata sunt? Si hæc, aut noviora Magdeburgica, quæ omnibus versionibus hucusque factis in quibusdam apud illos locis præferuntur, sint vera & legitima Biblia, manifestum est consequens, Lutheranos per 200. fere annos authentica & vera non habuisse Biblia. Posito etiam hæc nova Lipsiensia, aut his noviora Magdeburgica sola esse Biblia genuina, quomodo ostendent, quod omnes Lutherani sua antiqua Biblia Witteburgica, Luneburgica, Brandenburgica &c. abjecerint, & illa sola Lipsiensia, vel Magdeburgica statim sint cum magnis sumptibus amplexati? Certe propterea, quod Prædicantibus Wratislaviæ sint indulta corrugata collaria, horum mos mox non invaluit in aliis Lutheranorum locis; nec ideo quia Lipsiensibus vel Magdeburgicis sua placent Biblia, alii Lutherani statim post ipsos sicut canes current. Ergo.

Tandem omnes Lutherani non eadem utuntur interpretatione Scripturæ: tum quia aliqui tenent cum Luthero: alii cum Confessione Augustana: alii cum libro concordiæ: alii sentiunt cum Lipsiensibus: alii cum Helmstadianis: alii cum Je-  
nensi-

nenfibus: alii cum Witteberganis in eo, quod Scripturæ interpretationem concernit. Tum quia Scriptura aliter interpretatur in Saxonia: aliter in Suecia, aliter in Dania &c. Unde non immerito P. Georgius Scherer S. J. Pastores & Doctores Lutheranos comparat Vulpibus Samsonis Judic. c. 15. Sicut enim hæ quoad caudas quidem ad invicem junctæ, secundum capita autem ita discordes erant, ut una discurreret huc, alia illuc; ita illi quamdiu contra Papam, & Catholicos pugnant, tamdiu ad invicem fortiter sunt ligati, & uniti: dum vero doctrinam suam in lucem proferre debent, tunc unus eorum discurret huc, alter illuc; & aliqui in eo, quod Scripturæ interpretationem concernit, tenent cum Luthero: alii cum Confessione Augustana: alii cum libro Concordiæ: alii sentiunt cum Lipsiensibus: alii cum Helmstadianis: alii cum Jenensibus; alii cum Witteberganis: & Scriptura aliter interpretatur in Saxonia: aliter in Suecia: aliter in Dania &c. ut merito Fridericus Saxonix Dux coram Convivis suis in tabula dixerit: *quod bodie credo, hoc scio: quid mihi crastina ad credendum plastrabunt, & garrient, hoc scit Deus.* Et si Lutherani in interpretanda Scriptura conveniant: cur ergo inter eos aliqui ubi-quitatem, seu omnipræsentiam Christi quoad humanitatem habent pro certa, alii pro falsa? Cur apud illos aliqui putant, Purgatorium esse adiaphorum, & affirmari vel negari posse; cum tamen alii id concedere absolute nolint? Ergo.

Contra hanc Conclusionem Dices I. Dari aliquam Scripturam, est principium ab utraque parte, scilicet tam à Catholicis quam à Lutheranis concessum; ergo non debet trahi in dubium, nec ab adversa parte v. gr. à Lutheranis exigì, ut probent dari aliquam Scripturam. R. 1. neg. conseq. quia principium, quod non est evidens, est probandum. R. 2. dist. ant. est principium ab utraque parte, sed non ex eodem motivo; ac fundamento concessum, conc. ant. ex eodem fundamento &

Y y

moti-

motivo concessum, neg. ant. & conseq. Si Adversarii ex eodem, quo Catholici motivo, videlicet ex traditione, ac Ecclesiæ autoritate infallibili concederent, & possiderent Scripturas: facile inter Catholicos & Protestantes foret pax: si enim quoad Scripturarum existentiam admitterent traditionem, atque Ecclesiam judicarent infallibilem, id ipsum quoque deberent facere pro intelligendis Scripturis quoad sensum, & sic in omnibus articulis Catholicis inter & Protestantes controversis nasceretur concordia.

Dices 2. Hæc quæstio, an habeamus Scripturam Divinam est 1. *Curiosa*. 2. *Christiano indigna*, quia totam Christianitatem reddit dubiam. 3. est *inepta*, quia prima fidei principia non probari, sed supponi debent. Ergo. R. neg. ant. nam 1. *Curiosum* non est inquirere, an primum fidei principium sit satis solidum? & licet Deus res obscuras revelando velit, ut intellectum nostrum captivemus in obsequium fidei, non tamen vult, nec velle potest, ut eas res temere & absque fundamento infallibili firmissime credamus. 2. Quis Christiano indignum existimet? Si fidei Christianæ fundamenta, quæ utique infirma esse nequeunt, inquirere ac declarare adlaboret; quod fit per hujus quæstionis examen. 3. Quis *ineptum* pronuntiet indagare principium, quod per se notum non est? Quamdiu igitur AA. S. Scripturæ existentiam infallibiliter probare non possunt, (quod nunquam poterunt probare, nisi verbum Dei non scriptum, & Ecclesiam audiant) tamdiu male & imprudenter admittunt Scripturam, nec ea ad quoscunque articulos probandos uti possunt.

Dices 3. Scriptura se ipsam sua luce satis prodit; si enim attente & devote legatur, in ea tam convincentes reperiuntur causæ, quod sit Verbum Dei, ut Ecclesiæ testimonium, vel traditio aut omnino non requiratur, aut nonnisi ultimum locum obtineat: ergo. R. Si in Scriptura sit tanta lux, qua se  
ipsam

ipsam prodat, quare hanc non omnes vident? quare Lutherani Calvinistis, hi illis sunt contrarii? Cur Machometani eam lucem potius in suo Alcorano, & Judæi in suo Thalmudo, quam in nostris Bibliis vident? Jam probatum est in præcedentibus Scripturam in multis valde obscuram esse.

Dices 4. Ecclesiæ de existentia Scripturæ testimonium eo fere modo se habet, quo tabellarius nobis adferens literas Regis: sicut ergo dum has literas aperimus, & legimus; non propter tabellarii testimonium, sed propter manum, sigillum, & negotium Principis certo credimus, eas esse literas Regis; ita dum legimus S. Scripturas ab Ecclesia nobis oblatas, non propter Ecclesiæ testimonium, sed propter certa *Criteria* seu indicia Scripturis intrinseca certo credimus, eas Scripturas esse Divinas & literas Dei. Porro talia *Criteria* sunt *sublimitas* rerum, quæ in Scripturis tractantur: *talis* ad vitam recte instituendam *instructio*, qualis in nullo alio libro reperitur: *tanta* ad animos permovendos *efficacia*, quantam in alio libro nullo quis inveniet: *Vaticinia* de rebus futuris, quas modo ita evenisse scimus, &c. R. 1. neg. ant. nam est grandis disparitas hæc, quod Ecclesia in proponendis rebus fidei sit infallibilis, ut suo loco probabimus, tabellarius vero fallibilis, & sæpe mendax. R. 2. transf. ant. neg. conseq. nam quod manus seu character, sigillum, aliaque indicia probent, eas esse literas Regis, ideo est, quia ea indicia cernimus oculis nostris: at vero in S. Scripturis nulla habentur evidentiæ indicia, quæ probent, eas esse Divinas sive literas Dei. Cur enim à S. P. Augustino vel D. Hieronymo, vel alio Sancto & sapiente Viro non potuisset scribi liber, in quo contenta fuissent omnia enarrata *Criteria*? quin tamen talis liber esset Canonicus. Et quid? si quis diceret Evangelia SS. Bartholomæi, Thomæ, & Nicodemi, quæ nec ab AA. pro Canonicis agnoscuntur, esse Scripturas divinas, eo quod in iis memorata legantur *Criteria*. Imo



in Scripturis etiam ab AA. pro Divinis habitis plurima reperiuntur capita, & sententiæ, in quibus nulla apparet vel *sublimitas* rerum, vel *instructio* morum, vel *efficacia* seu energia verborum, aut *prædictio* futurorum; Cur ergo eas AA. agnoscunt pro Divinis?

Dices 5. In 1. Joan. c. 5. v. 6. habetur: *Spiritus est, qui testificatur*, hoc est, Spiritus sancti testimonium est quasi viva sensatio apud eos, qui Scripturam pie legunt, ut eam agnoscant; *ipse enim Spiritus reddit testimonium Spiritui nostro*. Rom. c. 8. v. 16. Et Spiritus S. vos docebit omnia, & *suggeret vobis omnia*. Joan. c. 14. v. 26. Ergo per Spiritum internum satis cognosci potest existentia S. Scripturæ. R. hoc argumentum, in quo AA. plurimum confidunt, nihil probare: tum quia adducit textus Scripturæ ad probandam existentiam Scripturæ, & sic supponit id, de quo quæritur; tum, quia ex citatis textibus non probatur, quod ille Spiritus privatus, seu illud dictamen internum, quo AA. judicant dari Scripturam, sit Spiritus S. illustratio, & non potius fallax persuasio, & erroneum proprii intellectus iudicium: tum denique, quia Gentiles, pagani, alique Scripturam negantes, eodem jure dicere possunt, se eam negare ex interno spiritus Divini testimonio.

Dices 6. Scriptum est 2. Pet. c. 1. v. 21. *Spiritu S. inspirati locuti sunt sancti Dei homines*: ergo S. Scriptura probat Canonem sui infallibiliter. R. neg. conseq. Unde enim (nisi traditio admittatur, aut Ecclesiæ vox audiat) infallibiliter quis certus est, istum D. Petri textum esse S. Scripturam, sive Verbum Dei?

Dices 7. In quibusdam Scripturæ locis additur. *Dominus locutus est: dixit Deus &c.* Ergo ibi Divinus Canon se ipsum prodit. R. Talia verba non reperiri in omnibus Scripturæ libris, capitibus, & sententiis: de quibus proinde redit quæstio, unde infallibiliter cognoscantur esse Verbum Dei. R. 2. neg. con-



conseq. Nam certus quis non est, an ea verba Spiritus S. addiderit, an autem ab aliquo impostore per malitiam, aut ab alio per infirmitatem humanam fuerint appolita. Et quid si similia verba invenirentur in Alcorano Turcico, vel in Thalmudo Hebraico, nunquid Turcæ vel Hebræi propterea infallibiliter certi erunt, se habere veram Scripturam Divinam?

§. II.

Dico 2. Vulgata Catholicorum S. Scriptura est Authentica. Aliqua Prænotanda

**U**T conclusio statuta debite intelligatur, Notandum 1. Linguam Hebræam fuisse primam, & à Deo Protoparenti nostro Adamo infusam. Ratio est 1. quia ante ædificationem turris Babel Gen. c. 11. v. 1. *Erat terra labij unius, & sermone eorundem*: atqui illud labium erat Hebræa lingua: ergo. min. prob. ex S. Hieron. epist. 142. ad Damasum, ubi ait: hoc esse commune antiquorum placitum: *Initium oris & communis eloquii, & hoc omne quod loquimur, Hebræam esse linguam, qua vetus testamentum scriptum est, universa antiquitas tradidit*; ergo. Ratio est 2. quia sancti in cælo loquentur lingua Hebræa, ergo & Adam in Paradyso eadem lingua fuit locutus. Conseq. patet: congruum enim est, ut illa lingua loquantur Beati in cælo, qua Adam locutus est in Paradyso, cum illa sine dubio fuerit perfectissima. Ant. prob. Beati in cælo loquentur voce articulata, ut docet D. Th. in 4. dist. 44. q. 2. a 1. q. 4. ad. 4. ubi dicit: *Laus etiam vocalis erit in Patria, unde August. dicit Psal. 149. Exultationes Dei in gutture eorum: quod corda & linguæ non desinent laudare Deum. Et idem etiam habetur per glossam super illud: in cymbalis bene sonantibus. Hæc autem laus erit lingua Hebræa: quia Tobia c. 13. v. 22. de cælesti Jerusalem dicitur: per vicos*

Yy 3

ejus

*ejus alleluja cantabitur.* Et Apocalyp. c. 15. v. 3. Joannes dicit , se vidisse Beatos cantantes Canticum Moyſi ; atqui Alleluja eſt vox Hebræa ; & non eſt verosimile , Canticum Moyſi pro Beatis in aliam linguam vertendum : ergo.

Ratio eſt 3. quia nomina propria ſive hominum , ſive locorum , quæ ab orbe condito uſque ad confuſionem linguarum in hiſtoria Moyſis leguntur , in Hebraica lingua ſuas habent origines : ſic *Adam* Hebraica vox eſt , idem ſignificans ac *homo* , & homo ideo vocatur *Adam* ab Hebræo nomine *Adamacb* ſignificante humum , quia homo de humo ſive terra à Deo formatus eſt. *Heva* pariter *Chava* Hebraicæ linguæ vox eſt , idem ſignificans ac *vivens* aut potius *vivificans* à radice *Chaja* , id eſt *vixit* : ſic enim vocata eſt uxor Adæ , eo quod futura eſſet Mater cunctorum viventium , ut Gen. c. 3. v. 30. dicitur. *Cain* Hebraice idem eſt ac latine *poſſeſſio* , & ideo ſic dictus à radice *Kanach* , id eſt , *poſſedit* , quia poſtquam Heva concepit , & peperit Cain , dixit Gen. c. 4. v. 1. *poſſedi hominem* : quali diceret , natus eſt mihi filius quali poſſeſſio una ; eſt enim filius quali parentum poſſeſſio , unde jure naturæ ſub patris poteſtate eſt. Sic pariter *Abel* ſuam derivationem habet ab Hebraica voce *Habel* , quæ idem ſignificat ac *vanitas* , per quod Heva celerem ejus mortem , ſeu eum cito tranſiturum , & vanitati ſimilem præſagire voluit. *Setb* ſimilis vox Hebræa eſt , idem ſignificans ac latine *poſitio* , ſeu fundamentum à radice *Schutb* ſignificante *poſuit* , *locavit* , ſicque dictus iſte Hevæ filius , quia eum poſt occiſum Abelem à Caino genuit Heva , eumque *Setb* quali futurum ſuæ ſobolis & poſteritatis fundamentum vocavit Adam dicens Gen. c. 4. v. 25. *poſuit mihi Deus ſemen aliud pro Abel* , quem occidit Cain. *Babel* Hebraice idem eſt ac latine confuſio , ſic dictus locus ille à radice *Balal* , id eſt , *confundit* , ſive *commiſcuit* , quia ibi ita ædificantium linguas Deus confudit , & commiſcuit , ut pro una omnibus communi lingua ſingulis ſingulas ,  
&

& singulis proprias indiderit juxta illud Gen. c. 11. v. 9. *Vocatum est nomen ejus Babel, quia ibi confusum est labium universæ terræ.*

Dices 1. Adam, Cain, Abel, & varia similia nomina propria sunt nomina linguæ Syriacæ: ergo. &. Hæc nomina in lingua Syriaca inveniri, quia derivata est ab Hebræa.

Dices 2. Convenientius fuit, ut eadem lingua uteretur novus Adam scilicet Christus, qua locutus est primus Adam: atqui ille nempe Christus usus est lingua Syriaca, quia illa post captivitatem communis fuit Hebræis: ergo. &. Christum non fuisse usum lingua Syriaca pura, sed Syro-Chaldaica, id est, Hebræa corrupta, quæ tunc apud Hebræos erat vernacula.

Dices 3. Deus promisit populo reddere primævam linguam: atqui lingua, quam ipsis reddidit, fuit Syriaca: ergo primæva lingua fuit Syriaca, non Hebræa. maj. prob. ex Sophonia c. 3. v. 9. ubi dicitur: *Reddam populis labium electum*: ergo. &. Hæc verba non intelligi de redditione linguæ primævæ, sed confessionis veri Dei: quod scilicet sicut in Paradyso primi homines ore uno Deum laudabant, & colebant, sic per Christum omnes gentes Deum agnoscerent, & ideo additur: *ut invocent omnes in nomine Domini* &c.

Dices 4. Lingua Hebræa plus quam sexcentis annis post diluvium tantum data est Moyfi, ut eruitur ex Psal. 80. v. 6. *Linquam, quam non noverat, audivit*, id est, populus Israeliticus, cum exiret de Ægypto, audivit novam linguam divinitus Moyfi revelatam; ergo. &. Populum in Ægypto oblitum fuisse linguæ Hebrææ, & solum Ægyptio idiomate fuisse usum: postea vero in egressu Israel de Ægypto, cum nulla ibidem addiscendi literas esset opportunitas, divinitus Moyfi Hebræam linguam fuisse infusam, & datam hebræis, quibus inaudita, & nova visa est, licet Atavi eorum ea locuti fuerant.

Notan-

Notandum 2. Hanc linguam Hebræam mundo coævam, Adamo & Patriarchis prioribus usitatam, à Deo in tabulis lapideis, & Moyse usam, usque ad constructionem turris Babelicæ permanuisse; post Babelicam autem linguarum confusionem in Abnepote Semi Patriarcha, nempe *Heber*, ejusque familia, usque ad Abrahamum & in tota gente Israelitica integram perseverasse, idque forte in præmium, quod *Sem* aut *Heber* Babelicæ conspirationis particeps non fuerit. Ita tenet S. P. Augustinus lib. 16. de Civit. Dei. c. 11. expresse dicens; facta linguarum divisione, *Non defuit domus Heber, ubi ea, quæ antea fuit omnium lingua, maneret. Et infra: quia ergo in ejus familia remansit hæc lingua, divisus per alias linguas cæteris gentibus, quæ lingua prius humano generi non immerito creditur esse communis, ideo deinceps Hebræa est nuncupata. Tunc enim opus erat eam distinguere ab aliis linguis nomine proprio, sicut aliæ quoque vocatæ sunt nominibus propriis. Quando autem erat una, nihil aliud quam humana lingua vel humana locutio vocabatur, quæ sola universum genus humanum loquebatur.* Quibus verbis S. Pater clare indicat, linguam illam, quæ ante communis erat, ideoque lingua humana dicebatur, secuta linguarum divisione dictam Hebræam ab Hebero, in cujus familia mansit, & per quam descendit ad Abraham, inde per Jacob ad Israelitas dictos vulgo Hebræos. Hinc videtur etiam velle S. Pater, Hebræos sic dictos ab Hebero abnepote Semi quinto post Semum, quem jam natum censet quando linguarum facta est multitudo.

Ratio autem est 1. quia familia Patriarchæ Heberi nullo pacto consentit in impium & flagitiosum fabrorum turris Babilonicæ consilium. Scriptura enim expresse dicit, urbem & turrim Babilonicam fuisse extructam à filiis hominum, per quos juxta interpretes intelligit homines impios & profanos; cum igitur familia Patriarchæ Heberi, quæ per Semum filium Noemi descendebat, ñ consenserit in flagitiosum istud extruendæ turris

turris Babylonicæ confilium, credibile non est, hanc familiam in eadem illorum pæna, confusione videlicet linguarum jacuisse, quorum culpæ se participem non reddidit. Hinc est, quod Familia Patriarchæ Heberi, tempore, quo homines per linguarum confusionem per omnes terras dispersi sunt, non fuerit ipsa dispersa, sed inconcussa tunc sedibus suis permanferit, donec Abrahamus ex familia Patriarchæ Heberi descendens, speciali vocatione inde fuerit à Deo evocatus; ergo sicut pænam dispersionis non subiit familia Patriarchæ Heberi, ita verosimile est, eam nec linguæ suæ confusionem esse passam, sed potius avitam linguam Hebræam conservasse puram & incorruptam.

Ratio est 2. Quia familia Semi, filii Noemi, ex qua Patriarcha Heber propagatus est, semper in vera Religione, seu in sincero unius & veri Dei cultu constanter perstitit: econtra-rio familia Chami alterius filii Noemi à Deo & à vera Religione descivit; quo factum est, ut familiam Patriarchæ Heberi singulari favore, gratia, ac benedictione Deus profecutus fuerit, cum econtra familia Chami, ex qua Chanaam prognatus est, à Deo sit maledicta. Prababile itaque est 1. Deum in familia Patriarchæ Heberi, quæ fuit familia sancta & benedicta, maluisse conservare linguam sanctam, seu Hebræam, per quam religionem, & legem suam propagare, & promulgare voluit magis, quam in familia profana & maledicta. Probabile etiam est 2. Linguam Hebræam sic dictam fuisse à Patriarcha Heber, eo quod apud ipsum, & in ejus familia fuerit tempore confusionis linguarum conservata, & postea ad ejus posteros transfusa.

Dices 1. Scriptura indicat linguam Heberi & familiæ ejus fuisse Chaldaicam non primigeniam Hebræam: ergo hæc tanquam primigenia non permanlit in Heber ejusque familia. ant. prob. Filij Heber progenitores Abrahæ, ac linguæ Heberi hæredes commorati sunt in Chaldæa, ibique servierunt diis alie-

Z z

nis:



nis: sic Josue c. 24. v. 2. dicitur: *Trans fluvium habitaverunt Patres vestri ab initio, Thare Pater Abraham & Nabor. Servieruntque diis alienis.* Atqui Religio ista trans fluvium Ephratem, fuit Chaldæa, ut habetur expresse Gen. c. 11. v. 28. ubi describitur mors Aran filii Thare, & Fratris Abraham *in terra natalitatis suæ in Ur Chaldæorum.* Et v. 31. describitur egressus Thare cum Abraham filio & Loth nepote de Ur Chaldæorum, ut irent in terram Chanaan: ergo successores Heber, & Abrahæ Progenitores incolatu & Religione 70. circiter annis permixti cum Chaldæis, & demum 100. annis permixti cum Chananæis una eademque lingua cum cæteris Chaldææ & Cananææ incolis usi sunt, quam postea transmiserunt ad posteros, quibus facta connaturalis, & postea Hebræa dicta est. Ergo. R. neg. ant. ad prob. dico: licet familia Heber morata sit in Chaldæa, & demum Abraham in Chanaan, exinde non sequitur linguam familiæ Heber tantum fuisse Chaldæam, nec linguam Abrahæ tantum Chaldaicam & Chananæam: potuit enim familia Heber lingua Chaldaica, & Abraham lingua quoque uti Chananæa ut lingua Regionis, & præterea tamen in familia sua servare linguam propriam ac primigeniam, id est, Hebræam, eamque ad posteros traducere. Quæ an postea Hebræa dicta sit ab Heber? uti probabilius, an ab Abraham? uti alij sentiunt, parum refert. R. 2. Duplicem esse linguam Chaldæam, unam primævam, quæ eadem est ac Hebræa: aliam decursu temporis corruptam, quæ ab Hebræa originem ducit; cum enim finito diluvio Noe in montibus Armeniæ, ubi Arca resedit Gen. c. 8. v. 4. cum filiis suis per 100. annos habitasset, profecti ab his partibus venerunt in terram Sennear, quæ in Chaldæa est, ibique ab incæpta turri linguarum divisione desistentes in varias Regiones dispersi sunt: sed cum familia Heber ab hac pæna libera fuerit, antiquum idioma & locum retinuit: postea tamen descendentes Heber, cum multiplicarentur, habitationem dilata-

latarunt, & Syriam Chaldææ finitimam occuparunt, & Hebræa lingua apud illos mansit incorrupta usque ad Captivitatem Babylonicam, quæ ratione loci etiam dicitur Chaldæa.

Dices 2. Sine fundamento asseritur, quod Sem aut Heber Babelicæ conspirationis particeps non fuerit, & in præmium pietatis in illis primigenia lingua permanferit: nam contrarium indicare videtur Scriptura Gen. c. 11. v. 1. & 6. ubi postquam Moyles dixisset terram primò fuisse laby unius, subjunxit v. 9. confusum fuisse labium *universæ* terræ: ergo si labium *universæ* terræ confusum est, etiam labium ipsius Sem aut Heber confusum est; ergo primigenia lingua non mansit penes ipsos. R. Quod hæc verba Genesis non ita universaliter & sine omni exceptione accipienda sint; quod patet ex illo Gen. c. 6. v. 12. ubi dicitur: *omnis caro corruerat viam suam*; ubi hæc verba non cum omni universalitate accipiuntur, sed Noe cum tota sua familia excipitur: ergo pariter cum dicitur, *confusum est labium universæ terræ*, non debet hoc accipi pro omnibus omnino hominibus, sed pro iis tantum, qui conspiraverunt in ædificationem turris, in hanc autem nec Noe, nec Semum, nec Heberum credibile est conspirasse.

Dices 3. Si in præmium pietatis primigenia lingua mansit in Heber, nec Judæi post captivitatem, nec Christus, nec Apostoli, nec Esdras vir sanctus prærogativa linguæ sanctæ fraudari debuissent; cum interim Samaritani impij ac rebelles ea fruerentur: atqui illi sunt fraudati; ergo. R. Hoc non evincere linguam Hebraicam debuisse restitui Hebræis post captivitatem Babylonicam, quin potius, quod sicut lingua hæc fuit conservata in Heber ejusque posteritate quia fidelis in præmium fidei illius, ita populo Judæorum captivo ob infidelitatem decuerit, ut in pænam auferretur, vel saltem cum lingua alienigena confunderetur; quapropter Christum & Apostolos loqui oportuit lingua tunc temporis usitata: quia si Hebraice

locuti fuissent, vix quisquam eos intellexisset. Nec refert, quod apud Samaritanos manserit; hoc enim ad Dei judicia referendum est, quæ sua dona sæpe à populo electo sed ingrato ad hostes suos in pænam transferre consuevit.

Notandum 3. Quæ de antiquitate linguæ Hebraicæ mox dicta sunt, etiam de ipsis literis Hebraicis (quæ sunt viginti duæ) intelligi debere; nam non solum linguam Hebraicam, sed etiam literas fuisse ante linguarum divisionem, adeoque diu ante Moysen docet S. P. Augustinus lib. 18. de civit. Dei. c. 12. *Non itaque credendum est, quod nonnulli arbitrantur, Hebræam tantum linguam per illum, qui vocatur Heber, unde Hebræorum vocabulum est, fuisse servatam, atque inde pervenisse ad Abraham: Hebræas autem literas à lege cæpisse, quæ data est per Moysen, sed potius per illam successionem Patrum memoratam linguam cum suis literis custoditam. Denique Moyses in populo Dei constituit, qui docendis literis præessent, priusquam Divinæ legis ulla literas nossent. Hos appellat Scriptura Gramatoi Sagogeis, qui latine dici possunt literarum inductores, vel introductores, eo quod eas inducant, id est, introducant quodammodo in corda discipulorum, vel in eos potius ipsos, quos docent. Imo verosimilius est literas quoque Adami tempore extitisse, illumque artem scribendi à Deo fuisse edoctum. Nec obstat, quod S. P. August. q. 69. super Exod. de hac re dicat: Nescio, utrum valeat indagari. Nonnullis enim videtur, à primis hominibus eas (nempe literas) cæpisse, & perductas esse ad Noe, atque inde ad parentes Abraham, & inde ad populum Israel: sed unde probari possit, ignoro. Non inquam obstat: nam S. Pater hic tantum fatetur se ignorare rationem certam & evidentem, non vero probabilem.*

Notandum 4. Licet ab initio extiterint vocales ad literarum pronuntiationem necessariæ, notæ tamen (quarum nomine intelliguntur puncta. quæ in Scriptura Hebraica consonantibus modo vocalium loco apponuntur, quia Hebræi in scribendo

do

do solent nonnisi literas consonantes propria figura exprimere, vocales autem per puncta) quibus hæ literæ in sacris codicibus designantur, nec à Moyse appositæ, neque ab Esdra, virisque Synagogæ magnæ inventæ & additæ sunt, sed probabilius à Masorethis Tyberiensibus, hoc est, Magistris Traditionis acceptæ per manus Esdræ, Gamalielis &c. adscriptæ sunt, qui Magistri sub sæculum V. ab ortu Christi in Tyberide urbe Palestinæ vitam egerant. Verum quidem est, à principio cum consonantibus institutas fuisse in lingua Hebraica vocales, easque fuisse semper expressas in pronuntiatione, ast non in scriptione; non enim eadem est ratio pro scriptione, quæ pro pronuntiatione, siquidem voces sine vocalibus pronuntiari non possunt, scribi tamen possunt, ut patet in linguis orientalibus Chaldaica, Syriaca, Arabica. Neque puncta vocalia pertinent ad integritatem & perfectionem S. Scripturæ substantialem, sed solum accidentalem, & ex parte legentium, ut scilicet à legentibus facilius ejus sensus possit intelligi. Et dum Christus Matth. c. 5. v. 18. dixit: *Nota unum aut unus apex non præteribit* &c. per *apicem* non punctum vocale intelligitur, sed literarum quamvis minimæ particulæ & ductus, sicut per *Nota* minima literarum hebraicarum *Jod* intelligitur: quasi Christus dixisset nec literarum minima, imo nec minima pars, seu ductus literæ legis præteribit, seu peribit. Præterea non obstat, quod in Thalmud Tract. Mephilla c. 1. & alibi fiat mentio distinctæ lectionis, accentuum, ac versiculorum, adeoque puncta vocalia Masorethis Tiberiensibus videantur antiquiora. Non inquam obstat, nam ibi tantum fit mentio distinctæ lectionis, accentuum, commatorum, & versiculorum in pronuntiando, siquidem nemo est, qui cum intelligentia legere volens, periodos, ac periodorum commata, nec non accentus non distinguit: non autem fit mentio de accentibus, & punctis vocalibus in scribendo: quia nullum punctum vocale in Scriptura

Thalmudica reperitur, ut testantur tum liber legis in Judæorum synagogis legi solitus, tum libri Rabbinici. Nec inferri potest, quod, si puncta vocalia sunt à Masorethis Tiberiensibus, sensus, quem vocales referunt, auctoritatem solum habeat humanam & non divinam: ac puncta à quolibet pro libitu mutari, aliisque alia substitui possint: nam hæc illatio negatur, quia idem sensus, quem Scriptura à principio tempore Moyſis & aliorum sacrorum Scriptorum habuit, continua traditione usque ad Masorethas Tiberienses pervenit, qui addendo puncta vocalia nihil in sensu divino immutarunt, sed tantum lectionem contextus facilitarunt. Nec cuique puncta immutare, & aliis alia substituere licet, quia puncta vocalia eundem sensum Scripturæ, quem sine his habuit, exprimunt.

Notandum 5. Tribus linguis, quæ propterea *Sacræ* vocantur, sacra Biblia originaliter conscripta, seu edita fuisse, scilicet Hebraica, Græca & Latina.

Notandum 6. Omnes libros veteris testamenti, quos Judæi in suo Canone referunt, Hebraice scriptos esse: quod cum sit quid facti, alia probatione non eget, quam quod ferme omnes interpretes in hoc conveniant. Excipiuntur *Danielis* & *Esdrae libri*, qui hinc inde Chaldaico idiomate usi sunt, quod ipsis familiare erat. Ita S. Hieron. in præfat. ad dictos libros: idem est dicendum de *una Jeremiæ pericope*, ut notat S. Bonavent. Præfat. in Threnos cap. 10. v. 11. ut etiam affirmat D. Hier. Præfat. in Dan. Libri vero Canoni Judæorum adjecti partim Hebraice, partim Chaldaice, partim græce exarati feruntur; sic libros *Tobiæ* & *Juditæ* chaldaice scriptos dicit S. Hier. in præf. ad dictos libros. *Librum 1. Machabæorum* probabiliter primitus Hebraice scriptum esse, licet textus Hebraicus amplius non extet, observat S. Hier. in prologo Galeato: *alterum vero Machabæorum* græce exaratum esse dicit. *Librum Ecclesiastici* pariter Hebraice scriptum esse à Jesu filio Sirach, & in græcum idio-



idioma translatum ab ejus Nepote, non obscure constat ex prologo, quem Jesus Junior libro Avi sui præfixit. Librum *Sapientiæ* græce exaratum asserit rursus S. Hier. Præf. in lib. Salom. ubi expresse dicit, quod ipse stylus libri hujus græcam eloquentiam redoleat. De libro *Job* dicit S. Hieron. præf. in Dan. *Job* quæque cum Arabica lingua plurimam habere Societatem.

Notandum 7. Testamentum novum fere totum fuisse græce conscriptum, in quo fere omnes Interpretes conveniunt: qui communiter excipiunt Evangelium S. Matthæi, & Epistolam ad Hebræos, quæ lingua hebræa non pura, sed corrupta, quæ nunc eadem est ac Syriaca, & literis hebraicis conscripta sunt: cum illa tempore Christi & Apostolorum erat in usu. De Evangelio Marci aliqui dicunt, illud Romæ lingua latina fuisse editum: alii vero & fors probabilius dicunt, illud fuisse græce conscriptum, inter quos est S. Hieron. epist. 123. ad Damasum. Et S. P. August. lib. 1. de consensu Evangel. c. 2. Favet etiam non levis conjectura: quia Romani, apud quos Marcus scripsit, tunc maxime studiosi erant linguæ græcæ: quod etiam probat, Epistolam ad Romanos non latine sed græce fuisse scriptam, idque frequentes indiotismi Græcanici, qui in his reperiuntur, satis confirmant.

Notandum 8. Ista originales, primas, & ab ipsis sacris Scriptoribus profectas editiones, sive authographa non amplius extare, sed haberi transumpta, & versiones in alias linguas.

Notandum 9. Versiones Bibliorum fuisse, & etiamnum esse plurimas. Ex græcis versionibus, per quas antiquum testamentum ex Hebraico in græcum idioma translatum est, celebres sunt versiones *Origenis*, *S. Luciani*, *M. Theodotionis*, *Aquila*, *Symmachi*, *Ferichuntina*, *Nicopolitana* anonymæ, *Hesichy*, & *LXX. Interpretum*: universim proinde sunt novem versiones græcæ.

Notandum 1o. Versionem LXX. Interpretum fuisse omnium versionum primam, ante quam nulla alia Sacrorum codicum versio extitit, quæ opinio probabilior est: licet sint, qui id negant, ita ut aliqui Syrorum sub Salomone ad petitionem Regis Tyry Hiram *Pentateuchum*, *Josue*, *Judices*, aliosque libros in linguam Syram, alii cum Rabino Azaria tempore Esdræ in Chaldaicam, & ex hac Chaldaica versione LXX. Interpretes suam translationem græcam hausisse dicant.

Nec contra hoc obstat I. Quod Chaldaica lingua tempore Esdræ vulgaris fuerit: item quod Christus & Apostoli versantes in terra Israel, dum aliquem versum Scripturæ citarunt, indubie eum lingua vulgari live Chaldaica, live Syriaca citaverint. Non inquam obstat: quia ex primo solum sequitur, quod Judæi in diebus Esdræ consueverint quidem Interpretes habere, qui Scripturam hebraice conscriptam populo lingua tunc vernacula interpretarentur, non autem quod tunc jam Scriptura in vernaculam seu Chaldaicam, seu Syriacam translata sit; Christus igitur & Apostoli locuti quidem sunt lingua tunc Judæis vulgari, nempe Syriaca, vel Syro-Chaldaica, in eaque lingua textus Scripturæ citarunt: non autem ex versione Chaldaica, quæ nulla tunc erat, sed ex fonte Hebraico aut ex versione LXX. quæ apud Judæos Hellenistas, hoc est, tunc maxime Græcizantes communis erat.

Nec obstat 2. Quod Plato sacrorum codicum notitiam habuerit, multaque ex iisdem suis inseruerit libris. Non inquam obstat: nam ex hoc necdum sequitur, quod illa ex græca quadam versione hauerit, sed quod Plato ipse sibi, ut sacros Codices legere, & verborum sensum aliquatenus percipere posset, sufficientem Hebraicæ linguæ notitiam à Judæis tunc temporis teste Philone per totam Ægyptum dispersis comparaverit, sicut linguam ægyptiacam, ut disciplinas ægyptiacas capesseret, intra brevissimum tempus didicisse fertur: cum juxta S. P. August.

gust. lib. 2. Retract. c. 4. Plato vir acerrimi studii sicut ægyptiacas, ita & literas hebraicas per interpretem didicerit.

Nec obstat 3. Auctoritas Clementis Alexandrini lib. 1. Stromat. asserentis ex Aristobolo Philosopho, quod ante Demetrium Phalereum Promotorem versionis LXX. gesta Hebræorum & insignia facta versa sint. Non inquam obstat: quia hoc de aliqua vera versione vix intelligi potest, quia si aliqua versio anterior extitisset, eam profecto Demetrius scivisset, & indicasset, quod tamen ab eo factum non est: ergo dum Aristobolus Philosophus ait, ea, quæ Judæorum gesta & insignia spectant, in græcum fuisse conversa, non loquitur de versione stricta & in rigore sumpta, qualis est ea, quæ verba aut sensum in aliam linguam transfert, sed de versione late sumpta, & minus proprie tali, in quantum scilicet ea, quæ Hebræi in suis codicibus habent, etiam à græcis Historicis enarrata fuerant, & ex eorum libris decerpta suis historiis inseruerint.

Notandum 11. Suasu Demetrii Phalerei, quem Philadelphus Ptolomæus Ægypti Rex Regiæ Bibliothecæ præfecerat, hanc versionem procuratam esse. Nam Aristæas Philadelphi Consiliarius hujus versionis historiam describit: inter alia, quod Demetrius Phalereus hos viros septuaginta Hebræos à summo Sacerdote Eleazaro consilio seniorum senes ex singulis tribubus sapientia & doctrina præstantes submissos duxerit in insulam Pharon per pontem septem stadiorum: ibique opus inceperunt, & spatio 70 sive 72. dierum versionem confecerunt. Unde quod singuli singulis cellulis, vel bini & bini singulis cellulis furint inclusi ad hanc versionem perficiendam, S. Hieronymus lib. 2. contra Rufinum inter fabulas rejicit.

Notandum 12. Ex versionibus Latinis præ omnibus emine illam, quæ communiter appellatur *Vulgata*, *Vetus*, *Communis*, utpote cujus usus erat frequentissimus, quamque S. P. Augustinus *Italiam* vocat. Hæc versio, seu editio vulgata quo-

A a a

ad

ad vetus testamentum exceptis libris *Sapientiae*, *Ecclesiastici*, *Psalterium*, *Baruch*, &c. tribuitur S. Hieronymo: novi autem testamenti versio non est D. Hieronymi, sed ignoti cuiusdam antiquioris Auctoris, attamen à S. Hieronymo emendata. Alias versiones latinas in multis à *vulgata* dissentientes cudere ausi sunt Recentiores Sectarii, ut *Münsterus*, *Oecolampadius*, *Beza* & alii. *Leo Juda* factus *Zwinglianus* inchoavit: *Bibliander* vero adjuvantibus *Pelicano*, & *Cholino* postea anno 1544. complevit Biblia, quæ vocantur *Tigurina*, quia *Tiguri* edita.

Notandum 13. Alias versiones vocari *Vulgares*, per quas nimirum Biblia versa sunt in aliquam linguam vulgarem. *Vulgares* autem linguæ censentur omnes, quæ non sunt Hebraica, Græca, vel Latina, utpote à vulgo usitatae, quales sunt Germanica, Gallica, Italica, Hispanica, Boëmica, Carniolica &c. & in has linguas vulgares seu vernaculas S. Scripturam varii traduxerunt. *Lutherus* & *Tigurini* Biblia Germanica, *Genevenses* Gallica, *Londinenses* Anglica effecere, sed sicut temerario ausu, ita infelici eventu: nam ipsimet suas mutuo carpunt versiones, easque errorum insimulant.

Notandum 14. Dum in Conclusionem nostram dicimus, *Vulgatam nostram Catholicam esse Authenticam*: per *ly authenticum* significare, nihil in hac nostra vulgata contineri, quod fidei repugnet, aut bonis moribus, vel ex quo perniciosus aliquis error nasci possit, sitque infallibilis regula fidei, nullo prætextu rejicibilis: quamvis leviores etiam interpretis errores contineat, qui tamen nec fidei, nec bonis moribus præjudicent; quos tamen leviores interpretis errores propria auctoritate corrigere, vel immutare non licet, nisi aliquid occurrat, quod *typographicæ incuriæ manifeste* adscribendum sit, ut dicit *Clemens VIII.* in Bulla Bibliis præfixa.

*His*

*His jam prænotatis.*

Probatur Conclusio I. Veram Christi Ecclesiam, quam Deus utpote volens conservare veram & divinam fidem in mundo, necessario debet reddere infallibilem in declarandis fidei articulis, & vel maxime in proponenda Scriptura sacra, ita definitum est in Concilio Trident. sess. 4. *Sacrosancta Synodus - - - statuit, & declarat, ut hæc ipsa vetus & vulgata editio, quæ longo tot sæculorum usu in ipsa Ecclesia probata est, in publicis lectionibus, disputationibus, prædicationibus, & expositionibus pro authentica habeatur, & ut nemo illam rejicere quovis prætextu audeat, vel præsumat, Ergo.*

Confirmatur: Illa Biblia sunt authentica in omnibus ad fidem & mores spectantibus, quibus Ecclesia semper usa fuit in confirmandis dogmatibus, & hæresibus refutandis: nam divinæ providentiæ & promissionibus Ecclesiæ factis consentaneum certe non est, ut eam per mille & amplius annos permisisset errare in receptione authentica Scripturæ: Columnam liquidem & firmamentum veritatis eam esse voluit, contra quam portæ inferi non prævalebunt; atqui Ecclesia à mille & amplius annis usa est Bibliis latinis vulgatæ editionis, ut patet tum ex Conciliis, tum Patribus, qui vel ad propaganda fidei dogmata, vel ad refutandas hæreses, ex illa editione desumpserunt testimonia: ergo Biblia latina vulgatæ editionis sunt authentica.

Probatur Conclusio 2. Jurisconsulti, sumpto ex Græcis vocabulo, ea Scripta dicunt authentica, quæ licet leves aliquos habeant errores, fidem tamen in judiciis faciunt, ac publicam & certam habent auctoritatem; atqui vulgata nostra admissis etiam levibus erroribus in judicio fidem facit, ac certam & publicam auctoritatem habet ita, ut illam nullus rejicere quovis prætextu audeat, & præsumat: ergo. maj. est certa, quis enim in judicio instrumentum aliquod ut non authenti-



cum rejiciet, quia in eo levis aliquis error habetur, & qui nihil facit ad rei substantiam? min. etiam patet tum ex Concil. Trid. cit. tum quia in omnibus Conciliis ut dictum, vulgata nostra etiam ante Clementis VIII. correctionem fidem fecit, & publicam auctoritatem habuit, cum Ecclesia jam plus quam à mille annis aliam non habuerit, & toto illo tempore in Ecclesia fuerit in usu pro decidendis rebus fidei, & morum: si enim aliam habuisset, jam illam in Concilio Tridentino pro authentica proposuisset. Ergo.

## O B J E C T I O N E S.

I. **P**Lura sunt in vulgata Catholica, quæ denotant illam non esse authenticam: ergo. ant. prob. Sixtus V. anno 1589. vetustissimis & castigatissimis collectis manuscriptis Biblia jussit excudi, & multis in eis repertis mendis rursus Clemens VIII. ea jussit emendari, & imprimi, in quibus tamen adhuc 1. multi errores: 2. antilogiæ: & 3. male latine expressa inveniuntur; ergo.

II. Illa versio non est authentica, quæ non est in omnibus conformis suo Originali: atqui vulgata Catholica non est in omnibus conformis suo Originali: ergo. min. prob. In multis non convenit cum fontibus Hebræis & Græcis: ergo.

III. Ut Copia aliqua sit authentica debet in omnibus cum suo originali convenire: ergo si etiam in levioribus vulgata Catholica non conveniat cum suo Originali, non est authentica.

IV. In Scriptura S. authentica prout à Spiritu S. dictata non potest admitti error vel levissimus: ergo etiam ut translatio ejus sit authentica, non potest in ea admitti levis error.

V. Translatio illa declaratur authentica, ut sit infallibilis fidei regula: atqui ut sit infallibilis fidei regula, non potest in  
ea

ea esse error etiam levis: ergo. min. prob. fidei non potest fuisse falsum: ergo si vulgata Catholica est infallibilis fidei regula: in ea error etiam levis esse nequit. Unde S. P. August. epist. 8. ad Hieron. c. 3. ait: *Admisso enim semel in tantum auctoritatis fastigium officioso aliquo mendacio, vel etiam errore, nulla illorum librorum particula remanebit, quæ non, ut cuique videbitur, vel ad mores difficilis, vel ad fidem incredibilis, eadem perniciosissima regula ad mentientis, vel errantis. Auctoris consilium, officiumque referatur.* Et epist. 9. *Si enim ad Scripturas S. admissa fuerint officiosa mendacia, vel errores - - - quid in eis remanebit auctoritatis?*

Quæ verba ad vulgatam Catholicam sic applicantur: quoniam si in illa inveniretur aliquod mendacium etiam in levibus rebus, non maneret ejus autoritas firma in reliquis; nam sicut deceptus fuit in illo levi, potuit etiam decipi in alio gravi; ergo.

VI. Editio vulgata continet multos barbarismos, & solæcismos: ergo non potest dici vulgata nostra Catholica authentica.

VII. Clemens VIII. in multis locis lectionem vulgatæ à Sixto V. editam correxit: ergo ea authentica esse non potest.

VIII. Vulgata jussu Clementis VIII. correctæ editio nec hodie est purgatissima, ut ipse Clemens in præfatione Bibliis præfixa fatetur: ergo.

IX. Si Concilium Tridentinum *vulgatam*, quæ hodie extat, pro authentica declaraverit, pro authentica declaravit editionem non existentem, sed futuram; quia editio tam Sixtina, quam Clementina primo emanata est post Concilium Tridentinum: ergo.

## SOLUTIONES.

**A**D I. Dist. ant. & illi errores sunt contra fidem, & bonos mores, neg. ant. & sunt in rebus levioribus, quæ nihil ad fidem vel mores faciunt, conc. ant. ad 2. dist. ant. Et illæ

antilogiæ sunt veræ & reales , neg. ant. sunt tantum apparentes, conc. ant. ad 3. Interpretem vulgatæ magis ad myſteria in Scripturis contenta, & vitandam obſcuritatem attendiſſe, quam ad orationis venuſtatem: unde S. P. Auguſt. in Pſal. 148. ait: *melius eſſe, ut nos reprebendant Grammatici, quam non intelligant populi.* Siquidem Scriptura potius res, quam verba ſpectat.

Ad II. Conc. maj. neg. min. ad prob. diſt. ant. in multis non convenit cum fontibus Hebræis & Græcis integris & incorruptis, neg. ant. corruptis, conc. ant. & neg. conſeq.

Ad III. Diſt. ant. ut copia ſit authentica, debet in omnibus cum ſuo originali convenire, quando originale & copia ſunt in eadem lingua, tranſeat ant. quando copia eſt translata in aliam linguam ſubdiſt. ant. omnibus etiam minimis debet cum ſuo originali convenire, neg. ant. in ſubſtantialibus, & quantum hic & nunc patitur natura verſionis, conc. ant. neg. conſeq. Quandoque enim non eſt poſſibilis verſio de verbo ad verbum: & ipſi correctores fatentur ſe non omnia correxiſſe. Dixi *tranſeat ant.* quia conſuſio noſtra dicit tantum vulgatam eſſe authenticam in hoc ſenſu, quod in ea nihil ſit, quod fidei repugnat & bonis moribus, & ex quibus pernicioſus error ſequi poſſit idque ſciente, & non contradicente Eccleſia: non autem in hoc ſenſu, quod nullos leviores interpretis errores contineat.

Dices: Ergo vulgata Catholicorum nihil amplius ex decreto Tridentini habet, quam opera S. Thomæ: nam & hæc ab Eccleſia ſunt approbata ut nullum errorem in ſe continetia: cum dicat Clemens VIII. *ſine ullo errore conſcripſit*: ergo. R. Quod licet Summi Pontifices variis prærogativis doctrinam S. Thomæ adornaverint, illa tamen Innocentius VI. hoc modo limitat: *Huius doctrina præ cæteris, excepta Canonica, habet &c.* Unde quandoque in diſputationibus audimus, tranſeat S. Thomas, quod nullus de vulgata noſtra etiam minimis dicet: ex quo clare patet, quod vulgatæ noſtræ plus authoritatis ex decreto

creto Concilii Tridentini accesserit, quam doctrinæ S. Thomæ: cum illa maneat certa regula fidei, quamvis in ea sint leves errores, non vero doctrina S. Thomæ.

Ad IV. Conc. ant. neg. conseq. In Scriptura enim, prout est à Spiritu S. dictata, non potest admitti vel minimus error, quia ille reduceretur in Spiritum S. tanquam illius primum Authorem; in translatione autem, licet in ea sit error, & Ecclesia illam approbet ut authenticam, error ille non reducitur in Ecclesiam, nec in Spiritum S. à quo dirigitur: unde errorum, qui sunt, Ecclesia non est causa, sed permissio, quia quæ mutanda videbantur, consulto immutata relicta sunt.

Ad V. Nostram vulgatam esse infallibilem fidei regulam in illis, in quibus relictus est levis error, neg. in illis quæ pertinent ad fidem & mores, conc. sic v. g. quid alteratur fidei regula, quam ex verbo Dei scripto habemus, sive in loco, ubi Jonas sedit, legatur cum nostra vulgata fuisse hederam, sive ut ex Hebræo deduci potest, cucurbitam. Ad rationem ex S. P. August. deductam R. Ecclesiam huic inconvenienti obviasse; licet enim in vulgata nostra, quæ mutanda videbantur, consulto immutata reliquerit, tamen districte Concilium prohibet: *ut nemo illam rejicere quovis prætextu audeat, vel præsumat.* Unde quamvis Ecclesia decursu temporis errores corrigere possit, nullus tamen particularis potest vulgatam nostram rejicere, & sic autoritas ejus manet firma.

Ad VI. R. Uti ad I. objectionis ant. probam. 3.

Ad VII. Dist. ant. correxit quoad verba quædam, & majorem textus expressionem, conc. ant. correxit quoad sensum, neg. ant. & conseq. Nam Lectio Clementina à Sixtina non differt formaliter & quoad sensum à Spiritu S. principaliter intentum, sed solum materialiter, & quoad verba quædam.

Ad VIII. Dist. ant. non est purgatissima à mendis accidentalibus, conc. ant. non est purgatissima sic, ut errorem contineat substantialem, neg. ant. & conseq.

Ad

Ad IX. Neg. seq. Nam Tridentinum pro authentica declaravit illam editionem, quæ jam olim *vetus*, ac *vulgata* dicebatur, & quæ longo tot sæculorum usu in ipsa Ecclesiâ, adeoque usu tali, qui juxta Ecclesiæ sensum mediante vivo fidei verbo per traditiones Apostolicas sit propagatus, probata est: ergo pro authentica declaravit editionem jam existentem, quæ postea de novo est edita à Sixto V. Clemente VIII. nihil in ea quoad substantiam mutantibus, sed errores accidentales præli, vel describentium vitium corrigentibus.

*Quæstiuncula ad hanc materiam pertinentes.*

Quæres I. An textus Originarius Hebraicus (ut antiquis temporibus erat) quoad substantiam, seu in illis, quæ ad fidem & mores spectant, per Judæos de industria corruptus sit? R. negative. Ratio est: quia Josephus lib. I. Contra Appionem: & Philo apud Eusebium l. 8. c. 6. & 8. testantur, tantum fuisse Judæorum zelum pro lege & libris sacris, ut mortem potius, omniaque tormenta subirent, quam vel unum legis apicem mutare, aut adulterare vellent; quin & tanta superstitione colunt sacros Codices, ut in libro legis, si vel unum erratum deprehendant, pro illegitimo habeant, & abjiciant, nec ullos libros non correctos servari velint ultra 30. dies: si vero ultra quatuor errores habeat, sepeliendos velint cum probis hominibus; ergo verosimile non est, quod Judæi corruerint textum Hebraicum originarium, ut antiquis temporibus erat. Ratio est 2. quia si corrupissent, tunc vel ante Christi tempora, vel post corrupissent? atqui neutrum dici potest: non ante, quia Christus, qui alia Judæis exprobrabat crimina, hujus eos nunquam redarguit, quin potius Joan. c. 5. v. 39. ad scrutandas Scripturas Auditores suos remisit. Non etiam post Christi tempora: quia in Codicibus Hebræis nunc extant testimonia, quæ in iis à Chri-  
sto



sto & Apostolis citata sunt: ridiculum autem est dicere, ea sic à Christo & Apostolis citata esse, ut ea postea falsaturi erant Judæi: ergo. Inde est, quod jam olim S. Hieron. c. 6. Commentarii in Isaiam hanc corruptionem incredibilem senserit dicens: *Si aliquis dixerit hebræos libros postea à Judæis esse falsatos, audiat Originem, quid in octavo volumine explanationum Isaiæ huic responderit quæstiunculæ, quod nunquam Dominus & Apostoli, qui cætera crimina arguunt in scribis, & Phariseis, de hoc crimine, quod erat maximum, reticissent, sin autem dixerint, post adventum Domini Salvatoris, & prædicationem Apostolorum libros Hebræos esse falsatos: cachinnum tenere non potero, ut Salvator, & Evangelistæ, & Apostoli ita testimonia protulerint, ut Judæi postea falsaturi erant.* Etiam S. P. August. L. 15. de Civit. c. 13. ait: *Absit, ut prudens quispiam - - - Judæos cujuslibet perversitatis atque malitiæ tantum potuisse credat in codicibus tam multis & tam longe lateque dispersis.*

Dixi: Textus Hebraicus Originarius, ut antiquis temporibus erat, quoad substantiam corruptus non est de industria; ad insinuandum, quod fors hic textus hodiernis temporibus quoad substantiam etiam corrumpi ex malitia, vel industria potuerit: nam postquam puncta vocalia sensum determinantia ab Hebræis Tiberiensibus post tempora Hieronymi addita sunt, jam adeo certum non est, quod significationes ad intentum Spiritus S. & legitimæ sint, cum unicum sæpe punctum perperam appositum sufficiat, ut integrum sensum ad sinistrum intellectum detorqueat. Accedit diversarum lectionum numerus, ex quibus quandoque in textu Hebræo aliqua lectio sensui in versione vulgata expresso videtur contraria: Sic c. 9. Isaiæ sensum v. 6. non quidem verba mutando, sed male interpretando detorquere conati sunt: ubi enim legendum est de Messia & *vocabitur*, seu & *vocabunt* eum Deus fortis &c. referendo hæc verba ad Messiam; Hebræi moderni legunt: & *vocabit* Eum Deus

*fortis*, referendo verba ad Deum Patrem, verbum enim Hebraicum secundum variam punctationem recipere potest tum activam tum passivam significationem, & verti tum *vocabit*, tum *vocabitur*. Passive legunt LXX. Chaldaeus, Symmachus, & Aquila: at Masorethæ punctarunt active, & hanc potius lectionem secuti sunt: quod indubie ab illis intuitu obscurandæ gloriæ Christi factum censetur. Jam contra quæres

Dices I. S. Justinus M. Dialogo cum Triphone accusat Judæos, quod S. Scripturam depravaverint. Idem scelus exprobrant Judæis S. Irenæus l. 3. c. 24. & l. 4. c. 25. Item Tertullianus l. de habitu muliebri. Ergo textus originarius non est quoad substantiam incorruptus. R. Quod S. Justinus non arguat Judæos ob depravationem textus Hebraici, sed quod versionem LXX. depravaverint, dum enim hi in cap. 7. Isaïæ hanc vocem Hebraicam *Almah* græce verterunt *Parthenos*, id est, *virgo*: ecce *virgo concipiet*: illi græce verterunt *Neanis*, hoc est, *puella*, seu *Adolescentula concipiet*, ut in versionibus Aquilæ, Theodotionis, & Symmachi interpretum Judaizantium legebatur. Dum idem Justinus Judæos accusat, quod ex Jeremiæ c. 11. v. 19. illa verba rescuerint: *Et ego quasi Agnus mansuetus, qui portatur ad victimam*: ipsemet subjungit hoc factum tantum fuisse in quibusdam exemplaribus, non in omnibus, unde etiam verba hæc in textu Hebræo antiquo reperiuntur. S. Irenæus loc. cit. loquitur expresse contra Theodotionem & Aquilam, qui prave interpretantes locum Isaïæ c. 7. dum vertere debuissent, *Ecce virgo concipiet*, verterunt, *Ecce adolescentula in ventre habebit*: quare Judæorum falsam lectionem, non vero Scripturarum corruptionem ab eis factam reprehendit. Dum idem S. Irenæus lib. 4. c. 25. de Judæis conqueritur, quod illi in lege quædam auferant, quædam addant, quædam autem ut volunt, interpretentur: intelligi debet de lege Phariseorum, quam hi contra legem Dei statuerunt, non legem scriptam cor-  
rum-

rumpentes, sed legi scriptæ contrariam legem suarum traditionum opposcentes. Tertullianus pariter intelligi debet, non quod Judæos de depravatione Scripturæ redarguat, sed quod hi vel de industria vel inscitia variantes codices, variantes & discordes interpretationes & lectiones habuerint, ex iisque relictis illis, quæ Religioni Christianæ magis favebant, alteras secuti sint. Vel ad hos Patres dicatur, quod crimen depravationis Scripturæ tantum quibusdam Judæis in aliqua orbis parte degentibus objiciant, nunquam tamen affirmant, universim toto orbe Codices sacros antiquos ab illis vitiatos esse: de quo tamen responsio nostra ad Quæres est intelligenda.

Dices 2. Judæi, ne cogerentur fateri Christum Jesum esse Messiam, Chronologiam textus Hebræi de industria falsarunt, & annos bis mille detraxerunt; ergo. R. neg. ant. quia prisci Ecclesiæ Patres Origenes, Eusebius, Hieronymus, S. P. Augustinus & alii, qui textus hebræi dissonantias à græcorum seu LXX. virorum versione in rebus Chronologicis diligenter inspexerunt, de hac depravatione Judæis objicienda nunquam cogitarunt. Quare Graveson hanc textus hebræi Chronologiæ depravationem purum commentum ab Isaaco Vossio & Peczronio excogitatum appellat, ut Judæis invidiam conflarent, & versioni LXX. interpretum majorem conciliarent auctoritatem.

Dices 3. Sunt aliqua, quæ habentur in textu nostro, & non reperiuntur in Hebræo: Sic 1. in Psalm. 13. tres versiculos, nempe *Sepulcrum patens est guttur eorum*, & duos sequentes nos habemus, quos Hebraicus textus non habet. 2. aliqua sunt adeo imminuta, ut diversum omnino sensum faciant ab eo, quem habent apud Patres antiquos, sic S. Justinus testatur, quod Psalm. 95. v. 10. olim lectum fuerit: *Dicite in nationibus, quia Dominus regnavit à ligno*: postea autem in odium Christi hæc particula *à ligno* detracta sit; ergo. R. ad 1. hos tres versiculos in textu Hebræo probabilius nunquam fuisse,

cum neque in Chaldæo, neque in Syro, neque in versione S. Hieronymi ex hebræo textu concinnata habeantur: unde sequitur, quod Ecclesia eos retinuerit, quia versio antiqua latina, quæ antiquior est lectione S. Hieronymi, & inter manuscripta Vaticana asservatur, eosdem versiculos exhibet. Et dum S. Paulus in epist. ad Rom. verba eorundem versiculorum adducit, non adducit ex corpore Psalmi 13. sed ex aliis Psalmis, & ex Isaia, ubi eadem verba reperiuntur, vel ex quodam exemplari versionis græcæ LXX. Interpretum, quæ tempore Apostolorum maximæ erat in Ecclesia autoritatis. Ad 2. B. quod hæc particula *à ligno* nunquam in exemplaribus Hebræicis fuisse videatur. Cum non reperiatur in illo psalterio, quod S. Hieronymus ex hebræo vertit: licet habeatur in psalterio, quod Hieron. ex LXX. emendavit. Probabilius ergo hæc particula olim illi psalmo secundum versionem 70. quæ in primitiva Ecclesia usitata erat, addita fuit ab aliquibus viris piis, ut explicarent Regnum Christi exordium à ligno, id est, à Cruce habuisse. Cæterum solus Justinus est, qui conqueritur, quod Judæi particulam hanc ex invidia expunxerint, deceptus forte ex eo, quod particulam hanc *à ligno* in Codice suo Græco invenerit, in Codicibus vero hebræis deesse repererit.

Dices 4. Judæi in odium Christi videntur plura loca S. Scripturæ corrupisse: ergo. ant. prob. 1. Deut. c. 21. v. 23. legitur: *maledictus à Deo est omnis, qui pendet in ligno*: hoc additum *à Deo* in textu puro non videtur adfuisse, cum Paulus ad Galat. c. 3. referens hæc verba dicat: *maledictus omnis qui pendet in ligno*: omittat *ly à Deo*; ergo.

2. Gen. c. 8. legitur in textu Hebræo: *Corvus egrediebatur, & revertebatur*: in vulgata vero legitur, *egrediebatur, & non vertebatur*: ergo.

3. In textu hebræo Psalm. 21. v. 17. legitur: *Caari id est, sicut Leo*: in vulgata autem legitur *Carn*, id est, *foderunt manus meas*:

*meas*: ergo Hebræi literam unam interposuerunt, & *Vau* in *Jod* commutarunt; ergo.

4. Gen. c. 3. v. 15. nostra vulgata habet, *Ipsa conteret caput tuum*: in textu hebræo habetur, *Hu jeschuyhecbu rošeb veatta teschuybennu bakébb*, id est, ipsum (scilicet semen) conteret tibi caput, & tu insidiaberis ipsi calcaneum: ergo.

5. Gen. c. 49. v. 10. ubi pro *Sebaluab*, id est, *Missus* vel *Mittendus*, ut videtur legisse Hieronymus, vel pro *Sebello*, uti videntur legisse 70. optimo utrique sensu, pro quo & Chaldaus Paraphrastes habet: *Messias cuius est regnum*: Judæi posuerunt *Sebilo*, nullo sensu, idque ut ex eo loco revinci non possent, jam *Messiam* advenisse. Ergo.

6. Psalm. 18. v. 5. pro *sonus eorum*: quod habent 70. & Hieron. qui sine dubio in hebræo legerunt *Kolam*, quam lectionem, versionemque probat Apostolus ad Rom. c. 10. v. 18. Judæi sublata una litera substituerunt *Kaunam*, id est, *linea*, vel *regula eorum*, nullo fere sensu, ne ex hoc loco possent convinci, ex Evangelii per totum orbem prædicatione, *Messiae* adventum, ejusque regnum advenisse.

7. Isaia c. 9. v. 6. habetur: & vocabitur nomen ejus admirabilis: ubi tam 70. quam Hieron. habent, *vocabitur*: ut plane videantur in Hebræo legisse *jikkare*, vocabitur in passiva conjugatione; hoc tamen tempore legitur: *jikra*, vocabit: quod videntur Judæi substituisse alienis additis punctis: quia ex hoc loco manifeste probatur Divinitas *Messiae*; legendo autem *vocabit*, omnes illos dignitatis titulos, quos *Messiae* à Propheta datos agnoscimus, ipsi referunt ad Deum tanquam suppositum verbi *vocabit* præter ultimum *Princeps pacis*: hoc modo: & vocabit nomen ejus admirabilis, *Consiliarius*, *Deus*, *fortis*, *Pater futuri sæculi*, *Principem pacis*: & vere Calvinus in hoc loco agnoscit hebraici textus depravationem: ergo.



8. Jerem. cap. 23. v. 6. In textu Hebræo nunc habetur; *jikreo, vocabit eum*: ubi tamen Hieron. legit manifeste *jikreibus, vocabunt eum Dominus iustus noster*. quomodo & sese legere in Hebræo manifeste indicat Hieron. in Comment. in Isaiam; & magis videtur hoc loco subolere Judæorum depravatio, ut verosimile sit, eos vel detraxille affixum pronomen *bu*, & ex *jikreu vocabunt*, fecisse *jikreo vocabit eum*: vel pro *jikra vocabit* passive acceptum ut in Isaia, addito pronomine affixo fecisse *jikreo vocabit eum*, cum quo pronomine necessario active sumi debet; ergo.

9. Isaia c. 53. v. 8. habetur: *propter Scelus populi mei percussus cum*: ubi in Hebræo legitur: *plega eis*, & pro *lo*, hoc est, *ei*, videntur substituisse *lamo*; id est, *eis*, ut non ad Christum, sed ad populum hæc percussio referatur; ergo.

10. Zachar. c. 9. v. 9. habetur: *Ecce Rex tuus veniet tibi iustus, & Salvator*: ubi & 70. habent: *Salvens ipse*, sic & Chaldaus Paraphrastes active *Pbarek*; cum tamen hebræa habeant *Neschab*, id est, *salvatus*, quod videntur substituisse pro *Moschab*, *Salvens*; ergo.

11. Num. c. ult. v. 7. & 8. præcipitur: *omnes viri ducent uxores de tribu & cognatione sua, & cunctæ feminae de eadem tribu maritos accipient*: quod tamen præceptum est fidei Scripturæ manifeste contrarium, siquidem Moyles primus illud neglexit accepta uxore Sephora filia Sacerdotis Madian, Exod. c. 2. Et Aaron duxit uxorem Elisabeth de tribu Juda Exod. c. 6. David duxit Michol filiam Saulis de tribu Benjamin. Ergo.

12. Hebræ c. 6. v. 4. legitur: *impossibile est enim eos, qui semel sunt illuminati - - & prolapsi sunt, rursus renovari ad penitentiam*; cui tamen repugnat hodierna Ecclesiæ consuetudo. Item Hebr. c. 9. v. 4. habetur, in Arca fuisse manna, virgam Aaron, & tabulas lapideas: econtra 3. Reg. c. 8. v. 9. dicitur: *In arca autem non erat aliud, nisi duæ tabulae lapideæ*: ergo.

R. Neg-

R. Neg. ant. ad 1. prob. neg. ant. quia *ly à Deo* legitur cit. loc. tam in versione 70. quam in vulgata , quod sufficiens signum est *ly à Deo* non fuisse additum à Judæis. Nec mirum , quod Paulus referens hoc deuteronomii dictum omittat *ly à Deo*, quia loquitur de Christo, qui non propter peccatum suum pendit in cruce : dum interim in Deuteron. dicitur maledictus à Deo, qui propter peccatum suum in ligno pendet.

Ad 2. Utramque lectionem veram esse, & quod Corvus revertebatur volitando circa & supra Arcam, & quod non revertebatur, scilicet intrando in Arcam.

Ad 3. Judæos de industria sacrum textum non corrupisse: fecisse tamen hoc, ut, si duplex potuit esse lectio, quarum una magis altera minus favens erat Christianis, illam minus faventem ex odio Christianorum amplexi sint. Et sic forte contigit circa Psal. cit. loc. *foderunt manus meas*: Hebraice enim illic duplex est lectio, *Carn*, id est, *foderunt*: & *Caari*, id est, *sicut Leo*; ubi Judæi priore lectione relicta, quæ magis favebat Christianis, posteriorem forte secuti sunt, quæ propter obscuritatem Christianis minus favet.

Ad 4. Dico SS. Ambrosium, Augustinum, Chrysostomum & plerosque legisse *ipsa* in fœminino: neque satis constare, quomodo legendum sit in Hebraico. Utut autem legi debeat, nullus est error, & redit in idem: cum enim Deus ibi mulierem cum semine suo opponat serpenti cum suo semine, verissime dici potest, quod tam ipsa mulier, quam ipsum semen illius caput serpentis conteret.

Dices: verbum *conteret* in Hebræo est masculinum *Jeschubh*, non fœmininum, & totus Hebræus contextus genere masculino exprimitur: ergo non bene legitur *ipsa*. R. Hebræum *hu* licet idem sit ac *ipse*, sæpe ponitur pro *ipsa*, Hebraice *bi*, ut ex ipso objecto capite Genes. v. 12. constat: *Mulier, quam dedisti mihi, ipsa* (Hebraice *hu*) *dedit mihi*. Item v. 20. Item Gen. c. 17.

v. 14. Item Gen. c. 24. v. 4. Item Gen. c. 38. v. 21. & 23. Præterea licet *conteret* in Hebræo ponatur genere masculino, circumstantiæ (nempe quod de muliere egerat) satis determinant verbum masculinum ad significationem fœmininam: estque usus Scripturæ in textu Hebræo, quod sæpe fœminæ verbum tribuat masculinum: præsertim ubi de fœmina narratur aliquis actus heroicus, qualis hic est, quod ipsa conteret caput serpentis; sicut ubi vulgata Esth. c. 1. v. 20. dicit: *Uxores - - - deſerant maritis ſuis bonorem: in Hebræo habetur Item in masculino, pro fœminino titenna, hoc est, dabunt. Idem habetur Ecclef. c. 12. v. 4.*

Ad 5. Si *ly Scbilo* deducatur à radice *Scbala*, quod significat *pacificum eſſe*, habebitur periphrasis *Meſſiæ* ſatis commoda, ipſe enim plurimis in locis prædicitur futurus *pacificus*, maxime Iſa. c. 9. v. 6. Hanc derivationem ſecutus eſt Oleaſter, quaſi per matarcheſin *Scbilo* poſitum ſit per *Scallach*. Retenta eadem radice, ſi dicatur *chirick* magnum pro *kamets* ſubſtitui, *ly Scbilo* erit infinitivum verbi: *Scbala*: variato puncto, quæ punctorum variatio & unius pro altero ſubſtitutio ſatis Hebræis eſt familiaris, eritque ſenſus: *Pax*, cum infinitivus sæpe loco ſubſtantivi accipiat. R. David Kimhi, Aben-Ezra. R. Beihai & alij vocem *Scbilo* vertunt *beno*, id eſt, *ſilius ejus*, ut ſit affixum, *Scil* vero ſignificat *ſilium*: nam quia *Scbala* Hebræis eſt eſſe *tranquillum*, hinc puerperarum ſecunda, ſeu pellicula, in qua proles involuta eſt, *Scbilja* dicitur, quia in ea foetus tranquille quieſcit. Extat hujus vocis uſus Deuteron. c. 28. v. 57. Quod autem ponatur *be* pro *cholem*, non obſtat: eſt enim uſitata converſio, qua literæ quieſcentes inter ſe commutantur. Porro ſpeciatiim *Meſſias* potius dicitur *Scbilo* quam *beno*, quia *Scbilo* dicitur ſilius reſpectu matris ſuæ, & reſpectu ſecundæ, in qua quievit: & ita Meſſias homo ſilius fuit reſpectu matris ſuæ tantum. Adde etiam, Judæos ex hoc loco, inter varia Meſſiæ nomina, hoc

hoc nomen *Scilô* posuisse; unde in Sanhedrin c. 11. fol. 98. legimus: Rabbi Johannam, dixit, quod est nomen Messiae? qui de schola Rabbi scela responderunt: (*Schilô*) juxta illud, donec veniat *Scilo*. Similiter pro *Scilo* hic Messiam intellexerunt omnes tres Paraphraste Chaldaei, Onkelus, Jonathan, & Jerosolymitanus, qui omnes habent pro *Scilo*, *Rex Messias*. Et Judæi antiquiores in Breschieth Rabba scribunt: *Scilô bu Melech Maschiab*, id est, *scilo ipse est Rex Messias*. Quod attinet nostrum interpretem, dico, ipsum ly *Scilô* transtulisse paraphrastice per ly *Mittendus*, sive *Messias*, idque ideo, quia sciebat ex communi judæorum traditione ly *Scilô* nomen esse Messiae: & sane melius & intelligibilius exponere non potuit.

Ad 6. 70. legisse *kaunam*, id est, *lineam* & *normam*, sicut nunc in Hebræo legimus, & vertendo attendisse potius ad sensum, quam ad verba; nam ipsa cælorum linea, norma, structura, ædificatio, & compolitio est *vox eorum*, qua Dei sapientiam, potentiam, & alia attributa enarrant. Si autem Psalmus ille literaliter non de notitia Dei, quæ tum ex cæli contemplatione, tum ex lege divina habetur, sed de Christo & Apostolis legem Dei per totum orbem annuntiantibus intelligatur: etiam hæc optime congruere Apostolis: nam sono suo velut architectonico instrumento, & norma orbem percurrente, Ecclesiam Dei docuerunt, & ædificaverunt. Fieri quoque potuit, ut ad sensum respiciendo, etsi legerint 70. *kassam*, maluerint reddere *sonum*.

Ad 7. Errores, qui ex additione punctorum acciderunt, nihil omnino veritati officere: puncta enim extrinsecus addita sunt, nec textum in se antiquum mutant: ergo tota corruptio se tenet ex parte punctorum extrinsecorum. Etiam *kara* non semel legitur in Scriptura in activa quidem conjugatione, habens tamen significationem passivam, cujus generis plura loca

annotantur à Forstero in suo Dictionario. Etiam Pagninus illud *jikra* passively vertit, *vocabitur*, uti & Tigurini.

Ad 8. Ly *jikreo* referri ad Judam & Israel, de quibus præcessit sermo. Nec obstat, si ad utrumque referatur, debere esse in plurali; sciendum namque est, frequenter in Hebræo nomen numeri singularis reperiri cum verbo plurali, & econtra; sic Gen. c. 1. v. 14. *Febi mecroth, sit luminaria*. Secundum Grammaticam Hebræam id fieri solet, quando nomen pluralis numeri distributive exponi potest, ut Gen. c. 27. v. 29. *Benedicentes te benedictus sit*, id est, *unusquisque benedicens*. Ita & hoc loco. Item censeo Catholice legi posse cum Judæis: *vocabit eum*: pro ut tunc legerunt 70. juxta de la Haye, non tamen cum iis Catholice exponi, cum referant ly *vocabit* non ad Judam & Israellem, sed ad ly *Dominus*. Attenta proinde linguæ latinæ proprietate, in qua hujusmodi verborum non ita est usus, bene transtulit S. Hieronymus. Præterea forte legi deberet iisdem literis *jikru, vocabunt*, & tunc sequitur explicationis gratia à D. Hieron. additum fuisse pronomen *eum*: & ita tota corruptio erit à punctis textui extrinsecis.

Ad 9. Ly *Lamo*, id est, *eis*, pro *lo*, id est, *eum* sæpius poni. Et ita ponitur in Job, præsertim c. 27. v. 23. In Isa. c. 44. v. 15. Ita & in hoc loco.

Ad 10. Licet *Noscbab* sit participium conjugationis *Nipbal*, radix enim est *salvavit*, sciendum tamen, conjugationem *Nipbal* quandoque sumi transitive, ut Grammatica Hebræa notat. Deinde Hebræi quandoque passivo utuntur pro activo, ut Prov. c. 29. v. 9. *Vir sapiens, si cum stulto contenderit*: in Hebræo est: *vir sapiens judicatur cum viro stulto*. Sic ergo hic *salvatus* positum est pro *salvans* aut Salvator. Exempla, ubi *Nipbal* sumitur transitive, sunt Prov. c. 6. v. 5. Psalm. 102. v. 14. Isa. c. 26. v. 3. Cernel. à Lap. vult, *Noscbab* hic non esse participium sed nomen, idem active significans, quod *Jesus*, id est, Salvator.

Ad



Ad 11. Præceptum illud esse intelligendum de solis illis foeminis, quæ ex defectu masculorum paternam hæreditatem fortiuntur. Et hinc S. Th. 1. 2. q. 105. a 2. ad 2. concedit filiabus Aaron liberum matrimonium: in quibus ratio hujus legis deerat, scilicet, ne hæreditas devolvatur ad alienam tribum, sed ut hæreditas permaneat in familiis, ut ibi additur.

Ad 12. Apostolum vel loqui de renovatione per baptismum utpote initerabilem, non autem de renovatione per poenitentiam, ad quam passim revocat lapsos. Vel non loqui de impossibilitate absoluta, sed morali. Ad alterum Apostoli locum R. ibi præpositionem *in* accipiendam esse pro *cum* arca, & *juxta* arcam, cum revera in arca nonnisi tabulæ fuerint.

Quæres 2. An textus Hebræus sit liber à mendis? R. Textum Hebræum non esse immunem à mendis levioribus, quæ incuria exscribentium, vel oscitantia librariorum potuerunt irrepere: nam hoc quotidiana constat experientia, qua videmus vix aliquid exscribi aut imprimi sine levioribus saltem mendis, quod magis habet locum in Hebræo ob maximam similitudinem literarum.

Quæres 3. An textus hebræus sit authenticus? R. Licet textus Hebræus à Judæis de industria falsatus non sit, adhuc tamen à nobis positive pro authentico, & fidei nostræ regula habendus non est. Ratio est: quia ut aliquis textus Scripturæ sacræ positive à nobis habeatur pro authentico, & fidei nostræ regula, debet nobis de hoc universalis Ecclesiæ judicio constare; atqui hoc nobis non constat de textu Hebræo, sicut nec etiam de Græco, bene vero de textu vulgatæ latinæ editionis, de quo solo Ecclesia in Tridentino congregata Sess 4. c. 2. pronuntiavit, ut pro authentico habeatur: ergo. Dictum est notanter in responsione: textum hebræum à nobis non esse *positive* pro authentico habendum, ad inuendum, nos minime contendere textum Hebræum vel Græcum non esse absolute & in

se authenticum, sed de authenticitate, vel non authenticitate ejus cum Tridentino nos præscindere, eo quod Ecclesia eum ut talem in Concil. Trid. non recognoverit, nec suo decreto ut talem fidelibus proposuerit, sed prætermiserit, & solum de vulgata latina mentionem fecerit, eamque ut authenticam declaraverit.

Dices I. Textus originarius olim fuit authenticus, & à Christo ac Apostolis, qui exinde testimonia sumebant, laudatus: ergo & nunc authenticus est, & non solus textus vulgatæ editionis. R. Conc. ant. neg. conseq. quia ideo fuit olim authenticus textus originarius, quia purus & ut talis per Synagogam sive Ecclesiam habitus: hodie vero authenticus positive à nobis haberi nequit, quia nec ut purus, nec suo originali conformis per Ecclesiam est declaratus. Præterea hoc argumentum solum illos urgere videtur, qui absolute negant hodiernos textus Hebræos & Græcos esse revera authenticos, non autem nos, qui cum Tridentino præscindimus, an authentici vel non authentici sint? solum enim asserimus, non esse habendos ut positive authenticos, quia hoc ab Ecclesia non fuit sanctum; Sicut enim libri, qui modo ut Canonici habentur, licet revera essent Canonici & Divini, non tamen certo ut tales habebantur, priusquam ab Ecclesia in Canonem reciperentur: sic textus Scripturæ, quamvis revera in se esset purus, & authenticus, non tamen haberi debet à nobis ut authenticus, nisi ut talis ab Ecclesia declaretur.

Dices 2. Si authenticus & purus non est textus Hebræus, nec pura & authentica dici potest vulgata latina, cum ex Hebraico textu translata sit: ergo. R. neg. ant. quoad 2. part. quia vulgata nostra latina habetur quidem ex Hebræo textu translata, sed ex Hebræo textu necdum punctorum additione, vel librariorum incuria aut ignorantia vitiato.

Dices

Dices 3. Fontes Scripturarum præferendi sunt rivulis, quando constat fontes non esse turbatos: atqui fontes non sunt turbati saltem in rebus fidei & morum, licet errata quædam leviora contineant: ergo. R. Divina providentia factum esse, ut vulgatam nostram latinam habeamus quidem ex Hebræo textu translata, ut diximus, sed hic textus Hebræus antiquus quod non sit vitiatus, & fons turbatus, constitit ex Synagogæ seu Ecclesiæ judicio, & hinc olim fuit authenticus. Unde ut editio aliqua sit authentica non satis est, quod nihil contra fidem vel bonos mores contineat, sed insuper requiritur, ut hoc constet publico Ecclesiæ judicio: quod non constat de moderna Græca & Hebraica, bene tamen de sola vulgata latina, etiam sola hæc pro authentica à nobis est habenda. Unde

Quod hic dicimus de authenticitate textus Hebraici, pariformiter dicendum est de textu Græco.

Quæres 4. An Ecclesia permittat recursum ad textum Hebraicum & Græcum pro corrigenda ex illis vulgata? R. negative contra Protestantes. Ratio est: quia sola vulgata ab Ecclesia declarata est authentica, & conformis suo originali puro & sincero: textus autem Hebræus, qui modo est, non est ab Ecclesia declaratus ut authenticus: neque decisum est, eum esse fontem purum ac sincerum; ergo pro corrigenda vulgata non potest fieri recursum ad textum Hebræum. Idem est iudicium de textu græco.

Dices I. Omnis translatio debet corrigi per originem, unde sumpta est: sed vulgata latina translata est ex textu Hebræo: ergo. R. Hoc verum esse, si origo supponatur pura, & ut talis ab Ecclesia sit declarata, secus si non supponatur pura, nec ut talis ab Ecclesia sit declarata, ut est textus Hebræus modernus; quare si diversitas aliqua inter textum Hebræum & vulgatam occurrat, non vulgata per textum Hebræum, sed potius hic per vulgatam corrigendus est.

Dices 2. SS. Patres Augustinus & Hieronymus passim ad Hebraicos, græcosque fontes tanquam primævos textus recurrendum esse docent, quoties latinæ versiones corruptæ videntur vel obscuræ: ergo. R. dist. ant. Et fontes Hebraici & Græci tempore istorum Ecclesiæ Patrum erant puriores, conc. ant. Et hodie sunt, neg. ant. & conseq. R. 2. Quod hi Patres, dum ad fontes recurrendum esse docuerunt, locuti sint suo tempore, quo Ecclesia nihil adhuc nec de Textu, nec de versione statuit, ita ut versio & textus in hoc pares fuerint, ubi omnino, si discrepantia observata fuit, in versione recurrendum ad textum erat; at vero cum modo textus & vulgata jam pares non sint, sed pro sola versione, non autem pro textu Hebræo aut Græco Ecclesiæ decretum stet, recursus pro corrigenda vulgata ad textum admitti nequit.

Dices 3. Ergo Ecclesia Græca nullam habet Scripturam authenticam. R. dist. illatum: ergo Ecclesia Græca nullam habet Scripturam authenticam, hoc est, non ut talem nobis ab Ecclesia declaratam, adeoque neque in hac ratione cum vulgata nostra latina comparandam, conc. authenticam in se, neg. Ecclesia Græca (intellige unita cum latina, non schismatica) habet Scripturam, quæ *forte in se* est authentica, quia nævi, qui in illa continentur, non obsunt veræ fidei aut moribus: licet à nobis non sit habenda ut authentica, quia Ecclesia Catholica eam talem non declaravit, juxta illud S. P. August. lib. Cont. epist. fund. *Ego vero Evangelio non crederem, nisi Ecclesiæ me commoveret auctoritas.*

Interim tamen Ecclesia permittit recursum ad textum Hebraicum & Græcum ob alia motiva, & utilitates. 1. ad auferendas ambiguitates verborum, & nominum, ut an nomen sit substantivum vel adjectivum, cujus casus, vel generis, cujus temporis sit verbum, ut sic tollatur æquivocatio, si quandoque in vulgata emergat. 2. Ad percipiendam energiam, & proprietatem,

tatem, quam dictio habet in nativa lingua, quæ in latina expressi non potuit. 3. & præcipue, ut ex textu Hebraico aut Græco convincamus adversarios de suis erroribus: cum illi enim textui Hebræo & Græco summam tribuant auctoritatem, ineluctabile contra eos argumentum sumimus, dum ex fontibus ipsos illos impetimus.

## QUÆSTIO SEPTIMA.

1. *Qualis sit Canon S. Scripturæ tum Veteris, tum Novi Testamenti; tam apud Judæos, quam apud Christianos?*
2. *An, quales, & quo Jure Heretici expungant è Canone S. Scripturæ libros tum Veteris, tum Novi Testamenti?*

### §. I.

#### *Prænotanda.*

**N**otandum I. Scripturam sacram prima sui divisione in Testamentum Vetus, & Novum dividi. Illud est, quod legem ante Christum à Deo datam exhibet, Christum ejusque Evangelium prænuntiat. Hoc vero, quod doctrinam à Christo sive per se, sive per Apostolos suos traditam nuntiat.

Notandum 2. Nomine Canonis in præsentì venire Catalogum librorum S. Scripturæ: & dum quæritur, quisnam sit legitimus SS. librorum Canon? idem est, ac dum quæritur, quanam libri sint vere Divini, id est, à Deo inspirati, ac formale Verbum Dei?

Notandum 3. Libros sacros alios dici *Authenticos*, alios *Canonicos*: *Authenticos* sacros libros præstat autoritate sua Spiritus sanctus; *Canonicos* vero infallibile judicium Ecclesiæ declarat, quæ definit talem librum vere à Deo esse inspiratum; cum enim plu-



plurimi libri obtruderentur pro sacris, de quibus merito dubitari poterat, debuit hoc iudicium relinqui Ecclesiæ, quæ summa cura in Conciliis Oecumenicis, imprimis Florentino & Tridentino in Canonem certum sacros libros redegit, à quo proinde Canone dicuntur Canonici. Fieri proinde potest, ut liber aliquis sit *quoad se* Authenticus, non vero *quoad nos*: consequenter licet omnes libri *Canonici* sint etiam *Authentici*, non tamen vicissim; possunt nihilominus omnes libri *Authentici* fieri etiam *Canonici*, si videlicet iudicio Ecclesiæ pro talibus approbentur, sicut in pluribus jam accidit.

Notandum 4. Ex libris Canonici aliquos esse *Proto-Canonicos*, aliquos *Deutero-Canonicos*. Proto-Canonici illi dicuntur libri, de quorum Authoritate nunquam dubitatum fuit in Ecclesia. Deutero-Canonici illi dicuntur libri, de quibus aliqua subinde fuit controversia, iudicio tamen Ecclesiæ sublata.

Notandum 5. Alios præterea esse Sacros libros, qui nunquam fuerunt, nec etiamnum sunt publico Ecclesiæ testimonio pro Canonici declarati, quantumvis à nonnullis olim in numerum S. voluminum recensiti, veterumque aliqui testimoniis eorum usi fuerint, de quibus aliqui de facto, sed extra Canonicum Catalogum ponuntur: ut Oratio Manassæ, 3. & 4. liber Esdræ; qui libri & similes quandoque etiam *Apocryphi* dicuntur, non quidem eo sensu, quo solet etiam in decretis Pontificum *Apocryphi* nomen ad interdicta, prorsusque damnata Hæreticorum scripta interdum transferri, sed in alia prorsus acceptione; *Apocryphum* enim ex Græco idem est quod *absconditum*, & sic etiam illi libri, quorum Author ignotus est, *Apocryphi* dici possunt: præprimis autem in præsentī acceptione libri *Apocryphi* sumuntur, qui sic absconditæ, ac proinde dubiæ sunt auctoritatis, de quibus non audent affirmare Patres, eos à Scriptoribus suis afflatu & assistentia Spiritus S. conscriptos esse; atque ita libri *Apocryphi*, prout extra libros sacros Authenticos & canonicos

nonicos sunt, ad duplicem respective classem reduci possunt, ita ut aliqui *simpliciter* vocentur Apocryphi, & rejiciuntur ab Ecclesia tanquam *supposititij* & *falsi*; alii dicuntur tales *secundum quid*, quod nimirum respectu nostri adhuc maneant *Apocryphi* seu *occulti*, neque permittantur cum reliquis scripturis publice prælegi, ex eo quod iudicium suum de his suspenderit Ecclesia; atque ita manent intra limites authoritatis humanæ, subinde tamen etiam à Patribus citantur.

Notandum 6. Citari frequenter alios libros, qui vel *injuriam temporum*, vel *incuria hominum*: vel etiam *Dei voluntate* erepti sunt; sic periculum fuit *negligentia custodum*, ne periret Deuteronomium inventum sub Josia, ut habetur 4. Reg. c. 22. v. 8. Aut etiam *ex impietate*, quomodo Joakim librum Jeremiæ scapello scidit, & in ignem conjecit, ut habetur Jerem. c. 36. v. 23. Et denique ex *Divina voluntate* ob peccata Judæorum, uti voluit à Moyse Tabulas legis confringi.

Notandum 7. Interivere autem libri Sacri, de quibus in ipsis Sacris literis fit mentio: 1. *Liber Bellorum Domini* cit. Num. c. 21. v. 14. 2. *Liber Justorum*, seu *recti*, Josue c. 10. v. 13. 3. *Liber Verborum*, seu rerum gestarum Salomonis, 3. Reg. c. 11. v. 4. 4. *Liber verborum Regum Israel*, 3. Reg. c. 14. v. 19. 5. *Liber verborum Regum Juda*, 3. Reg. c. 14. 6. *Liber Samuelis*, 1. Paralip. c. ult. 7. *Liber Nathanis Prophetæ*, 1. Paralip. c. 29. v. 29. 8. *Salomonis 3000. Parabolarum*, & *Cantica 5000*. Item 9. *Physica ejusdem de plantis, jumento, & volucris*, 3. Reg. c. 4. v. 32. 10. *Joannis Hircani liber dierum*, 1. Machab. c. ult. Hi libri, ut verosimilius est, in rigore non fuerunt Canonici, alias Deus non permisisset illos interire: vel certe illos restituisset, prout Deuteronomium amissum restituit tempore Josiæ Regis, 4. Reg. c. 22. Et librum Threnorum, quem Joakim Rex scissum in ignem abjecerat, restituit, Jerem. c. 36.

Notandum 8. Aput Hebræos ante captivitatem Babylonicam nullum Sacrorum canonem librorum extitisse, sed exacta captivitate verosimiliter ab Esdra approbante Synagoga magna confectum fuisse: quia ante captivitatem Babylonicam eis talis Canon necessarius non fuit, cum Judæis ipsa Sacrorum Scriptōrum authographa superfuerint: ex quorum diligenti perscrutatione, descriptione, & imitatione satis superque in fide ac moribus proficere potuerunt: qui tamen Canon post captivitatem necessarius fuit, ubi genuino Dei verbo ex multorum insidiis periculum iminebat. In hoc Concilio præter Esdram & Nehemiam præcipui erant Haggæus, Zacharias, Malachias, Zorobabel, Mardocheus, Josias filius Josedeck Sacerdotis. An hoc Concilium Synagoga magna appellatum idem fuerit ac synedrium magnum constans ex 72. Judicibus à Moyse institutum pro tractandis negotiis tum Reipublicæ tum Religionis? an vero aliud diversum tribunal noviter institutum? aliqui primum, aliqui secundum tenent, quod ad præsentem materiam parum refert.

Notandum 9. Apud Hebræos continuis temporibus unicum, eumque Esdrinum Canonem usque ad Christum natum extitisse, & non plures. Ratio est, quia tam Hebræi, quam veteres Christiani nullum alium præter Canonem Esdrinum agnoverunt. Ergo. Contra hoc notandum

Dices 1. Ideo post solutam captivitatem Canonem librorum sacrorum ab Esdra editum deducimus, quia teste Josepho l. 1. contra Appionem. Judaicæ gentis consuetudo fuit, ut post bella libri sacri recognoscerentur, & instaurarentur, atqui etiam succedentibus temporibus multa contra Judæos bella movebantur maxime ab Antiocho, sub quo præsertim contra libros sacros sævitum fuit, ut legitur 1. Machab. c. 1. v. 59. Ergo credibile est, quod post Esdram nova librorum collectio facta sit, & quidem à Nehemia, de quo 2. Machab. c. 2. v. 23. dicitur: quod construxerit Bibliothecam, congregaverit de regi-  
oni-

onibus libros & Prophetarum, & David, & Epistolas Regum. Item à Juda Machabæo, de quo ibidem v. 14. dicitur, quod ea, quæ deciderant per bellum, quod sub Antiocho Rege acciderat, congregaverit omnia: ergo novæ collectiones librorum post Esdrinam, & quidem approbante Synagoga magna factæ videntur. R. Neg. causalem maj. quia non dicimus, ideo præcise canonem ab Esdra post captivitatem conditum, eo quod Hebræis mos fuerit libros sacros post bella recensere, & repurgare: sed quia tempore captivitatis pessumdatis authographis libri sacri dispersi, & ex parte adulterati fors ac corrupti ab Esdra approbante synagoga emendati, in unum volumen collecti, & populo ut libri Divini propositi fuerunt. Unde Judæi post Esdram novis occurrentibus bellis aliisque causis tempore Nehemiæ, & Judæ Machabæi auctoritate Synagogæ magnæ libros sacros tantum recognoverint, repurgaverint, & Canonem ab Esdra confectum ex veterum exemplarium fide confirmaverint: nunquam autem novum & auctiorem Esdrino Canone ediderint, seu libros Esdrino Canoni non insertos inseruerint.

Dices 2. Si Canon Esdrinus continuo clausus mansisset ita, ut successu temporis libri sapientiæ, Tobix, Judith &c. (qui in Canone Esdrino non sunt) nunquam inserti fuissent, hoc erueretur ex illo, quod memorati libri à Judæis nunquam pro sacris & canonicis habiti fuerint: sed hæc ratio est nulla: ergo. min. prob. Non abs re suspicari potest, quod Judæi Hebraizantes præfatos libros è canone sustulerint, & quidem duplici ex causa: 1. Quod Hebraica seu sacra lingua exarati. 2. Quod hi libri ab Hellenistis, id est, Judæis extra Palæstinam inter gentes natis, & græca versione utentibus recepti fuerint, inter quos & Judæos Hebraizantes mutua æmulatio fuit: ergo. R. Conc. maj. neg. min. ad prob. neg. ant. quoad utrumque. Ratio negandi primum est: quia si hos libros memoratos ex illa ratione subduxissent, etiam Danielelem & Esdram eadem lingua

D d d 2

scilicet

scilicet Chaldaica scriptos, qua Ecclesiasticus, Tobias, Judith, & saltem primus Machabæorum scriptus est, subducere debuissent. Ratio negandi secundum est: quia si præfati libri locum habuissent in Canone Hellenistarum, etiam locum in canone vetustissimorum Christianorum habuissent, utpote qui Canonem Scripturarum ab Hellenistis Judæis acceperunt; hoc autem est falsum, cum prioribus Ecclesiæ sæculis à multis ceu *Apocryphi* habiti sint, licet eos postea universa Christi Ecclesia receperit, & suo canoni inferuerit.

Dices 3. Josephus lib. 2. contra Appionem citat ex c. 42. Ecclesiastici hæc verba: *Mulier vero in omnibus peior viro, cujus nequitia mulierem etiam beneficam superat.* Ergo Josephus vim legis tribuit Ecclesiastico, quod non fecisset nisi relatus fuisset in canonem: ergo alius ab Esdrino canon supponendus est, in quem Ecclesiasticus aliique libri sacri Esdrinis recentiores relati sunt. R. Ex hoc solum sequi, quod liber Ecclesiasticus quia ex Salomonis parabolis compilatus, apud Hebræos magnæ auctoritatis fuerit, maxime apud Hellenistas, qui Josephi tempore istorum librorum, esto non in canonem relati fuerint, magnam æstimationem habebant. Præterea priora verba: *mulier vero in omnibus peior viro*, in Ecclesiastico non reperiuntur.

Dices 4. Nehemias Canoni Esdrino suum librum addidit: ergo post Esdram novus Canon conflatus est. 2. Credibile est, quod dum mittendi essent codices sacri ad Ptolomæum Philadelphum per 70. senes vertendi in græcum, quod ab Eleazaro congregata fuerit Synagoga magna, & ab ea vetus Canon confirmatus, eique posteriores libri adjecti sint: ergo. R. quod liber Nehemiæ cum libro 1. Esdræ tantum unicum volumen constituerit, cum libri primi Esdræ continuatio sit: ergo cum Nehemiæ additione novus Canon conflatus non est. Ad 2. R. Quod tunc, dum mittendi essent libri ad Ptolomæum Canon quidem rursus recensitus & recognitus fuerit, nihil autem ei adjectum



jectum sit, quod exinde colligitur, quod 70. senes illos solum libros verterint, quorum exemplar aureis literis scriptum, & forte in templo asservatum ab Eleazaro ad Philadelphum transmissum est; hoc autem exemplar solum libros ab Esdra collectos unica addita Nehemiæ continuatione complectebatur: ergo alii libri Canoni Esdrino adjecti non sunt, quia alias LXX. eosdem vertissent.

Notandum 10. Hebræos tot numerare libros S. Scripturæ, veteris scilicet testamenti, quot habent ipsi literas, nempe viginti duos. Ita expresse S. Hieron. in prol. Galle. *Viginti duo elementa sunt, per quæ scribimus Hebraice omne, quod loquimur, & eorum initiis vox humana comprehenditur: ita viginti duo volumina supputantur, quibus quasi literis & exordiis in Dei doctrina tenera adhuc & lactens viri justi eruditur infantia: ergo.*

Notandum 11. Hebræos hos viginti duos libros in tres classes dividere, videlicet in *Tbora*, id est, legem: *Nebiim*, id est, Prophetas: *Ketubim*, id est, Hagiographa.

Notandum 12. Communem nunc apud Autores utriusque testamenti sacrorum librorum partitionem esse quadruplicem, nimirum in *legales*, *Historiales*, *Sapientiales*, & *Propbetiales*. Primi *legem*, secundi *historiam*, tertii *dictamina sapientiæ*, seu *variā doctrinam* præsertim ad rectam morum conformationem: quarti *Propbetias* & *vaticinia* potissimum *universalia*, seu totam Ecclesiam concernentia continent. Quamquam idem liber aliquando simul sit *Historicus*, & *legalis*, ut *Exodus*.

Notandum 13. Non eundem sensum esse modernorum Hæreticorum circa numerum librorum divinatorum, qui est Romano-Catholicis. Illi enim à codice sacro, quem modo pro S. Scriptura legimus, & reveremur, deletos volunt ex veteri testamento tanquam apocryphos, *Tobiam*, *Judith*, *Sapientiam*, *Ecclesiasticum*, *ambos Machabæorum*, & *Baruch*: Ex novo testa-

D d d 3

mento

mento vero expungunt *Epistolam ad Hebræos*, *Epistolas Jacobi*, *Judæ*, *2. Petri*, *2. & 3. Joannis*, & *Apocalypsim*. His prænotatis.

## § II.

Dico 1. Canon Hebræorum cum sua divisione est iste : *Genesis*, *Exodus*, *Leviticus*, *Numeri*, *Deuteronomium* : & hi quinque sunt legales. *Josue*, *Judices* & *Ruth*, *Samuel 2. Regum 2.* Et hi quatuor sunt Prophetæ anteriores. *Isaias*, *Jeremias* & *threni*, *Ezechiel*, Prophetæ minores. Et hi quatuor sunt Prophetæ posteriores. *Psalmi*, *Proverbia*, *Job*, *Canticum Cantorum*, *Ecclesiastes*, *Esther*, *Daniel*, *Esdras* & *Nehemias*, *Chronica*. Et hi novem sunt Hagiographa.

Univerſim ergo Canon Hebræorum constat viginti duobus libris: cujus ratio constat ex Superiori Notando 10. Solum ſuperest explicatio horum librorum.

**P**rimus liber est *Genesis*, quod nomen ex græco idem est ac origo: quia enarrat mundi Creationem, originem, & natales. Ab Hebræis vero hic liber dicitur *Bereſchith*, hoc est in principio, à prima nempe hujus libri dictione, & initialibus verbis, mos enim Hebræis est libros suos ab initialibus verbis denominare.

Secundus liber ſecundum græcam nominationem *Exodus*, latine vero *Exitus* vocatur ex eo, quod præcipua ejus pars de Israelitici populi exitu de Ægypto tractet, quem librum Hebræi *Veelle Schemoth*, hoc est, & hæc nomina, à primis ipsiusmet libris dictionibus compellant.

Tertius liber Græcis & latinis à materia, quam pertractat (tractat autem de ſacrificiis aliisque muniis Levitarum) dicitur  
Le-

*Leviticus*: ab Hebræis autem vocatur *Torath Haccobanim*, id est, lex Sacerdotum; vel etiam *Vaiicra*, hoc est, *vocavit*, ab exordio libri appellatur; nam Levitæ, id est, qui erant prognati ex Patre & tribu *Levi*, electi fuerunt à Deo ad munus Sacerdotale, & ministrandum ei in tabernaculo, sed hac partitione, ut *Amramitæ* sive posterii *Anram*, hoc est, *Aaron*, ejusque filii Sacerdotio fungerentur, solique sacrificarent: cæteri nempe posterii *Caath*, *Merari*, & *Gerson* (qui omnes fuerunt filii *Levi*) hisce subservirent, ut *Sacerdotibus* nostris *Diaconi*. Unde factum est, ut priores *Sacerdotes*; posteriores vero *Levitæ* nomine vocarentur; hic tamen contrarium accidit, & per *Levitas* in præsentem *Sacerdotes* intelliguntur, ita ut *Leviticus* idem sit quod *Sacerdotalis* aut *Sacrificatorius*.

Quartus liber tum à Græcis, tum à Latinis *Numerorum* dicitur: Hebræi vero de more suo *Vagedahber* à primis vocibus locutus est: compellant; inscribitur autem sub titulo *Numerorum*, eo quod liber hic à censu, & numeratione populi suum sumat exordium.

Quintus liber ad Hebræis ex consuetudine à primis dictionibus *Ellebaddebarim*, seu *ista sunt verba*, & quandoque à Rabinis *Misne*, hoc est, *iteratio legis* vocatur, prout & ex Græco liber hic *Deuteronomium*, seu *secunda lex* inscribitur. Vocatur autem *secunda lex*, & *iteratio legis*, non quasi novam & aliam legem à præcedentibus contineat, sed quod legis in Sina à Deo ante 38. annos latæ, & tribus superioribus libris, scilicet *Exodo*, *Levitico*, & *Numeris* descriptæ sit *repetitio*, & *explicatio*. Porro repetitio hæc legis à Moyse jamjam morituro facta est anno 40. exitus de Ægypto, paulo antequam Hebræi transirent *Jordanem*; & ingrederentur in *Chanaan* in campesribus *Moab*, nempe in *Abelsatim*, quæ fuit 42. & ultima mansio Hebræorum in deserto. Duplex autem hujus repetitionis causa assignari potest: 1. Quod senes, qui ex Ægypto egressi erant, & primam legem

legem in *Sina* audierant, ob murmur exploratorum Num. c. 14. jam mortui erant: & populus præsens erat novus, qui priorem legem promulgari non audierat; unde hac secunda legis promulgatione iterato Deus novum cum Hebræis fœdus iniit, ut habetur c. 29. v. 1. 2. Causa est: quia Moyſes jamjam moriturus, ultimumque ſuis ſibi commiſſis Hebræis, quos præ vita ſua diligebat, valedicturus, hac repetitione legem profundius, atque tenacius imprimere voluit; eaque de cauſa Moyſes c. 17. v. 18. juffit, ut novi Reges eligendi deſcribant ſibi Deuteronomium. Ex qua etiam ratione c. 31. v. 10. præcepit, ut Deuteronomium toti populo quolibet ſeptimo anno remiſſionis legatur.

Notandum Hos omnes libros quinque vocari *Pentateuchum*, qui apud Hebræos unus tantum fuit liber legis, & Hebraice *Tbora*, latine *Lex* vocatur.

Sextus liber dicitur *Joſue* non tam ex certitudine Authoris, quod nempe libri hujus Author ſit *Joſue*: hoc enim ex divina revelatione non conſtat, quamvis communiter Patres ita ſentiant: quam ex infallibilitate geſtorum, quæ liber hic continet.

Septimus liber eſt *Judicum*, quem Hebræi *Sopbetim*, id eſt, *Judices compellant*, à *Judicibus* nomen ſuum accipit, qui erant tunc *Magiſtratus ſummus*. Magna proinde *Judicum* fuit poteſtas, & quidem ſecundum quid *Monarchica*: unus enim ſolus *Judex*, iſque vel à Deo præpoſitus, vel à populo electus ſuo tempore præerat; non tamen erat *Regia*, nam nec leges novas condere, nec tributa populo imponere poterat, uti poſſunt *Reges*; nec *diademate* nec *ſceptro*, nec *ſatellitio* *Regio* utebatur, nec ungebatur, nec hæreditario jure ſuccedebat: electus tamen per omnem vitam manebat. *Monarchiæ* tamen *judicum* mixta fuit *Ariſtocratia*, nam in rebus difficiliſſimis ſupremi *Concilii*, quod *Sanbedrim* dicebatur, ſententiam exquirere, ejusque decretis ſtare tenebatur, in cæteris vero legem Dei ſequi

sequi, ac juxta eam populum gubernare, hinc non tam *Judex* quam *Dei Lex* populum gubernabat. Officia vero Judicum erant 1. Populum à servitute liberare. 2. Bellis præesse. 3. proprie judicare, id est, Jus populo dicere, eorumque lites justa sententia dirimere.

Libris Judicum annectitur liber *Ruth*, qui liber eximiæ pietatis, & Divinæ providentiæ singulare ostendit exemplum; Ruth enim Moabitis socrum suam in patriam revertentem pie subsecuta Boozo prædiviti secundis nuptiis jungitur, cui parit *Obed* Davidis Avum, unde Christus Dominus genus suum secundum carnem ducere dignatus est. Est autem liber hic appendix quædam libri Judicum, unde ab Hebræis illis annectitur: hujus enim historia contigit sub Judicibus.

Octavus liber sunt *libri Regum*, qui Judicibus (quorum ante Heli ultimus fuit Judex Samson) successerunt. Hisce quatuor libris Regum Spiritus S. prosequitur historiam gentis Judaicæ, & Ecclesiæ, sive Synagogæ veteris à Judicum exitu, quorum ultimus fuit Samuel, cujus gesta hic præmittuntur, quia ab eo facta est mutatio Regiminis quasi Aristocratici in Monarchicum & Regale, unde Regum nomine hi libri inscribuntur. Hebræi & Syri duos primos libros Regum vocant *Prophetiam Samuelis*: & duos posteriores vocant *libros Regum*, seu *Regnorum*.

Nonus liber ab Hebræis *Dibsebjamim*, *verba dierum*, seu *Chronicon*, à Græcis vero *Paralipomenon*, à Latinis autem *Supplementum*, aut etiam *relictorum*, aut *residuorum*, & à S. Hieron. epist. ad Domnionem præteritorum vocatur, quia supplet ea, quæ in libris Regum de Regibus Juda (nam gesta Regum Israel vix attinguntur in lib. Paralip.) prætermissa sunt. Paralipomenon Hebræis est liber unicus, Latinis duo sunt.

Decimus est *Liber Esdræ*, ab Authore suo nomen sortitus, 10. Capitibus historiam 82. annorum comprehendit. Liber

E e e

Nebe-



*Nebemia* ab Hebræis à libro *Esdra* non proponitur tanquam distinctus, quia historiam ab *Esdra* cœptam continuat 30. circiter annorum lapsu.

Undecimus est *Liber Esber*, cui nomen dedit cœli favore, & Providentia Dei electa Regina *Esber*.

Duodecimus est *Liber Job*, qui vel ab Actore Tragoediæ, vel Scriptore Historiæ sic dictus est.

Decimus tertius est *Liber Psalmorum*, qui ab Hebræis *Sepher-Tebillim*, seu liber *Hymnorum*, ac laudis Divinæ compellatur.

Decimus quartus est *Liber Proverbiorum*, quia continet sententias graves, sublimes, atque Divinas, quas Græci *Proverbia*, Hebræi *Misle*, *Parabolas* & *similitudines* appellant.

Decimus quintus est *Liber Ecclesiastæ*, seu *Prædicatoris*, quem Hebræi *Cokeleth* vocant, titulum hunc præsefert, quod munus hic subeat Salomon pœnitens Salutaris adhortatoris: toti enim orbi vanitatem mundi à se ad satietatem, vel potius ad nauseam cognitam deprædicat.

Decimus sextus est *Canticum Canticorum* ab Hebræis *Sir-haserim* quasi nobilissimum Carmen & excellentissimum Canticum dictus ob eminentiam, qua reliquis canticis præcellit.

Decimus septimus est *Liber Danielis*: Decimus octavus *Isaias*: Decimus nonus *Jeremias* & *Tbreni*: Vigessimus est *Ezechiel*: Vigessimus primus sunt Prophetæ minores. Notandum quod liber octavus, nempe *Libri Regum*: duos libros sub se contineant: quia dictum, quod primi duo libri Regum sint *Prophetia Samuelis*. & reliqui duo sint *libri Regum*: ergo duos libros faciunt: consequenter sunt 22. libri in *Canone Hebræorum*.

§. III.

Dico 2. Canon hodiernus librorum Veteris Testamenti apud Catholicos constat 5. libris legalibus, nempe *Genesi, Exodo, Levitico, Numerorum, & Deuteronomio.* 17. libris Historialibus, nempe *Josue, Judicum, Ruth, 4. Regum, 2. Paralipomenon, 2. Esdræ, Tobia, Judith, Esther, Job, 2. Machabæorum.* 5. libris Sapientialibus, nempe *Proverbiis, Ecclesiaste, Canticis, Sapientia, & Ecclesiastico.* 18. Prophetalibus, nempe *Psalterio, Isaia, Jeremia cum Threnis, Baruch, Ezechiel, Daniel, Osee, Joel, Amos, Abdia, Jona, Michæa, Nahum, Habacuc, Sophonia, Aggæo, Zacharia, Malachia.*

Univerſim ergo in Canone Catholicorum S. Scripturæ Veteris Testamenti ſunt libri 45.

Proto Canonici ſunt omnes exceptis *Tobia, Judith, Sapientia, Ecclesiastico, Baruch, & 2. Machabæorum,* qui ſeptem libri ſunt Deutero-Canonici.

Dico 3. Canon hodiernus librorum Novi Testamenti apud Catholicos conſtat ex 27. libris. Ex quibus 4. ſunt *legales*, in quibus lex nova à Chriſto tradita continetur: nempe quatuor *Evangelia, Matthæi, Marci, Lucæ, Joannis.* Unus eſt *Historialis,* qui res per Chriſti Apoſtolos bene geſtas commemorat, & vocatur *Actus Apoſtolorum.* Sapientiales ſunt 21. In quibus Sapientia novæ legis per exempla & præcepta beate juxta Chriſtum vivendi pleniffime traditur: nempe I. *Epiftola Pauli ad Romanos.* II. duæ *Epiftolæ ejusdem ad Corinthios.* 3. *Epiftola ad Galatas.* 4. *Ad Epheſios.* 5. *Ad Philippenſes.* 6. *Ad Coloſſenſes.* 7. II. *ad Theſſalonicenſes.* 8. II. *ad Timotheum.* 9. *Ad Titum.* 10.

E e e 2

Ad

*Ad Philemonem.* 11. *Ad Hebræos.* 12. Epistola S. *Jacobi.* 13. II. S. *Petri.* 14. III. S. *Joannis* : & hæ, videlicet S. *Jacobi*, S. *Petri*, & *Joannis* Epistolæ sex vocantur Epistolæ Catholicæ; uti & 15. Epistola S. *Judæ.* Unus est *Prophetalis*, in quo status Ecclesiæ Christi futurus prædicatur, nempe *Apocalypsis Joannis.*

Libri ex Novo Testamento in Canone Catholicorum *Proto-Canonici* sunt sequentes: videlicet *Evangelia* Matthæi, Marci, Lucæ, Joannis. *Acta Apostolorum.* Omnes Pauli Epistolæ excepta illa ad Hebræos. Item duæ Epistolæ Catholicæ nempe una *Petri*, & altera *Joannis.*

*Deutero-Canonici* sunt sequentes: *Marci* caput ultimum. *Lucæ* historia de Sudore Christi sanguineo cap. 22. *Joannis* historia de muliere adultera, c. 8. Epistola Pauli ad Hebræos. Epistola *Jacobi*, *Judæ.* *Petri* Epistola secunda. *Joannis* Epistola secunda & tertia. Denique *Apocalypsis.*

*Jam hæ duæ in hoc Paragrapho positæ Conclusiones  
Catholicæ.*

**P**RObantur argumento hoc Theologico: non possumus Certius, infallibiliusque cognoscere, quinam libri sint certo Divini, aut quis sit legitimus SS. librorum canon, quam ex judicio & sententia universalis Ecclesiæ: huic enim dictum fuit, quod sit columna & firmamentum veritatis, adversus quod firmamentum portæ inferi nunquam sunt prævalituræ, eo quod Christus omnibus diebus usque ad consummationem sæculi cum hac sua Ecclesia sit, illique post gloriosam suam in cœlos ascensionem miserit Spiritum veritatis, qui eam omnem veritatem doceat. Hæc propositio tam firma est, tamque inconcussa, ut jam suo tempore S. P. Augustinus, cujus auctoritatem ipsi refractarij revereri debent, intrepide asseruerit lib. Cont. Epist. fun-

fundament. c. 5. *Evangelio non crederem, nisi me Ecclesiæ commoveret auctoritas.* Atqui universalis Ecclesia in Concilio Tridentino sancte congregata judicavit, omnes eos libros, quos in prima & secunda conclusione præsentī enumeravimus, esse vere Divinos, adeo ut etiam anathematis fulmine percutiat, qui eosdem non ita susceperint sess. 4. in Decreto de can. scripturis. Ergo certo & infallibiliter scimus, omnes eos libros esse vere & certo Divinos, proin Canonem SS. librorum esse eum ipsum, quem S. Tridentina Synodus statuit, & determinavit, præcipue quia in eo statuendo non processit temere, sed orthodoxorum Patrum exempla secutam se disertis verbis asseverat.

Confirmatur. Quodcunque S. Synodus hac in re statuit, determinavit, & decedit, hoc decedit, determinavit, statuit, prouti in Spiritu S. legitime erat congregata, & per orthodoxorum Patrum doctrinam ita instructa & edocta. Ergo quidquid S. Synodus in præsentiarum statuit, hoc statuit assistente Spiritu S. & perpetua traditione veritatis facem præferente. Cui autem major fides adhibenda? num Spiritui S. & perpetuæ traditioni? num Spiritui privato, & doctrinæ Lutheri, Calvini, aliorumque modernorum Sectariorum?

Si vero requiratur, quinam illi orthodoxi Patres? quorum doctrinam S. Synodus est secuta? quænam ea traditio? En! illos antiquissimos, & hanc perpetuam. Ut de versione antiqua Itala, & nova Hieronymiana Ecclesiæ usitata nil comemorem, Concilium Carthaginense III. cui 44. Episcopi interfuere, Anno 397. celebratum, c. 47 SS. Scripturarum pene eundem catalogum tenuit protestando, eum à Patribus in Ecclesia legendum accepisse, utique à Romanis Pontificibus, quibus Ecclesia Africana in acceptis referat oportet prædicationis suæ initia. S. P. Augustinus hunc ipsum SS. librorum canonem veluti legitimum agnovit, & veneratus est: lib. 2. de Doct. Christ. c. 8. Innocentius I. in epist. ad S. Exuperium Episcopum Tolosanum Ka-

lendas Martij anno 405. data cap. ult. Eosdem libros omnes ut Divinos secundum traditionem ab Apostolicis temporibus in Ecclesia Romana conservatam suscipiendos esse gravibus asserit verbis. Gelasius hos libros in Synodo Romana I. de anno 496. eodem modo recensuit. Hos omnes secutum est Concilium Florentinum de anno 1441. sub Eugenio IV. in instructione Armenorum, ubi Jacobitis idem cum suis partibus Canon consignatus fuerat. Divinitatem huius nostri Canonis agnovere plurimi ex aliis Patribus, ut Melito apud Euseb. l. 4. c. 28. Orig. in Ps. 1. Concilium Laodicense can. ult. Athanasius in Synopsi. Cyrillus Hieros. Catech. 4. Hilarius præfat. in Psal. Nazianz. Carm. 3. Damasc. l. 4. de fide c. 18. Hæc ergo sunt exempla Patrum, quæ S. Tridentina Synodus jure est secuta. Hæc est traditio, quæ ipsi faciem prætulit in condendo vel potius declarando Canone SS. Librorum. Inexcusabiles sunt idcirco hæretici, qui tantam jam à tot sæculis habentes impositam nubem testium, post Ecclesiæ universalis judicium aliquos ex his libris è Canone expungunt.

*Canon hodiernorum Heterodoxorum veteris Testamenti cum sua divisione est sequens*

Legales sunt 5. nempe *Genesis, Exodus, Leviticus, Numeri, Deuteronomium*. Historici sunt 12. nempe *Josue, Judicum, Ruth, Samuelis duo, Regum duo, Chronicorum duo, Esdras, Nehemias, Esther*. Doctrinales sive Poetici sunt 5. nempe *Job, Psalmi, Proverbia, Ecclesiastes, Canticum Canticorum*. Prophetici sunt 6. nempe *Isaias, Jeremias, Iheremi, Ezechiel, Daniel, duodecim Prophetæ minores*.

Ergo Heterodoxi expungunt ex Canone veteris Testamenti libros *Tobiæ, Judith, Sapientiæ, Ecclesiastici, duos Machabæorum, & Baruch*. Imo & Lutherus librum *Job*.

*Canon*



*Canon bodiernorum Heterodoxorum novi testamenti cum sua divisione est sequens.*

CANON CALVINI.

*Historia* 4. Evangelia, Acta Apostolorum. *Doctrina* & *Dogmata*, *Pauli* & cæterorum *Epistolæ* 21. *Prophetia* *Apocalypsis*. Ergo Calvinus ex novo testamento nullum librum expungit.

CANON LUTHERI.

*Historia* 4. Evangelia, Acta Apostolorum. *Doctrina*, *Pauli* *Epistolæ* 13. Excepta ad *Hebræos*. *Prima Petri*, & *Prima Joannis*.

Ergo Lutherus ex novi Testamenti Canone expungit *Epistolam Pauli* ad *Hebræos*. *Epistolam* 2. *Petri*. *Epistolam* 2. & 3. *Joannis*. *Epistolam Jacobi*. *Epistolam Judæ*. *Apocalypsim*.

O B J E C T I O N E S.

Contra Canonem à Tridentino determinatum in Comuni V. T.

I. **S**I libri Deutero-Canonici essent vere Divini, & ut tales ex Apostolica traditione descenderent, tunc illos Christus aut Apostoli quandoque allegassent: atqui nunquam allegarunt; ergo.

II. Patres, qui floruerunt ante IV. sæculum non texuerunt Catalogum librorum: ergo hic Canon non descendit ex traditione Apostolica.

III. Liber *Baruch* nec in Canone Esdrino, nec à Conciliis Laodicensi, Carthaginensi, nec à Gelasio in synodo Romana, nec ab Origine, S. P. Augustino &c. refertur; ergo.

IV. S. Hieronymus ejusmodi libros, quos Tridentinum Canoni inseruit, veluti apocryphos rejecit: ergo non sunt Canonici.

V.

V. Libri *Tobiæ*, *Juditb*, *Sapientiae*, *Ecclesiastici*, & *Machabæorum* nunquam fuerunt libri Divini: ergo à Concilio Tridentino pessime declarantur ut Divini, eo quod ipsi neutiquam competat potestas faciendi libros Divinos. Ant. prob. Isti libri non tantum non fuerunt in Canone Judæorum, sed neque primis Ecclesiæ sæculis unquam fuerunt ut Divini à Patribus recepti. Unicus præ cæteris sufficiat S. Hieronymus in Epist. ad Chromaticum & Heliodorum Episcopos ait: *Sicut ergo Juditb & Tobia & Machabæorum libros legit quidem Ecclesia, sed eos inter Canonicas scripturas non recipit, sic & hæc duo volumina ( Sapientiam & Ecclesiasticum ) legit ad ædificationem plebis, non ad auctoritatem Ecclesiasticorum Dogmatum confirmandam. Ergo.*

VI. In tantum illi libri forent, aut essent certo Divini, in quantum Concilium Tridentinum eos ut Divinos determinavit: atqui Concilium Tridentinum non potuit eos ut Divinos determinare, quia liber Divinus suam Divinitatem debet habere à Deo, quem auctorem agnoscit: ergo.

VII. Ex veteris testamenti libris illi tantum sunt Canonici, qui fuerunt in Canone Judæorum: atqui prædicti libri non erant in Canone Judæorum: ergo. maj. prob. Concilium Tridentinum non potuit libros, qui non erant in Canone Judæorum, declarare canonicos, nisi eos cognosceret esse Divinos ex traditione: atqui per traditionem non potuit hoc cognoscere nisi ex Canone Judæorum: ergo.

VIII. Canonem illum Ecclesia debuit habuisse à Judæis: ergo. ant. prob. Apost. ad Rom. c. 3. v. 2. dicit: *credita sunt illis*, scilicet Judæis, *eloquia Dei*: ergo.

IX. SS. Patres præsertim Hilarius præfat. in Ps. Hieron. in prol. gal. Nazianz. imo & Synodus Leodicena omnem veteris testamenti librorum certitudinem repetunt ex Synagogæ judicio: non enim alium sacrorum veteris testamenti librorum canonem, quam ex Synagogæ judicio ratum habuerunt: ergo censent non  
ex

ex sola Ecclesiæ sententia dignosci, quinam libri ut Canonici admittendi sint, & quinam ut spurii rejiciendi.

X. S. P. Augustinus non alia ratione Judæos appellat Christianorum *Librarios* in Pl. 89. *Capsarios* in Psal. 40. & *Scrinarios* lib. 12. Contra Faustum c. 23. quam quia ex eorum judicio Christiani genuinos veteris testamenti libros spuris relictis habuerunt; ergo.

XI. S. P. Augustinus concedit, ea, quæ in canone Judæorum sunt, magis firma esse quam cætera: ergo omnem certitudinem librorum veteris testamenti repetit à canone Judæorum.

XII. Canon 85. Apostolorum recensens libros Divinos omittit *Tobiam*, *Judith*, *Ecclesiasticum*, & *Apocalypsim*, imo *Sapientiæ* librum positive excludit: ergo nec temporibus Apostolorum fuerunt isti libri habiti pro Divinis. Neque potest dici, quod Canones isti sint spurii, aut fictitii. Nam isti Canones ab orientalibus Ecclesiis recepti, & approbati fuerunt. Ergo.

XIII. Pontifex Gelasius in Conc. Rom. contexens sacrorum librorum Canonem, omittit secundum librum *Esdrae*, dicit enim: *Esdrae liber unus*; ergo.

## SOLUTIONES.

Ad I. neg. maj. Quia Christus & Apostoli non ideo hos libros non allegarunt, quod Divini non essent, sed quia ad expugnandos Judæos minus idonei ab illis visi sunt, cum in Canone Judæorum non extiterint.

Ad II. Licet Patres ante IV. sæculum canonem non condiderint, laudaverunt tamen libros Deutero-Canonicos tanquam Divinos, ut S. Clemens Romanus, S. Ignatius, S. Justinus, S. Clemens Alexandrinus, S. Irenæus, Tertullianus, S. Cyprianus, quin & Origenes contra Julium Africanum vindicavit historiam *Susannæ*.

Fff

Ad

Ad III. Licet Veteres Prophetiam *Baruch* non reduxerint in Canonem sub ejus nomine, sed tanquam appendicem Jeremiæ spectaverint, eo quod Baruch suæ Prophetiæ multa inseruerit, quæ ex Jeremia audierat, & tanquam scriba ejus ex scriptis ab eo dictatis collegerat, nihilominus inter libros Canonicos recensetur à S. Athanasio in epist. Festali, & ex eo ut libro Canonico nedum ad ædificationem plebis, sed ad confirmanda Dogmata proferuntur testimonia à S. Basilio l. 4. contra Eunomium, à S. Joanne Chrysost. orat. quod Christus sit Deus. & aliis pluribus.

Ad IV. Quod S. Doctor locutus fuerit, non ut ipse, sed sicut sentiunt Hebræi, qui illos libros non recipiunt, ita enim S. Doctor in Apologia sua contra Ruffinum sese explicat.

Ad V. neg. ant. ad prob. dist. ant. Non fuerant in Canone Judæorum Esdrino, conc. ant. in Canone Judæorum ab Eleazaro & 70. interpretibus facto, neg. ant. & conseq. Libri *Tobiæ* & *Judith* cum primitus in lingua Chaldaica exarati fuerint, ab Esdra & Synagoga SS. librorum Canoni non fuerunt inserti, quia Hebræi alias eos tantum libros divinos agnoverunt, qui Hebraice scripti sunt. Libri *Ecclesiastici*, *Sapientiæ*, & *ambo Macchabæorum* tempore Esdræ nondum prodierunt. R. 2. Et melius juxta dicta, quod unicus tantum fuerit Canon Hebræorum Esdrinus: nos semper magis revereri debere judicium infallibile Ecclesiæ, cui adpromissa est assistentia Spiritus S. de cujus veritate prudenter dubitare non possumus: unde dicit Osius Cardinalis: *Non Canon Hebræorum, sed Ecclesia canonicas facit Scripturas.* Ad D. Hieron. dico: S. Doctorem hoc scribendo respexisse ad Canonem Judæorum Esdrinum, in quo cum illi libri non extarent, eo ipso à quibusdam dubitatum fuit, an sint libri vere Divini? & hoc quidem impune, quia nulla adhuc Ecclesiæ definitio aderat, utpote quæ primo postea accessit Spiritu S. Ecclesiam suam ita dirigente. Et dum traditionem  
alle-

allegamus, non est necesse, ut ea sit mathematice uniformis, sed sufficit, quod potior & nobilior pars Ecclesiæ (quæ est latina) eos libros ut Divinos semper custodierit.

Ad VI. dist. maj. In tantum forent Divini divinitate extrinseca & relativa, conc. maj. divinitate intrinseca & absoluta, neg. maj. & sic dist. min. neg. conseq. Quantumvis libri Divini, eo ipso quia inspirati sunt, habeant suam Divinitatem intrinsecam & absolutam, nondum tamen habent divinitatem extrinsecam & relativam ad nos, saltem omnes, & quoad singulas suas partes, nisi per judicium Ecclesiæ nobis innotescat, eos esse libros vere Divinos juxta illud S. P. August. *Ego vero Evangelio non crederem, nisi me Ecclesiæ Catholicæ commoveret auctoritas.*

Ad VII. transmis. maj. dist. min. atqui per traditionem &c. nisi ex canone Judæorum solo, neg. min. nisi ex canone Judæorum, vel peculiari Spiritus S. revelatione, vel traditione habita ab Apostolis, conc. min. S. P. August. lib. 18. de Civit. Dei c. 36. ait: *Libros Machabæorum non Judæi, sed Ecclesia pro Canonicis habet.*

Ad VIII. Verum quidem esse, quod eloquia Dei, sive libri sacri crediti fuerint Judæis, non quidem ut Ecclesia Christi à Synagoga instrueretur, quinam libri sint sacri, & quinam non sint sacri & divini, sed ut illos hæc conservaret.

Ad IX. neg. assumptum: quinimo nullus eorum cum canone Hebræo consentit: nam S. Hilarius loc. cit. dicit: quosdam admittere libros *Tobiæ & Judith*, nec ipse contradicit: & tamen hi duo libri in Hebræo canone ab Esdra confecto (quem solum genuinum agnoscunt Hebræi hodierni & Heterodoxi) non continentur. Item Greg. Nazianz. & Athan. non habent in suo indice librum *Esther*, qui tamen à Judæis ut genuinus habitus fuit in ipsorum Canone. S. Hieron. etiam, qui in Prol. Gal. dicit librum *Judith* à Judæis reputari inter Apocryphos, nihilominus diserte affirmat illum librum à Synodo Nicæna in-



ter Canonicos computatum esse. Unde patet, quod Patres illi adferentes canonem Judæorum, illum non allegent, ut sit unica regula ad dignoscendos libros sacros.

Ad X. S. P. August. eis in locis nihil aliud significare, quam quod ex peculiari Dei Providentia factum sit, ut Judæi tametsi Christianis infensi, nihilominus cum per totum pene terrarum orbem dispersi fuere, ubique sacra etiam deportarunt Biblia, quibus Christianæ Religionis Dogmata & mysteria à Prophetis pridem vaticinata facilius persuaderentur Ethnicis & Paganis, atque Judæorum error & obfirmata cœcitas efficacius convinceretur: ut explicat S. Pater in Psal. 40. circa finem.

Ad XI. dist. ant. S. P. August. concedit, ea, quæ in canone Hebræorum sunt, esse magis firma in ordine ad convincendos Paganos & Judæos, conc. ant. concedit absolute esse firmiora, neg. ant. S. Pater enim ibidem agit de disputatione contra Judæos, & ad hoc dicit firmiorem hos libros habere auctoritatem, quos ipsi recipiunt, quam quos non recipiunt: item contra Paganos, ne putent nos confinxisse Prophetias, quas in Ecclesia Christi completas cernimus.

Ad XII. Certum esse, Canonem 85. qui hic objicitur, esse subreptitium, eo quod Scripturarum canoni adjiciat libros (puta duas *Clementis* Epistolas & ordinationes, ac tertium librum *Machabæorum*) communi conciliorum ac SS. PP. sententia rejectos.

Ad XIII. Gelasium non esse contra nos, quando dicit: *Esdræ liber unus*: in sua enim enumeratione Græcos & Hebræos secutus est, apud quos teste S. Isidoro & S. Hieron. liber 1. & 2. in unum librum coarctantur, & *Esdræ* 2. apud eos est, qui jam est 3. Apocryphus.

Obje-

*Objectiones contra Canonem V. T. à Tridentino determinatum in particulari contra Librum Tobiae.*

**L**ibrum Tobiae esse Divinum, negant Recentiores Hæretici Lutherus, Zwinglius, & Calvinistæ non alio ex fine, quam ut ulcus tegant, & sua prava dogmata tenacius tueri possint: liber enim Tobiae continet eximiae pietatis, & singularis patientiae non tantum præclara documenta, sed & ipforum bonorum operum laudandum meritum, quod Hæretici repudiant, & explodunt.

Verum quidem est, quosdam Catholicos etiam olim de libri hujus Divinitate dubitasse, sed jam amplius de eo, præsertim post Concil. Florent. & Trident. à Catholicis dubitari nequit, siquidem inter Scripturas canonicas ab illis Conciliis sit relatus, imo Gelasius Papa, Innocentius I. & Concil. Carthag. hunc librum ut Divinum agnoverunt.

Inter Latinos Patres S. Cyprianus de orat. Domin. eum *Scripturam Divinam* vocat: & Serm. de operibus & Eleem. *Scripturam*, in qua loquitur Spiritus S. S. Ambrosius eum vocat *Scripturam & librum Propheticum*. Item S. Isidorus lib. 6. Ethimolog. c. 1. dicit librum Tobiae *Ecclesia Christi inter divinos libros & honorat, & prædicat*. S. Basilus, item Alexander I. ex libro Tobiae probantem Trinitatem. Item Calixtus I. in epist. 2. allegans Tobiam ait: *Bene ait S. Scriptura*, Item Anacletus &c. Contra hunc ergo librum objiciunt Hæretici.

I. Pontifex non est infallibilis in declarando, quod *Jansenius* sit Author famosi voluminis, quia est quæstio meri facti: ergo Pontifex etiam non est infallibilis in definiendo, quod liber Tobiae sit scriptus ab Agiographo, id est, Scriptore sacro, quia est etiam quæstio facti.

II. Potest Ecclesia falli in eo, an Author damnati libri sit *Jansenius*? ergo etiam potest falli in eo, an libri Sacri Author sit Tobias.

III. Ecclesia tantum illos libros admittit ut Canonicos, quos admisit S. Hieron. eosque reprobat, quos ille à Canone rejicit, ut patet can. S. Romana Ecclesia. Dist. 15. atqui S. Hieron. dicit, librum *Tobiæ* non esse canonicum in Prologo Galeato his verbis: *Hic prologus Scripturarum quasi Galeatum principium, omnibus libris, quos de Hebræo vertimus in latinum, convenire potest; ut scire valeamus, quidquid extra hos est, inter Apocrypha esse ponendum - - Tobias & Pastor non sunt in Canone. Ergo. Ne quis vero existimaret ipsum de solo Judæorum Canone fuisse locutum, præf. in Prov. ait: Sicut ergo Judith & Tobia, & Machabæorum libros legit quidem Ecclesia, sed eas inter Canonicas Scripturas non recipit: sic & hæc duo volumina, scilicet Ecclesiastici & Sapientiæ legit in ædificationem plebis, non ad auctoritatem Ecclesiasticorum dogmatum consi mandam. Ergo.*

IV. Liber *Tobiæ* non est Scriptus Hebraice, sed Chaldaice teste S. Hieron. præf. in hunc librum: ergo hic liber non est Canonicus.

V. Hic liber continet varias Antilogias, & contradictiones: nam c. 3. v. 7. *Sara Raguelis filia*, quam *Tobias* junior ducturus erat in uxorem, dicitur habitasse in *Rages* civitate *Medorum*: ubi etiam dicitur habitasse *Gabelus* cap. 4. v. 21. atqui peractis *Tobiæ* nuptiis dicitur Angelus *Raphael* missus à *Tobia* in *Rages* civitatem *Medorum* ad *Gabelum* pecuniæ debitorem, sic enim dicitur c. 9. v. 3. *Vadas ad Gabelum in Rages civitatem Medorum.* Ex quibus omnibus hoc fit argumentum: non in eam urbem Missus est *Raphael* à *Tobia* juniore, in qua hic *Saram Raguelis* filiam matrimonio sibi junxit: atqui eam matrimonio sibi junxerat in *Rages* civitate *Medorum*: ergo non in *Rages* ad *Gabelum* mitti potuit Angelus, ut ab eo pecuniam creditam reciperet: vel *Sara* & *Gabelus* non erant in *Rages*, uti c. 3. v. 7. & c. 5. v. 8, refertur.

VI. Non est censendus Liber Canonicus, qui Angelum mendacii artificem exhibet: atqui hoc fecit hic liber *Tobiae*: ergo. min. prob. c. 5. v. 7. interrogatus Raphael à Tobia juniore, unde esset? respondit: *ex filiis Israel*. Et v. 8. interrogatus an noscat viam, quæ ducit in regionem *Medorum*? ait, novi: & omnia itinera ejus frequenter ambulavi, & mansi apud *Gabelum fratrem nostrum*. Deinde rogatus, de qua domo, aut de qua tribu es tu? v. 18. ait: Ego sum *Azarias, magni Ananiæ filius*. Et c. 7. v. 3. rogatus à Raguele: unde estis juvenes? dicit: *Ex tribu Neptbali sumus, ex captivitate Ninive*; atqui ista omnia sunt mendacia, ab Angelo prorsus aliena: ergo.

VII. Cap. 6. v. 8. dixit Angelus de corde piscis, quem Tobias jubente Angelo apprehendit branchia ejus: *Cordis ejus particulam, si super carbones ponas, fumus ejus extricat omne genus dæmoniorum, sive à viro, sive à muliere, ita ut ultra non accedat ad eos*. atqui hoc fabulosum, superstitiosum, & sanæ Theologiæ dissonum est: quippe quæ in rebus corporeis efficaciam in spiritus non agnoscit: ergo.

VIII. S. Th. 1. p. q. 115. a 5. ait: *Dicendum, Dæmones esse substantias intellectuales, corporibus non unitas. Unde patet, non subdi actioni cælestium corporum, nec per se, nec per accidens, nec directe nec indirecte*: ergo.

IX. In textu 70. c. 6. v. 15. dicitur: *Septem viros Saræ à dæmone occisos fuisse: quoniam dæmon eam diligebat*: atqui falsum est spiritum carnaliter dilexisse *Saram*, & ex zelotypia viros illius septem occidisse; ergo.

X. Cap. 13. v. 11. Supponitur devastatio *Jerusalem*: atqui hoc repugnat tempori: captus enim est Tobias in diebus *Salmanazar*, ut dicitur c. 1. v. 9. ac proinde ante captivitatem *Babylonicam*, in qua templum, & *Jerusalem* tantum devastata sunt; quomodo ergo potuit Tobias, qui tantum vixit centum & duobus annis, ut habetur *Tobiae* c. 14. v. 2. supponere de-

vastationem Jerusalem, quæ contigit circiter centum & triginta quatuor annis post, ut constat ex libris Regum. Deinde c. 14. v. 7. Tobias moriens filio suo dicit: *Domus Dei, quæ in ea incensa est, iterum reedificabitur*: ubi loquitur de incendio templi tanquam præterito, quod tamen diu post contigisse certum est. Ergo.

XI. Historia Tobiae repugnat aliis libris Canonicis: maxime 4. Reg. c. 15. v. 29. ubi legimus: *In diebus Phacee Regis Israel venit Tbeglatphalasar Rex Assur, & cepit Ajon, & Abel domum, Maacha & Janue, & Cedus, & Asor, & Galaad, & Galilaam, & universam terram Neptbali, & transtulit eos in Assyrios*. Et c. 1. lib. Tobiae, ipse dicitur esse ex Tribu & civitate Neptbali in captivitatem abductus à Salmanasar Assyriorum Rege, qui diu post Tbeglatphalasar regnavit: ex quibus tale fit argumentum: Tbeglatphalasar expugnavit, & abduxit universam Tribum Nephthali: ergo Tobias non potuit se dicere de Tribu Nephthali, & captum in diebus Salmanasar Regis Assyriorum.

XII. Falsitas hujus libri patet ex c. 14. ubi dicitur. Tobias completis 102. annis sepultus; atqui si hoc sit verum, falsificatur hic liber v. 3. ubi dicitur: quod lumen receperit anno vitæ suæ 116. si enim lumen amiserit, dum erat 56. annorum, & sexagenarius receperit, jam simul facient annos 116. ergo.

## S O L U T I O N E S.

**A**D I. Conc. ant. neg. conseq. disp. est: quod Pontifex possit definire doctrinam aliquam esse damnatam, absque eo, quod definiat v.g. doctrinam illam esse *Jansenij*: definire autem non potest librum aliquem esse Scripturam S. absque eo, quod definiat esse à Deo, five ab Agiographo, id est, Scriptore sacro Spiritu S. inspirante conscriptum.

Ad



Ad II. Conc. totum: de fide enim non est, Tobiam esse hujus libri Authorem secundarium, nec hoc definit Ecclesia, sed tantum quod sit liber Canonicus, ad quod plane indifferens est, an ab hoc vel ab illo sit conscriptus? sed sufficit, quod Deus illius sit Author primarius.

Ad III. Verba S. Hieron. esse cum distinctione accipienda: ut quando dicit libros aliquos non esse Canonicos, de priori canonicorum ordine voluminum, non vero de posteriori eum esse intelligendum; duo enim sunt voluminum Canonicorum ordines, quorum prior continet libros, de quorum fide & authoritate nulla fuit unquam inter Ecclesiæ Patres controversia: & vocantur libri Proto-Canonici; posterior vero complectitur libros, qui non statim ab exordio nascentis Ecclesiæ fuerunt recepti, sed sequentibus tantum sæculis, cum de illis dubia prius & diversa fuissent judicia, & hi vocantur Deutero-Canonici. Liber Tobiae, Judith &c. non sunt de ordine priorum, sed posteriorum. Præterea, etsi hi libri in canone Synagogæ non sint recepti, satis est ad eis fidem & venerationem conciliandam, quod in canone Ecclesiæ à Tridentino fuerint positi: majoris siquidem authoritatis est Ecclesia quam Synagoga, utpote plenior & uberior habens Dei assistentiam.

Petes: quomodo fieri potnerit, ut Tobiae liber ante Esdram editus, non fuerit ab eo cum aliis libris sacris in cano- nem Hebræorum relatus? R. Id forte factum ex eo, quod, cum illo tempore populus Israeliticus maximis difficultatibus in captivitate Babylonica fuerit jactatus, libris conscribendis vacare non potuerit. Unde eo tempore rarissima erant sacrorum librorum exemplaria, maxime eorum quæ erant recenter edita, nec adhuc publica Synagogæ authoritate probata, qualis erat liber Tobiae. Hinc Esdras quantumvis studiosus ac diligens omnes gentis suæ historias, & veteris memoriæ monumenta à suis conscripta, colligere non potuit.

Ad IV. Neg. conseq. Nec enim sequitur inde hunc librum non esse Canonicum: certe Spiritus S. æque potuit dictare Chaldaice quam Hebraice. Etiam Daniel & Esdras teste S. Hieron. in Daniele. Chaldaice sunt scripti, & tamen in Canone Hebræorum ponuntur. Nec mirum hunc librum Chaldaice vel Syriace fuisse conscriptum, cum historia hæc contigerit in Chaldæa, vel Assyria, vel Media.

Notandum: ante versionem Hieronymi extitisse interpretationem Græcam libri *Tobiæ*, & latinam: illa enim usos fuisse legimus Polycarpum epist. ad Philipp. & Clementem Alexand. lib. 1. Stromatum.

Ad V. Nullam in his locis esse antilogiam: nam in *Media* duæ fuerunt civitates eodem nomine *Rages*: sicut in Palæstina duæ urbes dicuntur *Bethleem*. Unde c. 5. v. 8. de Gabelo dicitur: *qui moratur in Rages civitate Medorum, quæ posita est in monte Echatanis*, quod videtur additum ad differentiam alterius *Rages*. Hinc potest hic textus ita explicari: quod Tobias junior cum uxore sua & comite Angelo ac Raguele ejusque conjugē ab inito matrimonio duas egerit hebdomadas, ut adjuraverat Raguel c. 8. in domo rurali: Raguel enim cum esset ditissimus, varias habuit domos, unam in civitate *Rages*, aliam ruri, in qua tunc morabatur; dicitur enim habitare Romæ, qui Tusculi, vel in loco vicino, vel alibi in agro Romano habitat: cum ergo jam tempus urgeret in patriam redeundi, Tobias ad Gabelum in civitate *Rages* commorantem delegavit Azariam, seu Angelum Raphaelē, ut pactam pecuniam ab eo reciperet. Quando ergo Angelus Raphael, ut dicitur c. 9. v. 6. assumptis quatuor servis Raguelis perrexit in civitatem *Rages*, Tobias cum universa conjugis suæ familia remanserat in domo Rague-  
lis, in villa scilicet, quam in agro vicino *Rages* possidebat Raguel, ad quam invitatus à Raphaelē Gabelus, cum cæteris convivium egit.

Ad

Ad VI. Omnia Raphaelis responsa nil nisi veritatem, licet verbis obscuris obvelatam, spirare. Unde ad 1. Raphaellem sine mendacio potuisse dicere, se esse ex filiis Israel, vel quia iustorum gens censetur Israelitica: vel quia Israel idem est, ac videns Deum: Angeli autem semper vident Deum: vel quia ad Israelitarum custodiam tribus Nepthali specialiter erat deputatus. Ad 2. vere dixit: *mansi apud Gabelum fratrem nostrum*: Angeli enim & homines Deum Patrem habent naturæ spiritualis similitudine, gratiæ sanctificantis adoptione, & Divinæ hæreditatis scilicet felicitatis æternæ adeptione: potuit itaque Angelus Raphael Gabelum appellare fratrem suum: & cum ad ejus custodiam specialiter, uti & Israelitarum esset deputatus, vere dixit, se se viam Medorum, & Gabelum nosse, apud eum mansisse, & itinera ambulasse frequenter. Ad 3. Verissime se nominavit *Azariam Ananiæ magni filium*: 1. quia ut ait S. Athan. in Synopsi. Raphael Tobiam comitatus assumpsit effigiem & formam Azariæ, ejusque personam præseferebat. 2. Cum teste D. Greg. hom. 34. in Evang. Angeli in se non habeant nomina, sed ea sortiantur ratione ministerii, quod apud homines agunt: & Raphael idem sit quod curatio Dei, quia ipse cæcitatem Tobiae curavit, ideo recte se vocat Azariam, id est, auxilium vel adjutorium Dei. Ergo tam ratione formæ quam effigiei Azariæ à Raphaele assumptæ, quam ratione significationis nominis Azariæ verum dixit. Ad 4. Vere respondit Ragueli pro se & Tobia: *de Tribu Nephtali sumus*, intellige, ille genere, ego protectione, ille per naturæ generationem, ego per deputationem Divinam.

Ad VII. In hoc facto nihil esse fabulosi, ut perperam volunt Hæretici: nam secundum ipsos non est fabulosum, quod 1. Reg. c. 16. v. 23. narratur de Cythara Davidis. Ipsi enim librum 1. Regum admittunt ut Divinum, consequenter dicere non possunt in eo aliqua fabulosa contineri: si ergo fabula non

fit, Cytharam Davidis à Saule repulſaſſe ſpiritum malum, quare fabuloſum erit; fumum cordis extricare omne genus dæmoniorum. 2. Nihil hic eſſe ſuperſtitioſi, ut enim docet S. Th. 2. 2. q. 96. a. 2. ſuperſtitioſum eſt uti rebus naturalibus ad aliquos effectus, ad quos certo conſtat virtutem naturalem non habere; quod hic factum non fuiſſe mox ex ſubſequenti conſtabit tertia reſponſione. 3. Nihil in hoc facto ſanæ Theologiæ diſſonum eſſe, nam cordi ſive jecori huius piſcis inſuit vis naturalis & phyſica, quæ *directe* agens in corpore Tobiae & Saræ ſedando motus carnis effrænatos & concupiſcentiæ, qui cauſa fuere, quare diabolus ita inſidiatus fuerat viris Saræ, & illos occiderat, ut patet ex verbis Angeli c. 6. v. 16. *indirecte* ad expulſionem dæmonis cooperata fuit ſubtrahendo ei materiam & occaſionem tentandi: quem ſic devictum virtute Dei Angelus ulterius fugavit. Si enim herbis vis ineſt naturalis refræ- nandi libidinem, cur non & jecori piſcis. Piſcem hunc fuiſſe Callyomynum, cujus fel juxta Plinium habet virtutem naturalem ad ſanandum oculos, in quibus eſt albugo, quod etiam hic affirmat Angelus c. 6. v. 9. ſic etiam de corde & jecore huius piſcis dicendum, quod habet virtutem naturalem *directe* ad ſanandos motus concupiſcentiæ, *indirecte* in dæmonem.

Ad VIII. S. Th. tantum velle in dæmones, cum ſint ſubſtantiæ ſpirituales, nihil à rebus corporeis poſſe imprimi; nos vero nullam hic afferimus qualitatem Dæmoni ab illo fumo fuiſſe impreſſam, ſed tantum fumum illum egiſſe in corpora Tobiae & Saræ, tollendo diſpoſitionem libidinoſam, illamque moderando, qua ſicut materia utebatur dæmon ad priores Saræ maritos tentandum.

Ad IX. Textum non dicere absolute dæmonem Saram adamafſe, ſed ſolum Tobiam hoc dixiſſe, qui cum eſſet juvenis, facile vulgi rumoribus potuit credidiſſe, & putafſe, dæmonem priores Saræ maritos ex Zelotypia occidiſſe.

Ad

Ad X. Tobiam c. 13. v. 11. locutum fuisse propheticæ de excidio Jerusalem, & c. 14. v. 7. de incendio templi futuro tanquam præterito: sicut Ifaias c. 53. v. 2. quasi Christi passio jam præterisset, ait: *Vidimus eum*, scilicet Christum, & non erat aspectus - - - *vere lanquæ nos ipsè tulit.* Idque frequentissimum est apud Prophetas. Quod vero illa Tobiae locutio prophetica sit, colligitur ex textu græco, in quo Tobias in futuro dicit: *Jerusalem erit deserta, Domus Dei in ea comburetur.*

Ad XI. Tribum Nepthali non ita universam à Theglathphalasar expugnatam, ut omnes ad unum usque in captivitatem abduxerit, neque senibus, neque infantibus, & plebæis victori inutilibus parcitum fuerit; itaque verosimile est ab hac calamitate ereptum fuisse Tobiam adhuc Juniozem, qui forte divina sic disponente providentia eo tempore, quo facta est à Theglathphalasar in Israelitas irruptio, Jerosolymam Deum adoraturus, ut solebat, abierat.

Ad XII. Nullam in eo reperiri falsitatem, si bene intelligatur: v. enim 3. dicitur: *quingenta & sex annorum lumen oculorum amisit, sexagenarius vero recepit:* quæ sic intelligenda sunt, quod Tobias post 56. annos lumen oculorum amiserit, & deinde post 4. quando jam sexagenarius erat, ipsum receperit; non autem 60. anni separatim numerandi sunt ab illis 56. & sic Tobias non debuit fuisse mortuus anno vitæ suæ 116. sed dum erat 102. annorum, ut dicitur c. 14.

### *Objectiones contra Librum Judith.*

Librum Judith esse Canonicum & antiqui Patres Clement Romanus, Clemens Alexand. Origenes, Tertullianus, Isidorus, Hilarius & S. P. Augustinus testantur: Item in Concilio Carthag. ab Innocentio I. & in Concilio Romano sub Gelasio inter Canonicos recensitus est. Item teste S. Hieron. præf. in



librum Judith. — eum inter Canonicos computat Synodus Nicæna. Item Concil. Trid. Sess. 4.

Soli Hæretici hunc librum Judith esse Canonicum negant. Neque alio ex fine è Canone hunc librum expungunt, nisi quia commendat castitatem.

Libri *Judith* radix Hebraica est *hodà*, confessus est, celebravit, nempe Dominum; non vero *Jadàth*, cum in lingua Hebraica non detur radix *Jadàth*. Contra hunc librum obijciunt Hæretici.

I. Falsum est librum Judith à Nicæna Synodo ut Canonicum receptum: ergo. ant. prob. S. Hieron. præf. in librum Judith dicit: *Hunc librum Nicæna Synodus in numero sanctarum Scripturarum legitur computasse*: atqui inter sanctas Scripturas computare non est definire eum esse Canonicum: nemo enim unquam negavit, librum Judith esse sanctum, sed Adversarii tantum volunt, illum non esse plenæ authoritatis ad fidei Dogmata confirmanda; ergo.

II. Aut damnandi sunt Patres, qui post Nicænam Synodum librum Judith non habuerunt ut Canonicum, aut damnandi non sunt? Si primum: facile patiemur cum his viris damnari. Si secundum: cur ergo nos damnamur? quando agimus, quod tanti Patres egerunt. Ergo.

III. Jure recusant Hæretici librum Judith agnoscere ut Canonicum: ergo. ant. prob. Ille liber est merum figmentum; ergo. ant. prob. Historiæ Judith apud Josephum aut alios, qui res eo tempore gestas scripserunt, non fit mentio: ergo.

IV. Hæc historia à Scriptoribus prætermissa fuit, quia fabulam sapit: ergo. ant. prob. In præfatione hujus libri mentio fit *Bethulæ*: atqui Bethulia nullibi extat, vel nota est, aut assignetur: ergo.

V. Hic liber inter Canonicos numerari non potest: ergo. ant. prob. c. 7. v. 2. dicitur: *Erant autem pedites bellatorum centum viginti*

*viginti millia, & equites viginti duo millia. Et c. 2. v. 7. nonnisi equitum duodecim millia recensentur. ergo. In Græco discrimen etiam occurrit, nam c. 7. v. 2. dicitur: Virorum peditum centum septuaginta millia; & equitum millia duodecim. Et c. 2. v. 7. Myriadas duodecim virorum electorum numerat, & equites sagittarios duodecim millia, id est, centum viginti millia electorum virorum peditum; ergo.*

VI. Cap. 4. v. 3. dicitur: *Et miserunt in omnem Samariam per circuitum usque Jericho, & præoccupaverunt omnes vertices montium.* Atqui hic est error: quia filii Israel non potuerunt mittere in omnem Samariam: ergo. min. prob. verum quidem est, quod Israel discesserit à Juda paulo post mortem Salomonis, & quod tunc temporis Samaria fuerit caput Regni Israel, sed aliquibus annis ante Manassen jam venerat Samaria sub potestate Assyriorum, ut patet ex 4. Reg. c. 17. v. 6. Ergo.

VII. Omnia, quæ habentur in hoc libro, sunt incerta: ergo. ant. prob. Circa tempus, quo hæc historia contigisse dicitur, invicem opponuntur Authores Catholici, nec de Nabuchodonosore quis esset, nec de aliis in hoc libro expressis conveniunt: ergo.

VIII. Falsum est, quod Judith dicit c. 8. v. 18. *Quoniam non sumus secuti peccata patrum nostrorum, qui dereliquerunt Deum suum, & adoraverunt deos alienos, pro quo scelere dati sunt in gladium, & in rapinam, & in confusionem inimicis suis: nos autem alterum Deum nescimus præter ipsum.* ergo. ant. prob. Sive hæc historia dicatur contigisse tempore Manassis, sive postea, hæc falsa sunt: ergo. ant. prob. Tempore Manassis omnia plena erant idololatria, & immunditiis, ut traditur 4. Reg. c. 21. Et postea populus adhuc immolabat in excelsis, ut habetur 2. Paralip. c. 33. Ergo.

IX. c. 8. dicitur Judith de Tribu Ruben, sic enim v. 1. ipsius genealogia refertur: atqui hoc est falsum; quia Judith  
cla-

clare c. 9. asserit se esse de Tribu Simeon dicens: *Deus Patris mei Simeon*; ergo.

X. Judith c. 9. vocat Simeonem Principem familiae Jacob, patrem suum: ergo Judith non erat de Tribu Ruben, sed de Tribu Simeon.

XI. Ab errore excusari non possunt hæc verba Judith c. 9. v. 2. *Domine Deus patris mei Simeon, qui dedisti illi gladium in defensionem alienigenarum*: atqui Simeon alienigenas non defendit, sed oppugnavit, ac perdidit: ergo.

XII. Cit. loc. Judith approbat, & summis laudibus in cælum effert, ipsique Deo attribuit factum Simeonis: atqui illud factum Jacob Gen. 34. & 49. detestatur, & *maledictum furorem* vocat; ergo.

XIII. Judith in sua oratione laudat Simeonem & Levi, eo quod Deus eis dederit prædam, quia zelaverunt zelum legis ejus: atqui juxta datam solutionem nullus zelus Dei fuit in illis: ergo.

## S O L U T I O N E S.

**A**d I. S. Hieronymum per *sanctas Scripturas* intelligere libros Canonicos: nam dicit ibidem: *Apud Hebræos liber Judith inter Agiographa legitur, cujus auctoritas ad roboranda illa, quæ in contentionem veniunt, minus idonea judicatur.* Ubi S. Hieron. de mente Hebræorum dicit librum Judith inter *Agiographa*, id est, *Sancta* computari, sed esse minus idoneum ad confirmandas res fidei: cui Hebræorum opinioni oponens auctoritatem Nicænæ Synodi addit: *sed quia hunc librum Nicæna Synodus in numero Sanctarum Scripturarum legitur computasse*; ergo de mente S. Hieron. Nicæna Synodus eum ita in numero Sacrarum Scripturarum computavit, ut eum idoneum esse censuerit ad fidei dogmata confirmanda. Unde observandum, quod S. Hieron post Ni-

cani

cæni Concilii sententiam tacite retractaverit id, quod de libro Judith in Prologo suo Galeato dixerat.

Ad II. Damnandos non esse Patres, qui post Nicœnam Synodum librum Judith non habuerunt ut canonicum, ex eo, quod certi non essent de hujus libri à Synodo Nicæna facta inter sacros relatione: si enim de ea certi fuissent: absque ullo dubio eum ut sacrum admisissent.

Ad III. neg. ant. ad prob. neg. ant. ad ejus prob. dico: rationem, cur Josephus de Historia Judith fileat, esse hanc, quia nonnisi historias libris Canonicis insertas recitare solet, & in Canone Hebræorum liber Judith non habetur. Imo Serarius observat in Judith proleg. 4. quod Josephus forte in alio libro aliquo de his egerit, cum lib. 10. Antiq. c. 3. promiserit, se de Assyriorum ac Medorum rebus acturum. Præterea dicendum: hoc argumentum nullius esse roboris, quod adversus libri Judith, ac etiam libri Tobie dignitatem & authoritatem ex Josephi silentio ducitur: nam & Jobi historiam, & infantium cœdem, aliaque prætermisit.

Ad IV. neg. ant. ad prob. conc. maj. neg. min. Nam Serarius in c. 6. q. 1. dicit: *Betbuliam esse Galilææ urbem in Tribu Zabulon in monte sitam, non procul ab urbibus, quas antea c. 3. expresserat Scriptura. Brocardus & ex eo Menochius exponit sic: A Nephtalim, de qua in Tobia, tres sunt Leucæ ad Dotbaim castrum sub monte Betbuliæ, ubi Joseph erravit fratres quærens - - - De Abelina est una Leuca ad montem Betbuliæ, ubi Judith occidit Holofernem, qui mons per totam ferme Galilæam cernitur. A Betbulia est una Leuca ad civitatem Tiberiadis: unde inter Orientem & Austrum supra mare Galilææ, quod dictum est mare Tiberiadis.*

Ad V. neg. ant. ad prob. dicit Serarius in c. 7. quod initio non fuerint nili equitum Sagittariorum duodecim millia: expectabantur tamen ex gentibus, quæ regi parebant, aut ei confederatæ erant, plura millia, quibus advenientibus ad viginti

H h h

duo

duo millia crevit exercitus. Ita etiam hunc locum explicat *Tirinus* c. 7. ad illa verba: *equites viginti duo millia*: dicens: *Accesserunt ergo ex Syria decem millia ad illa duodecim millia, quæ Holojernes c. 2. v. 7. ex Syria secum eduxerat.* Quantum vero ad textum Græcum attinet: conjicit *Serarius*, errorem esse in ipsis numeris.

Ad VI. dicendum, quod post reditum à captivitate Babylonica, dum ad sua cuique data est redeundi potestas, sine dubio non solum possessiones & bona eis fuerint reddita, sed & quoddam concessum Regiminis imperium sub Assyriorum tamen, seu Persarum Rege. Itaque tunc Judæi non ita arctarunt fines suos, quin miscerentur tribus: nam & *Judith* ex *Simeonis* Tribu habitasse legitur in *Bethulia*, quæ ad Tribus *Zabulon* sortem pertinebat: adeoque *Samariam* occupabant, ac sub *Elia-cim* Summi Pontificis, dum ista contigerunt, imperio vivebant, nec Assyrii in *Judæa* ac *Samaria* potiores partes obtinebant. Cumque indifferenter passim è captivitate reduces regiones illas inhabitarent, mirum non est, quod ad Summi Pontificis nutum cuncta administrarentur, adeoque ad omnes ob causam communem Pontifex miserit: illo siquidem tempore nec erat distinctio regni *Israelis* & *Judææ*, cum nulla esset regni forma, sed sub Summo Pontifice omnes tunc in his regionibus degerent.

Ad VII. Si hoc argumentum concluderet, deberet, etiam negari liber *Genesis*, quia circa initium mundi centum & decem recensentur opiniones. Etiam *Abrabæ* historia deberet dici conficta, quia de anno ætatis, quo eum à *Tharæo* genitum Scriptura commemorat, in varias abeunt opiniones tam Catholici quam Hetherodoxi Interpretes: incertum proinde hujus historiæ tempus veritati ejus adversari minime potest. Imo quare Heretici recipiunt *Estheris* historiam ut Canonicam? de cujus tempore, ac *Assveri* non minores extant lites.

Ad



Ad VIII. Dist. ant. Falsum est, quod Judith dicit c. 8. v. 18. Si verba illa extendantur ad universam Hebræorum gentem, transf. ant. si intelligantur de sola civitate Bethuliæ, neg. ant. & conseq. Judith ergo solum locuta fuit de sua civitate Bethulia, quæ aliis deficientibus in vera perseveravit Religione: quæ perseverantia illi erat motivum & civibus, quod spem firmam de Divino conceperint auxilio. Quod si tamen quis verba illa Judith extendere velit ad universam Judæorum gentem: tunc dicendum, quod licet populus sacrificaret in excelsis, Judith nihil falsi dixerit, cum sacrificare in excelsis non fuerit peccatum idololatriæ, sed ad summum aliud peccati genus contra determinatum locum sacrificii à Deo præscriptum: Judith autem loquitur præcise de scelere idololatriæ, à quo immunis suos concives Bethulienfes, & communiter Judæos prædicat.

Ad IX. *Simeonem*, de quo Judith c. 8. non esse Principem familiæ *Jacob*, sed alium ex familia *Ruben*, cujus etiam familiæ erat *Judith*, non tamen filium *Ruben*, sed cognatum ejus; ideo dum Gen. c. 46. v. 9. Item 1. Paralip. c. 5. v. 3. referuntur filii *Ruben*, non refertur nomen *Simeonis*, quia ibidem nomen filij sumitur stricte, in genealogia autem *Judith* late, prout etiam nepotes tales dici possunt; sic *Joseph*. Gen. c. 45. v. 8. Patrem se appellat *Pbaronis*, cum tamen Pater non esset. Item Esth. c. 13. v. 6. *Aman* vocabatur pater *Affueri*, & tamen non fuit.

Ad X. Quando *Judith* c. 9. vocat *Simeonem* (qui certe erat Princeps familiæ *Jacob*, & secundus natus post *Ruben*) Patrem: non vocat eum patrem generatione, sed veneratione, aut imitatione: quia veniebat Judith in mentem, quomodo *Simeon* gladio *Sicbimitas* interfecerit ulciscens raptum ac stuprum *Dinæ*, sororis suæ; sic & Ipsa contra *Holofernem* ejus pudicitiam tentaturum fortiter *Simeonis* exemplo insurgeret.

Ad XI. *Ly in defensionem* idem esse ac *in ultionem*: unde juxta *Serarium* in textu Græco habetur, *gladium in ultionem*: nam

vox illa in *defensionem*, qua utitur vulgata, id significat. Sic Paulus ad Rom. c. 12. v. 19. dicit: *Non vosmetipsos defendentes charissimi, id est, non ulciscentes, non vindictam sumentes, quia statim additur, mihi vindicta.*

Ad XII. dist. maj. cit. loc. *Judith* approbat, & summis laudibus effert factum *Simeonis absolute*, neg. maj. laudat factum *Simeonis*, sicut à *Jeremia* laudatur factum *Nabuchodonosoris*, conc. maj. & sic dist. min. neg. conseq. *Judith* ergo absolute non laudat factum *Simeonis*, quod *Jacob* Gen. c. 49. v. 5. *maledictum furorem*, pertinacem & indignationem duram vocat, sed solum *Judith* laudat hoc factum *Simeonis*, uti *Jeremias* laudat factum *Nabuchodonosoris* c. 25. v. 9. ubi dicit: *Ecce ego mittam, & assumam universas cognationes Aquilonis, ait Dominus, & Nabuchodonosor Regem Babylonis servum meum: ubi Nabuchodonosor aliique Gentiles à Deo potestatem, opes, vires, & arma acceperunt ad Judæorum peccata punienda, ut ibidem dicitur: ex eo tamen, quod Deus illis usus sit ad punitionem populi Judaici, & quod illi tanquam instrumenta ad hoc Deo deservierint, non censentur laudari, quamvis Propheta eos vocet servos Dei; sic etiam Judith dum Simeonem & Levi vocat servum Dei, quibus Deus gladium dedit ad ulciscendum, quo sensu ipsa pro defensione gentis suæ fortitudinem à Deo petit ad occidendum Holofernem, non censetur Simeonem & Levi velle laudare, quorum factum in libro Genesis reprobat. Pro hujus majori notitia.*

Observandum: Gen. c. 34. v. 2. historiam totam ita narrari: *Dinam cum vidisset Sichem, filius Hemor Hevæi, Princeps terræ illius, adamavit eam, & rapuit, & dormivit cum illa, opprimens virginem. v. 7. Auditoque quod acciderat, irati sunt valde filii Jacob, eo quod scdam rem operatus esset in Israel, & violata filia Jacob rem illicitam perpetrasset. Fecit ergo pater Sichem, quod potuit apud Jacob, ut filio suo Sichem filiam ejus Dinam daret in uxorem. Responderunt filii Jacob Sichem & patri ejus in dolo, se ei*

ei daturus sororem suam, si ipse & gens sua recipere velint circumcisionem, quod & factum est. Jam v. 25. habetur: *Et ecce die tertio, quando gravissimus vulnerum dolor est: arreptis duo filii Jacob Simeon & Levi fratres Dinæ gladiis ingressi sunt urbem confidenter (nam ratione fœderis ut amici habebantur) interfecitque omnibus masculis, Hemor & Sichem pariter necaverunt, tollentes Dinam de domo Sichem sororem suam: quibus egressis irruerunt super occisos ceteri filii Jacob, & depopulati sunt urbem in ultionem stupri: Quibus perpetratis audacter Jacob dixit ad Simeon & Levi: turbastis me, & odiosum fecistis me &c. Et c. 49. v. 5. dicitur: Simeon & Levi fratres vasa iniquitatis bellantia: in consilium eorum non veniat anima mea -- maledictus furor eorum &c. Hoc autem factum à Jacob maledictum summis laudibus extollit Judith, imo ipsi Deo attribuit c. 9. v. 2. dicens: Domine Deus patris mei Simeon &c.*

Ad XIII. Dist. maj. quia zelaverunt zelum legis ejus zelo proprio neg. maj. zelo improprio, & qualem etiam habent inimici Dei, quibus tamen Deus utitur, conc. maj. & sic dist. min. neg. conseq. Etiam Zachar. c. 1. v. 14. legitur: gentes, quæ Deum adjuverunt in malum, improprie zelasse dicuntur zelum Dei; ita & hic Simeon & Levi improprie Zelaverunt zelum Dei, hoc est, zelum, quem Deus habebat: nec ideo majori laude digni sunt, quam Nabuchodonosor.

Dices: Hæc solutio est contraria textui Græco: nam in hoc c. 9. v. 3. dicitur: quod Simeon & Levi non solum zelaverint zelum Dei, sed etiam nominantur filii à Deo dilecti: nam textus ita habet: *Dedisti uxores eorum in direptionem, & filias in captivitatem, & omnia spolia in distributionem filiorum dilectorum à te, qui etiam zelaverunt zelum tuum &c. Atqui hæc sunt contraria illi, quod de illis dicitur Gen. c. 49. ergo. R. Dist. maj. sed etiam nominantur filii à Deo dilecti, & secundum textum verba illa debent intelligi de Simeone & Levi, neg. maj. de aliis*

fratribus intelligi debent, conic. maj. & sic dist. min. neg. conseq. Judith ergo c. 9. v. 2. nullam facit mentionem de fratribus Simeonis, bene tamen v. 3. ubi de singulari transivit ad plurale, ubi non agit de solo Simeone, sed de aliis filiis Jacob, de quibus hic non est conquestus: ex quo clare sequitur, quod cæteri filii Jacob præter *Simeonem* & Levi fracti fœderis & cædis non fuerint rei: & sic ex zelo Dei, & forte ex mandato Dei potuerunt urbem diripere: ergo hi non illi laudantur à Judith:

### *Objectiones Contra Librum Job.*

**L**ibri hujus Authorem non esse Jobum, sed Moysen, gravissimi propugnant Authores: & merito: nam Moyses, non Job primus fuit scriptor Canonicus ex communi sensu librorum, quos saltem defacto habemus: quod non verificaretur, si Job hujus libri esset Author, cum Job ætate Moysen præcesserit. Præterea liber Job est admissus ab Hebræis in Canonem SS. Scripturarum: atqui si Job illius esset Author non fuisset admissus in Canonem Judæorum, eo quod Job non fuerit ex filiis Israel, sed Idumæus vel Arabs, qui ab Hebræis pro hostibus habebantur, adeoque Hebræi non admisissent in suum Canonem librum ab hoste gentis suæ conscriptum. Accedit, quod juxta S. Hieron. præfat. in hunc librum: liber Job sit Hebraice conscriptus, quamvis aliqua vocabula Arabica in eo legantur, præsertim quando introducuntur amici ad ipsum loquentes: atqui Job debuisset scribere Arabice vel Syriace, hæc enim fuit lingua ipsius.

Librum Job esse proto-Canonicum, apud Catholicos non est dubium: illum enim admisit antiqua Synagoga, & Ecclesia Catholica in multis Conciliis Provincialibus & Generalibus, & novissime in Concil. Trident. Et tam in veteri quam novo testamento commendatur tanquam liber divinitus inspiratus,

ut

ut Ezech. c. 14. v. 14. Item Tob. c. 2. v. 12. Item Jac c. 5. v. 11. Item 1. ad Corinth. c. 3. v. 19. Item 1. ad Timoth. c. 6. v. 7. Item S. Thom. in prologo hujus libri.

Circa hunc librum notandum, quod verba tum Dei, tum ipsius Job, Scripturæ Canonicae auctoritatem habeant, non autem verba ipsius amicorum, qui à Patribus dicuntur gessisse typum hæreticorum. Contra hunc ergo librum Job objicit Lutherus.

I. Josephus, qui historiam à primis initiis texuit, non meminit ipsius Job: ergo hic liber non est Canonicus. prob. conseq. Josephus libros suos composuit ex Scripturis Canonicis: atqui ex concessis nullam hujus libri facit mentionem: ergo.

II. Aliqua impossibilia narrantur in libro Job: ergo non est Canonicus. ant. prob. c. 2. v. 13. dicitur: quod tres amici Job *federunt cum eo in terra septem diebus, & septem noctibus*: atqui hoc est impossibile: ergo.

III. Impossibile est, quod Job c. 19. dicit: *Orabam filios uteri mei*: ergo. ant. prob. c. 1. dicitur: omnes filii Job perierant. ergo.

IV. Historia Job est omnino fictitia: ergo. ant. prob. fictitium est, quod narratur c. 21. v. 33. ergo. ant. prob. loc. cit. dicitur: *dulcis fuit glareis cocyti*: atqui hoc est fictitium: *cocytus* enim fluvius inferorum est, ut fabulatur antiquitas, & admittit S. Th. in hunc locum, ubi dicit: *veritatem de pœnis malorum post mortem proponis sub fabula, quæ vulgariter ferebatur, quia scilicet in inferno inter alios esset quidam fluvius nomine cocytus, qui interpretatur luctus, quo animæ malorum perducuntur*: ergo.

V. C. 42. v. 14. dicitur: *Et vocavit nomen unius diem, & nomen secundæ cassiam, & nomen tertiæ cornustibii*: atqui hæc sunt nomina proprie fictitia, & parabolica: ergo.

VI. Narrandi stylus denotat Librum Job esse parabolam: ergo. ant. prob. Hic liber sic incipit: *Vir erat in terra Hus nomine Job*:



*Job*: atqui hic est stylus parabolarum: nam perfecta historia loquitur in tempore præterito: sic Liber 1. Regum incipit: *Fuit vir unus de Ramathaim Sopbim*: ergo.

VII. Quod c. 1. & 2. narratur de concilio Angelorum præfidente Deo, colloquio Sathanæ, interrogationibus & respon-  
sionibus non potest historice accipi: ergo parabolice: ergo.

VIII. Hic Liber *Job* scriptus est metricè, ut scribi solent comœdiæ, & tragœdiæ, ergo dolorosam quamdam, & ærum-  
nis refertam continet fabulam.

IX. Nomen *Job* significat *dolentem*: terra *Hus*, terram *con-*  
*silii*: *Baldad vetusta secreta*: *Sopbat Speculatorem*: *Eliphaz au-*  
*rum Dei*: sed hæc nomina sunt parabolica: ergo.

## S O L U T I O N E S.

**A**d I. Conc. ant. neg. conseq. ad prob. dist. maj. Josephus libros suos composuit ex aliquibus Scripturis Canonicis, conc. maj. Ex omnibus Scripturis Canonicis, neg. maj. & conc. min. neg. conseq. In Josepho historico non sola historia *Job*, sed etiam aliæ historiæ sacræ desiderantur: multa ex sacris Scripturis prætermisit: multa ex suo addidit: in multis lapsus deprehenditur, ac reprehenditur. Præterea cum Josephus Hebræus de rebus suæ gentis scripserit, mirum non est, quod historiæ *Job* utpote gentilis & alienigenæ non meminerit: *Job* enim ex stripe *Hus* primogeniti *Nachor* fratris *Abraham* descendit.

Ad II. neg. ant. ad prob. conc. maj. dist. min. Atqui hoc est impossibile physice loquendo, conc. min. moraliter loquendo, neg. min. & conseq. Nam illa continuatio septem dierum & noctium physice non est accipienda, sed moraliter: unde plerumque solemus dicere, aliquem in quodam loco continue mansisse, dum majori temporis parte in eo mansit, licet ad alia peragenda breviter alio diverterit: sic *Jacob* Gen. c. 31. dicit:  
Die

*Die nocteque æstu urebar & gelu, fugiebatque somnus ab oculis meis:* quod phyſice intelligi nequit, quaſi Jacob nunquam ſubierit tectum, neque ullam toto illo tempore quietis partem captaverit: ſed intelligi debet de continuatione morali.

Ad III. Loc. cit. Filios uteri ſui, non vocari illos, qui c. r. leguntur periſſe; ſed illos, quos ſuſceperat ex concubinis, ſive ancillis, ut aperte colligitur ex 70. Interpretibus legentibus: *Invocabant in blanditijs filios concubinarum mearum:* qui primariis ſuis filiis nece ſublatis facile ſuperſtites eſſe potuerunt, utpote nec convivia celebrantes, nec cum alijs filiis matrisfamilias communicantes.

Ad IV. Fluvium *cocytum* eſſe quidem fabuloſum, notandum tamen in Hebræo legi Nahhal, quod non ſolum ſignificat torrentem, ſed etiam vallem, per quem torrentes deſluere ſolent: Vulgatus noſter interpres poſuit ſpeciem torrentis pro genere, vertendo ſcilicet *cocytum* pro eo, quod in Hebræo eſt *torrente*, aut *fluvio*, quemadmodum etiam 70. legerunt: unde ut à 70. non recederet, & ut rem, de qua agitur, clarius exprimeret, fabuloſi fluvii *cocyti* nomine uti voluit.

Ad V. Nomina trium filiarum Job non eſſe fabuloſa: D. enim Gregorius docet, illa eſſe deſumpta à virtutibus, ac præſeferre mirabilem pulchritudinem & gratiam tum internam, tum externam illarum virginum. Unde S. Th. in hunc locum oſtendit nomina illa non eſſe fabuloſa, ſed cum eſſent pulcherrimæ, nomina earum pulchritudini convenientia eſſe impolita: hinc dicit: *Vocavit nomen unius diem, ſcilicet propter claritatem ejus: & nomen ſecundæ Caſſiam, quæ eſt ſpecies aromatica, propter ſuavitatem ipſius: & nomen tertiæ cormiſtibii: eſt autem ſtibium, quo mulieres utuntur ad ornatum oculorum ſecundum illud. 4. Reg. c. 9. - - Quod ſi deinde Poetæ gentiles tam iſta, quam alia plurima nomina, & hiſtorias è divina Scriptura ſuffirati ſunt, & ad fabulas converterunt, nihil inde ſequitur abſurdi.*

Ad VI. In originali voce haberi *fuit vir*, Interpres autem noster vertit in præterito imperfecto, vel quia Hebræum præteritum valet utrumque, vel quia hic liber potius vitam Job, quam mortem describit.

Ad VII. Quod licet hæc symbolice proponantur, ut benè hic explicat D. Th. nihil tamen officiunt historiæ veritati: quia secundum sensum literalem debent intelligi, ut mos est S. Scripturæ, quæ res spirituales sub figuris rerum corporalium describit: sensus enim literalis est, qui primo per verba intenditur sive proprie dicta sive figurate.

Ad VIII. dist. ant. Métrice scriptus est in capitibus, quæ varios continent dialogos, conc. ant. in capitibus quæ simplicem narrationem referunt, neg. ant. & conseq. Itaque in libro *Job* distinguenda est historia à Dialogis: simplex historia soluta oratione scripta est pro more omnium historiarum; e contra dialogi, cum affectibus pleni sint, carminibus, utpote ad varios exprimendi affectus maxime idoneis, fuere conscripti; hoc autem scribendi genus non officit rei scriptæ realitati.

Ad IX. conc. maj. neg. min. Sæpe nomina in Scriptura relata nomina habent congruentem rebus ipsis, quæ geruntur, significationem, sic Deo volente, aut præfagientibus parentibus nomina imponentibus, attamen personarum non officiunt realitati, ut constat de *Abel*, qui sic vocatus est, quod cito evanescere, & luctum parentibus afferre deberet: sic quoque *Noe* dictus est, quod consolaturus esset parentes suos ab operibus manuum suarum: nemo tamen dixerit *Abel* & *Noe* fictas esse personas.

### *Objectiones contra Librum Esther.*

**L**ibrum Esther non solum usque ad caput 10. sed etiam quoad posteriora à v. 4 c. 10. usque ad finem, adeoque integrum

grum Librum esse Canonicum, tum antiqua Concilia Laod. c. 59. & Carthag. III. c. 47. tum Patres Græci Origenes, Cyrillus, Damascenus, & Chrysoft. tum Latini Hilarius, Innocentius, Rufinus, S. P. August. Et Novissime Concil. Trid. Sess. 4. asseruerunt. Concil. enim Trid. loc. cit. ita ait: *Si quis autem libros ipsos integros cum omnibus suis partibus: inter quos librum Esther numerat: prout in Ecclesia Catholica legi consueverunt, & in veteri vulgata latina editione habentur, pro Sacris & Canonicis non susceperit - - - Anathema sit.* Atqui in veteri vulgata latina editione, etiam ultima capita habentur, & non solum usque ad cap. 10. & in Ecclesia Catholica legi consueverunt, ut insipienti vulgatam nostram patet, & feria 4. Dominicæ 2. quadragesimæ in Missa lectio desumpta est ex c. 13. Esther. Item in lectione Missæ contra Paganos: Item in Missa 22. post Pentecosten offertorium desumptum est ex oratione, quam Esther ad Dominum Deum c. 14. habuit: Ecclesia vero nunquam in Missæ sacrificio nisi Canonicas adhibere consuevit Scripturas. Ergo. Contra hunc tamen librum objicies.

I. D. Hieron. præfat. in hunc librum licit: *Librum Esther variis translationibus constat esse vitiatum - - - quem librum editio vulgata lasciviosis hinc inde verborum sinibus trahit &c.* Ergo Liber Esther quoad posteriora capita post caput 10. S. Hieron ex Albo Scripturæ delevit. Secuti sunt ante Concil. Trid. Nicolaus Lyranus, Dionysius Carth. Hugo Card. Cajetanus in Comment. hujus libri. Et post Concil. Trid. Sixtus Senensis l. 1. & 8. Bibliothecæ. Et ex Hæreticis Joannes Brentius in Apologia confessionis Wittenbergicæ, Witacherus &c.

II. Caput 10. à v. 4. incipiendo, & sex sequentia capita defacto in Hebræo non inveniuntur: ergo quoad hæc Liber Esther non est Canonicus.

III. Postrema capita libri Esther non cohærent cum prioribus: nam c. 2. narrantur insidiæ duorum Eunuchorum, &

detectio earumdem industria Mardochæi, quæ rursus narratur c. 12. Ergo.

IV. In Libro Esther multæ reperiuntur contradictiones: ergo. ant. prob. c. 2. dicitur, conjunctionem Eunuchorum accidisse anno septimo Assueri: & c. 11. significatur accidisse anno ejusdem secundo: ergo.

V. Mardochæus c. 6. dicitur nihil omnino mercedis accepisse pro delatione insidiarum: & c. 12. dicitur Regem præcepisse Mardochæo, *ut in aula palatii moraretur, datis ei pro delatione muneribus*: ergo.

VI. Aman c. 3. dicitur fuisse de stirpe *Agag* Regis Amalecitarum: & c. 16. asseritur, quod *animo & gente fuerit Macedo*. Ergo.

VII. c. 3. narratur, causam indignationis *Aman* contra *Mardochæum* & omnes Judæos fuisse, quia Mardochæus nolebat illum adorare: & c. 12. dicitur: *Aman voluit nocere Mardochæo & populo ejus pro duobus Eunuchis Regis, qui fuerant interfecti*. Ergo.

VIII. c. 3. dicitur: quod Aman fuerit exaltatus post necem Eunuchorum, indignatio autem ejus contra Mardochæum & Judæos evenit post ejus exaltationem: ergo illa indignatio non potuit esse ob delationem Eunuchorum.

IX. Chronologi discordant in assignando tempore, quo contigerit hæc historia Esther, & proinde quis fuerit Rex ille Persarum, qui nomine Assueri, & Artaxerxis hic proponitur: ergo.

## SOLUTIONES.

Ad I. D. Hieron. in Præfat. cit. non loqui de nostra vulgata purgata, & emendata, sed de illa, quæ ipsius tempore circumferebatur, quam ipse ex Hebræo Codice diligentissime à mendis expurgavit, ut patet ex eadem præfat.

Ad



Ad II. Origenem Epistola ad Julium Africanum testari, capita illa aliquando in Hebræo fuisse, sed casu excidisse, quomodo multa alia injuria temporis exciderunt. Pariter Josephus lib. 11. Antiq. c. 6. refert duas Epistolas Assueri, & orationem Mardochæi, quæ his posterioribus capitibus continentur: & idem Josephus lib. 10. Antiq. c. 12. testatur, se sua ex textu Hebræo desumpsisse: hinc patet, quod etiam posteriora Capita libri Esther Josephi tempore in Hebræo extiterint.

Ad III. dist. ant. non cohærent quantum ad ordinem rei gestæ, conc ant. quantum ad veritatem rei gestæ, neg. ant. & conseq. postrema namque capita pertinent ad initium libri, ut patet ex annotationibus D. Hieron. quæ capitibus ultimis sunt insertæ in Bibliis latinis, quod nihil veritati officit, quin potius alia ex aliis confirmantur.

Ad IV. neg. ant. ad prob. R. Insidiarum detectio evenit anno septimo Assueri, non autem anno secundo, siquidem illa verba cap. 11. *anno secundo regnante Artaxerxe*, non debent extendi usque ad narrationem insidiarum, quæ fit c. 12. sed solum ad ea, quæ narrantur in ipso c. 11. id est, ad somnium, quod Mardochæus vidit, antequam Esther Assuero conjungeretur.

Ad V. Quod etsi Mardochæus nondum habuerit mercedem pro delatione, quando Rex jussit sibi prælegi annales, ut dicitur c. 6. tamen postea habuit amplissimam, quæ describitur eodem c. 6. & ea est, quæ significatur c. 12. per illa verba, datis pro delatione muneribus, & sic per anticipationem dicitur data esse Mardochæo munera, quæ c. 6. describuntur.

Ad VI. Aman potuisse esse de stirpe Agagi per aliquem eorum, qui in obsidione Amalec Saulis manus effugientes, & huc & illuc vagantes devenerunt in Macedoniam, cumque ibi diu mansissent, & ex iis natus esset Aman, ideo recte dicitur *animus ex gente Macedo*: ergo verum est Aman de stirpe fuisse Agag, sed non illius Agag, qui Rex erat Amalecitarum, quem cum

gente delevit Saul, sed diversæ ab eo familiæ, quæ in Macedonia morabatur: idque fundatur in textu Hebræo, qui diversis characteribus scribit *Agag*, de cujus stirpe hic dicitur Aman, ab illo Agag, de quo 1. Reg. c. 24. loquitur.

Ad VII. Nihil vetare, quominus indignatio Aman ex diversis causis provenerit: 1. antequam exaltaretur, provenit ex detectione insidiarum, quarum forsan erat complex. 2. Ex eo, quod Mardocheus nollet ipsum adorare post ejus exaltationem.

Ad VIII. Neg. conseq. ob mox dicta: nempe indignatio Aman evenit ante & post ejus exaltationem ex causa diversa.

Ad IX. Hoc argumentum esse simile huic: sciri certo non potest, quis fuerit ille sponsus, cujus nuptiæ referuntur Joan. 2. Ergo Joannis Evangelium non est recipiendum: diversa ergo placita Authorum circa tempus, & Principes libri hujus fidem & historiam, ac veritatem non debent reddere dubiam, aut incertam. Dico tamen hanc historiam contigisse sub Artaxerxe longimano septimo Persarum Rege.

Dices 1. c. 2. v. 21. narrantur insidiæ, sive conspiratio duorum Eunuchorum in mortem Regis, & detectio earum per Mardocheum, quæ rursus c. 11. & 12. repetuntur: Ergo. R. ut ad III. Etiam in libris *Paralip.* repetuntur ea, quæ dicta sunt in libris *Regum*, & tamen non ideo à Canone excluduntur: ergo & hic idem dicendum.

Dices 2. c. 11. v. 3. dicitur *Mardocheus* ab anno 2. *Artaxerxis*: *vir magnus & inter primos aulæ regię*: Et c. 2. narrantur illa, quæ anno 3. Regis *Assueri*, sive *Artaxerxis* (utroque epim modo vocabatur) contigerunt, ex quibus apparet *Mardocheum* tunc Regi fuisse incognitum: quomodo ergo anno 2. Regis potuit dici: *Vir magnus, & inter primos aulæ regię*. R. Quod quando *Mardocheus* c. 11. vocatur *magnus, & inter primos aulæ Regię*, hoc dici per anticipationem jam c. 2. eo quod talis postea fuerit. Pro clariori intelligentia.

Sci-

Sciendum hanc esse Libri *Esther* seriem : somnium *Mardo-  
chæi*, quod c. 11. proponitur, reliquis omnibus præmittendum  
est capitibus. Caput 12. ubi manifestantur, & repetuntur infi-  
diæ Eunuchorum, ponendum est post v. 20. capitis 2. Caput  
13. usque ad v. 8.nectendum est v. 14. capitis 3. Reliquum au-  
tem capitis 13. cum capite 14. annectendum est fini capitis 4. ca-  
put 15. correspondet v. 1. capitis 5. caput 16. medio capitis 8.  
inter versum 8. ac 10. inferendum est. Denique caput 10. ad  
finem libri pertinet. Ita hæc testantur Codices Græci, ubi ea  
secundum hunc ordinem reperiuntur.

Dices 3. cap. 3. v. 13. assignatur dies 13. pro deletione  
Judæorum. Et c. 13. v. 6. dicitur, quod assignata fuerit dies  
14. Ergo. R. Dies 13. quæ c. 3. assignatur deletioni Judæorum,  
destinata erat inchoationi cædis: & dies 14. de qua c. 13. desti-  
nata erat consummationi cædis: ut patet ex c. 9. v. 17. ubi clare  
habetur: *Dies autem decimusterminus mensis Adar primus apud om-  
nes interfectionis fuit, & quarta decima die cedere desierunt.*

Dices 4. c. 16. v. 14. dicit Rex, quod *Aman* regnum *Per-  
sarum* voluerit transfere in *Macedones*: atqui Rex hoc non po-  
tuit timere: *Macedones* enim, quorum regnum usque ad *Alexan-  
drum* obscurissimum fuit, illo tempore ausi non fuissent inva-  
dere *Persas*: ergo. R. Optime potuisse Regem timere *Aman*, cum  
esset gente *Macedo*, & regnum *Persarum* affectaret, eum voluif-  
se illud in *Macedones* transferre, ut gentem suam obscuram illu-  
strem redderet: quod facile effecisset dejecto Persico imperio.

### *De Libro Psalmorum.*

Omnia 150. Psalmorum David est Author. Ita S. P.  
August. lib. 17. de civit. Dei. Cap. 14. his verbis: *Mibi autem  
videntur credibilius existimare, qui omnes illos 150. Psalmos ejus (sci-  
licet Davidis) operi tribuunt.* Item S. Th. in Psal. 38. dicit: *Om-  
nes*

nes *Psalms* fecit David, & quosdam ipse cantavit coram *Arca*, ut habetur 2. Reg. c. 6. quosdam dabat aliis cantandos, & ideo illi, quibus dabantur, erant quasi cantores, & eis intitulantur tum propter dignitatem, quia fuerunt *Prophetae*: tum propter mysterium. Concil. Trid. sess. 4. de *Canonicis scripturis* habet, licet non definiat (alias esset de fide, & non sub opinione) Authorem *Psalterii* esse Davidem: imo *Psalterium* recensens ut *canonicum* illud appellat *Psalterium Davidicum* 150. *Psalmodum*; ergo supponit Davidem esse Authorem dicti *Psalterii*.

Dices 1. Tituli pertinent ad S. *Scripturæ* essentiam: atqui illi tituli aliquos *Psalms* tribuunt aliis, nam in titulo *Psalmi* 49. 72. usque ad 82. dicitur: *Psalms* Asaph, Iditum, Eman, Ethan, filiorum Core &c. Ergo. Imo S. Hieron. in præfat. lib. *psalm.* juxta *Hebraicam* veritatem dicit: *Psalms omnes eorum testamur Authorum, qui ponuntur in titulis, David scilicet, Asaph, & Iditum filiorum Core, Eman, Ezechabaria, Moyse, & Salomonis, & reliquorum, quos Esdras primo volumine comprehendit.* Idem docet in *Epistolis* ad Sophronium, & Cyprianum. R. conc. maj. dist. min. Atqui illi tituli aliquos *psalms* tribuunt aliis ut Cantoribus, conc. min. ut Authoribus, neg. min. & conseq. Hos specificatos David elegit ex tribu Levi in Duces, ac Principes chororum, eosque instruxit, ut variis organis Deum laudarent, Ita & explicandus est S. Hieron.

Dices 2. Dum in titulo dicitur *Psalms* David, ille Davidi tribuitur ut Authori: ergo etiam ipsi Asaph tribui debet ut Authori, cum in titulo dicatur *psalms* Asaph. &c. R. neg. conseq. Disp. est: quod *psalmi* Asaph &c. tribuantur in dativo, quæ forma locutionis non denotat Authorem libri: sed Davidi tribuuntur in genitivo, consequenter Davidem recognoscunt solum ut Authorem.

Dices 3. S. P. August. de titulo primi *psalmi* agens ait: non enim omnes *Psalms* à David editi sunt: ergo. R. Hunc locum non esse

esse S. Patris: alias sibi ipsi contradiceret: nam in psalmum 9. ad v. 18. habet: *Cujus (Davidis) nomini totum Psalterium tribuitur.*

Dices 4. In fine Psalmi 71. v. 20. dicitur: *Defecerunt laudes David filii Jesse.* Ergo. R. Hic psalmus ultimus fuit, prout psalmi conscripti sunt à Davide: à tempore autem Ezechiae vel Esdræ aliter dispositi sunt.

Dices 5. Psalmus 136. est post captivitatem, 400. annis post Davidem: ergo. R. Davidem scripsisse spiritu prophetico, & in persona populi, ita S. P. August. lib. 17. de Civit. Dei cap. 14.

### *De Libris Sapientialibus.*

Primus est *Liber Proverbiorum* sic dictus, quod contineat sententias graves, sublimes, atque Divinas, quas Græci *Proverbia*: Hebræi *Misle* parabolas atque similitudines appellant. Librum hunc esse Canonicum apud Hebræos, Græcos, & Latinos Orthodoxos certum est, uti & ex Concil. Trid. De fide est, libri hujus Authorem esse Salomonem, idque constat ex v. 1. ubi dicitur: *Parabolæ Salomonis filii David Regis Israel.*

Secundus est *Liber Ecclesiastis*, in quo mundi instabilitas, vitiorum contemptus, atque Dei cultus & Religio stabilitur, & prædicatur. Hic liber unanimi Hebræorum, Græcorum, & Latinorum consensu recensitus est inter libros proto-Canonicos tanquam Canonicus primæ classis. Indubitata etiam fide certum est, hujus libri Authorem esse Salomonem, ut hæc verba initialia hujus libri produnt: *Verba Ecclesiastæ filii David, Regis Jerusalem*: quis enim Ecclesiastes filius David, & Rex Jerusalem nisi Salomon?

Tertius est *Canticum Canticorum*: ita dictum ob excellentiam, & continentem materiæ dignitatem: cum enim Hebræi superlativo careant, dum alicujus rei eminentiam exprimere volunt, jungunt genitivum unius nominis cum casu recto ejusdem



nominis: ita & nos dicimus Deum Sanctum Sanctorum, Regem Regum, Dominum Dominantium. Librum hunc esse Canonicum etsi aliqui negarint tam Judæi quam hæretici existimantes, illum non spiritu Dei, sed impuri amoris afflatu esse conscriptum, nihilque continere, nisi sermones amatorios Salomonis: de fide tamen est Eum esse Canonicam Scripturam à Deo dictatam: unde hic liber tam in V. T. quam N. semper habitus est nedum sacer, sed & protocanonicus, ut patet ex Concil. Trid. Author hujus libri est Salomon, qui juxta recentiores Rabinos ab eo ut adolescente exaratus putatur, sicut proverbia à Salomone ætate jam matura, Ecclesiasten vero ab eo jam senes scriptos esse docent: de quo tamen nihil certi constat.

Quartus est *Liber Sapientiæ*: pertractat de Sapientia tum increata, tum creata, vivideque ad amorem sapientiæ excitat. Hunc librum esse Canonicum constat ex Concil. Flor. Carthag. III. c. 47. Ex Tolet. II. in professione fidei: & ex Nicæna Synodo II. act. 4. Tandem ex Concil. Trid. Sess. 4. Item S. P. Aug. lib. II. de Prædest. Sanct. c. 14.

Dices: Liber Sapientiæ continet falsum: nam in eo c. 14. v. 15. dicitur: primum idolum factum esse ab aliquo Patre in defuncti memoriam filii, qui *illum, qui tunc quasi homo mortuus fuerat, nunc tanquam Deum colere cepit*. Atqui juxta omnes historicos statua erecta Belo à Nino ejus filio fuit primum idolum: ergo. Hoc argumentum est Calvinii lib. I. Inst. c. II. § 8. ubi inquit: *Constat ex Moyse, quomodo Rachelem narrat furatam Patris sui idola, quæ non erant mortuorum imagines*. Ergo. & neg. assertum: ad prob. conc. maj. dist. min. atqui juxta omnes historicos statua erecta Belo à Nino ejus filio fuit primum idolum publice ad adorandum propositum; conc. min. fuit primum privatim honoratum, neg. min. Primum enim idolum fuit statua mortuo filio erecta à patre, quod fuit tantum privatim adoratum, ut explicat ipse sapiens, dum ita loc. cit. prosequitur: *Deinde convalescente*

*lescente iniqua consuetudine, hic error tanquam lex custoditus est, & tyrannorum imperio colebantur figmenta.* Præterea unde constat Calvino: Rachelem vixisse ante patrem illum lugentem filium? aut Rachelis idola non fuisse mortuorum simulacra? contrarium enim ex S. textu non obscure colligitur: Rachelis enim idola in Hebræo *Teraphim* vocantur: *Teraphim* autem vocantur etiam mortuorum imagines, quæ licitè observari poterant: sic 1. Reg. c. 19. v. 13. dicitur: *Tulit ergo Michol statuam, Hebraice Teraphim, & posuit eam super lectum:* ut sic Saulis servos David ad necem quærentes similitudine corporis humani deluderet.

Author libri sapientiæ est incertus: nam aliqui volunt Salomonem esse Authorem: dicit enim Author de se ipso c. 9. v. 7. *Tu elegisti me Regem populo tuo. . . & dixisti me ædificare templum.* quod alteri quam Salomoni convenire non potest. Ast S. P. Aug. lib. 17. de Civit. Dei c. 20. liber Sapientiæ propter eloqui nonnullam similitudinem, ut Salomonis dicatur, obtinuit consuetudo, non autem esse ipsius, non dubitant doctiores. Quod autem Author se Regem vocet, & templi ædificatorem, est, quia inducit personam Salomonis loquentis. Alii Jesum filium Sirach ponunt Authorem: inter quos fuit S. P. August. lib. 2. de doct. Christ. c. 8. sed postea lib. 2. Retract. c. 4. dicit: *de Authore libri, quem plures vocant Sapientiam Salomonis, quod etiam ipsum Jesus Sirach scripserit, non ita constare, sicut à me dictum est, postea didici, & omnino probabilius comperi, non esse hunc hujus libri Authorem.* Alii opinantur fuisse Philonem Seniore, qui vixit ante Christum annis 160. sub Onia Pontifice. Ex quibus patet Authorem hujus libri esse incertum: quisquis demum sit à Salomone accepta lumina & sententias traduxit.

Quintus est *Ecclesiasticus*, ita dictus, quod vere concionatorius & Paræneticus sit, & per præcepta instruat. Hunc librum esse Canonicum negant moderni Hæretici Lutherus & Calvinus eorumque sequaces: sed nunc de fide est Ecclesiasti-

cum esse librum Sacrum, divinitusque inspiratum post expressam Ecclesiæ definitionem in Conc. Trid. Sess. 4. Florent. in instruct. Armenorum. Et Carthag. III. c. 43. Hic liber defectu propositionis Ecclesiæ non ab omnibus semper necessitate fidei receptus fuit, sed de ejus Authoritate aliquando dubitatum fuit inter aliquos etiam Catholicos, ideo Deutero-Canonicus vocatur: Prologus tamen hujus libri Canonicus non est.

Author hujus libri est Jesus filius Sirach, Civis Jerosolymitanus, vir Eximiæ Sapientiæ, & Propheta, qui sententias Salomonis hinc inde dispersas in unum volumen collegit. Liber hic defuncto Seniore Siracide ad filium Siracidem, deinde ad Nepotis manus pervenit, qui Hebraice conscriptum græce reddidit, ac digessit, & ordinavit; quare Jesus Avus verus Author Ecclesiastici, Jesus vero Nepos græcus tantum interpret fuit.

### *Objectiones Contra Libros Machabæorum.*

Liber *Machabæorum* dicitur, quia Machabæorum gesta & præclara facinora narrat. Fuerunt Machabæi Illustres viri Tribus Sacerdotalis, qui zelo fidei accensi pro lege Mosaica, & tuenda Patrum suorum Religione strenue decertarunt. Illorum fuere quinque Fratres filii Mathathiæ Sacerdotis magni, scilicet *Joannes, Simon, Judas, Eleazarus, & Jonathas*, ut legitur 1. Mach. c. 2. ubi quidem sub diversis nominibus referuntur, omnes tamen dicti sunt *Machabæi* à cognomine *Judæ* tertii ex filiis Mathathiæ, qui quia cæteris zelo & fortitudine emicuit, hoc nomine hebraico *Machabæus* donatus est.

Sunt quidem quatuor libri Machabæorum, sed de tertio & quarto hic non est sermo, quia cum Apocryphi sint, non quod malam doctrinam contineant, quin potius pietatem redolent, & alicujus sunt authoritatis, sed quia iis Ecclesia tanquam fidei regula non utitur, nomine Scripturæ S. non veniunt.

Du-

Duos libros priores, nempe 1. & 2. Machabæorum esse Canonicos, probat non solum Concil. Trid. sed etiam Florent. Carthag. III. Gelasius in Concil. Rom. Innocentius epistola ad Exuperium: & ex SS. PP. præcipue S. P. August. lib. 18. de Civit. Dei c. 36. Authores sunt incerti. Lutherus, Zwinglius, alique hæretici hos duos primos libros Machabæorum ut Canonicos rejiciunt, non alia ratione, quam quia evidenter ostendunt falsa esse eorum dogmata: nam in libris istis stabilitur invocatio Sanctorum, probantur suffragia pro mortuis, & celebrantur dedicationes Altarium, quæ omnia negant hi hæretici. Unde ita contra hos libros arguunt.

I. S. Hieron. præfat. in Libros Salomonis dicit: *Judith & Tobia, & Machabæorum libros legit quidem Ecclesia, sed inter Canonicas Scripturas non recipit*: ergo.

II. Lib. 1. c. 1. dicitur, Alexandrum magnum regnasse primum in Græcia: atqui hoc est falsum: siquidem ante ipsum multi fuerunt Reges Lacedæmoniorum, Macedonum, Atheniensium, Corinthiorum: ergo.

III. Eodem cap. v. 7. dicitur de Alexandro: *vocavit pueros suos nobiles, qui secum erant à juventute nutriti, & divisit illis regnum suum*: atqui juxta Curtium lib. 10. c. 7. Justinum lib. 12. Diodorum lib. 7. & Orosium lib. 3. c. 23. hoc est falsum: nam isti Authores referunt divisionem factam esse post mortem Alexandri: ergo.

IV. Alexandri Regnum dicitur divisum in Provincias & earum Præfectos 22. 29. vel secundum Curtium 10. Atqui hoc contrariatur Prophetiæ Danielis: ergo. min. prob. Prophetia Danielis Alexandri regnum tantum in quatuor partes dividendum prædicit c. 11. v. 4. ubi dicitur: *Conteretur regnum ejus, & dividetur in quatuor ventos cæli*: ergo.

V. Lib. 1. c. 2. affirmatur vaticinium Danielis de abominatione desolationis impletum esse, quando Antiochus Epipha-

nes idolum in templo Domini collocavit: atqui Christus Matth. c. 24. asserit vaticinium illud implendum in novissimis diebus; ergo.

VI. Lib. 1. c. 1. v. 11. dicitur, Antiochum illustrem, seu Epiphanem regnasse anno 137. regni Græcorum: atqui hoc est falsum: ergo. min. prob. Ex annalibus Græcorum, & Chronologia Eusebii constat illum regnasse anno Græcorum 156. & ex serie Regum anno 155. ergo.

VII. Eodem cap. v. 8. dicitur: *Regnavit Alexander annis 12. & mortuus est*: atqui juxta computum libri illi tantum tribuuntur 6. anni: ergo.

VIII. Lib. 1. c. 6. commendatur factum Eleazari, qui se ipsum occidit: atqui se ipsum occidere est grande crimen, non commendatione dignum: ergo.

IX. Lib. 1. c. 4. Judas dicitur mundasse templum anno 148. id est, uno anno ante mortem Antiochi, siquidem anno 149. obiit: atqui c. 10. lib. 2. dicitur Judam purgasse templum post biennium à morte Antiochi, ergo.

X. In libro 1. illa templi mundatio narratur ante mortem Antiochi: & in lib. 2. narratur post ejus mortem: ergo est contradictio.

XI. Eodem die lib. 1. c. 4. v. 52. & lib. 2. c. 1. v. 18. dicitur templum mundatum, quo die fuit prophanatum: atqui prophanatum est die 15. ut habetur l. 1. c. 1. v. 57. & mundatum dicitur die 25. ut habetur lib. 1. c. 4. v. 52. ergo.

XII. Lib. 2. c. 1. v. 7. refertur Epistola, in qua fit mentio alterius Epistolæ, quæ statim in contextu additur, & scripta dicitur anno 169. his verbis: *Regnante Demetrio anno 169. Nos Judæi scripsimus vobis. Et tamen v. 10. scripta notatur anno 188. his verbis: Anno 188. populus, qui est Jerosolymis, & in Judæa, senatusque, & Judas Aristobolo Magistro Ptolomæi Regis*: atqui hoc implicat: ergo.

XIII.



XIII. Si annus 188. pertineret ad finem præcedentis epistolæ, post illa verba: *Anno centesimo octuagesimo octavo*, deberet poni punctum, atqui non ponitur punctum, sed tantum coma: ergo.

XIV. Lib. 2. c. 9. narratur Judas occisus anno 152. & tamen lib. 2. c. 1. refertur Epistola ab eo scripta anno 188. quæ si etiam pertineret ad finem præcedentis epistolæ 169. etiam jam tunc Judas fuit mortuus: ergo.

XV. Lib. 1. c. 6. v. 16. Antiochus in lecto suo in Babylonia moritur anno 149. atqui lib. 2. c. 1. v. 13. in templo *Naneæ*, quod erat *Persepoli*, quæ etiam in Scriptura vocatur *Elymaides*, dicitur occisus; quæ omnia sibi contradicunt: ergo.

XVI. L. 1. c. 6. v. 4. dicitur: *Antiochus repulsus à civitate Elymaide fugit inde, & abiit cum tristitia magna, & reversus est in Babylonem: & v. 16. & mortuus est illic*: atqui non est mortuus in Babylone; ergo.

XVII. Lib. 2. c. 1. v. 13. dicitur: *Cum in Perside esset Dux ijsse, & cum ipso immensus exercitus, cecidit in templo Naneæ*: ergo est mortuus in Templo *Naneæ*, non in montibus.

XVIII. Verbum *cecidit* loc. mox cit. intelligitur pro mortuus est: nam v. 16. habetur: *percusserunt Ducem, & eos, quicum eo erant, & diviserunt membratim, & capitibus amputatis foras projecerunt*: ergo.

XIX. Lib. 1. c. 6. v. 16. dicitur: *Antiochum Epiphanem mortuum esse anno 149. Regni Græcorum: & lib. 2. c. 11. v. 33. legitur mortuus anno 148. cum ipsius filius Antiochus Eupator tanquam Rex scripserit epistolam ad Judæos tanquam ejus successor anno 148. Ergo.*

XX. Lib. 1. c. 6. v. 20. narratur, *Antiochum Eupatorem cum ingenti exercitu invasisse Judæam anno 150. & lib. 2. c. 13. v. 1. hoc factum refertur anno 149. Item lib. 1. c. 7. v. 1. dicitur: Demetrium ab urbe Roma exiisse anno 151. Et lib. 2. c. 14. v. 4. ille exitus refertur contigisse anno 150. Ergo.*

XXI.

XXI. Lib. 2. c. 1. v. 19. dicitur: *Cum in Persidem captivi ducerentur Patres nostri*: atqui Judæi non in Persidem sed in Babyloniam fuerunt abducti: ergo.

XXII. Lib. 2. c. 2. quædam Apocrypha referuntur de Arca Domini, quæ probantur ex descriptionibus Jeremiæ: atqui hæc apocrypha non dixit Jeremias, sed opposita affirmavit c. 3. v. 16. ubi ait: *Non dicent ultra: Arca testamenti Domini*: ergo.

XXIII. Lib. 2. c. 2. narratur 1. Jeremiam tempore, quo Jerusalem obsidiebatur à Nabuchodonosore, abscondisse Arcam testamenti, & Altare incensi in monte, quem Moyses ascenderat, qui fuit mons *Nebo*, ut habetur Deut. c. 34. 2. Ipsum Jeremiam dixisse, locum fore ignotum, donec Deus congregaret congregationem populi sui, & propitius fieret: atqui hic duo falsa adstruuntur: 1. quia Jeremias non potuit hoc facere tempore obsidionis, cum tunc fuerit in carcere: nec postea, cum omnia pretiosa fuerint ablata, & Jeremias (ut habetur Jerem. c. 37. & 38.) omnibus tam Sacerdotibus, quam Nobilibus esset infensus. 2. Quæ enim fuerunt abscondita, postea à populo à captivitate Babylonica reverso nunquam fuerunt inventa: ergo.

XXIV. Lib. 1. c. 8. v. 16. dicitur de Romanis: *Committunt uni homini Magistratum suum per singulos annos dominari universæ terræ suæ, & omnes obediunt ei*: atqui hoc est falsum, quia apud Romanos duo creabantur consules: ergo.

XXV. Lib. 2. c. 3. v. 4. habetur: *Simon autem de Tribu Benjamin Præpositus templi constitutus*: atqui si fuit de Tribu Benjamin, non poterat esse Templi Præpositus, hic enim debuit esse de Tribu Levitica: ergo.

XXVI. Lib. 2. c. 8. v. 22. narratur de Juda: *Constituit itaque fratres suos Duces utrique ordini Simonem & Josephum*: atqui nullus ex fratribus Judæ vocabatur Josephus: ergo.

XXVII.

XXVII. Lib. 2. c. 10. v. 11. Antiochus Eupator Epiphanis filius regno suscepto Lysiam regni negotiis præfuisse dicitur: atqui lib. 1. c. 6. habetur, quod Lysias diu ante præfuerit, & Regem Antiochum Eupatorem instituerit: ergo.

XXVIII. Lib. 2. c. 12. v. 13. Judas laudatur, quod pro mortuis Sacrificium offerri jusserit: atqui ut Calvinus lib. 3. instit. c. 5. §. 8. dicit: pro mortuis orare est vanum, & superstitiosum: ergo.

XXIX. Etiam juxta Catholicos non licet orare pro iis, qui decesserunt cum peccato mortali: atqui tales erant illi, pro quibus Judas orare jussit: nam dicitur loc. mox cit. *Invenierunt autem sub tunicis interfectorum de donariis idolorum - - à quibus lex prohibet Judæos*: ergo.

XXX. In libro 2. cap. ult. Auctor culpam à lectoribus deprecatur: atqui hoc est alienum à divina autoritate: arguit siquidem Calvinus c. 9. qui scripta sua indigere venia fatetur, is Spiritus S. oracula non esse clamat. Ergo.

## S O L U T I O N E S.

**A**D I. Expl. S. Hieron. subdist. Et loquitur S. Hier. de Scripturis Proto-Canonicis, conc. Et loquitur S. Hieron. de Scripturis Deutero-Canonicis, neg. Itaque cum libri Machabæorum sint tantum Deutero-Canonici, meritò S. Hier. dicit, quod Ecclesia eos non recipiat inter Canonicas Scripturas nempe Proto-Canonicas.

Ad II. Neg. min. Cum enim Scriptura dicit, Alexandrum regnasse primum in Græcia, non de regno quocunque partiali loquitur, sed de Monarchia Græcorum, quam primus obtinuit Alexander, cum totius Græciæ Regnum adeptus est exclusis aliis Regibus, qui in variis ditionibus regnabant, & ille solus in tota, vel vere tota Græcia imperavit; unde Ale-

xander fuit primus totius Græciæ Monarcha, & ab illo incepit Græcorum Monarchia. R. 2. Quod Alexander dicatur primus regnasse in Græcia, hoc est, prius ibi regnavit, quam in aliis Regnis, quæ armis devicit: nam in textu Græco non dicitur primus, sed *πρῶτος*, id est, prius.

Ad III. Secundum Scripturam vere Alexandrum divisisse Regnum suum, dum adhuc viveret, licet illa divisio tantum post ejus mortem executioni data fuerit: quod utrum factum fuerit vel condito ab Alexandro testamento, sive alio modo, parum refert vel nihil contra Scripturæ locum. Et ita intelligendi sunt Authores citati.

Ad IV. Danielelem non negare in plures quam in quatuor partes divisum fuisse Alexandri Regnum: sed quatuor tantum posuit, quia illæ erant præcipuæ, & Judæis, quibus scribebat, magis notæ. Ita Danielelem explicat S. Hier. in cap. 11. Dan.

Ad V. Neg. maj. Quia de Danielis vaticinio nihil ibi dicitur, sed tantum dicitur: *ædificavit Rex Antiochus abominandum idolum desolationis super Altare Dei*: atqui illud idolum erat verè abominandum: sed non est sermo de eodem idolo, de quo loquitur Daniel. 2. R. Nihil obstat, quominus hæc Prophetia Danielis duplicem potuerit habere sensum etiam literalem: unum & principaliter intentum de Antichristo & ejus tempore: alterum minus principalem de hoc Antiocho & ejus persecutione, cum fuerit Antichristi figura, & ab aliquibus SS. PP. vocetur *Antichristus veteris testamenti*. Potest ergo dici, vaticinium Danielis ex parte impletum in Antiocho, & ex toto implendum in fine mundi.

Ad VI. Neg. min. ad prob. diff. ant. Et illi computus inter se non conveniunt quoad modum computandi, conc. ant. quoad rem computatam, neg. ant. & conseq. In re ergo nulla est hic diversitas: si enim aliqui computent annos Regni Græcorum ab initio regni Alexandri Magni à devicto Dario, inveniuntur  
usque

usque ad Antiochum Epiphanem anni 156. vel 155. Si autem aliqui (ut & Author lib 1. Machab.) computent octodecim annis post, nempe duodecim annis post mortem Alexandri, hisque duodecim addantur sex anni, quibus Alexander regnavit, faciunt annos octodecim: unde Author lib. 1. Machab. incipiendo hoc modo suum computum, recte dicit, Antiochum regnasse anno 137. regni Græcorum: si enim his 137. annis addantur 18. effient numerum 155. Tali modo omnia argumenta solvuntur, quæ de diversitate computus hujus libri objiciuntur.

Ad VII. Dist. maj Regnavit Alexander annis 12. à morte Patris, conc. maj. à devicto Dario, neg. maj. Quando dicimus, quod Alexander tantum regnaverit 6. annis, non intelligimus hoc à morte Patris sui, sic enim regnavit 12. annis, sed à devicto Dario: ab illo enim tempore tantum 6. annis regnavit tanquam totius Græciæ Monarcha.

Ad VIII. Dico cum S. P. August. epist. 61. quod quamvis homo ipse fuerit laudatus, *factum tamen ejus narratum, est non Laudatum.* 2. R. Eleazarum merito laudari non solum, quia id potuit fecisse ex instinctu Spiritus S. sed etiam, quia se ipsum non directe occidit, sed tantum indirecte, & permissive se habuit ad mortem: nam directe intendit commune populi sui bonum, & ideo elephantem se supposuit, illumque occidit, sub cujus ruina est sepultus.

Ad IX. Conc. maj. neg. min. Nam in c. 10. Libri secundi ista verba *post biennium* non significant, post biennium à morte Antiochi, sed post biennium à prophanatione. Ita Bellarminus. Sed contra hanc solutionem.

Dices: A prophanatione templi usque ad ejus purificationem non tantum biennium, sed tres anni integri cum decem diebus fluxerunt, ut clare constat ex lib. 1. c. 1. v. 57. Item ex S. Hier. qui dicit in Dan. 12. *Tribus annis templum pollutum fuit in Jerusalem:* ergo. Unde aliter



R. ad IX. Judam expurgasse templum anno 148. ut habetur lib. 1. c. 4. v. 52. nempe uno anno ante mortem Antiochi, quæ contigit anno 149, ut habetur lib. 1. c. 6. v. 16. In secundo autem libro c. 10. v. 3. narratur quidem hæc purgatio post mortem Antiochi, non tamen asseritur facta post mortem Antiochi, & hoc ideo, quia cum Author cap. 9. vellet absolvere, quæ ad Antiochum pertinebant, noluit narrationem ipsa templi expurgatione interrumpere, & ideo hanc post mortem ipsius recensuit; neque illud post *biennium* referendum est ad mortem Antiochi, sed numerandum est ab initio Principatus Judæ, quod fuit anno 146. ut colligitur ex lib. 1. c. 2. v. 66. & ita uno anno ante ipsius Principatum fuit prophanatum, nempe 145. anno, & biennio post ejus Principatum fuit mundatum: ergo tribus annis integris mansit templum prophanatum. Et hac solutione salvatur concordia Scripturarum. Ex qua

Ad X. patet responsio: etsi enim illa templi mundatio in lib. 2. narretur post mortem Antiochi, non tamen asseritur facta post mortem Antiochi ex ratione, quia Author voluit absolvere, quæ de Antiocho dicturus erat, & tum demum redire ad Judam & templi purgationem.

Ad XI. Conc. maj. dist. min. Atqui fuit prophanatum die 15. incomplete, conc. min. Complete, neg. min. & conseq. Eadem quippe die & mense, id est, simili die & mense, nempe 25. mensis *Casleu* facta fuit prophanatio templi, & ejus renovatio, licet diverso anno, ut habetur lib. 1. c. 4. v. 52. & repetitur lib. 2. c. 10. v. 5. Quando autem die 15. mensis *Casleu* dicitur fuisse positum idolum super Altare, tantum fuit prophanatio incompleta: completa vero & perfecta prophanatio fuit facta die 25. ejusdem mensis, quando publice idolum fuit adoratum; ut dicitur lib. 1. c. 1. v. 62.

Ad XII. dico I. Epistolam, cujus sit mentio in illa priori v. 7. non esse eam, quæ statim in textu additur: sed esse aliam; quod

quod facile esse potest. Dico 2. Epistolam v. 7. commemoratam, & ordine narrationis priorem esse revera posteriorem illa, quæ scripta dicitur 169. & hæc est, cujus fit mentio in priori epistola v. 7. commemorata: unde annus 188. qui ponitur v. 10. non pertinet ad initium Epistolæ scriptæ 169. cum annus soleat poni in fine Epistolæ: sed ille annus 188. pertinet ad finem præcedentis epistolæ v. 7. commemoratæ, & posterioris illa 169. scripta.

Ad XIII. Quod non positum fuerit punctum, sed tantum comma, vitium est typographi, quod facile hic poterat intervenire.

Ad XIV. Duplicem dari supputationem: unam ab anno primo Monarchiæ Alexandri Magni: secundam 18. annis post Monarchiam Alexandri incipiendo ab anno primo Æræ novæ seleucianæ: unde annus, qui juxta supputationem secundam five Seleucianam est 152. annus, juxta supputationem primam five Alexandrinam est 170 annus: si enim anno 152 addantur 18 anni, facient 170 annos: & sic Judas, qui dicitur mortuus anno 152. juxta supputationem seleucianam, adhuc vivebat anno 169 juxta supputationem Alexandrinam, cum juxta hanc supputationem Judas fuerit mortuus 170 anno, qui annus coincidit cum anno 152 supputationis Seleucianæ: adeoque Judas anno 169 facile potuit hanc epistolam scripsisse: & hoc supputationis modo utitur Author libri 1. Machab. Judas ergo hanc epistolam scripsit uno anno ante suam mortem, cum annus 151, qui est annus unus ante mortem Judæ, sit annus 169, quo anno hæc epistola dicitur scripta: est ergo tota diversitas in modo computandi, non in re computata.

Ad XV. Quod Antiochus Epiphanes non in persona propria, sed in suis comitibus in Templo *Naneæ* urbis *Persepolis* percussus fuerit, ac inde fuga elapsus, postmodum copiosiori militum apparatu hanc ab *Elemaitis*, seu *Persepolitaniis* irrogatam

sibi injuriam vindicare fuerit aggressus; at multitudine civium ad arma concurrente, exercitu suo majori ex parte fuso ac debilitato, sibi suisque salutem quantocius recedendo quæsierit, ut refertur lib. 2. c. 9. Cum autem ex illa præcipiti fuga, qua in *Babylonem* venire disposuerat, in *Mediam* divertisset, contigit, ut nuntius, qui è Syria venerat, relaturus ea, quæ in Judæa acciderant, ipsum repererit circa *Ecbatanam Mediæ* urbem regionem, à quo cum audisset Antiochus, à Juda Machabæo fugatos suos Duces Lyliam, Nicanorem, & Timotheum, ira ac furore abreptus jussit currum suum citissime agitari, & iter Jerosolymam versus accelerari: contigit autem eum de curru velocius agitato cecidisse, graviterque colliso corpore diro insuper viscerum dolore correptum fuisse ita, ut in sella gestatoria ipsum deinceps deferri necesse esset, quare *Babyloniam* ire decrevit, at morbo ingravescente præ dolore viscerum in montibus inter fætores, quos exhalabat, misere obiit super lectum suum.

Ad XVI. Hic non dici: *venit Babylonem*, sed *reversus est in Babylonem*, in quo reditu accelerato in montibus misere vitam finivit: unde particula *illic* non ad Babylonem, sed ad locum, ubi morte correptus fuerat, referri debet: vel si mavis, intellige per Babylonem Regnum Babylonicum.

Ad XVII. Quod Antiochus dicatur cecidisse in Templo *Naneæ*, non quod ibi mortuus sit, sed quia exercitus ipse ibi fusus & percussus ceciderat, & ipse Antiochus fuga vix evaserat: non enim in Scriptura verbum *cecidit* semper significat mortem in bello, sed & multoties fugam: sic Josue c. 7. dicitur: *cecidervnt per prona fugientes*. Et Gen. c. 14. legitur Regem *Sodomæ* cecidisse in prælio, & tamen ibid. v. 17. vivus postea dicitur occurrisse *Abrabæ*.

Ad XVIII. Hæc verba non intelligi de Antiocho, sed de Duce exercitus ipsius: sic enim ibidem dicitur: *Cum intrasset Antiochus, apertoque occulto aditu Templi mittentes lapides percusserunt*

*serunt Ducem*, non vero, *percusserunt Iysum*: relatio ergo non fit ad Antiochum, sed ad Ducem ipsius.

Ad XIX. Authorem libri primi Machabæorum in annorum supputatione, quæ Alexandrina est, differre toto sesqui-anno à calculo Chaldaico, quo utitur libri secundi Author: nam annus apud Authorem libri secundi 148. (quo jam mortuo Antiocho Epiphane regnarat aliquamdiu filius ejus Antiochus Eupator) ab Authore libri primi vocatur annus 149. & quidem ad finem vergens: nam mortem Antiochi Epiphanis annotat lib. 1. c. 6. v. 16. anno 149. contigisse: à cujus morte effluxerunt aliquot menses indubie usque ad præsentem copiarum Eupatoris cladem, quæ annotatur accidisse anno 148. mense *Dystro*, qui nostro partim *Februario* partim *Martio* respondet: hoc enim tempore solent in Asia Reges ad bella procedere.

Ad XX. Patet ex mox dictis responsio.

Ad XXI. Authorem hujus libri *Persidem* vocare non solum eam Regionem, quæ proprie dicitur *Persis*, sed etiam *Chaldaeam* & alias finitimas regiones: quod affirmat S. Chrysostr. hom. 6. in Matth.

Ad XXII. Nullos ex Canonicis libris Jeremiæ, vel Nehemiæ, qui modo extant, citari in libris Machabæorum: sed potius quasdam descriptiones, & commentaria Jeremiæ, ut dicitur lib. 2. Mach. c. 2. v. 1. & v. 13. Commentaria autem longe differunt à libris Canonicis historiæ, vel Prophetiæ Jeremiæ & Nehemiæ, qui nunc inter libros Canonicos reperiuntur. Credendum vero est, olim fuisse hæc commentaria & descriptiones, licet modo non extent, quia ita refertur in libro Canonico, qualis est 2. Machab. citatus. Nec oppositum dicit Jerem. c. 3. quia hic solum prædicit ablationem Arcæ, quemadmodum revera ablata fuit: non tamen dicit eam nunquam apparituram, etiam in fine mundi.

Ad

Ad XXIII. Jeremiam hæc gerere potuisse, imo defacto gessisse vel ante captam Jerusalem non regnante *Sedecia* (tunc enim fuit in carcere) sed *Joachim*, huic enim Jeremias erat in veneratione: unde ipse suasu Jeremiæ dedit se Chaldæis, ipsoque consentiente potuit Jeremias Arcam & Tabernaculum asportare. Vel capta jam à Chaldæis Jerusalem, antequam Templum ab eis incenderetur, siquidem facile hoc potuit ab illis impetrare, cum summæ apud Nabuchodonosorem esset Authoritatis, quippe qui durante obsidione multum pro reddenda civitate apud Regem Sedeciam & nobiles omnes institisset, affirmans, talem esse Dei voluntatem, ut Civitas in manus Chaldæorum veniret, ut patet Jerem. c. 39. Non fuisse autem à militibus diripientibus urbem Jerosolymam ablatam Arcam aut Tabernaculum, satis patet ex Jerem. c. 52. ubi enumerantur omnia, quæ ex Templo Domini Chaldæi abstulerunt usque ad Phialas & mortariola: Arcæ autem & Tabernaculi nulla fit mentio, quod tamen fieret, si fuissent ablata.

Quod vero dicatur Arca manifestanda, quando Deus, populum suum congregabit, non est intelligendum de congregatione Judæorum post Captivitatem Babylonicam facta, sed de illa, quæ fiet novissimis diebus, quando Deus per Eliam & Henoch Judæos ad Christum convertet: tunc enim Elias eis ostendet arcam, ut eos in fide Christi confirmet: talis autem asservatio Arcæ usque ad illud tempus est miraculosa, neque tunc Arca erit nociva, quia non ostendetur, ut adoretur (idque significant illa verba Jeremiæ c. 3. *Et non dicent ultra Arca Domini*, id est, non invocabunt, neque adorabunt eam: non enim dixit: *non erit Arca Domini*, sed *non dicent ultra Arca Domini*) sed erit proficua, quia Judæi convincentur viso illo signo à Jeremia longe ante prædicto ad credendum Evangelio.

Ad XXIV. Quamvis duo Consules quotannis crearentur, non tamen simul imperabant, sed alternis diebus singuli. Et hæc



hæc fuit institutio hujus dignitatis à suo exordio ut ait Livius lib. 2. *Ne si duo Consules simul imperarent, Regibus exactis non remotus, sed duplicatus error videretur.*

Ad XXV. Simonem hunc de Tribu Benjamin fuisse constitutum Præpositum Templi in rebus politicis v. g. ut præesset Templi prædiis, agris, redditibus, vel militibus ad Templi custodiam deputatis lib. 1. Mach. c. 4. v. ult. non autem in rebus sacris, quibus soli Sacerdotes de Tribu Levi præerant.

Ad XXVI. Josephum hunc alio nomine vocatum Joannem esse lib. 1. c. 2. v. 2. atque adeo Eum duo nomina habuisse.

Ad XXVII. Lysiam, qui sub Epiphane jam Dux belli erat, postea ab Antiocho Eupatore ejus filio, in eodem munere confirmatum esse, utpote nutritium & educatorem ejusdem.

Ad XXVIII. neg. min. quia pro mortuis orare pium est, ac religiosum, quando non constat eos vel beatos esse, vel damnatos, ut constat ex S. P. Aug. L. de cura pro mortuis c. 1. & ex continua praxi Ecclesiæ, & Judæorum, qui ad hunc usque diem orant pro defunctis.

Ad XXIX. dist. maj. Si constet eos mortuos esse in peccato mortali, conc. maj. Si non constet, neg. maj. & ita dist. min. neg. conseq. Judas itaque pie existimavit eos in articulo mortis dolorem de peccato acceptorum donariorum coram Deo concepisse, & misericordiam invenisse, quod significant illa verba: *quia considerabat, quod hi, qui cum pietate dormitionem acceperant, optimam haberent repositam gratiam: & ideo credidit sacrificiis & precibus vivorum posse juvari.*

Ad XXX. Aliud esse, loqui de ipsius historiæ veritate, aliud de interpretatione in aliam linguam. Interpres ergo veniam petit non falsitatis, quæ nulla erat, sed elocutionis, quæ ab homine erat. Vel dicatur, nihil impedire, ut Spiritus S. Scriptori assistat, qui in quibusdam tamen humano more ex modestia loquitur: sic enim Paulus ait: 1. ad Corinth. c. 11. *Et si imperitus*

*sermone non tamen scientia. Item 2. ad Corinth. c. 12. Ut minus sapiens dico plus ego. Item Donate mihi banc injuriam. Ergo similiter in præsentì.*

*Objectiones Contra Ecclesiæ Romano-Catholicæ Librorum  
N. T. Canonem. Contra Evangelium Matthæi, Marci,  
Luæ, & Joannis.*

I. In Genealogia Christi, quam texuit Matthæus, nullibi usque ad ejus baptismum dicitur Christus esse Filius Dei, sed tantum filius hominis: atqui hoc pertinet ad hæresim Cerinthi, & Ebionitarum: ergo.

II. In toto Evangelio non legitur Christum dixisse, se Patrem, aut Matrem, aut Fratres habuisse: sed se Filium Dei esse, & nihil de hoc mundo se velle habere: ergo illud, quod de genealogia Christi in Evangelio Matthæi habetur, non pollet autoritate Divina.

III. Matthæus sic orditur: Liber generationis Jesu Christi, non autem liber Evangelii Jesu Christi: ergo quæ scripsit Matthæus saltem hoc capite, potius Genesis, quam Evangelium nuncupari possent.

IV. Matthæus aliquæ Discipuli viderunt tantum Christum in carne, & quæ gessit in terris, cum Christus annorum esset triginta: ergo Matthæus certo narrare, ac describere non potuit Genealogiam Christi, quam non vidit.

V. In Evangelio Matthæi c. 2. v. 15. de Christo dicitur: *ut adimpleretur, quod dictum est à Domino per Propbetam dicentem: ex ægypto vocavi filium meum. Et v. 17. Tunc impletum est, quod dictum est per Jeremiam Propbetam dicentem: Vox in Rama audita est &c. Et v. 23. Habitavit in civitate quæ vocatur Nazareth, ut impleretur, quod dictum est per Propbetas, quoniam Nazareus vocabitur. Atqui hæc Spiritu S. inspirante non sunt scripta, cum ex veteri testamento citentur, & in eo non inveniantur. Ergo.*

VI. Marcus incipit suum Evangelium: *Initium Evangelij Jesu Christi filii Dei. Sicut scriptum est in Isaia Propheta: ecce ego mitto Angelum meum &c.* atqui in istis verbis est gravis error: ergo. min. prob. Hoc testimonium non invenitur in Isaia, sed Malachia c. 3. v. 1. ergo.

VII. Marcus c. 2. v. 25. dicit: Christum dixisse Pharisæis: *Numquid legistis, quid fecerit David, quando necessitatem habuit, & esuriit ipse, & qui cum eo erant. Quomodo introivit in Domum Dei sub Abiathar Principe Sacerdotum, & panes propositionis manducavit, quos non licebat manducare nisi Sacerdotibus, & dedit eis, qui cum eo erant.* Atqui hic multa falsa dicuntur: ergo. min. prob. nam 1. dicitur, quod hoc contigerit sub Abiathar: & ex lib. 1. Reg. c. 21. constat, hoc contigisse sub Abimelech. 2. dicitur, quod David dederit panem eis sanctum, qui cum ipso erant: & lib. Reg. dicitur, David fuisse solum. 3. dicitur, David intrasse in domum Dei: tunc temporis vero necdum erat ædificata domus Dei: nec Arca (quæ etiam vocatur domus Dei) erat in Nobe, sed in Silo, ut constat ex lib. 1. Reg. c. 1. 3. & 4. ergo.

VIII. Lucas in suo Evangelio non scripsit ea, quæ vidit, sed quæ habuit ex traditione, ut ipse ait c. 1. v. 2. *Sicut tradiderunt nobis, qui ab initio ipsi viderunt:* atqui ex iis, qui ei tradiderunt, potuit decipi: ergo.

IX. Lucas fuit deceptus scribendo historiam Pauli, Theclæ, & baptizati Leonis: nam S. Hier. de script. Eccles. verbo Lucas ait: *Pauli & Theclæ, & totam baptizati Leonis fabulam inter apocryphas scripturas computamus:* ergo & in scribendo Evangelio Lucas fuit deceptus.

X. Joannis Evangelium contradicit aliis Evangeliiis: ergo. ant. prob. Joan. c. 2. v. 11. de aqua in vinum mutata dicitur: *Hoc fecit initium signorum Jesus in Cana Galilææ.* Et c. 4. v. 54. recensens sanationem filii Reguli ait, *Hoc iterum secundum signum fecit Jesus;* atqui mutatio aquæ in vinum non fuit primum, nec

Sanatio filii Reguli fuit secundum signum Jesu: nam Lucas c. 9. v. 42. narrat primum Jesu signum, quando puer annorum duodecim prædicavit in templo: etiam ante sanationem filii Reguli multa alia miracula narrant Evangelistæ: ergo.

XI. Historia de muliere adultera, quæ habetur Joan. c. 8. non est Canonica: ergo. ant. prob. Ipsi Catholici Scriptores fatentur illam in Græcis codicibus non inveniri, ut Maldonatus in c. 8. Joan. Et Cornel. à Lap.

XII. *Matthæus* c. 1. v. 8. dicit: *Joram genuit Oziam. Et ex 4. Reg. habetur, Joram genuit Ochoziam. Et c. 8. v. 27. Ochozias genuit Joam. Et c. 11. v. 2. Joas genuit Amasiam. Et c. 12. v. ult. Amasias genuit Oziam. Ergo.*

XIII. Juxta *Matthæum Josias genuit Jechoniam, Jechonias genuit Salatbiel. Et ex lib. 1. Paralip. c. 2. v. 15. filii Josiæ fuerunt Jobanan ante patrem mortuus sine filiis, Joakim, Sedecias, & Sellum. De Joakim natus est Jechonias & Sedecias: filii Jechoniæ fuerunt Asir, Salatbiel &c. Ergo.*

XIV. Juxta *Matth. Salatbiel genuit Zorobabel. Et lib. 1. Paralip. c. 3. v. 9. dicitur Zorobabel natum esse ex Phadaja fratre Salatbielis, de Phadaja orti sunt Zorobabel & Semei. Ergo.*

XV. Juxta *Matthæum Jechonias genuit Salatbiel, Salatbiel genuit Zorobabel, Zorobabel genuit Abiud. Et secundum Lucam c. 3. Neri genuit Salatbiel, Salatbiel genuit Zorobabel, Zorobabel genuit Resa. Ergo..*

XVI. *Matthæus annuntiat generationes ter 14. atqui tot non reperiuntur: nam ut sint generationes ter 14. verbum genuit deberet repeti 42. vicibus: ubi tamen solum 39. vicibus reperitur. Ergo.*

XVII. *Matth. c. 2. dicitur de Christo: Nazaræus vocabitur, Et Lucæ c. 7. v. 34. Christus dicitur Manducans & bibens vinum. Ergo non fuit Nazaræus, nam Numer. c. 6. Nazaræis vinum erat prohibitum.*

XVIII.

XVIII. Matth. c. 5. v. 16. Christus dicit: *Sic luceat lux vestra coram hominibus, ut videant opera vestra bona.* Et Matth. c. 6. v. 1. dicitur: *Ne iustitiam vestram faciatis coram hominibus, ut videamini ab eis.* Ergo.

XIX. Matth. c. 8. v. 5. dicitur: *Accessit ad eum Centurio.* Et Lucæ c. 7. v. 3. dicitur: *Misit ad eum seniores Judæorum.* Et v. 6. *misit Amicos.* Ergo.

XX. Matth. c. 9. v. 18. Princeps Synagogæ dicit: *Domine filia mea modo defuncta est.* Et Marc. c. 5. v. 23. dicitur: *Deprecabatur dicens: quoniam filia mea in extremis est.* Ergo.

XXI. Matth. c. 10. v. 5. dicit Christus: *In viam gentium ne abieritis.* Et Marc. c. ult. dicitur: *Euntes in mundum universum prædicate Evangelium omni Creaturæ.* Ergo.

XXII. Matth. c. 10. v. 10. Christus præcipit Apostolis, *ne habeant peram in via, neque duas tunicas, neque calceamenta, neque Virgam.* Et Marc. c. 6. v. 8. Christus præcipit eis, *nequid tollerent in via, nisi Virgam tantum.* Ergo.

XXIII. Matth. c. 15. v. 24. Christus dicit: *Non sum missus, nisi ad oves quæ perierunt Domus Israel.* Et Zach. c. 2. v. 8. dicitur: *Misit me ad gentes: ergo.*

XXIV. Matth. c. 22. v. 46. dicitur: *Neque ausus fuit quisquam ex illa die (tertia ante passionem) eum amplius interrogare.* Et c. 24. v. 3. Eum iterum Apostoli interrogant: *Dic nobis, quando hæc erunt.* Ergo.

XXV. Matth. c. 27. v. 9. dicitur: *Tunc impletum est, quod dictum est per Jeremiam Prophetam dicentem: & acceperunt 30. argenteos.* Atqui hæc non reperiuntur in Jeremia, sed in Zacharia c. 11. v. 12. Ergo.

XXVI. Matth. c. 26. v. 29. ait Christus: *Non bibam amodo de hoc genimine vitis usque in diem illum, cum bibam vobiscum novum in regno Patris mei.* Et Actor. c. 10. v. 41. testatur S. Petrus se & alios post resurrectionem cum illo manducasse & bibisse dicens:



*manducavimus , & bibimus cum illo , postquam resurrexit à mortuis. Ergo.*

XXVII. Marci 11. v. 13. dicitur de Christo : *quod cum vidisset à longe ficum habentem folia , venit , si quid forte inveniret in ea , & cum venisset ad eam , nihil invenit præter folia , non enim erat tempus ficorum , & respondens dixit ei , jam non amplius in æternum ex te fructum quisquam manducet. Et ut loquitur Matth. c. 21. v. 9. nunquam ex te fructus nascatur in sæpitermum. Et arefacta est continuo ficulnea. Jam si hi textus essent authentici , Christus sibi contradiceret exsiccando , & arefaciendo arborem illam à se productam , exigendo fructus ab ea præter virtutem illi in productione datam , & extra tempus his producendis à natura destinatum. Ergo.*

XXVIII. Lucæ c. 2. v. 34. de Christo dicitur à Simeone : *Ecce positus est hic in ruinam , & in resurrectionem multorum. Et c. 9. v. 56. dicitur : filius hominis non venit animas perdere , sed salvare. Ergo.*

XXIX. Christus apud Joannem c. 5. v. 31. ait. *Si ergo testimonium perbibeo de me ipso , testimonium meum non est verum. Et c. 8. v. 14. dicit : Et si ego testimonium perbibeo de me ipso , verum est testimonium meum. Atqui hæc est manifesta contradictio. Ergo.*

XXX. Marci c. 10. v. 46. dicitur : *Et proficiente eo de Jericho , cæcus &c. Et Lucæ c. 18. v. 35. dicitur : Cum appropinquaret Jericho , cæcus quidam sedebat secus viam &c. Ergo.*

XXXI. Marc. c. 4. v. 22. dicitur : *Manducantibus illis. Luc. vero c. 22. v. 20. dicitur : postquam cænavit. Ergo.*

XXXII. Marc. c. 15. v. 25. dicitur : *Erat hora tertia , & crucifixerunt eum. Joan. vero c. 19. v. 14. dicitur : Erat autem Parasceve Paschæ hora quasi sexta , quando Pilatus tradidit Jesum crucifigendum. Ergo.*

XXXIII. Marc. c. 16. v. 8. Mulieres , quæ iverant ad monumentum , *nemini quidquam dixerunt. Et luc. c. 24. v. 9. dicitur : nuntiaverunt hæc omnia illis undecim. Ergo.* XXXIV.

XXXIV. Marc. c. 16. v. 14. Christus novissime apparuit recumbentibus illis undecim. Et Joann. c. 20. dicitur. Thomas non erat cum eis. Ergo.

XXXV. Evangelistæ non conveniunt in designanda hora resurrectionis Christi: nam Matthæus ait: quod mulieres venerint ad monumentum *Vespere Sabbati*. Marcus valde mane orto jam sole. Lucas valde diluculo. Et Joannes mane cum adhuc tenebræ essent. Ergo.

XXXVI. Luc. c. 3. v. 36. Sale dicitur filius Cainan, Cainan filius Arphaxad. Et Gen. c. 11. v. 12. dicitur: Arphaxad genuit Sale. Ergo.

XXXVII. Luc. c. 16. v. 8. dicitur: Laudavit Dominus villi- cum iniquitatis. Et Exod. c. 20. furtum prohibetur. Ergo.

XXXVIII. Joan. c. 3. v. 22. dicitur: *Jesus baptizabat*. Et c. 4. v. 3. dicitur: *Quamquam Jesus non baptizaret, sed discipuli ejus*. Ergo.

XXXIX. Joan. c. 7. v. 8. Christus dicit: *Non ascendo ad diem festum*. Et eodem c. v. 10. dicitur: *tunc & ipse ascendit ad diem festum, sed quasi in occulto*. Ergo.

XL. Joan. c. 7. v. 34. Christus dicit: *Ubi sum ego, vos non potestis venire*. Et c. 17. v. 34. ait: *Volo, ut ubi sum ego, & illi sint mecum*. Ergo.

## SOLUTIONES.

**A**D I. Dist. maj. nullibi usque ad ejus baptismum dicitur Christus esse filius Dei expressis terminis, transl. maj. virtualiter, neg. maj. & min. cum conseq. S. P. Aug. lib. 23. Contra Faustum Manichæum (cujus hoc est argumentum) c. 5. ostendit, falsum esse, quod dictitabat Faustus, scilicet in genealogia, quam texuit Matthæus, tantum dici Christum filium hominis; nam statim c. 1. v. 23. subdit, quod ille, quem filium David

nun-

nuncupat, de Spiritu S. conceptus sit, atque in eo completum sit illud Isaiaë vaticinium c. 7. *Ecce Virgo in utero habebit, & pariet filium, & vocabunt nomen ejus Emmanuel, quod est interpretatum, nobiscum Deus.*

Ad II. S. P. August. lib. 7. c. 2. respondet, quod, quando Christus ait se non habere in terris Patrem aut Matrem, aut consanguineos, id eodem prorsus modo intelligendum sit, quo modo intelligitur, dum suos edocens discipulos dicebat: *Ne vobis dicatis Patrem in terra, unus enim est Pater vester Deus*: per quod non negavit Christus secundum humanitatem assumptam se Matrem habere: sed significare voluit, nos eis, à quibus geniti sumus, non ita adhærere debere, ut salutem, & regnum cælorum perdamus.

Ad III. Conc. ant. neg. conseq. cum S. P. August. lib. 2. c. 6. quia licet S. Matthæus suum Evangelium non incipiat his verbis: *Liber Evangelii*, sed *Liber Generationis*, inde tamen non sequitur, istud capud ad Evangelium non pertinere: nam Evangelium significat bonum nuntium: quod autem faustum, ac bonum mundo nuntium attulit, quam Christi generatio, qua ejus Incarnatio declaratur?

Ad IV. Dicit S. P. August. lib. 7. c. 2. quod licet Matthæus Christum nascentem non viderit, sed Ei jam 30. annos nato adhærere cæperit, peculiari tamen Spiritus S. afflatu perspectas habuerit omnes circumstantias generationis Christi: aut eas à probatissimæ fidei testibus acceperit, in quibus postea describendis Spiritus S. ei specialiter adfuit, ne memoriæ lapsu vel minimum à vero aberraret.

Ad V. Conc. maj. dist. min. non inveniuntur dicta *literaliter* de Christo, conc. min. non inveniuntur dicta *spiritualiter* de Christo, neg. min. & conseq. nam. locus habetur Oseæ II. v. 1. *Ex ægypto vocavi filium meum.* Etsi enim Propheta ibi loquitur *literaliter* de populo Israel ex ægypto in manu Moysis educto, in-

intelligitur tamen etiam hic locus spiritualiter de Christo, quia reditus filiorum Israel ex Ægypto fuit figura reditus Christi. 2. locus invenitur Jeremiæ c. 31. v. 15. ubi Jeremias loquitur literaliter de Tribubus Juda & Benjamin ductis in captivitatem, & inducitur Rachel etiam mortua, plorans hanc stragem, cum Rachel fuerat sepulta in Bethlehem, quæ est urbs de Tribu Juda, Rachel autem erat de Tribu Benjamin, & ita per Rachel duæ hæ Tribus intelliguntur; tamen etiam intelligitur spiritualiter, cum ploratus Rachel fuerit figura lamentationis matrum plorantium cædem innocentium. 3. locus desumptus dici potest ex Judic. c. 13. v. 5. ubi de Samsone, qui fuit figura Christi dicitur: *Erit enim Nazaræus Dei ab infantia sua.* Vel ut loquitur S. Hier. in c. 2. Matth. *Possumus aliter dicere, quod etiam eisdem verbis juxta Hebraicam veritatem in Isaia scriptum sit: exiet virga de radice Jesse, & Nazaræus de radice ejus ascendet.*

Ad VI. Conc. maj. neg. min. ad prob. dist. ant. Hoc testimonium non invenitur in Isaia quoad omnia, conc. ant. quoad aliqua, neg. ant. & conseq. dicit enim S. Hier. in c. 3. Matth. *de diversis testimoniis scripturarum unum corpus effectum est.* Adeoque testimonium hoc est conflatum ex Isaia c. 40. v. 3. ubi habetur: *Vox clamantis &c.* Et ex Malachia c. 3. v. 1. ubi priora verba habentur. Marcus autem tantum citavit Isaïam utpote celebriorem, & cujus testimonium ejus proposito magis quadrabat. Nullum ergo in hoc est mendacium, aut error, quia non ponitur aliquod exclusivum, negando esse aliquid, quod alteri potest attribui.

Ad VII. Omnia illa vero sensu posse concordari. 1. Quia juxta Ven. Bedam in c. 2. Marci. Tam Abimelech quam Abiathar fuerunt illic, cum veniens David panes petiit & accepit, nempe Abimelech Princeps sacerdotum, & Abiathar ejus filius. Occiso autem Abimelech à Saule, fugit Abiathar ad David, quo regnante accepit ipse summi Sacerdotii gradum, non ob-

stante quod Sadoch esset constitutus à Saule summus Sacerdos. Marcus autem vocat Abiathar Principem Sacerdotum, ut declarat Beda, quia *Abiatbar multo majoris Excellentiae quam Pater suus effectus est, ideoque dignus fuit, cujus memoriam Dominus etiam vivente Patre quasi summi faceret Sacerdotis.* 2. Quamvis enim David solus ad Abimelech Sacerdotem accesserit ad panes petendos, tamen 1. Reg. c. 21. facit mentionem Sociorum dicens: *Pueris condixi in illum & illum locum:* & inter Socios hos panes propositionis, quos accepit pro illis, divisit. 3. Aequè non urget: etsi enim templum tantum post mortem David à Salomone fuerit ædificatum, tamen tabernaculum erat in civitate *Nobe*, quod postea Saul transtulit in Gabaon. Nec obstat, quod Arca Domini erat in *Silo*, quia locus, in quo erat tabernaculum, potest dici Domus Dei, cum ibi Deus speciali ratione colebatur non minus, quam Coram Arca. Quod vero tabernaculum fuerit in *Nobe*, constat: civitas quippe hæc erat civitas Sacerdotum, & panes, quos Achimelech dedit David, fuerant ablati de mensa propositionis, quæ erat indubie in Tabernaculo.

Ad VIII. dist. maj. quæ habuit ex sola traditione, neg. maj. quæ habuit ex traditione aliorum, & insuper ex inspiratione & assistentia Spiritus S. conc. maj. solutio de se patet.

Ad IX. Dist. ant. Et illæ historiæ falsè attribuuntur S. Lucae conc. ant. Et illæ historiæ verè à S. Luca fuerunt conscriptæ, neg. ant. & conseq. Historiæ illæ inter Apocryphas scripturas à S. Hieron. rejiciuntur. Ergo est dispar ratio de scriptis à S. Luca.

Ad X. dist. min. non fuit primum absolute, nec secundum simpliciter, conc. min. respectivè, neg. min. & conseq. Joannes enim non dicit id fuisse Christi miraculum primum simpliciter & absolute, sed primum post baptismum, & discipulorum assumptionem: hoc vero non tollit, quod alia miracula in sua  
pue-



pueritia fecerit. Similiter non vocatur absolute secundum miraculum, sed *cum venisset à Judæa in Galilæam*: Joan. 4. c. v. 54. quocum stat, plura alia miracula prius fecisse.

Ad XI. neg. ant. ad prob. dist. ant. Et hoc fatentur Catholici Scriptores de aliquibus Græcis Codicibus, conc. ant. de omnibus Græcis codicibus, neg. ant. & conseq. Quod hoc Catholici Scriptores non fateantur de omnibus Græcis codicibus, clare patet ex S. Hier. lib. 2. Dial. adversus Pelagianos. Ratio autem, quare non habeatur in aliquibus Græcis codicibus, est: quia temporibus illis res adhuc erat dubia, & ideo hæc adulteræ historia ponitur inter scripta Deutero - Canonica: sed jam post Concil. Trid. totum Joannis Evangelium, etiam ut comprehendit adulteræ historiam, est Canonicum.

Ad XII. Nullam hic esse contradictionem. Nam Joram genuit Oziam non immediate, sed mediate, quomodo Jesus fuit mediate Filius David: nec verbum genuit magis significat, quam verbum *Filius*. Evangelista ergo nolens excedere Tesseradecadem generationum in singulis trium ordinum classibus promissam, omisit hic tres generationes. Quod vero hos potius omiserit quam alios, ratio esse videtur, quod hi essent geniti ex Athalia filia impiissimi Achab & crudelissimæ Jezabel, quorum memoriam ad 4. usque generationem Deus abolitam voluit, & ideo in odium parentum hæ tres generationes à Christi genealogia excluduntur.

Ad XIII. Vitio Scriptorum ex textu excidit una generatio; duo enim vocabantur *Jechonias*, nempe *Eliacim* filius *Josia*, cujus nomen in *Joakim* vertit Pharao 4. Reg. c. 23. v. 44. Et *Joachim* filius *Joakimi* nepos Josiæ, ut constat ex 4. Reg. c. 24. v. 6. Scriptores ergo videntes nomen *Jechoniæ* bis repetitum, mendum crediderunt, quod emendare volentes, textum corruerunt. Legendum ergo est: *Josias genuit Jechoniam*, seu *Joakim* & fratres ejus. *Jechonias autem genuit Jechoniam* seu *Joachim*

in transmigratione Babylonis, id est, sub tempus abductionis Judæorum in Babyloniam, quæ cæpit anno 3. ejusdem Joachim. Ita 4. Reg. c. 24. v. 8. Hanc solutionem esse fundatam patet 1. ex eo, quia solus primus Jechonias filius Josiæ habuit plures fratres: secundus vero, qui fuit Pater Salatbielis habuit unicum fratrem, nempe Sedeciam. Patet 2. ex eo, quia in Tesseradecade tertia essent tantum 13. generationes, cum Evangelista annuntiet 14. quæ reperiuntur à Salatbiel usque ad Christum inclusive.

Dices: Jerem. c. 22. v. 30. Hic Jechonias filius Joakimi vocatur sterilis: ergo non fuit Pater Salatbielis. R. Dist. ant. vocatur sterilis absolute, id est, sine liberis, neg. ant. nam lib. 1. Paralip. c. 3. v. 17. ipsi assignat octo filios. Vocatur sterilis relative ad Sceptrum regium, à quo ipsos privandos prophetat Jeremias, conc. ant. neg. conseq. Ipsemet Propheta Jeremias se explicat dicens: *Scribe virum istum sterilem, nec enim erit de semine ejus vir, qui sedeat super solium David &c* quod etiam impletum est: nam licet filii Jechoniæ semper titulo Principum gavisi fuerint, ut patet in Zorobabele filio Salatbielis: Aggæi c. 1. v. 1. tamen imperium erat penes Pontifices.

Ad XIV. Zorobabelem, de quo loquitur lib. Paralip. non esse eum, de quo loquitur Matthæus. Nam Zorobabel, de quo loquitur Matthæus, ut ex 1. Esd. c. 3. v. 18. Et ex Aggæo c. 1. constat, fuit filius Salatbiel, & Pater Abiud. Zorobabel vero, de quo loquitur lib. Paralip. fuit filius Phadaïæ fratris Salatbielis, qui Zorobabel genuit Mosellam, Hananiam, & Salomitb Sororem eorum: iste ergo Zorobabel alium patrem, & alios filios habuit, quam Zorobabel, de quo loquitur Matthæus.

Ad XV. Salatbielem, & Zorobabelem, de quibus loquitur hic Lucas, prorsus alios esse ab iis, quos describit Matthæus. Neque enim rarum est in diversis familiis reperire plures ejusdem nominis, maxime si illæ familiæ sanguine, vel affinitate sint copulatæ.

Ad

Ad XVI. Reponendo in suum locum generationem *Jechoniae* seu *Jeakim*, quæ ex textu sublata est vitio scriptorum, & numerando generationem Christi *fili* *Mariæ*, de qua natus est *Jesus*, quod æquivalet verbo *genuit*, reperiuntur generationes 41. Tota ergo difficultas est de quadragesima secunda, circa quam est duplex interpretum sententia. Prima est eorum, qui comprehendunt generationem, qua *Abraham* genitus est, ita ut *Abraham* sit primum caput genealogiæ, *Isaac* secundum &c. Et hæc sententia arridet. Secunda est eorum, qui non comprehendentes *Abraham* tanquam stipitem, bis numerant generationem *Davidis*, ita ut claudat pri-mam Tesseradecadem, & aperiat secundam hoc modo, *David genuit Salomonem*, & sic prima Tesseradecas clauditur: & ut aperiat secundam, dicendum, *David* itaque genuit *Salomonem*. Neque dicatur: ergo generatio *Josia* deberet similiter bis repeti. Non inquam dicatur, Nam Evangelista dicit solum, *ab Abraham usque ad David generationes 14*. Sed non dicit *A David usque ad Joachim*, sed *a David usque ad transmigrationem Babylonis*: & sic *Josias* claudit secundam Tesseradecadem, sed non aperit tertiam, quæ aperitur à transmigratione Babylonis.

Ad XVII. Christum *Nazaræum* (id est floridum juxta *Isaiam* c. 11.) dici à civitate *Nazareth*, in qua post sui ex ægypto reditum habitavit: non vero à statu Religioso, cui per votum sese addicebant Nazaræi illi, quibus vinum erat prohibitum. Ita exponit *Tirinus*.

Ad XVIII. Christum non improbare opera bona facta coram aliis, sed solum pravam corrigere velle intentionem eorum, qui ideo bene operantur, ut videantur ab hominibus, & inde humanam percipiant gloriam.

Ad XIX. Eum accedere, qui per alium à se missum accedit: quidquid enim aliquis per procuratorem facit, recte dicitur & ipse fecisse: procurator enim & agens principalis sunt fictione juris una eademque moraliter persona.

Ad XX. Filiam Archisynagogi ita desperatæ salutis fuisse, quando eam reliquit, ut veniret ad Jesum, ut jam defuncta potuerit dici: quomodo de moribundo quotidie dicimus, jam mortuus est, id est, desperatæ salutis est. Et sic Archisynagogus potuit utrumque dicere, & jam mortua est, & in extremis est.

Ad XXI. Distinguenda esse tempora: Christus enim initio suæ prædicationis voluit, ut Apostoli suam missionem inciperent *ab ovibus quæ perierunt domus Israel*, ut Judæis Paulus & Barnabas Act. 13. declararunt: *Vobis oportebat primum loqui verbum Dei, sed quoniam repellitis illud - - - ecce convertimur ad gentes.* tandem post suam resurrectionem, quæ plene Apostolos corroboraverat, præcepit, ut per universum orbem divulgarent Evangelium.

Ad XXII. Matthæum literaliter *per Virgam* intelligere *Virgam defensoriam*, quam Apostolis prohibet Christus; Marcum vero intelligere *Virgam viatoriam* ad innitendum in via. Sed utrumque mystice intelligere nimiam curam corporis, quam Christus Apostolis suis prohibuit: quem sensum mysticum semper retinuerunt Christus & Apostoli, non vero sensum literalem.

Ad XXIII. Christum alia per se facere, alia per Apostolos: non fuit missus, ut gentibus proponeret verba salutis per se sed per Apostolos, quibus post resurrectionem dixit: *Euntes in mundum universum* &c. Sed est missus, ut Judæis per se præsentem, & apud ipsos miracula operantem annuntiaret Evangelium: unde uterque textus est verus.

Ad XXIV. Primum textum loqui de Pharisæis, qui defacto eum tentandi causa *publice*, ut prius solebant, non amplius interrogaverunt; secundum textum loqui de Apostolis, qui eum, ut ait D. Marcus, *secreto* interrogaverunt.

Ad XXV. Nomen Jæremiæ hic incuria librariorum irrepisse: tum quia Matthæus non solet exprimere nomina Prophetar.

tarum, quos citat. Tum quia Syriacus, & nonnulli codices latini (quorum unus extat Romæ adhuc in bibliotheca Augustinianorum) non habent nomen Jeremiæ. Vel hæc verba non esse à Jeremia scripta, sed ore tantum prolata, scripta vero à Zacharia, qui ea per oralem traditionem acceperat, quod non rarum est in Prophetis. Vel cum S. P. August. Tertull. Corn. à Lap. Eusebio: hæc eadem omnia olim in Jeremia extitisse, sed incuria scriptorum intercidisse, vel à Judæis erasa fuisse.

Ad XXVI. Christum Dominum post resurrectionem cum suis discipulis manducasse, & bibisse vinum naturale, seu de genimine vitis, non tamen illud bibisse ordinario modo, & ad serviendum naturæ necessitati: & hoc solo modo negaverat ante passionem se deinceps cum illis comesturum, & bibiturum, sed solum ad majus suæ resurrectionis testimonium.

Ad XXVII. Ibi nullam esse contradictionem, sed meram Christi Sapientiam. Voluit namque Christus hoc signo manifestare Judæis, quod arefaciendo arborem illam ex se non tale promerentem, multo magis & à fortiori illorum Synagogam arefaciendam brevi, reprobendam, & eradicandam, utpote quæ præter mera steriliū cæremoniarum folia, nihil jam Deo obtulit: cum tamen illud inter arbores & homines sit discrimen, ut illæ nonnisi certo anni tempore fructus dare, isti vero toto vitæ suæ tempore dignos pœnitentiæ fructus afferre teneantur.

Ad XXVIII. Dum dicitur Lucæ 2. c. Christus *positus in ruinam multorum*, sensum esse, Christum non esse causam formaliter, per se, & directam ruinæ multorum, sed solum occasionaliter, per accidens, & indirecte, quatenus multi ejus gratiæ, & doctrinæ resistentes majorem sibi damnationem acquirerent.

Ad XXIX. Per *ly verbum* Christum intelligere *fide dignum*: unde sensus primi textus est: *si ego solus testimonium perhibeo de me ipso,*



*ipso*, testimonium meum non est communi æstimatione dignum, ut credatur, sed alius est qui una mecum testimonium perbibet de me Pater: ergo testimonium meum dignum est, ut credatur. Sensus secundi textus est: *si ego testimonium perbibeo de me ipso, verum est testimonium meum* - - quia solus non sum: sed ego, & qui misit me Pater, duo testes omni exceptione majores.

Ad XXX. Verbum *appropinquaret* significare, cum propinquus esset Jericho, quod potuit dici de Christo sive egrediente de Jericho sive ingrediente urbem Jericho, quam paulo post egressum iterum Christus ingressus est, ut patet Luc. 19. v. 1. *Et ingressus perambulabat Jericho.*

Ad XXXI. Tres fuisse cœnas. 1. Paschalem & Sacram. 2. Vulgarem & prophanam. 2. Eucharisticam. Porro cœnæ Paschalis & vulgaris erant peractæ, quando Christus Eucharistiam instituit, sed adhuc cum Apostolis mensæ epulis constrictæ accumbebat: & ideo Evangelistæ indifferenter dicere potuerunt, *cœnantibus*, aut *postquam cœnavit*.

Ad XXXII. Judæos divisisse diem in quatuor horas, quæ dicebantur *Prima*, *Tertia*, *Sexta*, *Nona*: & quælibet illarum complectebatur tres horas communes. Pilatus ergo tradidit Jesum hora quasi Sexta, idest, sub finem horæ tertiæ, quæ durabat à nona nostra communi usque ad meridiem, qua durante Christus fuit traditus, & crucifixus.

Ad XXXIII. Mulieres *nemini* per viam occurrenti *quidquam* dixerunt hac de re, quia *invaserat eas tremor*: sed *mutiaverunt* Apostolis: in quo nulla contradictio.

Ad XXXIV. Collegium Apostolorum ante Apostasiam Judæ vocatum fuisse collegium duodecim: postea dictum fuisse collegium undecim, sive aliqui fuerint absentes, sive etiam aliqui alii, qui non erant Apostoli, fuerint præsentis: quia à nobiliori parte sic vocabatur confessus Apostolorum.

Ad

Ad XXXV. Evangelistas ibi diverso modo loquendi idem significare voluisse, ut lib. 3. de consens. Evangel. c. 14. eos conciliat S. P. August. dicens: Matthæum nomine *Vespere* sumptisse secundum consuetudinem Scripturarum partem pro toto, nempe primam horam noctis, à qua cæperunt emere aromata, pro tota nocte, imo pro nocte, dum incipit luce terminari, quod indicant verba Mathæi: *vespere autem sabbathi, quæ luceſcit in prima sabbathi*: prima enim pars noctis, utpote quæ terminatur in tenebras & medium noctis, non luceſcit in prima sabbathi, id est, dominica post sabbathum, sed terminus noctis. Unde ordo rei gestæ hic fuit, ut mulieres emerint aromata statim, cum transisset sabbathum, sicut Marci c. 16. v. 1. habetur, hoc est, illo vespere sabbathi post occasum solis: deinde cum jam diu transisset sabbathum nocte sabbathi jam luceſcente in primam diem post sabbathum, id est Dominicam, venerint ad monumentum. Quod totum optime concordat cum Luca dicente *valde diluculo*, cum Joanne, *Mane cum adhuc tenebræ essent*, cum Marco *valde mane*: die quippe surgente aliquæ reliquæ tenebrarum sunt, quæ tanto magis attenuantur, quanto magis oritur lux. Quod autem Marcus dicat *Orto jam sole*, non facit sensum, solem jam conspicuum super terram fuisse, sed quod cælum ab Orientis parte jam albesceret, quod utique non fit nisi orientis solis vicinitate, solis enim est ille fulgor, qui nomine Auroræ appellari solet.

Ad XXXVI. Cainam fuisse à Moyse ex causis nobis ignotis prætermisſum: sed à LXX. vel ex veteribus Hebræorum historiis, vel ex Spiritu S. afflatu fuisse in locum suum insertum, quos Lucas græce scribens est secutus.

Ad XXXVII. Non Christum, sed villici Dominum laudasse, non furtum, sed industriam, qua prudenter fecit; unde non furti actionem, sed modum actionis laudasse.

Ad XXXVIII. Jesum baptizasse non suis, sed discipulorum manibus, & hoc est, quod explicat c. 4. licet tamen Christus aliquos, scilicet Apostolos, propriis manibus baptizaverit, sed alio tempore.

Ad XXXIX. In Græco esse, *Nondum ascendo, quia tempus meum ad ascendendum nondum impletum est*, ut sequitur: unde nulla est contradicção.

Ad XL. Christum loqui de gloria cælesti, qua semper fructus est; & c. 7. declarat, discipulos ipsa non posse donari, quamdiu sunt in hac vita. c. vero 17. vult, id est, summe desiderat, ut suo tempore recipiantur cum ipso in æterna gloria.

### *Objectiones Contra Acta Apostolorum.*

I. S. Lucas Act. c. 1. v. 1. ait: *Primum sermonem feci de omnibus ó Theophile, quæ cepit Jesus facere, & docere.* Joannes vero c. ult. sui Evangelii dicit: *Sunt & alia multa, quæ fecit Jesus, quæ si scribantur per singula, nec ipsum arbitror mundum capere posse eos, qui scribendi sunt libri.* Ergo.

II. Act. c. 15. v. 28. Apostoli simul congregati definiunt: *Visum est Spiritu S. & nobis, ut abstinatis vos ab immolatis simulacrorum.* Et D. Paulus 1. ad Timoth. c. 4. v. 3. ait: *Doctrinam esse dæmoniorum abstinere à cibis, quos Deus creavit.* Ergo.

III. Act. c. 7. v. 2. dicit S. Stephanus: *Deus apparuit Abraham, cum esset in Mesopotamia, priusquam moraretur in Charan, seu Haran.* Et Gen. c. 11. v. 41. Abraham dicitur non ex Mesopotamia, sed ex Ur Chaldæorum educus. Ergo.

IV. S. Stephanus dicit Deum apparuisse Abraham, priusquam moraretur in Charan: & Moyse Gen. c. 11. dicit Abraham educum de Ur Chaldæorum venisse usque Haran, & habitasse ibi: & postea immediate c. 12. addit: *Dixit autem Dominus ad Abraham, egredere de terra tua, & de cognatione tua, & domo Patris.*

*tris tui &c. ergo Deus apparuit Abrahamo in Charan, non in Ur.*

V. Act. c. 7. v. 6. Deus dixit: *Erit semen ejus accola in terra aliena, & servituti eos subjicient annis 400. Et Exod. c. 12. v. 40. Filii Israel manserunt in Ægypto annis 430. Ergo.*

VI. Act. c. 9. v. 7. dicitur: *Viri autem illi, qui comitabantur cum illo (Paulo) audientes vocem, neminem autem videntes. Et ipse Saulus c. 22. v. 9. dicit: Qui mecum erant, lumen quidem viderunt, vocem autem non audierunt. Ergo.*

VII. Act. c. 13. v. 21. dicitur: *Regem dedit illis Deus Saul annis 40. Et Reg. c. 13. v. 1. dicitur: Filius unius anni erat Saul cum regnare cœpisset, duobus autem annis regnavit super Israel. Ergo.*

VIII. Act. c. 15. v. 1. dicitur: *Nisi circumcidamini, non potestis salvari. Et Paulus ad Galat. c. 5. v. 1. dicit: Si circumcidamini, Christus nihil vobis proderit. Ergo.*

IX. Act. c. 15. v. 10. D. Petrus ait: *Quid tentatis Deum imponere jugum super cervices discipulorum, quod neque Patres nostri, neque nos portare potuimus. Et Deut. c. 30. v. 11. dicitur: Mandatum hoc, quod ego præcipio tibi, non est supra te. Ergo.*

## S O L U T I O N E S.

**A**D I. S. Lucam non de omnibus absolute loqui, sed solum de præcipuis Christi gestis, ac documentis à prima infantia usque ad ejus in cælum ascensum. S. Joannem vero absolute de omnibus loqui.

Ad II. Ibi Apostolum non dicere, quod abstinere *absolute* à certis cibis sit doctrina dæmoniorum, sed abstinere ab illis *superstitiose*, hoc est abstinere ab illis quasi immundis, ut Judæi solebant, vel quasi per se malis, & à malo Deo seu dæmone procreatis, eo modo quo Simoniaci, Saturniani. Ebionitæ,

Marcionitæ & alij abstinebant hæretici: unde abstinere à quibusdam cibis ex motivo obedientiæ, temperantiæ, vel pœnitentiæ, exemplo S. Joannis Baptistæ, & in eo sensu, in quo interdum præcipit abstinere Ecclesia, non dæmoniorum, sed Spiritus S. doctrina est.

Ad III. S. Stephanum accipere *Mesopotamiam* late & extensive, prout comprehendit etiam partem Chaldææ, in qua *Ur* sita erat: nam v. 4. dicitur: *Tunc exiit de terra Chaldæorum, & habitavit in Charan.*

Ad IV. Apparitionem Dei factam esse Abrahæ, dum esset in *Ur*: unde Moyse Genes. cap. 12. resumit historiam ejus à tempore, quo ex *Ur* egressus est, ponit ergo *Dixit* pro *Dixerat*, vel pro *Dixit autem, cum esset in Ur*, quod subintelligit; nam *Haran* non erat terra Abrahæ, ibi non erat ejus cognatio, nec domus Patris: ergo non potuit in *Haran* dicere, *Exi de terra tua, & de cognatione tua* &c.

Ad V. Annos 400. Actuum numerandos esse à nativitate Isaac, quem Abraham genuit anno ætatis suæ 100. hoc patet tum ex verbo *Semen*, id est posteritas: tum ex Gen. c. 5. v. 13. ubi dicitur: *Scito prænosces, quod peregrinum futurum sit semen tuum in terra non sua, & affligent 400. annis.* Annos vero 430. Exodi numerandos esse ab egressu de *Ur Chaldæorum* in *Haran*, ubi remansit 5. annis, quo tempore genuit filios, indeque ingrediens anno ætatis 75. *Tulit Sarai uxorem suam, & animas quas fecerant in Haran, & pervenerunt in terram Chanaan*, ubi ætatis anno 100. genuit Isaac, 30. annis post egressum ex *Ur*, Hoc totum colligitur ex c. 12. v. 4. & seq. Gen.

Ad VI. Illam vocem *Non audierunt* in c. 22. significare *non intellexerunt*, vel quia non callebant linguam Hebraicam, qua Christus usus est, ut dicitur Act. c. 24. v. 14. Vel quia non audierunt linguam articulatam, sed confusam instar tonitru: uti & legitur simile Joan. c. 12. v. 28.

Ad



Ad VII. In his 40. annis includi annos, quibus Samuel ante Saul præfuit Israeli. Sensus autem libri Regum est hic: jam regnaverat uno anno Saul, quando indixit bellum Philistæis, & postea duobus adhuc annis regnavit in Israel. Vel uno anno adhuc regnavit, qui annus junctus primo facit duos annos, & sic duobus annis regnavit in Israel: qui sensus est conformis Hebræo originali, quod sic habet: *Filius anni* (unius vel primi) *erat Saul in regno suo, & altero anno regnavit in Israel.*

Ad VIII. Illud Actorum dictum fuisse à quibusdam Judæis, qui hæretice docebant, Gentiles non posse obtinere salutem, nisi prius fierent Profeliti, & Judaismo infererentur, quem errorem damnarunt Apostoli in 1. Conc. Jerosolymis, quem etiam damnat Paulus scribens ad Galatas, hominesque docens non salvari per circumcisionem, aliasque legis Mosaicæ cæremonias, sed per gratiam Jesu Christi.

Ad IX. In primo textu D. Petrum redarguere eos, qui docebant necesse esse ad salutem, ut Gentiles ad Christum conversi circumciderentur, & observarent legem Moylis: contra quos D. Petrus docet, Christianos non esse obligandos ad cæremonias legis non modo, quia sunt jugum gravissimum, & moraliter importabile, sed etiam quia sunt inutiles ad justificationem. Textum vero Deut. intelligi de præcepto Amoris Dei, quod esse facillimum observatu nemo non experitur, qui illud religiose observat.

### *Objectiones Contra Epistolam D. Pauli ad Hebræos.*

I. Illa Epistola canonica non est, quæ favere videtur hæreticis Novatianis: atqui Epistola Pauli ad Hebræos ita favere videtur: ergo non est canonica. min. prob. Hæc epistola c. 6. dicit: *Impossibile est eos, qui semel sunt illuminati iterum renovari ad pœnitentiam.* Item c. 10. v. 26. dicit: *Non relinqui bestiam pro pec-*

cato illis, qui voluntarie peccant post acceptam notitiam veritatis. Et c. 12. v. 16. & 17. de Esau dicit: *Non invenit penitentiae locum, quamquam cum lacrymis inquisisset eam.* Sed hæc omnia favere videntur hæresi Novatianorum, qui aliqua peccata irremissibilia volebant: ergo.

II. Hæc Epistola ad Hebræos favere videtur Arianis, Socinianis, & Unitariis, dum c. 1. v. 3. Filius Divinus non pronuntiatur *Patri consubstantialis*, sed solum *splendor gloriæ, & figura substantiæ ejus.* Et v. 4. solum excellentissima inter Creaturas asseri videtur, dum dicit: *melior Angelis effectus.* Ergo.

III. Hæc Epistola c. 1. v. 5. probat Christum esse filium Dei ex verbis 2. Reg. c. 7. v. 14. *Ego ero illi in Patrem:* quæ verba ad literam de Salomone dicta sunt: ergo ex his verbis hujus Epistolæ non probatur idipsum solide: cum solum ex sensu literali firmum argumentum sumi possit.

IV. Hæc Epistola c. 9. v. 4. dicit, fuisse in Arca urnam auream habentem Manna, & Virgam Aaron, quæ fronduerat, & Tabulas legis: sed hoc contradicit L. 3. Reg. c. 8. v. 9. ubi habetur: *in Arca autem non erat aliud, nisi duæ tabulæ lapideæ, quas posuerat in ea Moyses in Horeb.* Ergo.

V. Hæc Epistola dum c. 9. v. 15. loquitur de testamento proprie dicto, quod morte testatoris confirmatur, allegat verba Exod. c. 24. Et Levit. c. 14. v. 49. *Hic sanguis testamenti, quod mandavit ad vos Deus.* Ubi nomine testamenti intelligitur foedus, seu pactum; atqui non omne pactum est testamentum: ergo.

VI. Ipsi Ss. Patres fatentur, certum non esse, hanc Epistolam esse S. Pauli: Ita Tertul. lib. de pudicitia eam tribuit Barnabæ. Hieron. ait: certum non esse foetum esse Paulinum. S. P. Aug. lib. 16. de Civit. Dei c. 22. ita scribit: In Epistola, quæ scribitur ad Hebræos, quam plures Apostoli Pauli esse dicunt,

cunt, quidam vero negant, multa & magna conscripta sunt. Ergo hæc Epistola Canonicis non est annumeranda libris.

VII. Hæc Epistola ad Hebræos non est foetus D. Pauli: ergo. ant. prob. Initio hujus Epistolæ neque exprimitur nomen Pauli Apostoli, neque hæc Salutatio: *gratia vobis & pax &c.* quam in aliis omnibus suis Epistolis solet apponere: ergo.

VIII. In hac Epistola est longe diversus stylus à stylo aliarum Epistolarum Pauli: ornatior & gravior est, quam in aliis tredecim Pauli Epistolis, in quibus se ipsum imperitum sermone, nec in sublimitate sermonis venisse dicit: ergo.

IX. Author sub finem hujus Epistolæ scribit se reversurum ad Judæos: quod certe in Paulum non cadit, qui, ut eos tanquam suos capitales hostes effugeret, Cæsarem appellavit: ergo.

X. Author hujus Epistolæ c. 2. v. 3. sese annumerat iis, qui non à Christo, sed ab Apostolis doctrinam acceperunt; atqui Paulus ad Galat. c. 1. affirmat, se non ab homine, sed à Christo per revelationem accepisse Evangelium: ergo.

## S O L U T I O N E S.

**A**D I. Apostolum loqui de eo, qui peccat contra Spiritum S. id est, qui à Spiritu S. illuminatus, habens plenam cognitionem veritatis, adhuc voluntarie & ex malitia cognitam & exploratam veritatem oppugnat. Hunc ergo impossibile est, ait Paulus, rursus renovari ad poenitentiam: id est, moraliter impossibile, seu perquam difficile est, ut convertatur; tum quia qui sic peccant, ut plurimum non convertuntur: tum quia qui in Spiritum S. peccant, directe resistunt gratiæ, qua sola curari possent: quæ est unicum remedium ad recuperandam salutem & veniam: quamvis contingere possit absolute, ut tales peccantes tandem suasionibus cedant, gratiam ac-

acceptent, & sic eis remittatur peccatum. Et sic intellectus textus Apostoli minime Novatianis favet, utpote qui aliqua peccata absolute prorsus, ac omnino irremissibilia esse docebant. Præterea S. Chrysost. & Theodoretus cum aliis Ss. Patribus dicunt, textus citatos primum, & secundum debere intelligi de renovatione rursus per baptismum, non autem reconciliatione per pœnitentiam: ita ut sensus sit iste: Impossibile est rursus renovari ad pœnitentiam, id est, recuperare baptismatis gratiam, quatenus gratia renovationis & regenerationis est: non autem quod impossibile sit obtinere veniam peccatorum per pœnitentiam, & justificari per gratiam reconciliationis; nomine hostiæ enim hic intelligitur baptismus, aut potius mors & passio Christi, quatenus in baptismo operantur. Unde sequitur quod Apostolus in utroque textu non excludat pœnitentiam, sed tantum iterationem baptismi, ita ut velit in Ecclesia non esse locum secundi baptismatis, qua iterum sicut prius abluiamur. Tertius textus minime servire potest Novatianis, quia Esau pœnitentia non fuit veta: nam ut loquitur Theodoretus in hunc locum, *Esau non flevit agens pœnitentiam, sed fratris felicitati incidens*. Tandem si hæc verba faverent Novatianis: etiam ista Christi verba Matth. c. 12. v. 32. *Qui autem dixerit (verbum) contra Spiritum S. non remittetur ei, neque in hoc Sæculo, neque in futuro*: Novatianis faverent.

Ad II. Nomina *Splendoris & figuræ*, seu ut ait Græcus, *Characteris substantiæ ejus* (ut explicat Theodoretus in hunc locum) mire exprimunt, & explicant coexistentiam, coeternitatem, consubstantialitatem Filii cum Patre: sicut enim ignis aut sol non est splendore, duratione anterior, nec ipsum libere, sed necessario, immutabiliter & perpetuo diffundit, nec ab eo separabilis est: ita Pater æternus filium suum duratione non præcedit, nec eum libere, sed naturaliter & continuo generat, estque ab eo prorsus inseparabilis. Ita etiam sentit S. Chrysost.

Hom.

Hom. 2. ad Hebr. Illa verba: *tanto melior Angelis effectus*: juxta Theodorethum in epist. ad Ephes. intelligi debent quoad humanitatem.

Ad III. Verba illa, *ego ero illi in Patrem* in literali sensu de Salomone quidem dicta esse, qui filius Dei per adoptionem, & proinde improprie talis fuit: attamen ex intentione Spiritus S. verba hæc etiam Christum mystice ac prophetice respexisse, qui natura filius Dei est. Et negatur, quod solum ex sensu literali ad stabiliendam fidei veritatem validum argumentum sumi possit, si enim hoc verum esset, nullum ex iis, quæ mystice, ac typice in veteri testamento Christum designant, efficax argumentum confici posset: quod nullus dixerit.

Ad IV. Apostolum per præpositionem *in* non significare *intra*, sed juxta Arcam in aliquo sinu, qui erat appendix Arcæ: quomodo Christus Luc. c. 3. dicitur moriturus *in Jerusalem*, cum tamen juxta civitatem illam sit mortuus, & non intra muros ejus; sic licet D. Joannes baptizaret juxta urbem Bethaniam, dicitur tamen *Hæc in Bethania facta sunt*. Vel dicatur cum Theophilacto & aliis, quod tempore Salomonis non fuerit in Arca nisi duæ tabulæ legis, cætera autem postea fuerint reposita à Jeremia, quando abscondit Arcam, ut refertur 2. Machab. c. 2. v. 5.

Ad V. Quod licet vox Hebraica *Berith* foedus & testamentum promiscue significet, tamen LXX. Interpretes, quorum hic versionem S. Paulus secutus est, *Diathecin*, id est, ultimam dispositionem non sine Divino afflatu verterint, quia cum foedus illud cum Israel non esset consummandum nisi per sanguinem, & mortem Jesu, quo fiebat, ut esset pactum de conferenda per mortem ejus hæreditate vitæ æternæ, aptissime pactum illud vocare potuit Paulus nomine testamenti, prout ad Rom. c. 9. Ad Galat. c. 3. & 4. alibi loquens de lege veteri semper testamentum vocat id, quod Hebræi dicunt *Berith*. Imo adeo trita est in Ec-



clesia vox hæc *testamentum* pro Hebraica voce *Berith*, ut nihil frequentius dicamus, vel audiamus, quam testamentum vetus, & testamentum novum.

Ad VI. Licet scriptor hujus Epistolæ esset incertus, tamen ex Ecclesiæ traditione habemus eam esse canonicam. Neque hæc Epistola quovis tempore, aut omnibus fuit indubia: inde neque libris Protocanonicis annumeratur: attamen jam ut Canonica, & genuinum Pauli scriptum respiciendum est, ut antiquitas demonstrat: hanc enim Epistolam ut Pauli factum agnoscebant. Ex Græcis Patribus Clem. Alexand. apud Euseb. l. 6. Hist. c. 14. Dionys. Alexand. in Epistola contra Paulum Samosatenum. S. Athan. Epist. ad Alexandrum Episc. Constantinop. &c. E Latinis PP. præter Concil. Carthag. III. & Innoc. I. Epist. 3. ad Exup. S. Hier. Epist. ad Dardanum. S. P. Aug. l. 2. de doct. Christ. c. 8. S. Hilarius l. 4. de Trin. S. Ambros. l. 1. de fide c. 4. &c. Ergo. immerito Lutherus cum suis hanc epistolam è Canone Librorum Sacrorum expungit.

Ad VII. Neg. ant. ad prob. conc. ant. neg. conseq. quia D. Paulus justas habuit causas non exprimendi suum nomen initio hujus Epistolæ. *Prima* est: Cum enim Paulus sciret nomen suum esse invisum Hebræis, ne eos à lectione averteret, consulto nomen suum non inscripsit, neque salutationem ordinariam apposuit, ut in aliis. Ita Clem. Alexand. Apud Euseb. l. 1. c. 11. cui consentit D. Hier. l. de script. Eccles. in Paulo. *Secunda* est: ne cum Apostolus gentium esset, præter officium ad Hebræos scribere videretur. Ita Theodoreth. præfat. Comment. in c. 1. ad Galat.

Ad VIII. Paulo non defuisse sublimitatem styli: sed ut omnes Christo lucrifaceret, nunc grandiori, nunc simpliciori stylo usum esse, uti unicuique expediebat.

Ad IX. Paulum, cum Romæ esset, ad Judæos scribere potuisse se ad illos reversurum: hanc enim Epistolam Paulus nomin-

minatim non direxerat ad Judæos Hierosolymis commorantes, quorum ut rabiem effugeret, cæsarem appellaverat, sed ad Judæos in Asia dispersos, ad quos citra periculum redire poterat.

Ad X. Paulum hic non agere de confirmatione Evangelij per doctrinam, quod hoc doctrina Christi sit: sed de confirmatione per miracula & prodigia, quibus usque ad ipsum, & suo tempore doctrina Christi per Apostolos confirmabatur: ut proinde in Epist. ad Galat. c. 1. dicere potuerit, se non audivisse, aut didicisse Evangelium ab homine, sed à Christo: & in epist. ad Heb. c. 2. scribere potuerit, doctrinam à Christo enarratam confirmatam fuisse in ipsum, & usque ad ipsum per prodigia, & miracula Apostolorum.

### *Objectiones Contra reliquas Epistolas Pauli.*

I. Rom. c. 4. v. 20. Abraham in repromissione Dei non hæsitavit diffidentia. Et Gen. c. 17. v. 17. Risit Abraham dicens in corde suo: putasne centenario nascetur filius, & Sara nonagenaria pariet. Ergo.

II. Rom. c. 5. v. 13. dicitur: Usque ad legem peccatum erat in mundo: peccatum autem non imputabatur, cum lex non esset. Et Gen. c. 6. v. 3. Deus delevit homines propter eorum peccata: ergo semper fuit imputatum peccatum, etiam ante legem scriptam.

III. Rom. c. 8. v. 16. dicitur: Spiritus testimonium reddit spiritui nostro, quod sumus filii Dei. Et Eccl. c. 9. v. 1. dicitur: Nescit homo, utrum amore an odio dignus sit. Ergo.

IV. Rom. c. 12. v. 19. dicitur: Non vosmetipsos defendentes, sed date locum iræ. Et Act. c. 24. v. 2. Paulus seipsum coram Agrippa defendit. Ergo.

V. Corinth. c. 1. v. 17. dicitur: Non me misit Christus baptizare, sed evangelizare. Et Matth. ult. c. omnibus Apostolis Christus dicit: Docete omnes gentes baptizantes eos. Ergo.

VI. 1. Corinth. c. 13. v. 7. dicitur: Charitas omnia credit. Et 1. Joan. c. 4. v. 1. dicitur: Nolite credere omni spiritui. Ergo.

VII. Galat. c. 1. v. 10. dicitur: *Si adhuc hominibus placerem, Christi servus non essem.* Et 1. Corinth. c. 10. v. 33. dicitur: *per omnia omnibus placeo.* Ergo.

VIII. Galat. c. v. 25. dicitur: *Sina mons est in Arabia, qui conjunctus est ei, quæ nunc est Jerusalem.* Atqui Sina à Jerosolyma longe distat. Ergo.

IX. Coloss. c. 1. v. 24. dicitur: *Adimpleo ea, quæ desunt passionum Christi.* Et Joan. c. 19. v. 30. Christus moriendo dixit: *Consummatum est.* Ergo.

X. 1. Ad Timoth. c. 2. v. 12. dicitur: *docere mulieri non permitto.* Et ad Titum c. 2. v. 3. dicitur: *ut senes prudentiam doceant adolescentulas.* Ergo.

XI. 1. Ad Timoth. c. 5. v. 14. dicitur: *Volo juniores nubere, filios procreare.* Et 1. Corinth. c. 7. v. 7. dicitur: *Volo omnes vos esse cælibes, sicut me ipsum.* Ergo.

## S O L U T I O N E S.

**A**D I. Abraham non fuisse incredulum: unde non ex incredulitate, sed ex admiratione, quærit, *putasne centenario &c.* & ideo pro verbo *risit*, Chaldaeus habet, *gavissus est.*

Ad II. Peccatum à Deo semper fuisse imputatum: sed non semper fuisse imputatum, id est, reputatum tale ab hominibus solo lumine naturali instructis, qui non existimabant, se esse peccato obnoxios. Ideo existentiam peccati originalis probat Apostolus ex effectu & pæna ejusdem peccati, puta ex morte, quæ regnavit in omnes, quotquot ab Adamo usque ad Moysen vixerunt: ergo & causa mortis, nempe peccatum originale.

Ad III. Apostolum ad Rom. loqui de testimonio, quod, licet sit certissimum ex parte Spiritus S. non est tamen certum ex parte nostri, nisi certitudine conjecturali, & ad summum morali: nam non sumus certi, an illud testimonium sit à Spiritu S.

S. an vero à spiritu maligno transfigurante se in Angelum lucis? Eccl's. vero loqui de certitudine absoluta & infallibili, quam nemo de sua salute potest habere absque speciali revelatione quamdiu est in vita.

Ad IV. Verbum *defendere* in Primo textu sumi pro *ulcisci*, quomodo Judith c. i. dicitur: Nabuchodonosorem jurasse *per thronum*, quod *se defenderet*, id est, ulcisceretur. In secundo textu sumi pro innocentiam suam probare, suæque indemnitati consulere, quod valde licitum est, licet vindicta sit lege Dei prohibita.

Ad V. Apostolum dicere, quod non sit missus baptizare *principaliter*: quia primarium Apostolatus officium est *prædicare*: baptismi enim dispensatio committi solet Parochis, & aliis presbyteris.

Ad VI. Apostolum non loqui de doctrina, sed de recte factis proximi, quibus relatis homo charitatem habens non contradicit, sed narrantibus facile assentitur. D. Joannem vero loqui de doctrina, docereque, probandos esse *spiritus*, si ex Deo sint.

Ad VII. Apostolum velle placere omnibus, omnes ædificando, neminem offendendo &c. sed non velle placere, id est, gratiam illorum occupare docendo grata illis, qui Christi doctrinæ repugnantia docent, ac faciunt: sic enim servus Christi non esset.

Ad VIII. Montem *Sina* non realiter, sed mystice esse conjunctum, id est, ut vox græca sonat, *similis* Jerosolymæ ut nunc est: sicut enim in Sina olim, ita nunc in Jerusalem traditur lex mere Cæremonialis & servilis, utrobique generantur filii, non liberi, sed servi.

Ad IX. Opus fuisse, ut Christus multa pateretur in suo corpore naturali, & etiam in suo corpore mystico. Porro Christus moriendo personales passiones consummavit, sed non consum-

summavit passiones corporis mystici, cujus membra multa pro Christo & Ecclesia patiundo *adimplent ea, quæ desunt passionum Christi.*

Ad X. Apostolum non permittere docere Mulieri publice in Ecclesia, ut sese explicat 1. Corinth. c. 14. v. 34. his verbis: *Mulieres in Ecclesiis taceant.* Sed non tantum non permittere, verum suadere, ut privatim domi suæ puellas suas, & ancillas suas doceant.

Ad XI. Apostolum 1. ad Corinth. exoptare, ut omnes à nuptiis abstineant, ut ipse abstinuit: verum velle juniores viduas, quibus inest periculum incontinentiæ, nubere, cum melius sit nubere, quam uri. Hic ergo Apostolus *non legem figit,* ait S. P. August. de viduis. *Sed remedium ostendit.*

### *Objectiones Contra Epistolam Jacobi, & Judæ.*

I. Eusebius l. 2. hist. c. 28. asserit: Epistolas Jacobi & Judæ esse adulterinas: ergo non sunt Canonici.

II. In multis Exemplaribus græcis hæc Epistola Jacobi nomine S. Jacobi non inscribitur: ergo.

III. Author hujus Epistolæ Jacobinæ utitur salutatione tantum prophana, non gratiam divinam Sonante: *Jacobus Dei & Domini N. J. C. servus 12. tribus salutem.* Ergo ejus Author non est Apostolus Christi.

IV. In hac Epistola Jacobi justificatio non fidei, sed operibus adscribitur, cum tamen Paulus ad Rom. c. 3. dicat hominem justificari ex fide sine operibus: ergo aberrat à doctrina Apostolica.

V. Solent Apostoli aliquid semper interferere de Fidei doctrina; atqui hæc epistola tota est in operibus commendandis, de fide autem omnino silet: ergo non est Apostolica.

VI.



VI. Author hujus epistolæ profert testimonia ex epistolis Petri, & Pauli: ergo non est Apostolus, sed aliquis ex Apostolorum discipulis.

VII. In hac Epistola c. 1. v. 13. dicitur: *Deus neminem tentat.* Et Gen. c. 22. v. 1. dicitur: *Tentavit Deus Abraham:* ergo

VIII. Author hujus epistolæ cap. 1. & 2. Legem veterem vocat legem libertatis. Et Paulus ad Gal. c. 4. vocat eam legem servitutis. Ergo.

IX. Judas asserit se post Apostolos vixisse, cum ait: *Memores estote verborum, quæ prædicta sunt ab Apostolis Domini N. J. C. qui dicebant vobis, quoniam in novissimis temporibus venient illusores &c.* Citatque aliqua loca Petri 2. Pet. c. 3. & Pauli. 1. ad Timoth. c. 4. 2. ad Timoth. c. 3. Ergo.

X. Judas citat librum *Enoch*, qui est apocryphus: ergo & ejus Epistola est apocrypha, & sic consequenter minime Canonica.

XI. Judas testimonium *Enoch* non ut apocryphum, sed ut propheticum citat: ergo approbat totum librum.

## S O L U T I O N E S.

**A**D I. neg. ant. Sic enim scribit Eusebius Cæsariensis lib. 2. hist. Eccles. c. 23. *Tamen & istas ( Jacobi & Judæ ) cum reliquis in quam plurimis Ecclesiis publico receptas approbatasque legitari cognovimus.* Dum autem scribit ante ista verba, quod Epistolas has nonnulli spurias & supposititias esse existimarint, & pauci admodum ex veteribus harum Epistolarum mentionem fecerint, dicendum, quod hoc Eusebius duntaxat historice referat, cum ab horum opinione se abhorrire allatis mox subsequis verbis declaret.

Ad II. Nomen *Jacobi* casu vel malitia in quibusdam solum exemplaribus græcis excidisse, cum illud adhuc in vetustissimis  
lati-

latinis codicibus, & in compluribus græcis tam editis quam manuscriptis extet.

Ad III. neg. ant. quia quando Apostoli apprecantur alicui salutem, adprecantur haud dubie salutem Christianam, quæ & Dei gratiam & pacem complectitur: ergo salutatio non est prophana, alias etiam illa, quæ habetur Act. c. 15. esset prophana.

Ad IV. neg. Conseq. Inter doctrinam utriusque Apostoli nulla est oppositio: nam Paulus excludit à negotio justificationis opera citra fidei & gratiæ Spiritum facta: & D. Jacobus requirit opera fidei & gratiæ: quæ etiam requirit Paulus ad Rom. 3. dicens: *Factores legis justificabuntur.*

Ad V. neg. min. Nam in hac Epistola scribitur: *Probatio fidei vestræ patientiam operatur c. 2. v. 3. & Fides cooperatur operibus illius, Abrahæ, & ex operibus fides consummata est. c. 2. v. 22.* Præterea magis commendat opera quam fidem, quia contra eos scribit, qui neglectis operibus ex sola fide salutem sibi pollicebantur, uti nostri Sectarii: unde dicit. c. 2. v. 24. & 26. *Ex operibus justificatur homo, & non ex fide tantum - - - fides sine operibus mortua est:* utrumque ergo commendat & opera, & fidem.

Ad VI. Neg. ant. Equidem ad marginem hujus Epistolæ e regione verborum Jacobi annotantur quædam loca Petri & Pauli, verum inde concludi non debet unum Apostolum ab alio citari, sed similes sententias in Apostolis inveniri: quod ideo fecit Spiritus S. ut ostenderet se unum eundemque eorum omnium esse Authorem.

Ad VII. Tentationem duplicem spectari posse, Primam *seductionis*, quæ ad peccatum sollicitat, & hanc Apostolus Deo denegat, qui neminem excitat ad male agendum. Secundam *probationis*, quæ est materia luctæ & victoriæ, meritorum & gloriæ, hac tentatione probavit Deus Abraham.

Ad VIII. negatur loqui S. Jacobum c. 1. v. 25. nominando legem perfectam libertatis, loqui de lege testamenti veteris: loqui-

loquitur enim tunc de lege nova seu Evangelica, quæ non est lex timoris & servitutis, sed amoris & charitatis.

Ad IX. Neg. ant. Judas enim cum aliis Apostolis vixit: sed quibusdam, nimirum Petro & Paulo, Jacobo supervixit, posteriusque Epistolam scripsit, & ideo merito potuit ita loqui.

Ad X. Retorquetur argumentum: Paulus Apostolus Act. c. 17. & 1. Corinth. c. 15. profert testimonia ex Ethnicis Poetis, Menandro, & Epimede: ergo ejus scripta sunt profana? In apocryphis ergo & Ethnicis libris potest esse aliquid veri, & illud est, quod Apostoli Spiritu S. inspirante protulerunt: nec tamen propterea totum librum approbant.

Ad XI. Sine dubio credendum esse, Enoch aliquid prophetici & Divini scripsisse, & ejus vaticinium in eo libro, quem Judas citat, insertum fuisse: liber nihilominus est apocryphus, quia multa fabulosa simul cum hoc vaticinio, quod Judas citat, continet.

### *Objectiones contra Epistolam secundam Petri, secundam & tertiam Joannis & Apocalypsim.*

I. *Contra Epistolam secundam Petri* Hæretici nihil aliud opponunt, quam diversitatem styli à prima Epistola, quam esse Petri certo constat. Verum hæc diversitas provenit vel à diverso interprete: vel à diverso tempore, quo scripsit Petrus: non enim novum est eundem hominem diverso tempore diverso stylo scribere. Hæc Epistola secunda Petri à Concilio Laodiceno anno 372. Et Carthagiensi III. anno 397. Demum à Florentino & Tridentino in Sacrorum Librorum Canonem est relata: & D. Petro indubitanter adscripta est, ut ipsum nomen *Simon Petrus* initio positum testatur.

II. *Contra 2. & 3. Joannis.* opponunt authoritatem Papiæ, qui apud Euseb. l. 3. hist. Eccles. c. 39. duos fuisse Joannes asse-

rit, unum Apostolum, & alium qui *Senior* dicebatur: & cum Author harum Epistolarum non Apostolum sed *Seniorem* se nominet, verisimile est has epistolas esse ab illo Joanne Seniore scriptas. R. Neg. conseq. Papias enim non dixit has Epistolas non esse Joannis Apostoli, sed solum duos Joannes nominat, uter autem epistolas scripserit, tacet. Porro Joannes Apostolus poterat se *Seniorem* appellare, tum quia post omnes alios Apostolos vixit, & ad extremam senectutem pervenit: vixit enim usque ad Trajani tempora, & imperium, ac mortuus est anno circiter ab Incarnatione Domini 101. ut S. Hier. l. de Script. Eccles. observat. Tum quia *Senior* idem est ac *Presbyter*, Joannes autem erat Presbyter & Apostolus.

III. D. Hieron. l. de Script. Eccles. in Joan. asserit, Epistolam secundam & tertiam Joannis adscribi Joanni Presbytero: ergo. R. D. Hieron. per Joannem Presbyterum intellexisse Joannem Apostolum: ut constat ex sua ad Evagrium epistola 85.

IV. *Contra Apocalypsim* opponunt: Titulum hujus libri non esse Joannis Apostoli, sed Joannis Theologi: ergo. R. Eundem esse Joannem Apostolum & Joannem Theologum: & quidem præ cæteris Apostolis est Theologus nominatus, quia cæteri de humanitate Christi, Joannes vero de ejus Divinitate præcipue scripsit.

V. In hoc libro c. 1. & ult. dicitur: *Beatus homo qui servat verba prophetiæ hujus*: cum tamen nemo sciat, quid hæc Prophetia significet? ergo. R. D. Joannem per Prophetiam intelligere totum librum, in quo non mirum est, quod multa, quæ prophetice prædicuntur, sint obscura: in eo tamen multa sunt vitæ præcepta clarissima, quibus nos hortatur ad patientiam & perseverantiam in persecutionibus.

VI. Author Apocalypsis favere videtur c. 19. v. 7. & c. 20. errori Cerinthi de Millenario terreno Christi regno, de nuptiis & deliciis, quibus justi, qui ante judicium generale mille  
annis

annis una cum Christo in terris regnaturi erant, frui debebant. *℞.* Illa, quæ citatis locis libri Apocalypseos referuntur, non ad litteram, & carnaliter esse intelligenda, ut perperam interpretatur Cerinthus, sed spiritualiter de Ecclesia sponsa Christi, quam Joannes immortalitatis, aliisque dotibus exornatam vidit, non tamen priusquam fieret resurrectio prima, id est resurrectio spiritualis animæ à peccatis, quæ soluta corpore mox cælo donatur. Hanc autem resurrectionem appellat S. Joannes *primam*, ad discrimen resurrectionis secundæ generalis, in qua omnes animæ cum suis corporibus iterum erunt unitæ, & resurgent. Per mille vero annos hujus primæ resurrectionis denotat S. Joannes spatium illud, quo animæ justorum gloria in cælis una cum Christo potituræ sunt à tempore Ascensionis Christi usque ad universale judicium, in quo animæ justorum reassumentes corpora sua beatitudine completa æternum fruentur. Ponit autem S. Joannes determinatum mille annorum pro indeterminato, quod in sacris literis sæpe fieri solet.

VII. Cap. 6. Apocalypsis favere videtur errori docentium, animas justorum ante finale judicium non habere stolam gloriæ, seu facialem visionem Dei. *℞.* Verba illius capitis intelligenda non esse de beatitudine animæ, quasi hæc animabus Martyrum sit differenda, donec compleatur numerus electorum in finali judicio, nam c. 7. v. 9. Hæ animæ apparent stantes ante thronum Dei in conspectu agni amictæ stolis albis, & consequenter jam fruenter beatitudine: sed esse referenda ad unionem earundem cum suis corporibus, pro qua obtinenda requiescere debent ad finale judicium.





## PARS SECUNDA

### *De Sacris Traditionibus, seu Verbo Dei non scripto.*

Secundus locus Theologicus, unde doctrina Theologica haurienda est, sunt Traditiones, seu Verbum Dei non scriptum, ex quibus Divina ac infallibili autoritate difficultates deciduntur, quæ tum circa ipsum Verbum Dei scriptum, seu scripturam Sacram, tum circa alia fidei & morum dogmata emergunt, & ex S. scriptura satis dirimi non possunt. Igitur unica quæstione subdivisa in Paragraphos de his agemus. Unde fit

### Q U Æ S T I O U N I C A

*An præter Scripturam Sacram aliqua Traditiones tanquam Verbum Dei non scriptum pro regula fidei admitti debeant?*

#### § I.

Præ Notanda necessaria ad statum quæstionis.

**N**otandum 1. in præsentī nos loqui de Traditione stricte & Theologice sumpta, seu de Traditione Sacra: & hæc definitur, quod sit *doctrina fidei aut morum non scripta, sed viva voce quasi de aure ad aurem successive tradita.*

Notandum 2. Dum dicitur in definitione traditionis sacrae, *doctrina non scripta*: hæc verba non esse intelligenda, quod traditio sacra nullibi scripta esse debeat: nam traditiones in scriptis SS. PP. & actis Conciliorum revera asservantur; sed esse intelligenda, quod ejusmodi doctrina viva voce non scripto à suo primo Authore tradita esse debeat, quamvis deinde à successoribus fuerit literis consignata.

No-

Notandum 3. Traditionem spectato suo Authore dividi in divinam & humanam. *Divina* prout extitit in lege naturæ, in lege Mosaica, atque etiam hodie in lege Evangelica existit, est *Verbum Dei non scriptum, sed traditum: seu doctrina Dei in S. literis non scripta, sed à Deo immediate revelata, & a Majoribus ad posteros quasi de aure in aurem successive tradita.* Talis fuit in lege naturæ doctrina de mundo isto à Deo condito, de remedio adhibendo pro originali peccato delendo, de ritibus, quibus tunc Deus colebatur: cum enim illo tempore doctrina Dei non esset scripta, regebantur homines doctrina à Deo tradita, & de aure in aurem communicata. Post legem scriptam & ante Christum fuit talis doctrina de Divinitate Sacrorum Librorum, de remedio pro delendo peccato originali in fæminis, quæ scripta non erant, & tamen ut à Deo dicta habebantur. *Traditio Divina* prout hodie in lege nova existit non incongrue describitur, quod sit *doctrina à Christo, vel Spiritu S. Apostolis revelata, ab his ad posteros ore duntaxat transfusa, licet in libris Scripturæ Canonicis consignata non sit, sed in aliis fide dignis monumentis: tales traditiones sunt, quod Evangelia secundum Matthæum, Lucam, Marcum, Joannem, Actus Apostolorum: Epistolæ Pauli: alique Scripturæ Sacræ libri sint Canonici. Item de perpetua Deiparæ Virginitate: de parvulis ante usum rationis baptizandis: de non rebaptizandis Hæreticis: de septenario Sacramentorum numero: aliæque ad fidem vel Sacramentorum materias & formas spectantes, quæ nullibi verbo Dei scripto exprimuntur, sed tamen à Christo, vel Spiritu S. Apostolis revelata creduntur. Traditio humana est doctrina quædam non revelata divinitus, sed ab humana tantum auctoritate dimanans, & ab uno alteri communicata.*

Notandum 4. Traditionem humanam dividi in *Apostolicam & Ecclesiasticam.* *Apostolica* est doctrina, quam Apostoli

Q q q 3

ipsi

ipsi quatenus Ecclesiæ Pastores propria autoritate assistente tamen Spiritu S. instituerunt, & ad nos viva voce transmisserunt, v. g. observatio diei Dominicæ loco Sabbathi, Paschæ, jejunii quadragesimalis &c. *Traditio Ecclesiastica* est illa, quæ post decessum Apostolorum ab Ecclesiæ Prælati Apostolorum Successoribus accedente fidelium usu fuit introducta, & tandem per modum consuetudinis tacito sibi succedentium fidelium usu recepta, & ad nos usque transmissa v. g. Vigiliæ, festorum celebrationes, aquæ lustralis usus, abstinencia à carnibus, ovis, lacticiis certis anni diebus, pia & laudabilis formandæ crucis consuetudo, &c.

Notandum 5. Traditionem Ecclesiasticam humanam aliam esse *Ecclesiæ Universalis*, live universam respicientem Ecclesiam: ut diei Dominicæ observatio loco Sabbathi: aquæ benedictæ asperfusio &c. Aliam *particularem*, quæ Ecclesiæ particulari est commissa, ut jejunium Sabbathi olim Romæ observatum: aliam *perpetuam*, quæ dogma aliquod proponit: aliam *temporalem*: qualis fuit observatio legalium usque ad Evangelii promulgationem: aliam *necessariam*, quæ in forma præcepti est tradita, ut admixtio aquæ cum vino in Missæ Sacrificio: aliam *liberam*, quæ in forma tantum Consilii est tradita, ut aquæ lustralis asperfusio.

Notandum 6. Ex sola Traditione Divina, utpote solâ à Deo revelata, elici posse conclusionem Theologicam. Ratio est: quia Conclusio Theologica ducitur ex propositionibus supernaturalibus, & a Deo revelatis: atqui solæ propositiones Traditionis Divinæ sunt à Deo revelatæ: reliquæ enim ut Apostolicæ, & Ecclesiasticæ Authores habent Apostolos, & eorum Successores. Ergo.

Notandum 7. Ex Traditionibus Apostolicis, & Ecclesiasticis contra Hæreticos Theologum posse trahere firmum saltem Argumentum & ad Ecclesiæ consuetudines, & fidei Dog-

Dogmata comprobanda , etſi ſcripta in ſacris literis non reperiuntur. Ratio eſt : quia & ipſe S. Paulus 1. Corinth. c. 11. v. 16. Eccleſiæ conſuetudinem contentioſis Corinthiis oppoſuit : ergo & nos pariter Eccleſiæ morem ab Apoſtolis receptum , tot ſæculorum uſu , ac gentium conſenſione probatum recte hæreticis opponimus , maxime dum hi à nobis Scripturam in alicujus rei confirmationem eſſagitant. Imo Paulus ipſe ad convincendos contentioſos Corinthios non tam Scriptura & ratione , ſed potius traditione utendum eſſe duxit , cum eos ad morem Eccleſiæ his verbis revocaverit dicens : *Si quis videtur contentioſus eſſe , nos talem conſuetudinem non habemus , nec Eccleſia Dei* : quaſi diceret : ſi quis adeo eſt durus & pertinax , ut argumentis poſitis non adducatur , ſed adhuc contendat fæminam aperto capite orare oportere , hunc ego ( Paulus ) non aliter refello , quam quod Eccleſiæ Dei conſuetudinem non habeat. Ex quo patet quantam vim ipſe Apoſtolus in traditione agnoverit , dum eos , quos nec Scriptura , nec ratio moviſſet , Eccleſiarum more & conſuetudine movendos exiſtimavit. Quod ſi tanta vis conſuetudinis Eccleſiæ in rebus ad ſolum ritum ſpectantibus , ( ut erat fæminam non debere aperto capite orare ) quanto major erit in rebus fidem ſpectantibus ? Ergo convincens Theologus ex his traditionibus contra hæreticos argumentum deſumit.

Notandum 8. Lutheranos Traditiones credere imbecilliores eſſe , quam ut ductis inde argumentis dogmata fidei confirmentur. Nam quod Eccleſiæ Traditiones à Chriſto & Apoſtolis deſcenderint , exiſtimant nullo modo poſſe probari : cum omnia Verba Chriſti ( quæ Chriſti eſſe conſtant ) ab Evangeliftis fuerint ſcripta. Sed quidquid Chriſtus , quid Apoſtoli fuerunt locuti , ii ſolum noſcere potuerunt , qui Chriſtum & Apoſtolos audierunt , quorum cum nullus extet , nos nunc ne unum quidem dogma poſſe traditione probare : adeoque  
opor-

oportere, omnes fidei & Religionis controversias sacrarum literarum testimoniis componere, & nihil finire, nisi quod sacris literis est expressum; hinc eruditionis vere Theologicæ esse, nihil ultra nisi quod S. literis proditum est, definire: Cætera omnia esse problemata in illud rejicienda tempus, cum sublato speculo videbimus Deum facie ad faciem. Ista est genuina mens & doctrina Lutheranorum.

Notandum 9. Hæreticos nostri temporis traditiones sacras rejicientes, nec esse primos, nec solos hujus erroris Authores: sed hujus farinæ hæretici jam aliis retro sæculis fuere, qui ad solas Scripturas provocantes, Traditiones aspernabantur: quos S. Bernardus hom. 66. in Cantica commemorat. Sed & Arianis hanc hæresim tribuit S. P. August. in confictu contra Maximinum: & ut Author est Epiphanius hæres. 73. (qui & ipse hunc errorem Arianis hæres. 75. allignat.) dicit: Ariani certe, qui in Synodum Seleucianam convenerunt, non obscure sunt testati, se in fidei quæstionibus præter divinas Scripturas nihil omnino recepturos. S. Basilii Eunomium in eodem errore versatum dicit c. 25. de Spiritu S. & L. 1. contra Eunomium. Semi Arianis eundem errorem tribuit S. Epiphanius hæres. 73. æque Pelagiani dicunt, credamus quod legimus, & quod non legimus, nefas adstruere credamus. Ita S. P. Aug. c. 39. de nat. & grat. Nestoriani B. V. Mariam Theothocon, hoc est, Deiparam dicere nolunt, quod hæc vox nusquam in Scriptura extet, ut acta Concilii Ephesini, Cyrillus, & alii de Nestorianis scribentes referunt. Eutyches in Concilio Calcedonenfi Act. 1. dicebat: *In qua Scriptura jacent duæ naturæ?* Cui respondit Mamas Presbyter, & *quæ scriptura dicit Homousson?* Quid ad hæc Lutherani? damnant priores ut hæreticos: nonne & se ipsos ut hæreticos damnare debent, quia hi iisdem ac priores innituntur principiis: *nihil præter Scripturam sacram Apostolicam habere auctoritatem:*



*tem : sed solam Scripturam S. esse solam fidei & morum regulam , extra quam nullum dogma haberi potest de fide credendum. His prænotatis sit contra hos hæreticos*

§. II.

CONCLUSIO PRIMA.

In statu Legis naturæ extiterunt Traditiones Divinæ.

**P**ROBATUR: Nulla potest esse vera Religio sine certa fidei & morum regula: atqui in statu legis naturæ fuit vera erga Deum Religio: ergo in statu legis naturæ fuit certa fidei & morum regula. Subst. Atqui illa regula non erat Scriptura S. nulla siquidem tunc extabat: ergo ea regula erat Traditio. maj. est certa. min. constat ex eo, quia tempore legis naturæ toto illo intervallo, quo ab Adam usque ad Moysem bis mille & fere quingenti anni fluxerunt, exercebatur fides, & ritus ac cultus Deo per Adam, Abel, Seth, Enoch, Noe, Abraham, Isaac, Jacob, Melchisedech, aliisque justis exhibebatur. Adamus proinde filios suos docuit mysteria sibi revelata: filii Adami, quæ à patre didicerant, suis posteris ad Moysem usque non interrupta serie communicarunt. Hinc Deus Gen. c. 18. commendat Abrahamum, *quod præcepturus sit filiis suis, & domui suæ post se, ut custodiant viam Domini, & faciant judicium & justitiam.* Ex quibus patet, quod posterii Adami ritum colendi Deum acceperint non per Scripturam, sed per traditionem.

Confirmatur: Illa quæ tunc ad fidem in lege naturæ pertinebant, ipsi Adamo, cæterisque Patriarchis revelata, & ab his orali traditione ad posteros propagata fuisse, innegabile est: unde enim alias sequentia fidei suæ dogmata hausissent? quæ sunt de existentia Dei Remuneratoris: de Immortalitate animæ, de pæna æterna impiis infligenda, & justis æterna beatitudine de-

R r r

stinata:

stinata: de peccato originali & ejus remedio: de venturo Messia Redemptore generis humani: de ritibus sacrificiorum Deo offerendorum: de actibus fidei, spei, & charitatis &c. Profecto hæc haberi non potuerunt, nisi à Deo Patriarchis revelata, & ab his per successores ad posteros transfusa fuissent. Ergo.

## CONCLUSIO SECUNDA.

In lege Mosaica præter Scripturam extiterunt divinæ Traditiones ad fidem & mores spectantes.

**P**ROBATUR 1. Israelitæ non solum jubebantur scripturam legere, sed etiam Patres interrogare: nam Deut. c. 21. dicitur: *Interroga patrem tuum, & annuntiabit tibi, majores tuos, & dicent tibi.* Item Eccli. c. 8. *Non te præereat narratio seniorum, ipsi enim didicerunt à patribus suis.* Item Psal. 77. *Quanta mandavit patribus nostris (Deus) nota facere ea filiis suis, ut cognoscat generatio altera, filii, qui nascentur, & exurgent, & narrabunt ea filiis suis, ut ponant in Deo spem suam.* Ergo.

PROBATUR 2. Ipse Moyse Deut. c. 32. v. 7. jamjam moriens populum Judaicum ad Traditionem in cantico suo provocavit: *Memento dierum antiquorum, cogita generationes singulas, interroga patrem tuum, & annuntiabit tibi &c.* Ergo.

PROBATUR 3. Usque ad tempora Esdræ scripturæ in formam librorum redactæ non fuerunt, & in variis chartis dispersæ longo tempore inveniri non potuerunt, ut ex 4. Reg. c. 22. eruitur, ubi tanquam aliquid novum refertur, quod unum volumen legis Domini in templo repererint. Ergo.

PROBATUR 4. Judæi plura ut fidei dogmata credere debuerunt, quæ in Scripturis non expressa erant: v. g. Lib. omnes in suo Scripturarum Canone contentos esse Divinos: pro tollendo originali peccato dari remedium aliquod etiam pro foeminis pro quibus  
non

non erat circumcisio: imo & pro omnibus sive masculis sive foeminis ante octavum diem decedentibus: ergo ea tantum ex Traditione scire potuerunt, cum vetus testamentum nullam de his faciat mentionem.

Probatur 5. Per bis mille annos à Moysè usque ad Christum fuit quidem Scriptura Sacra, sed solum penes Israeliticum populum: cum tamen ex aliis gentibus multi haberent veram fidem, & ad veram Ecclesiam spectarent, quæ sola traditione adjunctæ sunt, ut Job & amici ejus, uti D. P. August. lib. 2. de peccat. Orig. c. 24. Item lib. 1. de Prædest. Sanct. nec non lib. 18. de civit. Dei c. 47. constanter asserit. Ergo.

Dices cum AA. Ex his nihil probari. Tum quia viva semper vox Dei sonabat in veteri Ecclesia. Tum quia Religio etiam sine Papatu, baptismo, cœna Dominica &c. fuit in veteri Ecclesia conservata: an idcirco ista in nova Ecclesia non sunt necessaria? sed

Contra Primum, quod temere dicitur, est: unde probatur, Dei vocem continuo auribus fidelium per bis mille annos insonuisse? certe gentes non ita assiduo senserunt vivam Apostolorum vocem: ergo.

Secundum conceditur, nempe Papatum, baptismum, cœnâ Dominicam &c. non esse absolute necessaria, sed tantum ex supposita Christi voluntate, qui utique sine his aliter suam Ecclesiam instituere potuisset: sed quid hoc ad rem nostram?

### CONCLUSIO TERTIA.

In lege nova quamvis omnia, quæ in S. Scriptura seu Bibliis continentur, infallibili fide sint credenda: non tamen omnia credenda continentur in S. Scriptura seu Bibliis, sed alia multa per antiquas Traditiones cognita, credita, & observata, credi & observari debent.

Hæc conclusio est omnium Catholicorum contra hæreticos, & aperte definita à Concilio Tridentino Sess. 4. in Decreto de Canonic. Scriptur.

**P**ROBATUR 1. ex S. Script. Joannes Evangelista c. 21. v. 25. de Christo ait: *Sunt autem & alia multa quæ fecit Jhesus, quæ si scribantur per singula, nec ipsum arbitror mundum capere posse, qui scribendi sunt, libros.* Quæ per hyperbolen dicta volunt S. P. August. Cyrillus, & alii Patres ad designandam multitudinem, & magnitudinem rerum à Christo gestarum: sicuti Joan. c. 12. v. 19. *Ecce mundus totus post eum abiit.* Et quamvis Joannes facta solum Christi commemoret: hisce tamen factis utique dicta erant admixta: quemadmodum nullum prope factum Christi ab hoc aut aliis Evangelistis commemoratur sine aliquibus ejus dictis; Atqui ea dicta, & doctrina Christi nullibi scripta sunt: ergo pertinent ad Traditiones, ac Verbum Dei non scriptum. Ergo non omnia credenda continentur in S. Scriptura. Hic locus pro Traditionibus adeo clarus est, ut ex hæreticis Joannes Brentius in Proleg. de Tradit. scribat: *Certum esse, multa fecisse Christum & dixisse, quæ scripta non sunt.*

Dicunt AA. 1. Non minus antiquos hæreticos inde suos colorare posse errores. Dicunt AA. 2. Nos non posse probare, quod ea, quæ Christus dixit, non fuerint postea ab Apostolis scripta. Sed

Contra 1. est: Ea quæ nos Catholici ex Traditione affirmamus, consonant veterum Patrum, & Conciliorum doctrinis, nec scripturis repugnant: ea autem, quæ antiqui hæretici ex Traditione affirmarent, nec consonarent veterum Patrum & Conciliorum doctrinis, nec scripturis, sed potius his repugnant: ergo.

Contra 2. est. 1. Non nobis, sed Adversariis probatio incumbit: cum pro nobis stet præsumptio, & possessio veræ doctrinæ

Strinæ antiquæ contra illorum novas accusationes: nam qui Titium homicidam dicit, affirmat, & accusat: etiam homicidium probare tenetur. Qui Cajum dicit injustum domus possessorem, actor est, & ad probationem obligatur, ut apud omnes clarum est: ergo cum nos Catholici à mille & septingentis annis teneamus, utrumque Dei Verbum, tam scriptum quam traditum: & Sectarii hodie erroris nos accusent circa Verbum Dei, & negent non Scriptum seu traditum aliquod Verbum Dei extare, sunt accusatores & actores: ergo illis incumbit probatio. Unde jure merito contra eosdem utimur ultimis illis verbis Jephthe Jud. c. 11. v. 11. & 27. *Quid mihi & tibi est, quia venisti contra me, ut vastares terram meam? non ego pecco in te, sed tu contra me male agis, indicens mihi bella non justa.*

Contra est 2. Si ea, quæ Christus dixit, postea ab Apostolis fuissent scripta, necessario in Scriptis Apostolorum invenirentur: atqui in illorum scriptis non inveniuntur: vel AA. ostendant: ergo.

Probatur Conclusio 2. Quod libri in S. Scriptura contenti sint Divini: quod libri in Canone non repositi sint spurii & apocryphi: quod Pater in Divinis sit ingenitus: quod filius in Divinis sit consubstantialis Patri: quod B. V. Maria semper permanferit virgo in & post partum: quod parvuli sint baptizandi etiam absque actuali propria fide: quod baptizatus hæreticus non sit rebaptizandus, adeoque baptismum ab hæreticis collatum esse validum: Quod symbolum Apostolorum necessario acceptandum & retinendum sit: quod dentur quatuor Evangelia: quod Christus descenderit ad inferos, &c. hæc omnia Calvinistæ & Lutherani credunt: atqui nullum ex his credere possunt propter authoritatem Scripturæ Sacræ: nullius enim nequidem apex est in Scripturis: nihil horum continetur in Verbo Dei nec aperte, imo nec obscure, ergo ex sola Traditione illa credunt: ergo non omnia, quæ ad fidem & mores spe-

R r r 3

stant,



stant, continentur in Scripturis: sed per Traditionem credi debent.

Hoc argumentum multum torquet Sectarios: unde & varias adhibent responsiones, & effugia ut elabantur:

Aliqui dicunt 1. Se mirari, quod nos Catholici hos non Scriptos fidei articulos eis objiciamus, cum inter Evangelicos, & Romano-Catholicos non sint controversi. At inane hoc effugium, nam

Contra est: In præsentī non controvertitur, an enumerati in argumento articuli sint veri? sed solum controvertitur: an sint aliqui articuli credendi, qui neque per se in S. Scriptura continentur? neque ex ea per bonam consequentiam deducantur? Sectarii negant: Catholici affirmant, enumeratos articulos credendos, & ab ipsis Sectariis Creditos proferunt, qui in S. Scriptura non continentur: ergo potius nobis mirandum est, quod Sectarii in materia luce meridiana Clariori Catholicis adversentur.

Dicunt 2. Alii: Omnia enumerata esse Scripta: idque probant ex Bellarm. Lib. 4. de Verbo Dei c. 11. ubi hic Author ab omnibus Catholicis magni habitus ait: omnia scripta esse, quæ sunt omnibus necessaria. At inane iterum effugium. Nam

Contra est. 1. Cardinalis Bellarminus loquitur solum de omnibus Scitu ad salutem simpliciter, & expresse necessariis: atqui pleraque enumerata in argumento non sunt omnibus scitu necessaria ad salutem simpliciter & expresse: ergo. Proinde non nisi perverse effatum illud Bellarmini generaliter accipitur, & ad quælibet credenda applicatur.

Contra est 2. Si omnia enumerata Scripta sunt, designent AA. illum locum, ubi scripta inveniantur: atqui nullum certe assignare poterunt: ergo inaniter id dicunt, & sinistre Bellarminum pro se citant.

Contra.

Contra est 3. Dato etiam non concesso, quod AA. aliquem locum Scripturæ designarent, in quo enumerata Scripta invenirentur: unde constat, quod hic ipse locus designatus sit genuinum Dei Verbum scriptum? unde & ex quo loco id constat? certe nullum AA. assignare poterunt: cum quolibet assignato eadem redeat quæstio: cum nulla Scriptura doceat, quinam sint libri Canonici, qui vero apocryphi: ergo AA. fateri compellentur, non de quovis Scripturæ loco, quod Verbum Dei sit, ex Scripturis constare. Semper ergo AA. sic respondendo petunt principium, & supponunt id, quod quæritur: supponitur enim, quod alius ille locus, qui ad probandum affertur, sit genuinum Dei verbum: quod ipsum autem quæritur: ergo non supponendum foret, sed probandum, priusquam ex eo aliud probaretur.

Dicit 3. Calvinus l. 1. instit. Hoc haberi ex evidentia rei, quæ probationibus non eget his verbis: *Non obscuriorem veritatis sub sensum ultro Scriptura præferret, quam coloris sui res albæ ac nigrae: Saporis suaves & amaræ.* Sed

Contra: Si hoc verum esset, jam nullus esset sanus mente, qui libros sacros à prophanis facillime non discerneret: sicut nullus est sanus oculis, qui non facillimè discernit res albas à nigris: nullus est sanus palato, qui non illico discernit res suaves ab amaris: atqui plurimi viri mente sani fuerunt, & sunt, qui ita libros sacros à prophanis non discreverunt, aut discernunt: uti fuerunt Irenæus, Clemens Alexandrinus, Origenes, Tertullianus, viri in Sacris literis versatissimi, & tamen librum Hermetis, qui Pastor inscribitur, ut sacrum venerati sunt: mente sani erant Patres tum Latini tum Græci, qui ante constitutum ab Ecclesia sacrorum librorum Canonem de quibusdam libris, an sacri essent, dubitarunt: mente sani sunt tot hodie in Ecclesia viri ingenio & doctrina præstantissimi, & tamen inter illos nemo est, qui possit libros sacros à non sacris ex sensu veritatis, quem

quem ultro præferebat Scriptura, discernere: ubi tamen ex colore res albas & nigras, & ex sapore dulces & amaras discernunt omnes. Ergo falsa est Calvini responsio. Quod si Catholicorum testimonia non accipit Calvinus, quid dicet de Luthero, Brentio, Kemnitio &c. qui circa epistolam ad Hebræos, & Apocalypsim vacillarunt, & ex Canone exploserunt? Aut omnes illi mente sic destituti sunt, uti sensu destitutus est, qui lucem à tenebris, album à nigro, suave ab amaro non discriminat: aut Certe modus ipse Calvinianus discernendi Scripturam omni prorsus ratione destituitur: quod ultimum verisimilius est.

Dicunt AA. 4. Quod hoc habeant ex Spiritu privato. Sed hunc Spiritum privatum jam in superioribus impugnavimus pluribus: nihilominus breviter.

Contra est 1. Tota Spiritus privati autoritas nititur testimonio hominis alicujus privati asserentis, se intus à Spiritu S. doceri: atqui talis homo certe falli potest, & à sua phantasia, vel dæmone decipi, dum à Spiritu S. doceri se putat: ergo recurrendum est ad authoritatem humana majorem, quæ falli, aut fallere non potest, qualis est autoritas Verbi Divini Scripti, vel traditi: & si in verbo Dei Scripto fide Divina tenendum non inveniatur, id ex Verbo Dei tradito discernendum est. Ergo.

Contra est 2. Si hæc omnia Sectarii ex suo spiritu privato habeant, necesse est, ut ille illorum Spiritus privatus in illorum mente sit Divinus: per consequens nunquam contrarius sibi esse possit. Jam quomodo miseri Sectarii in tam contrarias partes abeunt? Cur Lutherus Epistolam S. Jacobi respuit, quam ut Canonicam Calvinus admittit? cur in varias partes scinduntur, ubi de genuino illorum verborum sensu agitur: *Hoc est Corpus meum?* quorum verborum tot inventi sunt sensus, quot fuere hæretici, qui ea per Spiritum privatum interpreta-

ti sunt : ergo cum spiritus veritatis sibi contrarius esse nequeat, neque hæc & alia multa ex Scriptura haberi possint, manet, quod ex Traditione Divina repetenda sint.

Dicunt AA. 5. ad argumentum. Adducta in argumento & similia exempla pro Traditionibus saltem ex Scriptura Sacra per bonam consequentiam deduci posse. Ast & hoc effugium est frustraneum: nam

Contra est 1. Scripturam, ex qua deduci possent, esse veram Scripturam Canonicam, & genuinum Dei Verbum scriptum nullo modo ex Scriptura Sacra ostendi potest, ut jam supra diximus: ergo adducta & similia exempla ex Scriptura per bonam consequentiam deduci nequeunt.

Contra est 2. Spiritum S. ex Patre & Filio procedere negant Græci: atqui non negarent, si istud ex S. Scriptura per bonam consequentiam deduci posset: ergo. Unde Patres ex verbo tradito id probarunt: quibus subinde victi Græci consenserunt, & Catholicæ Ecclesiæ adhæserunt, quamvis ex instantia postea se iterum separarint.

Contra est 3. Deiparam Mariam semper etiam post partum Virginem permanisse, esse articulum fidei omnium credendum, aperte docet S. P. August. cap. 69. de Eccles. Dogm. (hujus enim libri ipse à plerisque creditur Author) sic scribens: *Integra fide credendum est, B. Mariam Dei Christi Matrem & Virginem concepisse, & Virginem gemisse, & post partum Virginem permanuisse. Nec est blasphemiae Helvidii acquiescendum, qui dixit, fuit Virgo ante partum, non virgo post partum.* Jam ex quo textu S. Scripturæ probari hoc potest? ex nullo, sed ex mera habetur traditione. Unde & S. Hier. refellit Helvidium, & confirmat, Mariam fuisse perpetuo Virginem, etiamsi hoc non sit aperte scriptum in literis Divinis, sed Apostolorum & Patrum traditione veluti per manus ad nos derivatum, & omnium Christianorum consensu comprobatum. Ergo cum & sectarii

concedant esse articulum fidei, quod Deipara Maria fuerit virgo etiam post partum: etiam admittere debent, non omnes articulos in S. Scriptura contineri, aut per bonam consequentiam ex ea deduci.

Contra est 4. Baptismum recte parvulis dari, & his prodesse, docent nobiscum Sectarii contra Anabaptistas: atqui cum Sectarii dicant, totam Scripturam testari, neminem absque propria fide salvari & justificari: non possunt ex S. Scriptura vel unicum textum allegare, infantes habere propriam & actua-lem fidem: ergo. Unde etiam Lutherus in epist. Cont. Anabapt. ad duos Parochos aperte concedit, *ex nulla sententia S. Scripturae valide concludi, infantes recte baptizari: nihilominus laudabiliter istud fieri, quia a tempore Apostolorum in Ecclesia iste mos viget: adeoque ex traditione habetur: ut præter alios Patres Origenes docet lib. 5. c. 6. in epist. ad Roman. his paucis verbis: Ecclesia ab Apostolis traditionem accepit etiam parvulis baptismum dare. Quid ad hoc Sectarii?*

Contra est 5. Baptizatos hæreticos non esse rebaptizandos, ita recte iterum nobiscum Catholicis admittunt Sectarii: atqui hunc articulum contra Cyprianum ejusque adhærentes non potuit sufficienter probare ex S. Scriptura Stephanus Romanus Pontifex, sed solum Ecclesiæ traditionem fortissime ut constantissime opposuit: ex qua etiam rem felicissime evicit, & consensum totius Christianitatis obtinuit: ergo. Unde & S. P. August. lib. 5. de baptis. contra Donatistas c. 23. ait: *Apostoli quidem nihil ex inde (de hæreticis non rebaptizandis) præceperunt. Sed consuetudo illa, quæ opponebatur Cypriano, ab eorum traditione exordium sumpsisse credenda est. Sicut sunt multa, quæ universa tenet Ecclesia, & ab hac ab Apostolis præcepta bene creduntur, quamquam scripta non reperiantur. Quod Clarius?*

Contra est 6. Symbolum Apostolorum de fide necessario credendum, & tenendum esse, agnoverunt SS. Patres, asseren-



ferentes illud ab Apostolis oretenus editum, & Ecclesiæ traditum fuisse. Illud ipsum retinent moderni A catholici integrum verbotenus, licet quoad sensum à veritate recedant. Calvinus quoque non vult dubitare, quin symbolum illud ab Apostolis proficiscatur: nam lib. 2. Instit. c. 16. §. 18. dicit: *neque vere mihi dubium est, quin à prima statim origine Ecclesiæ, adeoque ab ipso Apostolorum sæculo instar publicæ omnium calculis receptæ confessionis obtinuerit* &c. Jam unde ipsi Calvino, & cæteris Sectariis dubium non est? Ex S. Scriptura certe non: cum in ea nullibi reperiat. Ergo ex traditione Ecclesiæ & SS. Patrum, qui ab ipsis Apostolis traditum affirmant. Ex quibus omnibus luculenter patet, non omnia (quod probandum erat) quæ ad mores & fidem spectant, in scripturis contineri, sed plura ex sola traditione credere debere.

## CONCLUSIO QUARTA.

In lege nova præter Verbum Dei scriptum, necessario est admittenda Traditio Divina, tanquam altera fidei regula.

**P**ROBATUR 1. Ex S. Script. quæ 2. ad Tessal. c. 2. v. 14. jubet: *State & tenete traditiones, quas didicistis, sive per sermonem, scilicet ore prolatum, sive per Epistolam, scilicet scripto transmissam, ut explicat D. Th. 3. p. q. 25. a 3. ad 4. ubi præcepit Apostolus expresse post scriptum jam Evangelium aliaque, ut etiam traditiones non scriptæ servantur.* Unde ex hoc loco adversus omnem sinistram interpretationem tale formatur argumentum: si Paulus hortetur Thessalonicenses, ut observent, quæ verbo prædicavit, non autem scripto consignare voluit, tunc præter Verbum Dei scriptum necessario est admittenda traditio: atqui Apostolus Paulus Thessalonicenses hortatus est, ut ob-

servarent, quæ verbo illis prædicavit, scripto autem consignare non voluit, nempe de tempore adventus Anti-Christi post destructum Romanum imperium, ut interpretantur Patres: ergo. Unde S. Chrysost. hom. 4. in Epist. ad Tessal. in hunc locum ait: *Hinc patet, quod non omnia per Epistolam tradiderunt Apostoli sed multa etiam sine literis. Eadem vero fide digna sunt tam illa quam ista. Itaque Traditionem quoque Ecclesiæ fide dignam putamus: Traditio est, nihil quæras amplius.* Similiter loquitur Theophylactus in Epist. 1. Corinth. c. 11. super illa verba Apostoli. v. 2. sicut tradidi vobis, præcepta mea tenete, ita scribens: *Liquet ex his, cum Paulum tum Apostolos reliquos baudquaquam omnia literis mandasse præcepta, quæ populis tradidissent.*

Probatur 2. S. Paulus 2. ad Timoth. c. 1. v. 13. ait: *Formam habe sanorum verborum, quæ à me audisti.* Non ait, quæ tibi scripsi: etenim affirmat 2. ad Timoth. c. 2. v. 2. *penes ipsum fuisse verbum Dei depositum coram testibus, quod non foret opus, si scripisset: aut ubi scripta conspiciuntur? hinc Apostolus hortatur Timotheum, 2. ad Timoth. c. 4. v. 1. ut quæ à se audivit, Hæc commendat fidelibus hominibus, qui idonei erunt & alios docere.* Item 1. Corinth. c. 11. v. 34. ait Apostolus: *cætera, cum venero, disponam.* S. Chrysost. & Theophyl. notant expresse in hunc locum, D. Paulum loqui de præceptis non scriptis: aut ubi sunt illa, quæ disposuit Apostolus? Item Act. c. 1. v. 13. dicitur de Christo, *quod Apostolis se post resurrectionem suam manifestavit, per dies 40. apparens, & loquens de regno Dei, hoc est, de futuro Ecclesiæ statu, & institutis; ubi hæc leguntur scripta? ergo.*

Probatur 3. ex SS. Patribus quatuor priorum sæculorum, quos Novatores admittunt. In 1. Sæculo D. Dionys. lib. 1. de Eccles. Hierarch. ait: *Apostoli summa illa & supersubstantialia partim scriptis, partim non scriptis institutionibus suis nobis tradiderunt.* In II. Sæculo D. Iren. l. 3. c. 4. ait: *Quid autem, si neque Apostoli Scripturas reliquissent nobis, nonne oportebat ordinem sequi traditionis,*

tionis, quem tradiderunt iis, quibus comittebant Ecclesiis? In III. Sæculo Origenes in c. 6. ad Rom. dicit: *Ecclesia ab Apostolis traditione accepit etiam parvulis baptismum dare.* In IV. Sæculo S. Basil. lib. de Spiritu S. c. 27. sic scribit: *Dogmata quæ in Ecclesia prædicantur, quædam habemus ex doctrina scripto prodita, quædam rursus ex Apostolorum traditione in mysterio, id est, in occulto, tradita recepinus - - - Nec bis quisquam contradicit, quisquis sane, vel temeriter expertus est, quæ sint iura Ecclesiastica.* Item S. Epiphan. hæres. 6. dicit: *Oportet autem & traditione uti: non enim omnia à Divina Scriptura possunt accipi: quapropter aliqua in Scripturis aliqua in traditione Sancti Apostoli tradiderunt.* En minime dubium sensum primitivæ Ecclesiæ de Traditionibus Divinis præter Verbum Dei scriptum.

In omnibus subsequentibus sæculis SS. Patres eadem energia de Traditionis existentia scripserunt. S. Gregorius Nyssenus lib. 3. Evang. Evnom. S. Hieronymus Dial. cont. Lucif. c. 8. ex Cypriani & Co-Episcoporum ejus errore docet, nunquam recedendum à Traditionibus. In sæculo V. S. P. August. non solum multa ab Apostolis sine scripto Ecclesiæ tradita & conservata sæpe recenset, sed etiam ex illis fidei dogmata contra hæreticos confirmat Epist. 118. Item lib. 10. de Genesi ad litteram c. 23. hæc notatu digna verba habet: *Consuetudo Matris Ecclesiæ in baptizandis parvulis nequaquam spernenda, neque ullo modo superflua deputanda, nec omnino credenda est, nisi Apostolica esset Traditio.* Quid ad hæc Prædicantes? cum in Colloquio Ratisbonensi hæc verba objicerentur, nihil aliud respondere potuerunt, nisi pudendum illud: *Nos ab Augustino hac in parte libere dissentimus, ut videre est in Protocollo Monachienfi Edit. 2. sub finem pag. 367.* Si Sectarii à S. Augustino hac in parte libere dissentiunt, debent etiam Sectarii ab omnium Patrum sana doctrina libere dissentire, qui similia de Traditionibus habent: ergo Sectarii reliquum nihil habebunt, nisi insanos hæreticorum errores. Tandem qua Authoritate dictis Patrum primitivæ Ec-

clesiæ libere dissentire, & eos respuere audent? Ergo magis suos Magistros Hæresiarchas ab Ecclesia damnatos Calvinum & Lutherum æstimabunt, quam Sanctos Ecclesiæ Patres?

Probatur 4. Ex Conciliis. Concilium Nicanum II. anno 789. celebratum Act. 7. ita habet: *Ab Apostolo edicti tenemus Traditiones, quas accepimus, omnia recipientes, & amplectentes, quæcunque Ecclesiæ Catholicæ antiquitas scripta, & non scripta recipit.* Eadem act. definit: *Si quis Traditionem Ecclesiæ sive scripto, sive consuetudine valentem non curaverit, anathema sit.* Quid ad hoc fulmen asseclæ Lutheri? quod jam in ipsos, antequam essent, ab Ecclesia vibratum est, & quidem eo tempore, quo Ecclesiam Romanam ab omni errore puram fuisse, ipsi Sectarii fatentur.

Synodus V. non ex Scripturis solum, sed etiam ex doctrina Patrum & Conciliorum sua de fide decreta formavit: & definitiones suas in hunc modum conclusit: *Cum igitur hæc ita recte confessi sumus, quæ tradita nobis sunt tam à Divinis Scripturis, quam à Sanctorum Patrum doctrina, & ab his quæ definita sunt de una eademque fide à prædictis quatuor Conciliis &c.*

Synodus VI. Synodus VII. & Synodus VIII. Act. 10. can. 1. Traditiones diserte asserunt, & observandas decernunt. Et novissime Synodus Tridentina Sess. 4. Ergo.

Probatur 5. Ratione. Christus Dominus illa, quæ audivit à Patre sine scripto locutus est mundo: & quæ didicit in sinu Patris, ea sine scripto hominibus enarravit: neque Consilium ipsius fuit, Evangelium suum per literas imprimere chartis & membranis, aut lapidibus insculpere (quod proprium veteris legis fuit) sed per auditum cordibus (quod proprium est novæ legis) mandare. Unde nec Apostolis suis mandasse legitur, ut scriberent aliquid, sed tantum præcepit, ut *euntes per mundum universum prædicarent Evangelium omni creaturæ*: quod præceptum Domini sedulo executi sunt Apostoli ac Discipuli, &  
omnes

omnes quidem Evangelium prædicarunt verbo, sed non omnes scripto vulgarunt: nam ab Andrea, Thoma, Bartholomæo, & Philippo nihil Scriptum accepimus. Cæteri Apostoli quidem scripsere, non autem ideo, quod propositum illis esset omnem Doctrinam Evangelicam scripto edere, & complecti, sed quod varie necessitas & utilitas eos ad scribendum aliquid compelleret, nempe ut aut fideles in fide, & in sanis moribus instruerent, aut ad bonorum operum studium hortarentur, aut hæreticos de erroribus convincerent, atque ad veritatem revocarent, manifestum est, quod per illa, quæ scripserunt, non totius Doctrinæ Christianæ quoddam veluti Symbolum tradere voluerint, sed multa Traditioni orali reliquerint. Ergo.

## O B J E C T I O N E S.

I. Traditiones à Scriptura S. aperte damnantur: ergo. ant. prob. Deut. c. 4. v. 12. dicitur: *Non addetis ad Verbum, quod loquor vobis, nec auferetis ex eo.* Ergo.

II. Deut. c. 12. v. 32. dicitur: *Quod præcipio tibi, hoc tantum facito: nec addas quidquam, nec minuas.* Ergo.

III. Prov. c. 30. v. 6. dicitur: *Ne addas quidquam verbis illius, Dei, & arguaris, inveniariusque mendax.* Ergo.

IV. Apocalyp. c. 18. v. 22. dicitur: *Contestor omni audienti verba prophetiæ libri hujus: si quis apposuerit ad hæc, apponet Deus super illum plagas scriptas in libro isto: & si quis diminuerit de verbis libri prophetiæ hujus, auferet Deus partem ejus de libro vitæ.* Ergo.

V. S. Paulus ad Galat. c. 1. v. 8. dicit: *Licet autem Angelus de cælo evangelizet vobis, præterquam quod evangelizavimus vobis, anathema sit.* Ergo Traditiones, quæ sunt aliquid præter id, quod evangelizavit Paulus, non sunt admittendæ.

VI.



VI. Idem S. Paulus ad Gal. c. 3. v. 15. dicit: *Homini confirmatum testamentum nemo spernit, aut superordinat: quasi diceret: quanto minus testamento Dei aliquid superaddendum. Ergo.*

VII. S. Paulus epist. 2. ad Timoth. c. 2. v. 16. dicit: *omnis Scriptura divinitus inspirata utilis est ad docendum, ad arguendum, ad corripiendum, ad erudiendum in justitia, ut perfectus sit homo Dei ad omne opus bonum instructus: ergo sola Scriptura est sufficiens.*

VIII. S. Joannes c. 20. v. 30. & 31. dicit: *Hec autem scripta sunt, ut credatis, quia Jesus & Christus filius Dei, & ut credentes vitam habeatis in nomine ipsius. Ergo Scripturae sufficiunt ad salutem, nec opus est Traditionibus.*

IX. Christus ipse improbat Traditiones Matth. c. 15. inquit: *Irritum fecistis mandatum Dei propter traditiones vestras. Ergo.*

X. Scriptura I. Petri Traditiones appellat esse vanas, & humanas, quæ fallibilem auctoritatem habent: ergo Traditiones non solum non sunt necessariae, sed plane sunt improbatæ.

XI. Veteres Patres, si quandoque admittunt Traditiones, non intelligere per has nisi in S. Scriptura contentas: vel certe non loqui de Traditionibus Dogmatum, sed solum quarundam caeremoniarum, rituum, & consuetudinum in Ecclesia observari solitarum: atqui de his in præsentī non est controversia, sed solum de Traditionibus divinis ad fidem spectantibus: ergo.

XII. Tertullianus lib. contra Hermogenem c. 22. ita procedit: *An de aliqua subjacenti materia facta sint omnia, nusquam adhuc legi: scriptum esse doceat Hermogenis officina. Si non est scriptum, timeat vae illud adjicientibus, aut detrabentibus destinatum. Ergo Traditiones non scriptas rejecit Tertullianus.*

XIII. Tertullianus de Carne Christi c. 7. sic Marcionem alloquitur: *Non recipio, quod extra Scripturam de tuo infers: ergo extra Scripturam non recipiebat Tertullianus Traditiones.*

XIV.

XIV. S. Cyprianus lib. 2. epist. 3. docet Christum solum audiendum his verbis: *si solus Christus audiendus est, non debemus attendere, quid alius ante nos faciendum putaverit, sed quid, qui ante omnes est, Christus prior fecerit.* Ergo.

XV. S. Cyprianus epist. 74. ad Pompejum loquens de Stephano Romano Pontifice, qui Cypriano traditionem opponebat, inquit: *unde est ista traditio? ea facienda esse, quæ scripta sunt, Deus testatur, &c.* ergo Cyprianus rejiciebat traditiones, quæ scriptæ non erant.

XVI. S. Cyril. Alexand. l. 12. in Joan. c. ult. ait *Non omnia, quæ Deus fecit, conscripta sunt, sed quæ scribentes tam ad mores quam ad dogmata putarunt sufficere.* Ergo neque ad mores neque ad fidem necessariae sunt Traditiones.

XVII. D. Irenæus l. 3. c. 1. docet, omnia, quæ prædicaverunt Apostoli, postea scripserunt, his verbis: *Quod tunc prædicaverunt, postea per Dei voluntatem in Scripturis nobis tradiderunt:* ergo nihil reliquerunt non scriptum.

XVIII. D. Athanasius Epist. ad Serapionem ait: *Unius cujusque quæstionis inventionem non ex propriis ratiocinationibus dicere possumus, sed ex Scripturarum consequentia.* Ergo.

XIX. D. Athanasius Orat. contra gentes initio ait: *sufficiunt per se Sacra, & divinitus inspirata Scriptura ad instructionem veritatis.* Ergo non est opus Traditionibus.

XX. D. Athanasius in Epist. ad Serapionem ait: *Ne igitur interroges, sed solum ex Sacris literis condiscas, sufficiunt enim, quæ in illis reperies documenta.* Ergo.

XXI. D. Athanasius lib. de Incarnat. Christi contra Apollinarium inquit: *Hæc scripsi dilecti, tametsi nihil omnino opus fuit, ut scriberem: sufficit enim per se Evangelica traditio.* Ergo.

XXII. D. Athanasius Epistola Festali 39. postquam libros Canonicos utriusque testamenti recensuit, subjungit: *Hi sunt fontes salutare, ex quibus sitiens haurire possit eloquia.* In his

*Solis pietatis Schola beatè annuntiatur. Ergo juxta S. Athanasium non annuntiatur in Traditionibus : ergo hæ non sunt necessariae.*

XXIII. S. Irenæus lib. 3. c. 2. ait: *Cum ex Scripturis arguuntur, in accusationem convertuntur ipsarum Scripturarum, quasi non recte habeant, neque sint ex auctoritate, & quia varie sint dictæ, & quia non possit inveniri ex his veritas ab his, qui nesciunt Traditionem. Ergo.*

XXIV. S. Basilius in Asceticis c. de vera ac pia fide inquit: *Manifestissimum hoc infidelitatis argumentum fuerit, & signum superbiæ certissimum, si quis eorum, quæ scripta sunt, aliquid velit rejicere, aut eorum, quæ non scripta, introducere. Ergo.*

XXV. S. Chrysost. hom. in Psalm. 95. ait: *Neque enim oportet quidquam dicere sine testibus, solaque animi cogitatione, nam si quid dicitur absque Scriptura, auditorum cogitatio claudicat, &c. Ergo.*

XXVI. S. Chrysost. hom. 1. in Epist. ad Tit. ait: *omnia Evangelium continet, & præsentia & futura, bonorem, pietatem, fidem &c. Ergo Traditio non est necessaria.*

XXVII. Theophilus l. 2. Paschali ait: *Diabolici est Spiritus aliquid extra Scripturarum Divinarum auctoritatem putare Divinum: ergo Traditiones nullæ sunt Divinæ.*

XXVIII. D. Hier. in c. 22. Matth. ait: *Quod de Scripturis auctoritatem non habet, eadem facilitate contemnitur, qua probatur. Ergo.*

XXIX. S. P. August. lib. 2. de doctr. Christ. c. 9. ait: *In his, quæ aperte posita sunt in Scriptura, inveniuntur illa omnia, quæ continent fidem, moresque vivendi. Ergo non est opus traditionibus.*

XXX. S. P. August. lib. de bono viduitatis c. 1. inquit: *Sancta Scriptura nostræ doctrinæ regulam figit: ergo non est opus traditionibus.*

XXXI. S. P. August. Tract. 19. in Joan. ait: *Electa sunt, quæ scriberentur, quæ saluti credentium sufficere videbantur. Ergo cætera non sunt necessaria.*

XXXII

XXXII. S. Hier. in Aggæum Prophetam c. 1. inquit : *Gladius Verbi Dei percutit omnia, quæ absque authoritate & testimoniis Scripturarum, quasi traditione Apostolica reperiunt, atque confingunt.* Ergo.

XXXIII. Si præter Scripturam etiam essent credendæ Traditiones, Scriptura esset mutila & insufficiens : atqui hoc dici nequit. Ergo.

XXXIV. Multæ traditiones sunt Apostolicæ, quæ referuntur in Canone Apostolorum ; item in libris recognitis à S. Clemente Papa editis, quæ tamen non habent certam fidem. Ergo nec aliæ traditiones Apostolicæ sunt infallibiles, consequenter nec sunt regula fidei.

XXXV. Ecclesiæ Dogmata non debent committi principio defectibili : sed traditio est principium defectibile : ergo. min. prob. principium, quod de aure in aurem transit, est defectibile : sed traditio de aure in aurem transit : ergo. maj. prob. quod facillime alteratur ac deperditur, est principium fallibile : atqui quod de aure in aurem transit, facillime imperitia ac perveritate alteratur, & per oblivionem & negligentiam deperditur ; ergo.

XXXVI. Admissa necessitate traditionum, quilibet suo Marte prætextu traditionum Apostolicarum poterit fabulosa & erronea proponere, sicut accidit Papiæ circa regnum Christi mille annorum, & ætatem Christi quasi 50. annorum : ergo traditiones nedum non sunt necessariae, quin potius sunt maxime noxiæ.

XXXVII. Christus in controversiis fidei remisit Judæos ad Scripturas dicens Joan. c. 5. v. 39. *Scrutamini Scripturas :* Ergo non remisit ad Traditiones.

XXXVIII. Christus instruens peregrinos discipulos in Emaus, solas scripturas ad probandum adhibuit, explicans illis Moysen & Prophetas : & non adhibuit traditiones : ergo.

XXXIX. Paulus sive cum Judæis disputaret, sive discipulos sive Ecclesias doceret, nonnisi ex Scripturis loquebatur, ut videre est ex Actis Apostolorum c. 17. v. 2. Item 2. ad Timoth. c. 3. Ergo si Paulo sola Scriptura fuit fidei regula, debet & nobis esse.

XL. Non est ratio, cur Deus voluisset aliqua credenda tradere scripto, & alia non scripto, & per verba oris: ergo sine fundamento adstruuntur traditiones. ant. prob. Dum aliqua meliori modo fieri possunt, sine ratione adstruitur modus deterior, maxime ex parte Dei perfectissime operantis: atqui meliori modo credenda & observanda in Scriptura, quam sine hac traduntur: quia si hæc semel authentica agnoscatur, de ea dubitari fas non est: econtra vero plerumque dubitatur de iis, quæ de aure ad aurem dicuntur: ut patet in fide debitoris ore se tantum obligantis, quæ non habetur pro tam certa, sicut ejus, qui se scripto obligat; ergo.

XLI. Traditio quæcunque est narratio humana, quæ non est infallibilis: nam omnis homo mendax: ergo est obnoxia erroribus, consequenter nequit esse regula fidei.

XLII. Admissis Traditionibus facimus circulum vitiosum: nam probamus Traditiones ex Scripturis, & has vicissim ex Traditionibus: ergo Traditiones non sunt admittendæ.

## S O L U T I O N E S.

Ad I. Illum locum non tantum de verbo Dei scripto, sed etiam de tradito intelligendum esse: non enim dicitur: *non addetis ad Verbum, quod scribo*, sed *ad verbum quod loquor*. Dato autem non concessio, locum illum tantum de verbo Dei scripto esse intelligendum, non alia per illum prohibetur additio, quam quæ textus Verbi Dei alteret, vel corrumpat: nequaquam vero additio, quæ genuinum verbi Dei sensum exponit, & elucidat: alias  
illi.



illicitum fuisset Deuteronomio alios addere libros. Porro tantum abest, ut à Traditionibus nostris textus scripturæ corrumpatur, quin potius illum defendant, & germanum sensum exhibeant. Denique traditiones non sunt proprie additiones ad verbum Dei, sed illius complementum.

Præterea quæro: vel istud præceptum hoc loco expressum spectat ad solos Judæos, vel ad solos Christianos, vel ad utrosque. Si ad solos Judæos, Cur Sectarii Lutherani æque ac Calvinistæ id nobis Christianis objiciunt? si ad solos Christianos, cur Sectarii non se circumcidunt, cum circumcisio tunc fuerit præcepta? si ad utrosque: ergo Christiani omnes nunc sunt obligati ad omnia præcepta cæremonialia, quæ olim Deus in veteri testamento dedit, quod est falsum, cum lex Moylis non amplius valeat, ut ipsi Novatores fatentur.

Ad II. Illum locum esse tantum intelligendum, ut Judæi in ritu colendi Deum utantur cæremoniis sibi à Deo præscriptis, non vero aliis, quæ usitatæ erant gentilibus. Deinde etiam Deus per Traditiones præcipit, unde has observando etiam tantum facimus, quod Deus præcipit.

Præterea particula *tantum* in Hebraico textu non reperitur. Demum verbum *faciendi* hic non significat quaslibet hominum actiones, sed tantum sacrificia, *hoc tantum facito*, id est, aliter mihi non sacrificato, ut docent antecedentia verba, quibus prohibita fuerunt Gentium sacrificia, quæ filios & filias immolabant igni comburentes, tali modo Deus sibi non vult sacrificari, sed ritu à se præscripto: cui expositioni favet lingua Hebraica, quæ verbum *faciendi* sæpe accipit pro *sacrificare*.

Ad III. Illo loco solum eos impugnari, qui aliquid venditant pro Verbo Dei, quod non est tale more Pseudo-Prophtarum, qui dicebant, hæc dicit Dominus, cum tamen Dominus locutus non esset, quod non fit admittendo traditiones.

Ad IV. Ex illo textu aliud non sequi, nisi quod tam Apocalypsi quam aliis omnibus & singulis S. Scripturæ libris nihil veluti ad illos spectans sit addendum, aut ex ipsis auferendum, adeoque nullum librum Bibliorum esse vitiandum: quod ipsum etiam Concil. Trid. in decreto de Canon. scriptur. gravissime prohibet. Quocum consistit, quod, licet Evangelio S. Matth. v. g. nihil sit addendum tanquam spectans ad illud, adhuc alia Evangelia ab aliis Evangelistis scripta addantur. Pariter ergo cum tota Sacra Scriptura integre conservata traditum verbum Dei optime cohæret. Viderint autem Sectarii, quomodo ipsi evadant plagas in Apocalypsi expressas, cum non solum ex diversis S. scripturæ libris capita, sed etiam ex Canone totos libros tollant.

Ad V. Illa verba *præterquam quod evangelizavimus* idem sonare, ac contra id *quod evangelizavimus*. Ita exponit S. P. August. tract. 98. in Joan. Unde patet, quod Apostolus nequaquam anathema dicat iis, qui annuntiarent aliquid præter id, quod Galatis prædicaverat: nam & ipse tum in hac epistola, tum in aliis scriptis postea quædam docuit, & tradidit, quæ antea Galatis non prædicaverat: & S. Joannes postea suum scripsit Evangelium & Apocalypsim, in quibus multa sunt *præter*, sed non *contra* ea, quæ Galatis evangelizaverat Paulus.

Ad VI. S. Paulum intelligendum esse de additamento contrario, quod mentem Testatoris everteret: etenim testes subscribendo testamento addunt aliquid de suo absque vitio. Verum Traditiones Ecclesiæ verbo Dei scripto seu testamento nihil addunt contrarium, quo Dei dispositionem evertant: ergo non repugnant testamento Dei, nec ab Apostolo improbantur.

Ad VII. Neg. idem esse: esse utilem S. scripturam, ut perfectus sit homo ad omne bonum: ac esse sufficientem excluso omni alio medio ad eum finem. Nunquid enim sol est utilis ad omne vivens producendum? an idcirco etiam sufficiens sine causis particularibus secundis, & universali prima? dicit

Apo-

Apostolus: *sacræ literæ*: ubi dicit *Solæ*? dicit *Scripturæ utiles sunt*, ubi dicit, *sufficienter sunt*, ut traditionibus opus non sit? nam si Paulus dixisset *sufficit*, sequeretur scripturas novi testamenti esse inutiles: Apostolus enim ibi loquitur de scriptura veteris testamenti, tum quia scriptura novi testamenti nondum erat relata in canonem sacrorum librorum, nec totaliter scripta: tum ex his verbis præcedentibus, *ab infantia sacras literas nosti*, non enim potuit Timotheus ab infantia noscere literas novi testamenti, utpote nondum extantes.

Ad VIII. S. Joannem hic non loqui de sufficientia doctrinæ, sed de sufficientia miraculorum & signorum post resurrectionem, quod hæc satis sint ad persuadendum hominibus Christum esse filium Dei: male igitur ex hoc loco inferunt Sectarij post Evangelium Joannis superfluas esse traditiones, nisi eadem ratione inferant, superflua etiam esse alia tria Evangelia, Epistolas Apostolicas &c.

Ad IX. Dist. ant. Christus ipse improbat traditiones Pharisæicas, humano spiritu inventas, & Scripturæ repugnantes, Conc. ant. Divinas, Divino spiritu inspiratas, neg. ant. Christus cit. loc. apud Matthæum loquitur de superstitiosis tum Judæorum, tum gentilium traditionibus, de quibus ut caveamus, monuit nos S. Paulus ad Coloss. c. 2. v. 8.

Ad X. Expl. sub dist. appellat esse vanas & humanas, quando solo humano ingenio concipiuntur, Conc. quando Spiritu S. dictante prædicantur, neg. solutio de se patet.

Ad XI. Quamquam Veteres Patres nomine Traditionis subinde intelligant doctrinas in Scriptura contentas, aut sensus Scripturæ ex traditione Ecclesiastica habitos: item formulas verborum, ut *Hemusion*, *Deothocon* &c. demum nonnulla quædam ad ritus & cæremonias potius, quam ad Dogmata pertinentia: attamen clarissimum est plures Ss. Patres loqui expressis verbis, & quidem in actu signato de Dogmatibus, ut Ss.  
Basi.

Basilii, Chrysostomi, S. P. Augustini, uti liquet exemplo vel solius symboli Apostolici. Et si etiam loquerentur de solis ritibus, verborum formulis, & sensu scripturarum, jam haberetur Traditionum necellitas; quisquis enim pertinaciter contenderet ejusmodi rituum institutionem non niti in autoritate in Scripturis à Deo concessa, absque dubio hæreseos labe forderet; unde falsum est, Sectarios de Traditionibus in hoc sensu non movere litem; licet enim fateantur, veteres nomine Traditionum interdum ritus, cæremonias, & ordinationes Ecclesiasticas intelligere, negant tamen hisce virtutem & dignitatem sacram, item ordinationibus & ritibus Ecclesiæ vim obligandi. Equidem ejusmodi res v. g. formare crucem, uti aqua benedicta, observare dies festos, & abstinentiam à carnibus certo tempore, non sunt articuli fidei, nec spectant ad fidem, sed ad mores, innituntur tamen duobus fidei articulis: 1. quod Ecclesia in ordinatione & observatione illorum errare non possit. 2. Quod quilibet Christianus in conscientia sit obligatus Ecclesiæ leges & ordinationes servare.

Ad XII. Ex hoc textu Tertulliani nil aliud concludi posse, quam Hermogeni timendum esse illud *Væ*, quod adjicientibus aliquid ad scripturam, vel de ea detrahentibus destinatum est: quia Hermogenes docet contra scripturam cælum & terram ex nihilo factam confirmantem, factam esse ex aliqua materia subjacenti: ergo addit aliquid scripturæ contra scripturam.

Ad XIII. Tertullianum non dicere Marcioni: *non recipio, quod extra scripturam infers: sed non recipio, quod extra scripturam infers de tuo*. Unde ipse Tertullianus ibidem c. 2. contra Marcionem, extra scripturam infert Traditionem.

Ad XIV. Tempore D. Cypriani fuisse hæreticos, qui voverunt in sacrificio Missæ solam aquam Calici esse infundendam, unde *Aquarii* appellati sunt: Contrarios hos Cyprianus scribit, & docet, *nihil alienum ab hæreticis excogitatum in hoc mysterium cænæ*

Domi-

*Dominicæ inducendum, sed id duntaxat faciendum; quod Christus Jesus fecit, & nobis, ut faceremus, præcepit. Ex quo nihil sequitur contra Traditiones, imo hæ potius per hoc confirmantur. Nam in sacrificio facere debemus, quod Christus fecit: quid autem fecit Christus? non solum vinum, nec solam aquam, sed vinum aqua mistum in sacrificio obtulit. Unde hoc scimus? ubi scriptum? nullibi. Ergo à sola Ecclesia, & traditione id habemus, & tenemus.*

Ad XV. Hanc Cypriani epistolam non esse admittendam, eo quod eam scripserit, cum errorem suum de rebaptizandis hæreticis tueretur, & in qua consequenter traditionem circa illam quæstionem rejiciebat, quia eam esse contra Scripturam putabat: verum alias traditiones admittebat, nam l. 2. Epist. 3. ait: *Admonitos nos scio, ut in calice offerendo dominica traditio servetur --- ut calix mixta vino offeratur.*

Ad XVI. D. Cyrillum non excludere necessitatem eorum fidei articulorum, & morum præceptorum, quæ non continentur in libris canonicis: sed excludere necessitatem scribendi plura Christi facta, cum Joannes ex omnibus, quæ Christus fecit, & dixit ea selegerit, quæ saluti credentium scripto mandari videbantur sufficere, cætera ad nos per traditionem transmittenda relinquens.

Ad XVII. Dist. ant. Apostoli omnia, quæ omnibus prædicaverunt, qualia sunt ea, quæ omnibus sunt expresse credenda, postea scripserunt, conc. ant. hocque solum vult D. Irenæus. Apostoli omnia, quæ perfectioribus, Prælati, Episcopis prædicaverunt, qualia sunt ea, quæ spectant rationem gubernandæ Ecclesiæ, administrandorum Sacramentorum, refellendorum hæreticorum, postea scripserunt, neg. ant. non enim illa secretiora mysteria omnes indifferenter docebant, nam Apost. 2. ad Timoth. c. 2. dicit: *Hæc commenda fidelibus hominibus,*

U u u

qui



qui idonei erunt & alios docere. Et D. Irenæus l. 4. c. 43. docet: *Apostolos cum Episcopatu tradidisse successoribus Charismata scientiæ.*

Ad XVIII. Explicando textum sub dist. sed ex scripturarum consequentia simul & traditionis, conc. ex scripturarum consequentia tantum, neg. Nam ibidem adhibet authoritatem traditionis, cum subjungit: *videmus tamen adhuc illam ipsam ab initio traditionem, & fidem Catholicæ Ecclesiæ quam Christus quidem dedit, Apostoli vero prædicaverunt.*

XIX. Expl. text. sub dist. ad instructionem omnis veritatis, neg. veritatis quam ibi astringit nempe Idola non esse Deos, & Christum esse Deum & hominem, conc. Porro ista duo habent in scripturis expressa testimonia. Præterea hæretici istum locum objiciunt corruptum: interposita voce *omnem*: objiciendo sic: *sufficiunt scripturæ - - - ad omnem veritatis indicationem*; quæ particula *omnem* in textu S. Athanasii non reperitur.

Ad XX. S. Athanasium dicere, quod sufficiant ista documenta ad refutandas blasphemias Arianorum, Pneumatomachorum de filio & Spiritu S. interrogationes, quod verissimum erat: an autem sufficerent ad alia quævis fidei dogmata, exponenda? ibi non quærebatur.

Ad XXI. sufficere (ait S. Athanasius hoc loco) ad refellendum errorem Apollinarii, de quo illic loquitur, & quem impugnat: sufficere ad quævis alia fidei dogmata probanda, ac propugnanda? non dicit.

Ad XXII. Dum S. Athanasius ait, in solis Scripturis pietatis scholam annuntiari, non opponit Scripturas sacras traditionibus, libros Canonicos apocryphis, qui ab hæreticis obtrudebantur.

Ad XXIII. S. Irenæum scribere contra Gnosticos, & illos hæreticos, qui in circuitu ambulant, & à scriptura ad traditionem, à traditione rursus ad scripturam provocant, atque undique se implicant: hinc S. Pater mox subjungit: illos ad  
tra-

traditionem provocatos adversari etiam traditioni. Hæc autem non sunt adversus nos Catholicos, sed contra Sectarios: illi enim pro libitu scripturas, quæ ad palatum non faciunt, rejiciunt, ut libros Machabæorum, epistolas Jacobi & Judæ &c. tanquam non sint ex autoritate: dum versione latina impugnantur, hæc inquirunt non recte se habet: dum traditione ex communi Ecclesiæ sensu premuntur, adversantur traditioni, sese Patribus, & doctoribus omnibus præferentes. Cæterum ex cit. loc. luculenter constat S. Irenæum admittere traditionem, quæ, ut ipse loquitur, *ab Apostolis per Successionem Presbyterorum in Ecclesiis custoditur.*

Ad XXIV. De iis introducendis agere Basilium, quæ à Scriptura sacra sunt aliena, eique contraria, cujusmodi erant, quæ contra scripturas introducebant hæretici.

Ad XXV. S. Chrysostomum non negare, aliquid dici posse absque Scriptura, si nitatur traditione, sed solum dicere, nihil esse dicendum absque Scriptura, ita ut sola animi cogitatione nitatur, quod utique verum est.

Ad XXVI. S. Chrysost. per *Evangelium* non intelligere Scripturam: addit enim, *Omnia simul prædicationis verbo conclusit.* Illa autem prædicatio partim est scripto mandata, partim sine scripto tradita.

Ad XXVII. Neg. conseq. Nam Theophilus per hæc verba non excludit traditionem, sed libros apocryphos, qui pro Divinis à quibusdam supponebantur, quosque hoc loco redarguit Theophilus.

Ad XXVIII. S. Hieronymum non fideliter citari: qui loquens de particulari quadam sententia, qua quidem nitebantur ex libro apocrypho probare Zachariam, quem Judæi interfecerunt inter templum & altare, fuisse patrem Joannis Baptistæ, ait: *Hoc quia de Scripturis auctoritatem non habet &c.* Et sensus est: hæc sententia, quia ex libro apocrypho probatur,

non ex Canonico, facile contemnitur. Non ergo S. Hier. rejicit Traditionem, ex qua probat jejunium Epist. ad Marcel. Imo illius necessitatem probat. In Dialog. cont. Lucifer. admit- tens hanc sententiam : *Etiam si Scripturæ auctoritas non subesset, to- tius orbis in hanc partem consensus instar præcepti obtineret ; nam & alia multa, quæ per traditionem in Ecclesiis observantur, auctoritatem sibi scriptæ legis usurparunt.*

Ad XXIX. Expl. text. sub dist. *Inveniuntur illa omnia &c.* quoad ea, quorum fides & cognitio explicita cuique sunt neces- saria ad salutem, conc. quoad ea, quorum cognitio explicita non est sic necessaria ad salutem, neg. Nam D. P. August. l. 1. Cont. Crescon. c. 33. dicit : *Scripturæ veritatem à nobis teneri, quando facimus, quod Universæ Ecclesiæ placet, etiam si nihil de ea re scriptum legamus.*

Ad XXX. S. P. Augustinum regulam quidem figere, sed & addere ; *ne audeamus sapere plus quam oportet sapere &c.* quo significat, scripturam sic esse regulam, ut contra illam sapere non liceat : unde regulam esse adæquatam non dicit.

Ad XXXI. Eodem modo hoc loco explicatur S. P. Au- gustinus, quo ad XVI. supra explicuimus D. Cyrillum.

Ad XXXII. Verba S. Hieronymi in Edit. Paris. anno 1609. tom. 9. pag. 102. ita sonare : *Sed & alia, quæ absque auctoritate & testimoniis scripturarum quasi traditione Apostolica sponte reperiunt, atque confingunt, percutit gladius Dei.* Ubi apud D. Hier. non vi- detur verbum *omnia* : sed *alia* : *Omnia* autem & *alia* non sunt Sy- nonima. Item non legitur *gladius verbi Dei*, sed *gladius Dei* : loquitur quidem Hier. de gladio Verbi Dei, sed hoc verbum non habet in textu. Pariter D. Hieron. apponit in textu particulam *sponte*, à qua pendet tota rei substantia, & illam idcirco hæ- retici hunc textum allegando omittunt. Hieronymus ergo di- cit, gladium Dei percutere adhuc *alia*, quæ hæretici sine au- thoritate & testimoniis Scripturarum sponte, & ex perversa sua  
volun-

voluntate reperiunt, & fingunt, quasi Apostolicæ essent traditiones. Sed quid hoc contra Ecclesiam Romanam, quæ non invenit & fingit traditiones Apostolicas, sed eas à Majoribus per legitimam successionem acceptas custodit? Dolendum sane, ab hæreticis ita inique tractari veneranda antiquorum Patrum scripta.

Pro intelligendis aliis Patrum locis, qui hic objici possent, pro regula tenendum est: quod dum hi sæpe ad S. scripturam provocant, & ejus testimonio standum esse asserunt, quod hi inquam de casu quodam particulari, in quo scriptura clara est, & evidenter hæreticorum erroribus repugnat, intelligendi sint. Aut quod illas tantum traditiones, quas forte pro se adducere voluerunt hæretici, tanquam Dei verbo contrarias rejiciant. Similiter quod, dum scripturas S. quandoque sufficere dicunt, vel de sufficientia ad confirmanda quædam dogmata, de quibus disputant, vel de sufficientia ad præcepta, aut vitiorum generalia remedia, & virtutum incitamenta loquantur, non vero de sufficientia absoluta. Aut quod tantum traditiones apocryphas reproben: Aut quod non habita generali traditione ab Ecclesia recepta, solam tunc scripturam sequendam esse doceant.

Ad XXXIII. Neg. maj. quia mutilum est, & dicitur illud, cui aliquid deest ad justam & debitam integritatem, S. scripturæ autem nihil tale deest: ergo. Imo & Traditiones non sunt de præcipuis & explicite credendis mysteriis fidei, ac necessariis absolute necessitate medii ad salutem, sed solum necessitate præcepti.

Ad XXXIV. Dist. ant. Et tales sunt recognitæ tantum testimonio humano non fundato in assistentia Spiritus S. Conc. ant. tales sunt recognitæ testimonio Ecclesiæ fundato in assistentia Spiritus S. neg. ant. & conseq. Sicut Ecclesia est regula animata discernens inter Canonicam & apocrypham scripturam, sic

U u u 3

etiam

etiam discernit inter vere Divinam & Apostolicam & inter traditionem apocrypham. Nec tamen propterea omnes apocryphas traditiones simpliciter rejicit, sed quæ bonæ sunt, illis utitur ad instructionem fidelium, licet eas de fide esse non determinet: sic enim jure Canonico utitur, in quo non omnia de fide sunt.

Ad XXXV. Dist. ult. min. quod de aure in aurem transit, facile alteratur, & deperditur, si nullæ sint causæ ad illius conservationem adjuvantes, conc. min. si sint tales causæ, neg. min. In servandis traditionibus multæ sunt causæ. 1. est specialis Dei providentia, qui Ecclesiam regit, & conservat, *ne portæ inferi prævalent adversus eam*. 2. est cura SS. Patrum, qui in suis scriptis traditiones Christi & Apostolorum mandarunt. 3. est perpetuus ac successionem continuus fidelium usus, in quo ritus Sacramentorum, dies festi, jejuniorum tempora, celebratio Missæ, servantur. 4. Est ipsa hæresis: cum enim singulis sæculis novi oriantur hæretici, qui diversa Ecclesiæ dogmata impugnant, ita semper à Deo suscitantur Viri docti, qui ut hæreticis resistent, doctrinam Ecclesiæ, traditionesque antiquas diligenter investigant, propugnant, & magna diligentia posteris commendant.

Ad XXXVI. Neg. conseq. Equidem fieri potest, ut aliqui hac in parte fallantur: verum huic incommodo opponitur infallibilis universæ Ecclesiæ autoritas, quæ collatione facta ad scripta veterum, & ad successiones Ecclesiarum Apostolicarum errorem detegit, & traditiones falsas rejicit, sicut revera rejectus est ille millenariorum & ætatis Christi error, quem tamen non ex traditione, sed ex Scriptura male intellecta multi tuebantur, nempe ex Apoc. c. 20. v. 4. Et ex illo Joan. c. 8.

Ad XXXVII. Conc. ant. neg. conseq. Quia Christus Judæos ad scripturas remisit, ut eos ex Scripturæ testimoniis de sua Divinitate tanquam fortissimis argumentis convinceret: ex quo



quo minime argui potest, quod præter Scripturam etiam traditiones pro regula fidei admittendæ non sint.

Ad XXXVIII. Eadem est responsio, ac prioris: quia clarissima pro his doctrinis firmandis testimonia expressa in S. Scriptura reperit.

Ad XXXIX. Eadem pariter est responsio.

Ad XL. Neg. ant. quia alias de certitudine Scripturæ non constaret: si enim extaret scriptus codex testificans libros sacros specialiter enumeratos esse canonicos, deberet etiam extare codex alius testificans & hunc esse Canonicum, quo casu certe in infinitum procederetur. Et licet in Humanis certior sit fides scripto quam ore data: sed non in præsentī, cum ita congruum fuerit, ut non omnia scripta essent, sed quædam ab instructione Ecclesiæ peterentur, ita ut ab omnibus suspiciatur Ecclesiæ autoritas, nec quilibet quodlibet credere, aut docere præsumat.

Ad XLI. Dist. ant. est narratio humana à Christo profecta, conc. ant. à puro homine profecta, neg. ant. & conseq. Vel aliter, est narratio humana Ecclesiæ autoritate firmata, quæ in similibus assistente Spiritu S. ab omni errore præservatur, conc. ant. est narratio humana nulla altiori assistentia firmata, neg. ant. & conseq. solutio patet ex terminis.

Ad XLII. Neg. committi circulum vitiosum, quia non probatur idem per idem eodem modo, siquidem aliquam scripturam Divinam dari probatur ex eo, quod Deus nobis suam voluntatem revelare debeat: quod vero hæc sit Scriptura legitima, probatur ex traditionibus.



*Quæsitæ quædam necessaria pro complemento tam ad S.  
Scripturam quam Traditiones pertinentia.*

**Q**Uæritur I. Quid sit sensus Scripturæ? R. Est ejus genuina significatio, sive est res, quam Spiritus S. tanquam Author Scripturæ S. voluit significare per scripturam.

Quæritur 2. Quotuplex sit sensus S. Scripturæ? R. Est duplex, *litteralis*, & *mysticus*. Sensus *litteralis* est ille, quem verba sive proprie, sive metaphorice accepta immediate significant. Ex qua definitione patet, sensum litteralem esse duplicem, *proprium* nempe & *metaphoricum*: *proprius* est ille, quem verba proprie accepta immediate significant, ut in hac propositione: ad Gal. c. 4. v. 22. *Abramam duos filios habuit, unum de ancilla, & unum de libera*. Sensus *litteralis metaphoricus* est ille, quem verba figurate accepta immediate significant, ut cum Christus dicitur *Leo*, *Agnus*, *Vitis*: quia unum dicit verbis, & aliud sub illis intelligitur, nempe sub illis vocibus *Leo*, *Agnus*, *Vitis*, Christi fortitudo, mansuetudo, & fecunditas intelliguntur. Hic

Observandum I. In sensu litterali verba debere significare ex Spiritus S. loquentis intentione, quia ex ea pendet, ut verba vel proprie sumantur, vel metaphorice: ut si quis dicat: *Leo rugiens circumit*: ambiguum est, simpliciterne & ut verba sonant, an vero tropice intelligenda sint, de leone animali, an de dæmone?

Observandum 2. Si metaphora, aut alio tropo sensus aliquis exprimatur, non facit, quo minus sensus ille sit litteralis. Exemplum hujus habetur Matth. c. 16. v. 11. ubi Christus ait: *cavete à fermento Phariseorum*: quod idem est remota metaphora ac cavere à doctrina Phariseorum; sensus enim spiritualis nititur sensu litterali. Neque ullus locus est scripturæ, in quo non etiam ipsa verba aliquid immediate significant: quandoquidem

dem nec mediate quidem aliquid significare possent, nisi mediante re illa, quam immediate significant.

Sensus *Mysticus*, seu spiritualis est ille, qui non proxime per voces, sed mediate & remote, mediantibus scilicet rebus per voces sensu litterali significatis à Spiritu S. indicatur: sic quod in Genesi c. 16. v. 22. & c. 21. v. 12. dicitur de duobus filiis Abrahæ, Apostolus ad Galat. c. 4. in sensu Mystico exponit de duobus testamentis.

Quæritur 3. Quotuplex sit sensus Mysticus? R. Triplex, *Allegoricus*, *Tropologicus*, & *Anagogicus*: sicut enim tres sunt virtutes Theologicæ, fides, spes charitas: ita tres sunt sensus mystici: allegoricus respondet fidei, anagogicus spei, & tropologicus charitati. Sensus *Allegoricus* est rei ad Christum & Ecclesiam militantem pertinentis significatio per aliam rem scripturæ verbis immediate significatam, unde est de rebus credendis. Sensus *Anagogicus* est rei ad Ecclesiam triumphantem pertinentis significatio per aliam rem scripturæ verbis immediate significatam: unde est de rebus sperandis. Sensus *Tropologicus* seu moralis est rei ad morum instructionem significatio per aliam rem scripturæ verbis immediate significatam, unde est de rebus agendis. Quadruplex iste sensus in una voce *Jerusalem* occurrit: nam *litteraliter* significat Urbem Palæstinæ capitalem. *Allegorice* Ecclesiam, *Anagogice* Patriam cælestem: *Tropologice* animam hominis.

Quæritur 4. An sit de fide, Scripturam sub una littera continere plures sensus? R. Affirmative. Nam illud est de fide, quod expresse in Scriptura reperitur: atqui quod Scriptura sub una littera plures sensus contineat, expresse reperitur in ipsa Scriptura: nam historiam litteralem de *Jona*, qui tribus diebus & noctibus tribus extitit in ventre ceti, de se ipso per Allegoriam exponit Christus Joan. c. 3. v. 14. Item quod Exod. c. 12. litteraliter de Agno Paschali scribitur: *Os non com-*

tis ex eo, impletum est in Christo, ut habetur Joan. c. 19. v. 36.

Quæritur 5. An sub iisdem S. Scripturæ verbis, aliquando multiplex sit sensus litteralis? R. Affirmative. Ipsæ S. Scripturæ id innuunt. sic v. g. quod dictum fuit de Israel Oseæ c. 11. v. 1. *Ex Ægypto vocavi filium meum*, id de Christo interpretatur Matthæus c. 2. v. 15. Item illud Psalmistæ: *Dominus dixit ad me, filius meus es tu, ego hodie genui te*, Apost. ad Hebræ. c. 1. exponit de generatione Christi æterna: *Cui Angelorum dixit, filius meus es tu &c.* Quod idem Apost. Act. c. 13. explicat de Resurrectione Christi, *Resuscitans Jesum. Sicut in Psalmo 2. scriptum est, filius meus est tu, ego hodie genui te.* Item illud Isaïæ c. 33. *Generationem ejus quis enarrabit?* à Patribus intelligitur de æterna simul & temporali Christi generatione, utraque enim est ineffabilis.

Quæritur 6. An in quolibet S. Scripturæ textu tam V. quam N. T. reperiatur sensus litteralis? R. Affirmative. Ratio est: quia verba non nude & quoad litteras duntaxat posita sunt, sed semper sensum aliquem à Spiritu S. intentum vel immediate vel mediate reddunt: si mediate, erit sensus spiritualis necessario litteralem præsupponens, ut & S. Th. 1. p. q. 1. a 10. docet. Si vero immediate verba sensum reddunt, sicut revera reddunt, hoc ipso sensus litteralis habebitur.

Quæritur 7. An in quolibet S. Scripturæ textu tam V. quam N. T. præter sensum litteralem contineatur aliquis sensus Mysticus? R. 1. In V. T. in plurimis sed non in omnibus reperiri & contineri; docet enim S. P. Aug. q. 2. super Genesim: *In quibusdam locis solus sensus litteralis quærendus.* Quis enim sensus Mysticus quærendus in his textibus: *Diliges Dominum Deum tuum ex toto corde tuo. Non occides, non furtum facies &c.* Ergo concludit D. Epiph. lib. 2. Hæref. 61. *Non omnia habent verba Divina opus allegoria, sed prout se habent, accipienda sunt.* R. 2. Id ipsum de N. T.

Quæ-

Quæritur 8. Quid sit sensus *accomodatitius*? R. Est ille, quo verba S. Scripturæ ad significandum aliquid à Theologo, Concionatore, aut Interprete accomodantur, quod Spiritus S. per ea nec mediate nec immediate significare voluit, ut v.g. si quis bella & persecutiones, quibus olim Israelitæ agitati fuerunt, trahat ad persecutiones, quas à Tyrannis & Hæreticis passa est Ecclesia Catholica: ex quo patet, sensum hunc non esse sensum S. Scripturæ, sed sensum illius, qui verbis S. Scripturæ utitur ad significandum aliquid, quod iis significare non voluit Spiritus S.

Quæritur 9. Quid sit sensus *Parabolicus*? R. Est ille, quo aliquid dicitur, & aliud per quandam comparisonem intelligitur; sicut dum brachium Dei pro ipsius potestate & fortitudine sumitur. In parabolis ergo duæ sunt partes: 1. Quæ continet rem, quæ in similitudinem affertur. 2. Quæ applicationem continet, & utraque suum habet sensum litteralem.

Quæritur 10. Ex quo sensu S. Scripturæ Theologus certa & firma possit deducere argumenta? R. 1. Ex sensu litterali semper Theologus firma & certa potest deducere argumenta. Ratio est: quia ex illo Scripturæ sensu semper firmum eruitur Argumentum, qui est sensus à Spiritu S. intentus: sed talis est sensus litteralis: ergo.

Ref. 2. Etiam ex sensu Mystico, si aut ab Ecclesia proponatur, aut scripta & Traditionis autoritate nitatur, aut ex ipsa textus sacri serie colligatur: secus non. Ratio est *1<sup>mi</sup>* quia tunc certum est, illum sensum mysticum à Spiritu S. fuisse intentum. Ratio *2<sup>di</sup>* est: quia tunc pro suo quisque ingenio ac pietate sensum cudit mysticum.

Ref. 3. Ex sensu accomodatitio nunquam. Ratio est: quia hic sensus nec à Spiritu S. intentus est, nec Spiritum S. ut Authorem respicit, sed à quolibet interprete pro ingenii sui dexteritate S. Scripturæ accomodatur.



Moderni Sectarii quosvis sensus mysticos tanquam nugas & insanias derident, & solum sensum litteralem admittunt: dicunt enim 1. fundamentum fidei oportet esse certum, quales non sunt sensus mystici, hi enim sunt varii & incerti: ast ad hoc patet responsio ex superius posita *R.* 2da. Dicunt 2. Ipsimet Doctores Pontificii fatentur ex mystico sensu non peti firmum argumentum. At & ad hoc patet responsio ex mox dicta *R.* 2da. Dicunt 3. Varietas, & pluralitas sensuum parit æquivocationem, quæ vim argumenti minuit. Ast dicendum, verba æquivoca vim argumentationis minime impedire, si modo determinate constet, quo sensu illa usurpentur.

Errori huic consentit Apologia Confessionis Augustanæ Tit. de sacrificio Missæ, ubi dicitur: *Allegoriæ non pariunt firmas probationes.* Interim tam Calvinistæ alyque Sectary: quam Lutherani parum memores hujus suæ doctrinæ, quando de Pontifice agendum est, perpetuis iisque plerumque ineptissimis Allegorys ex Daniele & Apocalypsi petitis, convincere se posse temere existimant, Romanum Pontificem esse Antichristum.

Hactenus de varietate sensuum Scripturæ egimus! quibus solum breviter addendum, nullum sensum S. Scripturæ, quem Novatores contra doctrinam ac fidem Romano - Catholicæ Ecclesiæ afferunt, esse legitimum. Ratio est: quia nec S. Scripturæ habent versionem legitimam, ex qua sensus ille eruatur: nec testimonia Patrum ex primis quinque Sæculis, quibus idem sensus comprobetur: quæ duo fundamenta ad probandum aliquod dogma fidei ipsi unice admittunt.

Jam Quæritur 11. An detur regula, per quam legitimæ traditiones ab illegitimis dignoscantur? *R.* Affirmative, & hæc regula est in judicio, & Authoritate Ecclesiæ Romano - Catholicæ sita. Ratio est: quia Ecclesiæ Catholicæ infallibiliter constat de una traditione legitima, ut ipsi Adversarii consentientur in colloquio Ratisbon. supra citato, nempe hosce libros esse S. Scri

Scripturam : de qua etiam Martinus Kemnitius in exam. Trid. Sess. 4. Sic ait: *Hanc Traditionem, qua nobis in manum dantur S. Scripturæ Libri, reverenter accipimus.* Cur ergo eidem constare infallibiliter nequeat de aliis quibusvis traditionibus, cum eadem via & ratio discernendi ad omnes æque suppetat? Et si Ecclesia est infallibilis in una Traditione ad posteros propaganda, cur non in omnibus? Certe Apostolus 1. ad Tim. c. 3. v. 15. non limitate, sed absolute illam vocat *columnam & firmamentum veritatis.* Ipse etiam Lutherus in omnibus illam infallibilem agnoscit Tom. 7. fol. 562. Germ. sic scribens: *Ecclesia nec debet, nec potest mentiri, nec errores docere ne in minimis quidem, cum Deus sit Os Ecclesiæ, & Deus mentiri non possit, sic etiam Ecclesia nequit.* Sed vel maxime S. P. August. lib. de utilit. credendi c. 14. disertè docet, eandem Ecclesiæ auctoritatem sufficere generatim ad discernendas Traditiones legitimas ab illegitimis.

Quæritur 12. Quot sint regulæ, quibus Traditiones Divinæ Secerni possint à Traditionibus pure Apostolicis? R. Plures assignari, quæ tamen ad quatuor recte revocantur: non quidem quod una Triditio ex una harum regularum, & alia ex aliis dignoscatur (constant enim fere omnes ex illis omnibus) sed quod singulæ illarum regularum sufficiant ad quamlibet Apostolicam Traditionem deprehendendam.

Prima igitur est: Si quod fidei Dogma Patres ab initio secundum suorum temporum successionem concordissime tenuerunt, ejusque contrarium ut hæreticum refutarunt, nec tamen in scripturis Divinis reperitur, illud est traditionis Divinæ, quia omnia dogmata fidei habemus ex Divina revelatione. Hujusmodi sunt Virginitas perpetua Deiparæ etiam post partum: quidquid pertinet ad materiam & formam Sacramentorum saltem in genere, &c.

*Secunda* est: Si quidquam est nunc in Ecclesia communi fidelium consensione probatum, quod humanam excedit potestatem, illud est traditionis Divinæ: talis est praxis v. g. vota dissolvendi, remittendi juramenta, matrimonii rati per solemnem Religionis professionem dirimendi &c. Cum enim illa omnia jure naturæ stent, eorum dissolutio non potest esse juris humani.

*Tertia* est: Si Ss. Patres in aliquam traditionem unanimiter consentiant, eamque Divinam esse doceant, tenendum est hanc esse Traditionem Divinam, etiamsi materia illius non excedat potestatem Apostolorum & Ecclesiæ: Secus si solum ut institutionem Apostolicam vel Ecclesiasticam tradiderint. Rationis est, quia si communiter deciperentur Ss. Patres, qui sunt Ecclesiæ Doctores & Magistri, necessario deciperetur tota Ecclesia, quæ tamen ex Divina promissione est infallibilis.

*Quarta* est: Quando aliqui Patres in hanc Traditionem non consentiunt (ut accidit in traditione de non rebaptizandis hæreticis, cui S. Cyprianus cum nonnullis Africanis contradixit) judicandum est eam Traditionem esse Divinam, quæ reperitur in præcipua sola Ecclesia Romana, in qua interrupta non fuit Pontificum Successio.

Quæritur 13. Ubi depositæ sint, & custodiantur Traditiones Divinæ. R. Apud Ecclesiam Romano-Catholicam. Ita D. Paulus 1. ad Tim. c. 6. v. 20. Item 2. ad Tim. c. 1. v. 13. & 14. Id diserte affirmant, S. Irenæus lib. 3. advers. Hæreses c. 3. Tertull. lib. de præscript. c. 21.

Quæritur 14. Quomodo Sacræ Traditiones non scriptæ à tot Sæculis incorruptæ custodiri potuerint, & custodiri possint deinceps usque ad consummationem sæculi? R. Id fieri potuisse, & posse citra omnem difficultatem. Nam si potuit doctrina veræ Religionis sine scripto custodiri ab Adamo usque ad Moysen, potuit profecto etiam custodiri à Moyse usque ad Chri-

Christum, potuit & à Christo usque ad nos, & à nobis usque ad consummationem sæculi: ex nulla alia ratione, quam ex illarum usu frequenti, & quotidiano: sic frequentantur quotidie ferme septem Sacramenta adhibita certa materia & forma, variisque in administrando ritibus: oratur quotidie: offeruntur suffragia pro defunctis: invocantur, & coluntur Sancti: reliquiis deferitur veneratio: offertur Missæ Sacrificium: adoratur Eucharistia: observantur jejunia &c. Ergo.

Quæritur 15. Quæ Traditiones mutari, vel abrogari possint? R. Divinæ, & à Christo Authore profectæ nullo modo, bene autem pure Apostolicæ disciplinam spectantes, sicut & Ecclesiasticæ, quales reipsa quam plurimæ pro temporum exigentia mutatæ sunt. Ratio primi est: quia Verbum Dei mutari non potest. Traditiones autem Divinæ nil aliud sunt, quam Verbum Dei non scriptum sed traditum: ergo. Ratio secundi est: quia Traditiones pure Apostolicæ, hoc est, ab Apostolis ut Pastoribus ortæ non excedunt jus & potestatem Ecclesiæ: ergo. Sic abrogata est traditio Apostolica, quæ habetur Act. c. 15. v. 28. abstinencia à sanguine, & suffocato: consuetudo de trina immersione in baptismo servanda: consuetudo de quotidiana laicorum communione peracta consecratione facienda: usus poenitentiae publicæ, &c. Ergo.

Dices 1. Traditiones Apostolicæ sunt juris Divini: ergo per Ecclesiam abrogari nequeunt. R. dist. ant. traditiones Apostolicæ à Christo Authore, vel Spiritu S. Apostolis revelatæ, & ab Apostolis ad nos transfusæ, quæ sunt traditiones solum denominative Apostolicæ, Conc. ant. Traditiones pure Apostolicæ ab Apostolis ut Ecclesiæ rectoribus profectæ, neg. ant. & conseq.

Dices 2. Traditiones Ecclesiasticæ sunt juris Divini: ergo & pure Apostolicæ. ant. prob. qui respueret traditiones Ecclesia-

clesiasticas; haberetur pro hæretico: ergo. R. neg. ant. ad prob. dicendum, talem non ideo præcise, quia traditionem talem negaret, censendum fore hæreticum formaliter, sed tantum illative & præsumptive, quia de tali negante traditionem recte præsumi potest, quod simul illud fidei dogma negaret, quo scilicet Ecclesiam leges condendi potestatem habere credimus.

Hæc omnia cedant ad Majorem Dei Gloriam, B. V. M. Honorem, S. P. Augustini Venerationem, & Romano - Catholicæ Ecclesiæ subjectionem, & Correctionem.

